

سراشیکی ناول

ادھ اور ادھ

محمد حفیظ خان

آوہ اوہورے لوک

ناول

محمد حفیظ خان

نائلہ ناز لعلوانی

ایم فل سکالر (سرائیکی)

سرائیکی ایریاء سٹڈی سنٹر ملتان

وقار اسلم بھٹی

ایم فل سکالر (سرائیکی)

سرائیکی ایریاء سٹڈی سنٹر ملتان

0306-1446635

آدھ آدھو رے لوک

سرائیکی ناول

محمد حفیظ خان

یکے از مطبوعات

ملتان انسٹی ٹیوٹ آف پالیسی اینڈ ریسرچ ملتان

Saraiki Novel
"Adh Adhorey Lok"

by

Muhammad Hafeez Khan
(Tamgah e Imtiaz)

April 2018

Price: Rs.350

Published by
Multan Institute of Policy and Research
62-B, Sakhi Sultan Colony Multan

Printed by: BPH Printers, Lahore

ISBN: 978-969-9782-16-9

سرائیکی ناول

آدھ آدھو رے لوک .

محمد حفیظ خان (تمغہ امتیاز)

اپریل 2018

قیمت: تین سو پچاس روپے

ملتان انسٹی ٹیوٹ آف پالیسی اینڈ ریسرچ

62-B نئی سلطان کالونی ملتان
raihafeezkhan@gmail.com

ايس ناول دے

اھري

خالد فتح محمد

دے ناں

اے ناول فرضی کردار اے واقعات دے ذریعے حقیقی تاریخی تناظر وچ لکھیا گئے

(1)

اے احمد پوری عجیب شہر ہے، اتھوں دے ریلوے اسٹیشن داناں تاں دیرہ نواب صاحب پر دیرہ نواب صاحب اتھوں ترائے میل پرے ہے۔ اسٹیشن اتے اصلی دیرے دے درمیان پہلے احمد پور شہر آندے، وَل نواب صاحب دی فوج دی چھاوئی تے چھاوئی توں بعد دیرہ نواب دی حد شروع تھی ویندی ہے جیندے نکلے جیسے بازار دے کعبے پاسے صادق گڑھ پیلس دی عالی شان عمارت ہے تے سچے پاسے ریاستی دفتراں دے وڈے افسراں دے گھر ہن۔ صادق گڑھ پیلس، نواب بہاول پور دارہائشی محل جیڑھا چارے پاسوں دیہہ دیہہ فٹ اُچیاں کندھاں دے سبب پینتری فٹ اُچے مرکزی دروازے دے اندروں ہک چٹی عمارت دی صورت وچ نظر دے جیڑھی گھائے گھائے ساوے کچھوچ درختاں وچوں کتھاؤں لگی ہوئی تے کتھاؤں وَل وَل جہات پیندی اے۔ مرکزی دروازے توں چٹی عمارت توڑیں ہک فرلانگ لمبی سڑک ہے جیندے ڈوہیں پاسوں سرؤ دے اُچے اُچے بوٹیاں دی قطار اے تے ایں قطار وچ ہکو جتی وتھ تے ٹینشن کھڑے

ہوئے نواب صاحب دے باڈی گارڈ پہرے تے ہن۔ گاڈرجیڈے لمبے تے وڈیاں
 وڈیاں واٹوایاں مچھاں والے اے چوہے نیگرنواب صاحب دی آپڑیاں چون تے رکھے گئیں
 جہاں وچ اکثریت محل دے نیڑے دی وستی محراب والے دے لشاری بلوچاں دی ہے۔
 محل دے سجھ اُبھار والے پاسوں دی کندھ ونج وینڈڑ ہئی، بھل ہوسی کوئی ڈوں
 میل لمبائیں جیندے اُتے ہر پنجاہ فٹ توں بعد برجیاں تے ہر بُرجی وچ پہرے اُتے پک
 سنتری تے سنتری کول تلوار دے نال نال توڑے والی بندوق جیندے نال فائر کرن کیتے
 کپڑے دی واٹوایاں تھکڑی کول بھاء لاکراہیں کجھ دیر توڑیاں بندوق چلن دا انتظار کرینداتے
 ایں دوران جے دشمن سر تے چُج ونجے تاں ول بندوق سٹ تے تلوار توں کم گھنیںد اہا۔ لیکن
 بُرجیاں وچ موجود اناں سنتریاں دی زندگی وچ نہ تاں بندوق چلاون دی نوبت آئی تے نہ
 تلوار دی۔ کیوں جو ریاست بہاول پور دا امن امان پورے ہند سندھ وچ مشہور ہا۔ نہ تاں
 کہیں نے پک عرصے توں ریاست تے چڑھ مار کیتی تے نہ نواب صاحب دامزاج حملہ
 آوری والا ہا۔ پوری ریاست وچ اسکول، کالج اتے ہسپتال بنڑوائے۔ ہر شہر دا آپڑاں پاور
 ہاؤس لہذا بجلی وافر اُتے نہری نظام تے گراڑے کنٹرول نال زراعت سودھی تے اجناس
 ماندی ای نہ ہئی۔ نہ چوری چکاری تے نہ کوئی قتل یا ڈاکہ۔ سزیندا ہا جو پکس دے ہتھیاراں
 کول ول زنگال لگ ویندا جیکوں ول ول لہا ونزاں پوند اہا۔

اے جولائی 1947ء دی کوئی اُکرس ماری شام ہئی۔ کمیٹی دا ہر کارہ مونڈھے
 تے پوڑی لڈکراہیں پک ہتھ وچ مٹی دے تیل دا پیا وٹھی تے گلیاں محلیاں وچوں تھیندا ہویا
 دیرے دی بزار وچ تقریباً ویہہ ویہہ فٹ دے فاصلے تے پورے ہوئے لکڑ دے تھمبیاں
 وچ ٹھوکویں وڈے لالیناں دے شیشے صاف کرن توں بعد اُناں وچ مٹی دا تیل بھرتے
 بلیندا ودا ہا جو اندھارا تھیں توں بعد وی اندھارا نہ راہوے۔ ایویں سویرے فجر دی اذان

توں پہلے لائین و سماون وی ہوندی ذمے واری ہئی۔ اوڈے صادق گڑھ پیلے دیاں اُچیاں
 کندھاں تے لگے ہوئے شیشے والے لیمپ وی بل گئے پر ایندے باوجود عجیب جیہا اندھارا
 اندھارا ہا۔ وادھو نے آپڑیں لونی تیلی دی دوکان بند کریندے ہویاں دھچر دھوبی کو ہکل
 ماری۔

”اویار..... لگدے بکروال جھڑو چا آندے۔“

”ساون ہے تاں بکروال وی آسی، کیہڑی انوکھڑی گالہہ ہے۔“..... دھچر نے
 وادھوکوں ولدی ہکل ڈتی۔ اتنی دیروچ وادھو دوکان دے در بھیر کراہیں دھچر کول آ بیٹھا
 جیڑھا جو تکھے تکھے دوکان دے اگوں لاتھے استری والے پھٹے تے اُن دھوتے کپڑیاں دے
 بنگ کوں اندر ڈو دھکیںدا پیا ہا۔

”گالہہ چھڑی بکروال جھڑو دی کائنی، اے تاں آسی تے ڈوں چار پھینگاں پانی
 دیاں چھنڈک تے کھنڈ پُنڈ ویسی، اصل گالہہ تاں ایس رو لے دی ہے جو ریاست کتھاں
 ویسی۔ نویں ملک پاکستان نال رلی یا پہلے آلی کار ہندوستان وچ راہسی۔“ دھچر دے اُلاون
 وچ زچکائی ہئی۔

”یار! تیکوں ساکوں کیا، بہاول پور پاکستان نال رلے یا ہندوستان نال، میں
 ایویں لونی تیلی کرنی ہے تے توں لوکاں دیاں میلاں دھونڈیں نی۔ اے رولا کہیں واسطے ہے
 تاں ایس بھین دے بھنڈو یے حکیم رام لعل کہیتے۔ اے جیڑھی چار چو باریاں اُچی ماڑی
 بنزائی بیٹھے ناں، اتھائیں چھوڑ تے بھجڑاں پوسس۔“ وادھو سڑک دے اُوں پار حکیم رام
 لعل دی دوکان ڈوڈیدھے ہوئے تھوڑے جیسے اُچے بلارے نال اُلاٹراں جیڑھی جو ہالی
 توڑیں وی مریضاں نال بھری پئی ہئی۔

دھچر وبل تے کھنگوریا ماریا..... ”ہولے بول یار، کوئی سنڈی تاں کیا اکھسی،

ہالی پاکستان کتھوں پیا بنڑ دے۔ چنگا جی ہے شودا حکیم وی، گھر بھادیں جو احمد پور ہس پر خدمت پورے دیرے دی کریندے، ہر ویلے حاضر تے نہ کوئی لو بھتے نہ کوئی لالچ۔ ہتھ وچ شفا تاں اخیر ہے۔“

”پر ہے تاں کراڑ.... شفا کوں اساں گھول پیو نڑیں۔“ وادھو نے خندق نال سر کوں چھنڈ کیا تے ول یکدم انداز بدل تے ہولے ہولے من من کیش....

”یار دچھر! سُنو یں نہرو آپڑیں بھین بھجیندے آپے دو لہے صادق سیں کول۔“

”ونج ونج.... نہرو دا باقی من ایہو کم رہ گئے۔“.... دچھر سامان سانجھ کراہیں دوکان دی در سال دی جھری وچ دردے بھٹے پکیند اپیا ہا۔

”پوری گالہ تاں سُن.... اُج نبی بخش خدمت گار آیا ہامیڈے کول، اوہو آدھا پیا ہا جو کوئی لکشمی ہے نہرو دی بھین، دو لہے سیں کول ملن آندی پئی ہے جو ریاست کول ہندوستان نال ای راہون ڈتا ونجے.... پاکستان نال رل تے کیا ملسی.... نواں ملک تے بکھا ملک.... جناح صاحب کول تاں ملازماں کول تنخواہیں ڈیون دے پیسے دی کوننا ہو سن، ملک کتھوں چلیسی۔“ وادھو االا گجھ اچیرا تھی گیا ہا۔

یکدم زور دی گاج دی آواز آئی، کتھائیں بجلی ڈھکی ہی تے نال ای مینہ دی درھے پھا شروع تھی گئی۔

”اُجھونج گیو سے گھر۔“.... دچھر طنزاً آپڑیں آپ نال االایا تے سُن توں بچن کیے دوکان دے اگلے چھپردی اوٹ وچ تھی گیا۔ ”یار ایویں خواجواہ دیاں گالہیں وچ لو اچھوڑی.... نکلی کول بخار ہاتے بھر جائی تیڈی پنڑ دی بیٹھی ہو سی۔“

”اے رنیں دا کیا ہے، اناں خوش نی تھیونڑاں ہوندا بے شک تھئے لوک کھڑو.... ایں گالہوں بھرا بیج تے اپنی کیتی کر....“ وادھو ڈھڈھے مینہ دے پانی وچ ہتھ اڈ

تے منہ تے چھنڈے مارن لگ پیا۔

”اُودا دھویار..... رناں توں بغیر ای گھر نی وسدے، رُل ویندن“

وادھو ٹھڈا ساہ بھرتے پیراں دے بھرنے بہہ تھیا..... ”میڈی رن وی بھجائی
طرحاں سوہنی ہووے ہا، پتر جی بیٹھی ہووے ہاتاں ول میں وی اوندی تانگھ وچ ٹھڈے
ٹکارے بھراں ہا۔“

”ٹھڈے ٹکارے تاں توں وی بھریندیں پر ڈسیندا نؤی، میسا ہئیں پورا۔“
دھجروی زچکائی چھوڑ مینہ دی جس چا ون لگ پیا۔ ”اچھا..... اے تاں دس جو اومائی لکشمی
آندی کڈن پئی اے“.....

وادھو نے زور دا خچکا ماریا..... ”یار اومائی لکشمی جانڑیں یا ساڈا صادق جانڑیں،
میکوں کیا پتہ“.....

”یار وادھو! میکوں تاں اے کوئی چکر لگدے۔“ دھجرونے بارش رکن دی تانگھ وچ
گاہہ بدن دی کوشش کیتی۔

”چکر کیا ہے، بس آپ تڑاپی ہے۔ ریاست بہاول پور دلی کنوں لاتے ملتان
توڑیں ایڈے وڈے علاقے دی آدھل اے۔ ریاست رلدی اے ہندوستان نال تاں
پاکستان دے پکے کجھ نی بچداتے جے رلدی ہے پاکستان نال تاں ایوں سمجھ جو نہرو کوں ہاں
والا ہتھ پوسی آ۔ اے بیکانیر تے جیسلمیر لگھ کنوں وی ہولے ہون بہاول پور توں بغیر۔ ایں
گاہوں ہر کوئی چاہندے جو آساں دھرو گھنوں بہاول پور کوں۔“ گاہہ مُکا وادھو لمبا ساہ
چھلکيا۔

”میڈی گاہہ دا جواب نوی ڈتا۔“ دھجرونے زچکائی نال الانزاں
”ہُن میکوں نی جو پتہ کڈاں ڈھکے بی بی لکشمی دوہے سیں کول تاں جواب کیا

ڈیواں۔ جی میکوں پتہ ہاڈس چھوڑم۔“ وادھو دے آلا وچ دی زچکائی آگئی۔ مینہ وی مٹھا
تھیندا تھیندا اولدا چوکھیرا تھی گیا ہا۔ وادھو ڈوہیں ہتھاں نال سر پکڑ کراہیں ولدا پیراں دے
بھرنے نٹھ بیٹھا۔ ”یار نراض نہ تھیویں، سارے ڈینہہ دی دکانداری نے تاں جیڑھا چیتا پیتا
سوچتا اے مینہ وی انج رولی کھڑے۔ اگوں گھر دیسوں تاں ولدا اوہو ہکو سوال جو کہیں حکیم
کوں ڈکھاؤ ہا تاں شایت کوئی بال بچہ تھی پوئے۔“ وادھو دامنہ، بُتھاڑ بن تے کجھ بیاوی
ڈھلا تھی گیا ہا۔

”یارتیکوں کئی دفعہ تاں آکھے جو حکیم رام لعل کوں ڈکھا، کئی بے اولاد داں دی اولاد
تھی گئی اے، پرتوں تاں اصلوں قسم چاتی ہوئی اے نہ ڈکھاؤن دی۔“ دچھر موقع ڈیکھتے
ولدا شروع تھی گیا۔

”میں او ترک تاں مردیاں پرایں کراڑ کوں ہتھ کاٹنا ڈکھیاں۔“ وادھو کوڑتج
تے اُنھی کھڑا تھیا۔

دچھر کھل پیا تے وادھو دے مونڈھے تے ہتھ رکھتے آکھیں ”یار نہ تاں دوا
دار ودا کوئی مذہب ہوندے تے نہ حکیم دا۔ دوا، دوا ہوندی اے تے حکیم، حکیم“

”آپڑیاں جتھاں آپڑیں کول رکھ۔ ہر شے داندہب ہوندے، دوا داوی تے حکیم دا
وی۔ حلال حرام دا فرق ہوندے تے توں میڈے ایمان دی پاڑ نہ پٹ، کہیں بے دے سر
ونج تھی۔“ وادھو نے ستلی دی خالی بوری دی گتھلی بنڑاتے سرتے رکھی تے وسدے مینہ
، چچ گھر ڈوڑ پیا۔



(2)

”بئے کھاناں جندے، بئے کھا، جندے پکھی کھاسوتاں وَل اے کجھ تاں
 تھیسے“۔ حکیم رام لعل دیرے نواب دے وڈے بازاردی آدھل وچ آپڑیں دکان تے بیٹھا
 پردے دی اُوٹ وچ پروبھری بیٹھی زنانی دی وینی اُتے نبض آلی جاتے ڈوں انگلیں رکھ
 کراہیں بیماری تاں کجھی بیٹھا ہا پر ہُن خود زنانی کنوں اوندی تصدیق چاہندا پیا ہا۔ زنانی دی
 خموشی تے بجائے رنج تھیون دے اُلٹا کھل پیا۔

”ڈسیندی نی جو گھر آلا ویسے مار آیا ہاتے او ہے کھا دِن“۔ زنانی کجھ وی نہ بولی
 تے شرم کنوں ہی وی سنگڑ گئی پراوندی چُپ تے سنگڑن توں لگدا پیا ہا جو حکیم صاحب دی گالہہ
 ای سچ ہے۔

”جندیاں دا ایڈا گوشت کھاسوتاں ڈھڈالو ایسی ضرور تے ہُن ڈھڈالو ای کھڑے
 تاں دواوی کھاتے درد کوں وی چکا، اچھو جھنب ویسی آ“۔ حکیم نے پرچی تے دوا لکھ تے
 نکلے کوں بنڑوان کیسے ڈتی تے تندیر وچ بیٹھی ڈو جھی زنانی کو اُلوایا ”ہاں بی بی، وینی

اگوں کر۔

حکیم رام لعل سٹھیکا لنگھ کراہیں بیاٹھ تر یاٹھ سالاں دا تھی گیا ہئی۔ احمد پور داجم
 پل کئی پختاں توں تے پیشہ ایہو ہکو حکمت۔ سویرے سویرے دیرے نواب دی بازار وچ
 آپڑیں مطب تے باہندا تاں رات تھی ویندی پر لوکیں دارش اتجھا جو گھٹن کوں نہ آندا۔ تخت
 پوش تے بہہ کراہیں ہک پاسوں بواناں دی قطارتے ڈوجھے پاسوں زنانیاں دی تے ادھ
 وچ کپڑا اڈیا ہويا۔ تخت پوش دے چارے پاسوں نکڑے خدمت گار، نسخے دی پرچی
 وٹھیندے، سدھا دوا آلے چھوٹے حکیم کول جیڑھا نسخہ پڑھ کراہیں پڑیاں بنڑاتے نال
 دے نال مریضاں کوں ٹوری رکھیندا۔ حکیم رام لعل کول دوا دی ہئی تے شفا دی پر آپڑیں
 مونہوں دھیلا نہ منکدا۔ کہیں ڈے ڈاتاں سر اکھیں تے نہ تاں پرواہ کانتی۔ ایندے باوجود
 سارے ڈینہہ وچ اتنا کما گھندا جو آپڑیں گزران دے نال نال کئی ٹھکیاں دا بار اچائی کھڑا
 ہئی۔

حکیم رام لعل دا گھر احمد پور دے ہاتھی بزار دے نال دی گلی وچ ہا جیڑھی مڑھی ڈو
 ویندی ہئی۔ ڈوں منزلہ مکان تے چھی کمرے۔ چھوٹ جیہا دلان تے دلان دے اگوں نکلی
 جہی پوچویں رسوئی جتھ نیلے ساوے تے رتے رنگ دے نکلے لگے ہوئے جہاں
 وچ کچھ نکلے دھوپ سندور دے وی ہن برکت، بخت تے بہتری کیے۔ حکیم دے گھر دے
 چھی کمریاں وچوں ہک تلواں کمرہ اوندی بڈھی ماء دا ہا جیڑھی کڈن دی جھوک لڈا گئی ہئی،
 ڈوجھا اوندا آپڑاں اتے تر جھا مہماناں کیے ہاتے اتلی منزل تے ہک اوندی دھی ٹلسی دا،
 ہک وچ ٹرنک بسترے تے باقی دے تر جھے وچ اوندی ڈال داٹکا نہ ہئی۔ گھر آون والے
 مریضاں کوں حکیم صاحب اکثر مہماناں آلے کمرے وچ ڈیکھد اجیندا جو ہک دروازہ گلی
 ڈو گھلدا ہئی۔

تلسی حکیم دی وڈی دھی، ہوسی کوئی ویہہ اکویہہ سالاں دی، املک ملوک تے
 گردلی، قد چھیکواں، رنگ صاف، آگا پیچھا ماسلاتے نور وچ چھمک طرحاں دی لچک تے
 مستی۔ حکیم دی ذال اٹھے ویلے ہلکیندی راہندی جو پیچھا چادر وچ گج تے ٹری کرتے جے
 کھڑی کرتاں وی منہ سامیں تھی کراہیں جو مرد ذات دی دیدا کیا اعتبار، زرا اندھپ تے
 اصولوں لندھیا۔ پرتلسی کے توڑیں آپڑاں آپ کچیدی، انگ انگ وچ جوانی کڑکارے
 مارے تاں کوئی کیویں رتھ دھیمیں دھیمیں ٹورے، پیراں وچ آپ کنوں آپے سپرنگ لگ
 ویندن تے نینگرا یویں ٹولیاں مارڈدی ہے جیویں تکھی ہو وچ گڈی لوڈے کھا کھائی توں
 بی تہد منگدی اے۔ تلسی گھر دے کمیں کاریں وچ تاں ول وی ایڈے اڈوں چادر ویرھی
 وڈی راہوے ہا پر جنیں ویلے دھڑ دھڑ کریندی پوڑیاں چڑھدی تاں وڈے گھیردی چادر
 دی اوند اپیچھا کج وچ تھولی پئے ویندی۔

تلسی پنج جماعتاں تاں محلہ پھلو رام دے زمانے اسکول توں پڑھیاں تے
 چھویں دا آجن اُدھ ہا جو اسکول توں اٹھا گھدی گئی۔ گالہہ اے ناں ہئی جو چٹ ہئی،
 اعتراض اوندے ہوون والے سوہرے سوڈھی مل کوں ہا جو چھوہریں سانگے پنج جماعتاں
 کافی ہوندن، اگوں تے پڑھسے تاں ول ایکوں جھلیسے کون کیوں جو اوند امنگیند او شنوداس
 تاں اصولوں لکن ہا۔ ہوندے دا پتہ تے نہ ناں ہوندے دا۔ منگنی نکلے لا ایں گالہوں تھی گئی جو
 سکامات ہاتے ماسی کوں انکار کون کریندا۔ وشنو بھایں جو سولہاں ستارہاں سالاں دا تھی
 گیا ہا پر ماء دے مرن توڑیں سمد اماء نال ہا۔ غضب دا ڈرو، نیندرو وچ وی ڈرا کلا خواب ڈیکھ
 کراہیں چیرکاں نکل ویندیاں ہن۔ سکول دامنہ تاں کیا ڈیکھداں ہا، ڈاہ یاراں سالاں دی
 عمراں وچ ای پیودی لونی تیلی دی ہئی تے جوبیٹھا۔ چھی ست سالاں دی محنت توں بعد ایں
 جو گاتھی گیا جو اے دی غیر موجودگی وچ کم کوں ریڑھ سکے۔ ریڑھن ایں سانگے جو ہک

ڈھلڈ چھو ہر جیکوں کہیں دی گاہہ وی دیر نال سمجھ آندی ہئی ایس توں سوا بیا کر کیا سکدا ہا جو
جھٹ گھڑی کم ٹوری رکھے نہ تاں دکان بند کرنی پوندی ہئی۔ محلے دے چھو ہر چھٹکر وی تانگھ
رکھیندے ہن جو کھڑے ویلے ہئی تے وشنو باہوے تے اداو کوں ٹکا ٹکا تے غاپے
لاؤن۔ ایس واردات دی کھو کردوا وشنودے پوکوں تھئی تاں اداو کلبے کلبے پتر دے مستقبل
کنوں مایوس تھی کراہیں بہوں زور دی حاجت ویلے وی بس آون ونجن کریندا۔ ایندے
باوجود جو وشنوللن کہیں کم دانہ ہا، اداو کوں یقین ہا جو حکیم رام لعل دی دھی نال شادی دی صورت
ونج گھٹو گھٹ ایذا اچھ ضرور مل پوسی جو باقی دی حیاتی کیتے اوندی روٹی مانی دی فکرتوں
جان چھٹ ویسی۔ سوڈھی دی کوشش تاں پوری ہئی جو تلسی جھٹو جھٹ اوندی نو نہ بن کراہیں
اوندے گھر آن باہوے پر مسئلہ اے ہا جو وشنوتلسی کنوں پورے پنج سال چھوٹا تے اوندے
سامنڑیں نکڑا لگدا ہا۔ ایندے باوجود سوڈھی مل کئی دفعہ کوشش کیتی جو تلسی دامکلا وادھئی ونجے
پر حکیم صاحب ہر واری نال ویندا جو وشنو ہالی ایس جو گانی تھیا جو گھرتے گھر آلی کوں سنبھال
سگے یا اناں دی سندھ لہہ سگے۔

ڈوجھے پاسے تلسی کیتے وی اے سانگا اتجھا اُن بھاندا گراں ہا جیکوں نہ اُونگل
سکدی ہئی تے نہ اُگل، چھڑی اُبتے کریندی ودی ہئی۔ جنیں ویلے کڈہائیں وشنو اوندے
گھر آندا تاں تلسی سارے در و لاتے کوٹھے دی چھت تے چڑھ ویندی تے پڑچھتی ونج
لگ کراہیں اُتھاں لا تھیاں پر انیاں بے کار چیزاں کوں ولدے سروں نکھیرن بہہ راہندی۔
وشنو اداو کوں کہیں پاسوں وی جو آن نہ لگدا ہا۔ اداو کوں اوندے کیتے نکڑا جیہا ہک چھو ہر ہا،
جیندے ونج تیزی تے نہ طراری ہتھوں آلس دی پنڈ۔ تلسی کوں رہ رہ کاوڑ چڑھدی جو ماسی
آخراو کوں جمایا کیوں۔ جے جم ای پیا ہا تاں ول ضروری ہا جو اوندے متھے ماریا ونجے۔
جو آن تاں اداو کوں آپڑاں پیو وی نہ لگدا ہا۔ سُنو دی ہئی جو اوند اپو بہوں وڈا حکیم ہے پر اتجھا

حکیم کبھڑے کم داجیز ہا آپڑیں زنانی دی طبیعت وی ٹھیک نہ کر سکے۔ ایویں خواہ مخواہ چڑی گھنٹے اُبلدی و دی راہندی تے پئے کوں گھر وڑدے سارای سنگھاں تے چا گھندی۔ تلسی کوں کاوڑ لگدی جو اے کجھا جو آن اے جیز ہا و لداسیکا ڈیون دی بجائے آپڑیں کوٹھے وچ لُک باہندے۔ تلسی کوں ایں گالہہ دی سمجھ وی نہ آندی ہئی جو اوند امار سوڈھی جنیں ویلے وی اُناں دی دَرسال لنگھدے اوندی مادی کاوڑ پتہ نی کینتے وان وٹیندی ویندی ہے تے اُمرا دیاں کھلاں آپ کنوں آپے گلہاں توں سمدن و دیاں۔ سمجھ تاں ایں گالہہ دی وی اُمک کاٹنا ہئی جو سوڈھی صرف ہوں ویلے ای اُناں دے گھر کیوں آندے جنیں ویلے جو اوند اپو آپڑیں مطب تے ہوندے۔ اوندی مادی بھاند دے باوجود سوڈھی تلسی کوں ایں گالہوں وی نہ بھاند اہا جو اوندی دید اوکوں آپڑیں بُت وچ گندھوئے طرحاں پڑ دی جا پدی۔ چھوہر کوں ایویں لگدا جو اُندا آگا پیچھا اُن کجیا کہیں چوک وچ لاتھے۔

تلسی کوں شاید مرد ذات دے ناں توں ای نفرت تھی و نچے ہا جو اُویاض کوں نہ ڈیکھ گھندی۔ فیاض اوندے پیو دے مطب تے دوادیاں پڑیاں بنڑانوں کیتے ڈو سال پہلے ملازم تھیا تے آپڑیں عقلمندی تے ایمانداری کارن ڈیہناں وچ ای پورا مطب سنبھال کراہیں نکا حکیم سڈیجن لگ گیا۔ پنساری کنوں اصلی دوائیں دی خریداری، اُناں دی رگڑائی تے وڈے مرتباناں توڑیں سنبھائی اتجھا کم ہا جیند اسد ہا صفاناں تعلق حکیم رام لعل دے نسخے دی تاثیر تے شفاناں ہا۔ جڈاں دا اے کم فیاض نے سنبھالیا حکیم اصلوں بے چنتا تھی گیا۔ حکیم صاحب کیکی میکی واسطے ایڈے اوڈے تھیند اتاں اُبالہیاں نینگر مریضاں دی ایہا کوشش ہوندی جو فیاض کو ہتھ ڈکھا ویندیاں تھوون۔ پہلے پہلے تاں فیاض نے آپڑیں آپ کو گل حکمت توڑیں رکھیا تے حکمت کنوں بُویندارہ گیا پر جییں ویلے خود حکیم صاحب اوندی سُرست شناس ڈیکھ کراہیں گنڈ چا تھی تاں جو آن دُکی اُتے آ گیا۔ شروع شروع وچ

مریضاں تے اوند ااعتبار جماون کیتے حکیم رام لعل ایویں سڈ چا ماریا ”فیاض حسین او فیاض حسین..... ذراتوں ڈیکھ کیا تکلیف ہے ایس نکلی کوں“۔

فیاض حسین بھج تے حکیم صاحب دے سچے پاسوں آن بیٹھاتے پردے دے ڈوجھے پاسوں بیٹھی نینگر دی، پردے دے باہروں آئی وینی دی نبض والی جاتے سچے ہتھ دیاں ڈوں انگلیں رکھ کراہیں لکھنے بعد پورے پگ نال آکھیں..... ”سنیں ڈکھو ترا تھیا کھڑے“.....

حکیم صاحب خوش تھی تے اوندی کند تھپی تے آکھیں ”چل ونج ہن.. ترے ڈینہہ دی دوا بنزائی آ“۔

فیاض پر وبھرا تھیا تاں حکیم نے چھوہر دی ماء کوں سڈ مارتے ہو لے ہو لے آکھیا جو مائی نکلی کو مٹانے دی گرمی تھیون لگ پئی ہے، شادی کر چھوڑ ہن ایندی۔ ہالی تاں تریا تریا پیشاب آندا پے تے علاج وی تھی ویسی، پر عارضی ہوسی آ..... پکا علاج ایندے مکلاوے وچ اے۔

فیاض دوا چاتے آیا تاں حکیم صاحب ہک واری ول چھوہر دی ماء دے گن وچ بھسکا ماریا ”اے گھن دوا ترے ڈینہہاں دی، ہک پڑی ڈینہہ وچ ترے واری ترے منگر پانی دے نال تے اے ہئی قلمی شورہ نہائیں اُتے جھیرن کیتے، باقی اوندی ذات کرم کر لئی“۔ ایس طرحاں ڈینہہ وچ ڈوں ترے واری فیاض دا امتحان گھنن توں بعد حکیم رام لعل گدی توں اٹھنا شروع کر ڈاتاں جو ایس دوران فیاض مریض ڈیکھ سکے۔ لیکن ایندے باوجود کتو ضرور رکھیندا جو فیاض دے گدی تے باہون نال ای زانائیاں آلے پاسے ہک اچوی جئی کیوں مچ ویندی ہے تے آرام نال بیٹھیاں زانائیاں دی وی ایہا کوشش ہوندی جو حکیم رام لعل دے ولدے سروں گدی تے باہون کنوں پہلے پہلے او فیاض کوں ہتھ ڈکھا

گھن۔ اے سب کچھ ڈیکھ کراہیں حکیم رام لعل مُسک پونداتے اوکوں آپڑیں جوانی دے
ڈنہہ یاد آویندے جڈاں زنانیاں بغیر کہیں بیماری دے چھڑا آپڑیں نبض اُتے اوندیاں
انگلیں داسیک محسوس کرن تھم تھی باہندیاں ہن۔

فیاض حسین وچ وی نینگریں دی جھک ایویں اجائی کاٹنا ہئی۔ سوہنا پو بکا ننگر،
چھی فٹ قد، کنک پکیا سلونز اس رنگ، ونگرے وال، گھائیاں مچھاں تے کولی کولی جتویں
ڈاڑھی تے بلوچ تھیندا ہا محراب والے دا۔ تہوں چرویں اکھ تے اکھ وچ بے معلوماں
سُرماجیندے نال ڈناراں کچھ کچھ کالیاں تھی کراہیں بیاں وی تیکھیاں تھی گیا ہن۔ فیاض
حسین داپوندیر حسین نواب صاحب دے باڈی گارڈ دستے وچ شامل ہاجیندے سبھے جو آن
آپڑیں سجا پو ہڈ قد پاروں گاڈر جو آن سڈیندے ہن۔ نذیر حسین دی سک تاں ایہا ہئی جو
اوند اپتر وی باڈی گارڈ دستے وچ بھرتی تھی ونجے پر اوند ارواح رجوع فوج آلے پاسے ہا
ای کاٹا۔

شروع شروع وچ نذیر حسین نے بہوں کوشش کیتی جو کہیں طرحاں فیاض کوں
فوج ڈو وند لایا ونجے۔ اُونور حضور دے ویلے پریڈ واسطے اُٹھیندے پتر کوں وی نال گھن
ویندا۔ بینڈ جنیں ویلے پہلی لام والے ریاستی ترانے ”کھڑی ڈیندی آں سنہیڑے اناں
لوکاں کوں اللہ آن وساوے ساڈیاں جھوکاں کوں“ دی دُھن ونجیدا تاں باڈی گارڈ دستے
دے جواناں دے قد میں دی مستی نال پریڈ گراؤنڈ دی دھرتی ہلوا پڑ تھی ویندی پر ایندے
باوجود فیاض حسین دا دل نہ لکيا۔ نذیر حسین کوں بہوں ارمان ہا جو اوند اپتر ڈاھ جماعتاں پاس
کرتے وی روٹی روزگار آلے پاس نہ آندا پیا ہا۔ ایویں لگدا جو اُو کوئی بے چین روح ہے
جیکوں سمجھ نہ آندی پئی ہئی کہ اُونے کرنا کیا ہے۔ نذیر حسین نے اوکوں کوئی ہنر سکھاؤن دی
سبیل وی کیتی پر ہر کم دا پہلا ڈیہاڑا ای جھیکوئی ڈیہاڑا ثابت تھیندا۔ ایں جھک تان وچ

پک ڈیہ نہہ فیاض کوں بخار تھی گیا۔ پہلے تاں جو ان پرواہ نہ کیتی پر جنیں ویلے بیماری ویڑھ
 سیڑھ کر گئی تاں نذیر حسین اوکوں حکیم رام لعل کول گھن گیا۔ حکیم دامطب ڈیکھ کراہیں فیاض
 کوں آپڑیں بیماری بھل گئی۔ اوکوں ایویں لکيا جو اوتاں کئی سالوں توں ایں جاء دی گول وچ
 ہا۔ نہ صرف گول بلکہ کوئی پک جیہا بھلا ندر اہا جو رب نے باقی دی حیاتی اوند ا مقسوم اتھائیں
 رکتھائیں لکھ چھوڑے۔

حکیم رام لعل کوں مطب دی اچیری گدی تے بیٹھا ڈیکھ کراہیں فیاض کوں ایویں
 لکيا جو کوئی راجہ ہے آپڑیں تخت تے بیٹھا، رعایا وچ شفا تقسیم کریندا بیٹھے۔ فیاض کوں اوند
 مریضاں دی نبض تے سچے ہتھ دیاں ڈول انگلیں رکھ کراہیں بیماری نبھن وی جادو دا کوئی
 منتر لکيا کہ جیندے وچ کوئی رمز گھبی ہوئی ہئی۔ فیاض واسطے اے سھو کجھ وی حیران کن ہا
 جو اوزنائیاں جہاں دی شکل تاں کیا پچھاواں وی کوئی نہ ڈیکھ سکدا ہا، حکیم دے ہتھ وچ
 آپڑیاں ویڑیاں پکڑا باندھیاں ہن بھادویں جو پردے دی اوٹ ہوندی ہئی پئی۔ اے ڈیکھ
 کراہیں فیاض تاں مداری دی بانسری طرحاں مندر تیج تے رہ گیا۔ بیماری شمار دی وان
 وٹیندی گئی تے ڈو جھے ڈیہ نہہ چنگا بھلا نواں نرویا تھی تے پو دے اگوں آن بیٹھا جو بابا سیں
 میں حکمت سکھساں حکیم رام لعل کنوں۔

نذیر حسین پہلے تاں ادھر تیج تے پتر کوں غور نال ڈٹھاتے ول زور دا چکا مارتے
 کھل پیا۔ کھل جھلجی تاں مسکدیاں ہویاں آکھن لکيا ”بھل بھئی جو آن بھل، دو لہے
 صادق سیں دے باڈی گارڈا شینہہ جیڈا پتر ہن حکمت سکھسی تے اووی کراڑ کنوں۔“

”بابا سیں! جے اے کراڑ دوا دارو کر سکدے تاں اوں کنوں حکمت سکھن وچ
 میکوں کیہڑا میہنزاں اے۔“ فیاض دے الا وچ بھادویں جو لتھے بخار دی کمزوری ہئی پر لگدا
 ایویں ہا جو نیتی توں اوں ہنڑاں کائنی۔

”پر پتر حکیم رام لعل چھڑا کر اڑای نہیں، گراڑاوی ہے، اُونے کتھوں تیکوں
 شاگرد بلہاؤنڑیں۔“ نذیر حسین ہک دفعہ ول راہ ماری کیتی۔
 ”چلوٹساں نہ آکھو میں خود گالہہ کر گھنداں۔“ اے آکھ تے فیاض حسین اُنھی
 کھڑا تھیا پر نذیر حسین یو اُتھی سوچن پئے گیا جو چھوہر کون تھیا کیا ہے۔ پتر کون ہتھوں ویندا
 ڈیکھ کراہیں اُونے ہکل ماری ”کھڑو وئے پتر کھڑ.... میں جُلداں تیڈے نال، توں کروا
 تے راہیں تَر لے کر اڑ حکیم دے میڈے کنوں۔“



(3)

حکیم صاحب دے گھر دے دروازے دی کُنڈی کھڑکی تاں چھت تے دھوتے
 کپڑے سکڑیں سٹ تے تلے لہندی تُلّسی کوں ایویں لکیا جیویں اے ٹھک ٹھک دَر تے نیں
 بلکہ اوندے دل تے تھئی ہے۔ اونیں اُبالہہ وچ ڈوں ڈوں پوڑیاں کٹھیاں بلا نگھیاں تے
 پیر زمین تے لگدے سارای دَر ڈونجی پر ڈیڈھی توڑیں مُجَدے مُجَدے یکدم پیر جھلنے پئے
 جو اوندی ماء منہ بڑائی کپڑے دے پک تھیلے کوں تڑیاں کنوں ایں طرحاں لٹکائی آندی ہئی
 جیویں کہیں پلٹ شے کوں چائی آندی ہووے۔

تُلّسی داہاں دھڑچ تھیا۔ ضرور اوندے پُو نے فیاض دے ہتھ کوئی شے گھر بھیجی
 ہوسی تے اوندی ماء کوں کہیں مسلمان دی ہتھ لگی شے کنوں ایویں نفرت ہئی کہ جیویں اوندی
 سھو کچھ بد بودی ماری رُوڑی بن گیا ہووے۔

”اماں! فیاض اے؟..... تُلّسی نے ول ای کچھ چھوڑیا

”بیا کون..... اوہو ہے مویا مسلا..... ہزار واری آکھم تیڈے پیو کوں کہ

ایں بلا دے ہتھ گھر کوئی شے نہ بھیجی کر پر ولد اہو کوں بھیج چھوڑیندے..... وڈا حکیم بنڑیا
وَدے، پاکی پلٹلی دی سُدھائی کائی، تلسی دی ماء تھیلا چاتی بُو بولائی ویندی ہئی۔

”اماں ہولے بول.... اُون گھنسی“..... تلسی ڈنداں کوں جھپڑتے بولی۔

”تے سُن گھنے، میڈی تاں جان چھٹسی“..... اے آکھ تے راہی نے تھیلے

کوں بھکاتے تخت پوش تے سٹیا تے خود سقاوے دے باہروں پئی پانی دی وَلٹوئی وچوں
پانی منگروچ پاہتھاں تے جھیرن بہہ گئی۔

تلسی تَرے ڈینہاں توں فیاض دے آون دا انتظار کریندی پئی ہئی تے جے اُج
آیا وی سئی تاں اوندے کیا بھانڑیں۔ پتہ نی فیاض کوں ڈیدھے ساری ای او کوں کیا تھی ویندا
ہا۔ ایویں لگدا کہ جیڑھے مرد دا تصور اوندے دماغ وچ ہے اُو فیاض کوں سامڑیں بلہاتے
لیکھا گئے۔ جڈاں سال سوا سال پہلے اُون پہلی واری فیاض کوں آپڑیں ابے نال گھر آندا ڈٹھا
تاں اصلوں پوی تھی تے رہ گئی۔ پہلے تاں بُت وچ وِساٹ شروع تھیا تے وَل مٹھیاں
مٹھیاں چوَنگاں نے گرد دھال مچا چھوڑیا۔ تلسی کوں سمجھ نہ آندی پئی ہئی جو کرے تاں کیا
کرے۔ ہُن تیں تاں اونے آپڑیں پیوتوں علاوہ چھڑے ڈوں مرداں کوں نیڑے توں ڈٹھا
ہا، پک اوندا منکیند اوِشنو تے ڈوجھا اوندا سوہرا سوڈھی مل۔ پر انہاں ترہیاں وچ کوئی وی
اتجھی گالہہ کاٹنا ہئی کہ جیڑھی انہاں کوں تلسی سانگے مرد بنڑاوے۔ لیکن فیاض دی تاں
گالہہ ای کجھ بنی ہئی۔ اوتاں اُو، اوندا بچھاواں وی چنگا بھلا نر جو آن لگدا کہ جیندا سوچ
کراہیں وی تلسی دے بُت وچ مستی دیاں لہراں لوڈے کھاوَن لگ پوندیاں ہُن تے
اوندا مسام مسام پگھر و پانی تھی ویندا۔ اُوندا دل کریندا جو فیاض او کوں ہتھاں نال چبولے،
ولہڑے، لگی پاوے کجھ ایں طرحا گھٹ کے جو اوندی پک پک پسی کئی کئی جا میں توں تڑکج
تڑکج ونجے۔

اتنا تاں تلسی وی جائز دی ہئی جو فیاض مُسلا ہے تے ہک مُسلے تے ہندوانی دا
 کیہا بنجوک۔ پر کیا کریندی ایس بنجوک دے نہ ہون نے ای بے معلومے سانگے وچ کجھ
 اتجھی چھک گندھ چھوڑی کہ جینے اوکوں سر کنوں لاتے پیراں تیں ”فیاض“ بنزا
 چھوڑیا۔ تلسی کوں سمجھ نہ آندی ہئی جو تھیا کیا ہے۔ فیاض نے تاں پہلی واری اوکوں اکھ
 چاتے وی نہ ڈٹھا ہا کہ ایس گھر وچ کہیں جوان چھوہراناں نشان وی ہے۔ اونے آپڑیں
 ڈاڈی کنوں سُزیا ہو یا ہا جو جوان چھوہر کوں جوان چھوہر دی خوشبو سٹ تھگے پاروی آویندی
 ہے پر اے کیہو جیہا گھروہا جینے و تراں تے آئی چھوہر کوں وی اکھ بھال تے نہ ڈٹھا ہا۔ پر
 ایندے باوجود تلسی کوں آپڑیں بُت وچ و سٹا دے نال نال کجھ اتجھیاں سریراں وی
 جاگدیاں ہو یاں محسوس تھیاں ہن کہ جہاں دا احساس کہیں زنانی کوں مرد دے بھرویں
 انداز وچ ڈیکھن نال ای تھیندے۔ کئی ڈیہاڑے تلسی ایس غرق وچ رہ گئی جو اے کجھ مرد ہا
 کہ جینے اوکوں پوری بھال نال ڈٹھا ای کائنی پر وِل وی پورے دا پورا ڈیکھ گئے۔ تلسی کوں
 آپڑیں ایس گویڑ تے ایس گالہوں وی پورا یقین ہا جو عورت دی زبان تاں کوڑ مار سگدی ہے
 پر اوندا جسم کوئنا۔ جسم دی گواہی تاں ست پردیاں وچوں وی صاف چکھانی ویندی ہے۔ سب
 توں اُتے سب توں پچی۔

کجھ ڈینہہ گذرے، عین ڈوپہاراں ویلے حکیم صاحب دے گھر دی کُنڈی
 کھڑکی۔ راہی سقاوے وچ پانی و ہیندی پئی ہئی ایس گالہوں تلسی اے سوچ کراہیں کہ
 کتھائیں بابا نہ ہووے، تکھے تکھے بھجی تے دردی کُنڈی کھول تے خود ڈیڈھی دی اوٹ وچ
 تھی گئی پر باہروں کوئی آواز نہ آئی۔ تلسی سمجھ گئی جو کوئی غیراے تہوں ریاستی رواج دے
 مطابق ترے واری ہولے ہولے تاڑی مارئیں اے دُسن کیتے جو گھر وچ کوئی مرد کوئی
 بیٹھا۔ تاڑی دی آواز سن کراہیں باہروں کوئی بولیا ”فیاض ہاں میں.... حکیم صاحب کجھ

سامان بھیجے گھن گھن۔

فیاض دا الاسُن کراہیں تلسی دادل پہلے دُکلی تے وَل دُرگن تے آگیا تے اوکوں
 آپڑیں کناں وچ ٹھا کے تھیندے محسوس تھیون لگے جیویں دل دا بلارا سینے دی بجائے کناں
 وچ آگیا ہووے۔ تلسی تکھے تکھے ڈیڈھی دی اوٹ وچوں نکل تے فیاض دے سامنڑیں آ
 گئی۔ فیاض نے لحطے کیے اکھ اتوں تے چاتی تے وَل جلدی جلدی جھکی جھون گھست تے
 کپڑے دا تھیلا اگوںہا کر چھوڑیا۔ تلسی دادل کیا جو تھیلا پکڑ تے وَل دا فیاض دے منہ تے
 ڈے مارے جو اوکوں ڈیدھا کیوں نی پیا۔ لیکن جیویں ای اُگوں تے تھئی اوندی سردی چادر
 پتہ نی کیہڑی شے نال اڑی تے اڑ تے اُتھائیں رہ گئی تے اوندے ہتھ وچ چھڑا تھیلا رہ
 گیا۔ آن دی آن وچ اونداسرؤلی اُمب جیہا وجود فیاض دے سامنڑیں ہا۔ اُوہ اُلے پیراں
 اندر ڈوبھی تے بس ایہو یاد رہ گیا جو فیاض پٹیاں پٹیاں اکھیں نال اوکوں ڈٹھی ویندا ہا۔ کجھ
 اُگوں تے وَج تے وی تلسی کوں آپڑیں پیچھے تے ڈھیر ساریاں لگیاں کویلیاں دے پتے
 بُلکیندے محسوس تھئے تاں اُونے گردن بھنوائے پچھو آں ڈٹھا۔ فیاض اُتھائیں دا اُتھائیں در
 وچ کھڑیا حیرانگی نال اُون بھجی جھوہر کوں ڈٹھی ویندا ہا۔ تلسی کوں ایویں لکيا جو اماں دی
 آواز چوانتی آلی کارا وندیاں کناں کوں ڈمھیندی پئی ہے جو آہدی نہ ہم آپڑاں آگا پچھانج
 تے رکھیا کر، کہیں لُندھے ڈیکھ گھدا تاں جو ٹھا کر رکھیں آ۔

تلسی بھجی ہوئی آپڑیں کمرے وچ وَڑی تے وَڑ تے ساگن بہہ گئی۔ اوکوں
 فیاض دا اثر تڑڈیکھداں۔ کتھاؤں لُندھپ نہ لگدا پیا ہاتے نہ اُکٹھاؤں جو ٹھی تھی ہی۔ بس
 ہک سرشاری ہی، سرور ہا جیڑھا کہیں مور کوں آپڑیں پرکھنڈا تے والہا نہ رقص دے بعد
 محسوس تھیندے، کہیں گوئے کوں آپڑیں زندگی دی سب توں اچے سُراں والی گائیکی، کہیں
 مصور کوں آپڑیں خوبصورت ترین تصویر دی نمائش تے کہیں تیز باؤلر کوں مخالف بیٹس مین

دیاں وکٹاں اڈاون دی صورت حاصل تھیندے۔

کچھ لکھنے بعد اوند ساہ وچ ساہ آیا تاں اُونوار آلے رنگے پنگ دی جیرھی پانی والے پاسوں بیٹھی ہائی ہوں پاسوں پچھوایں تھی تے ایں طرحاں دَبک تھی جو جگہاں گوڈیاں تیں تلوں تے لڑک تے پلدا یاں پیاں ہن۔ ”کیا ہر چھوہر ایویں آپڑاں آپ کہیں دل بھاندے کوں ڈکھاتے اُٹھرتی ویندی ہوسی۔ کیا اوسھو کچھ جیرھا مانگ رکھن کوں آہدی اے، چھوہریں دی فطرت دے خلاف کیوں ہوندے۔ اگر اے سھو کچھ ایویں ہے تاں ول اساں فطرت دے خلاف کیوں رُدے ہیں۔ کیا اے ساڈا بڈھپا تے وکھوونک دیاں بیماریاں ساڈے کیتے فطری تقاضیاں دے برعکس زندگی گزارن دا عذاب تاں نیں۔“ تلسی حیران ہئی کہ اے ساریاں گالہیں ایں ویلے اوندے دماغ وچ کیوں آندیاں ہن۔ پتہ نیں کڈن اُونے اَبے دی کتاب وچ پڑھیا ہا جو عورت کوں ماہواری دی بندش تھی ونبجے تاں اُونے شکل کنوں بدشکلی تھی تے املک نچرتی ویندی اے۔

”تے اے بندش جے عورت دے اُٹھن باہون، کھاون پیون، پاؤن ہنڈاون تے آپڑیں آپ دے اظہار تے لاڈتی ونبجیں تاں کیا اُونے عورت رہ سگسی۔“..... اوکوں آپڑیں گالہہ دا کوئی جواب نہ ملیا تاں اُٹھی تے بہہ گئی۔ اوند ایل کریندا پیا ہا جو ول کتھاؤں گنڈی کھڑکے، اُونج تے دروازہ کھولے تے اگوں فیاض کھڑا ہووے تے ول.... تے ول اُونے اوکوں آپڑیاں اکھیں وچ لکا گھنے، آپڑاں سھو کچھ ڈکھاون کیتے۔ کہیں بندش توں بغیر کیوں جو اُونے فطرت کوں آپڑیں خلاف نہ کرنا چاہندی ہئی۔

”اوڈے فیاض وی کہیں نویں کھڑاند وچ پیر پیر لہندا ویندا ہا۔ اُج اُونے ہک چھوہر دے جسم کوں عورت دے جسم داروپ وٹیندے ڈٹھا ہا۔ اُوہالی تیں و اتھی آپڑیں آپ کنوں کچھی ویندا ہا جو عورت دے جسم وچ اے مستی کتھوں آندی ہے۔ خون وچ ہوندی اے

یا ماس وچ۔ جے خون وچ ہوندى اے تاں اکیوں وَل وَل چھمکاں مار چھمکیندا کون اے
تے جے ماس وچ ہوندى اے تاں اکیوں لُو ڈے کون ڈیندے، تھڑکیندا کون ہے۔ کیا کہیں
نینگر داجسم ایڈاوی جادو گر تھی سکدے جو ڈیکھن والے کوں سرتوں لاتے پیراں تیں مُندر
چھوڑے۔ کیا اوند اے مُندر یکن کہیں ونجی ہوئی شے دی تلاش ہئی یا کوئی حیاتی دی نویں رمز
اوندے اُتے کھل دی پئی ہئی۔ جے اے تلاش ہئی تاں کدھ دی ہئی۔ کیا کہیں سُخان دی
تلاش؟..... پر کجھی سُخان تے کجھی رمز..... نہ کہیں دامنڈھ تے نہ کہیں داپاند۔

کیا کتھائیں تلسی تے فیاض اپنی اپنی سُخان دی تلاش وچ تاں نہ ہن! ہک دا
جسم اوند اہوون دے باوجود اوند اہوون نہ ڈتا ویندا پیا ہاتے ڈوجھا آپڑیں ہوون یا نہ ہوون
دی آدھل وچ لکھیا ہو یا ہا۔ تلسی تے فیاض ڈوہیں آپڑیں آپڑیں ہوون دی سُخان وچ مَن
مرضی کرن چاہندے ہن تے شاید ایہو شعوری بحر ان انہاں کوں ہک بے آلے پاسے
چھکی آندا ہا۔ پر ڈوہیں آپڑیں آپڑیں گھر والیاں دی کھچل وچ سمجھ نہ سکدے پئے ہن جو
اے کیا تے کجھی سُخان ہے جیڑھی سُجاتی ای نی ویندی پئی۔ سُخان جساماں نال ہوندى اے یا
جسم آپڑیں سُخان خود گولیندن، اے اتجھی چیرھی گنڈھ ہئی جیڑھی ڈوہیں کنوں کھل دی نہ
پئی ہئی۔

اُول ڈینہہ تاں فیاض کوں پتہ ای نہ لکھا جو اُوکیں طرحاں پیریں رُدا احمد پورتوں
دیرے نواب عید گاہ توڑیں بچ گئے۔ ترے میل دا اے پندھ عام طور تے ناگیاں تے کیتا
ویندا جیڑھے گلو آلی چنگی توں رُدے ہن تے اتھائیں ای اُناں دا اڈھ ہوندا ہا۔ پر آج تاں
اے سار اپندھ ایس طرح سُسیا جو سُس تے اوندے پیراں وچ آ گیا۔ عید گاہ تاں ہن
حکیم رام لعل دے مطب توں ڈوہ چار منغاں داپندھ ہئی۔ ایس سارے پندھ داسوچ
کراہیں فیاض دیاں جگہاں وچ پہلے تاں تر وڑ جیہا محسوس تھیا، وَل رڑاں تے رڑاں دے

بعد وِساٹ تے چھیکو وِچ اُو شُدھ تھی کراہیں دیرے دا بزار شروع تھیون کنوں پہلے نکلے
چوک وِچ بنڑے ہوئے فوارے دی وِزینڈی دے نٹھ بیٹھا کہ جتھوں کھبے پاسے ہک پکی
سڑک نواب صاحب دے محل دی ڈینہہ لاه والی فصیل دے نال نال ویندی ہوئی وڈے در
دے سامنڑیں وِچ رلدی ہئی۔

فیاض دا چیتا گردان تے چار پھیرے گردا ای گردا ہا جو اے تھی کیا گئے تے ہُن
تھیں کیا۔ کیا کہیں تریت دا وجود ڈیکھن والے تے ایں طرحاں دا اثر وی کریندے جو
آپڑیں موجود کنوں ناموجود وِچ دھک ڈتا ونجے۔ اوتاں آپنی منزل دی تلاش وِچ ہا پر
اوندی منزل کتھ اے۔ کیا اُونے حکیم صاحب دے مطب تے وِچ تے نبھاں نال لوکیں
دیاں بیماریاں بھڑن یا تلسی دے جادو گر بوتے وچوں جیون دی کوئی رمز گولنی اے۔ ہالی
توڑیں تاں اوکوں اے سُدھ وی کاٹنا ہئی جو اصل تلسی ہئی کیہڑی، اوجیندا اُونے آگا ڈٹھا ہا
یا وِل اوجیڑھی اوکوں پیچھے بھر بھج دی ہوئی نظر آئی ہئی۔ سوچیندے سوچیندے اوندی سُر ت
جواب ڈے گئی جو عورت ہے کیا، اے کجھی مخلوق ہے جو چھڑا ڈیکھن وِچ ای ہوش رلا ڈیندی
ہے، چیتا بھنوا ڈیندی اے۔ کیا ہے ایندے وِچ، کدھ دی بنڑی ہوئی ہے۔ ایندی جس
رَس کیا ہے اے دِل کھس کیوں ہے۔

فیاض کافی دیر توں ڈوہائیں ہتھیں نال سر پکڑتے جھکی جھون گھتی بیٹھا ہا۔ کجھ
دیر بعد اوندے دماغ وِچ یکدم ہک نواں گوڑا آیا۔ ”اے سھو کجھ ہُن تیں اوندے نال
کیوں نی تھیا۔ اُونے ڈھگ چھوہریں ڈٹھیاں ہُن، کئی نینگریں دی گرولی ویڑیں پکڑتے
نبض کجھی ہوسی پر نہ تاں کہیں دے ڈیکھن نے اوندے اندر کوں ہلایا تے نہ کہیں دی نبض دی
ٹور نے ایندے دِل دی ٹور دے نال ریل میل کیتا۔ کیا ہر نینگر تلسی نی ہوندی تے جے ہر
نینگر تلسی نی ہوندی تاں تلسی وِچ ایذا خاص کیا ہے، ایذا اَنج کیا ہے جو ڈیکھن والا چھوہر

آپڑیں سُجّان بھل کراہیں محض آپڑیں گول وچ، آپڑیں تلاش وچ نکل پوندے۔
 فیاض دے بُت وچ جیویں ولدے سروں ساہ پئے گیا۔ اُونے آسمان ڈوڈٹھا
 ۔ شام تھیندی پئی ہئی تے آندیاں سردیاں دی ٹھڈی ڈیل نے اوندے جسم وچ مٹھا مٹھا
 جلّول مُندھا ونزاں شروع کر ڈتا۔ اُونے اُٹھی تے فوارے وچوں نکلدے پانی دی پھنکار
 کوں ڈوہیں تلیاں دی بھیلی وچ بھر کراہیں منہ تے چھنڈے مارے تاں ایویں لکيا جو
 ہنڈی ہنڈی و سسے بٹھے دی بلدی کیری تے کہیں نے پانی دا ایجھا کراٹر کا کیتے جیندے
 وچوں ٹھاڈل دی بجائے سیک نکلد اپیا ہا۔ ڈوں ترے چھنڈیاں توں بعد اوندی ڈہنی اچوی
 کوں تھولا جیہا بھہا ملیا تاں ولد ا فوارے دی ونڈی تے بٹھ بیٹھا۔ ”کیا ہن تیں جیڑھی
 سُجّان دی تلاش وچ اُگھا بریا پھر داہا اُچھڑی تلسی دی تلاش ہئی۔ کیا تلسی ای اوند اچھڑیا
 ہو یا وجود ہے جیکوں لہمن دی جستجو نے اوکوں نواب صاحب دی فوج دی ملازمت ای نی
 کرن ڈتی تے نہ ای کوئی بیا کم تے سدھا کہیں مقناطیس آلی کار چھک کراہیں اوکوں آپڑیں
 پو دے مطب تے آن کھڑا کیتا۔ کوئی عورت کیس طرحاں کہیں مرد دا وچھڑیا ہو یا وجود تھی
 سکدی اے تے اودی تلسی جی چھوہر۔ نہ جیندے نال کوئی تعلق نہ کوئی واسطہ۔ اُور کتھ جی
 جائی تے میں کتھ۔ اوند اندھب انج تے میڈا انج۔ تے جے تلسی میڈی جستجو، میڈی گول
 نی تاں میڈی گول کون ہے، میں کیکوں گولیندا وداں۔ میڈی سُجّان کیا ہے، کوئی میکوں
 کیوں نی سُجّویندا۔ اے کچھا گردا میڈے وجود کوں ویڑھی ودے جو میں آپڑیں آپ کووی
 نی سُجّان سکدا پیا۔“



(4)

اُج تاں وادھو گھر وڑ دیاں ساری ای کاوڑ داٹو کرا سرتے رکھی آیا ہا۔ آون سیتی
 کجھ کان قصور نہ ہوندے ہوئے وی ڈوں ترے بُجو ذال کوں زپ چھوڑ یونس۔ ”گندی
 رن آ..... بُن تیں کوئی بال بچہ جم چھوڑیں ہا تاں میکوں دھیلے دھیلے دے بندیاں کنوں
 ٹگے ٹگے دیاں گالہیں نہ سُنز نیاں پوون ہا۔“

وادھودی ذال مہراں تاں بُجو کھاتے وَلئیندی سَلئیندی گئی پروادھودی ماء کو کاراڑا
 گھت ڈتا۔

”حیا کروادھو آ..... کیوں ماری ویندیں شودی کوں..... ناں حکیم کول گھن
 ویندیں تے ناں رب دی رضا منیندیں.... بُن آپ ڈس اے شودی ونجیں تاں کیہڑے
 پاسے ونجیں..... وادھودی ماء نو نہہ کوہاں نال لاتے ساکن بہہ گئی۔

”اماں توں نہ وٹپ کیتی کرایں سنڈھ دی..... ایہہ کہیں جوگی ہووے ہا تاں
 سُن تیں ڈاہ واری گھن تھئی کھڑی ہووے ہا..... سارا قصور ایں حرامزادی دا ہے۔“ وادھو

وَل مہراں ڈوالر داپیاہا۔

”خبردار میڈے موئے ماء پیوکوں ناں پڑسیں پیا۔“ وادھودی ذال سس دی
 وکیر چھڑواتے کھڑنکی تھی گئی۔ ”میں تاں سنڈھ ہاں ناں، دفع کر میکوں تے ہئی گھن آ ایں
 گھروچ..... میں وی تاں ڈیکھاں جو چوکھے ڈیہناں بعد بال کھیڈ دے ایں دلان
 وچ۔“

”ڈیکھ ڈیکھ چڑھتاں تاں ڈیکھ گندی رن دیاں..... مانہہ دے اٹے وانگوں
 آکڑاں ڈکھیندی پئی اے.....“ وادھو نے ولدے سروں ذال کوں ڈوں چار تھپ
 بے چھنڈک چھوڑے۔

وادھو ذال کوں تھپ مارن کوئی نویں گالہ نہ ہئی، روز ڈیہاڑے دی کہانی ہئی
 پر آج تاں کجھ انوکھری چوٹ لگی ہئی مہراں کوں جینے اوندے بت دے ریشے ریشے وچ
 کہیں چھتے جن کوں واڑ چھوڑیا۔ پہلے تاں اوچھڑی کھڑنکی تھی پر ہن تھپ کھاتے اُونے
 ساکدے وادھوکوں گئی کنوں پکڑیا تے ڈڈھ وچ گوڈے دے ہکو ز پیڑے نال اُوکوں کچے
 دلان وچ کند دے بھرنے سٹ کراہیں سینے تے چڑھ بیٹھی۔ وادھوں دی گردن ہن
 اوندے ڈوہیں ہتھاں وچ ہئی تے گھوگھے دے وٹ نال اوندیاں اکھیں باہر ڈونکل آیاں
 ۔ لگدا ہا جو کوئی جن مہراں دے موتے وچ جران کیتی ودا ہا جیڑھا آج اوندے منہ تے آ
 گئے۔ وادھودی ماء پہلے تاں ہکی ہکی تھی اے سب کجھ ڈیدھی رہ گئی جو کرے تاں کیا کرے پر
 جئیں ویلے پتر دے گرگاٹ نکلن شروع تھئے تاں اوپا گلاں طرحاں بھیجی تے مہراں کوں کند
 ہچھوں وڑھ کراہیں آپ ڈوچھکن لگی۔ کجھ ناں بنڑیا تاں مہراں دیاں ڈوہیں بانہیں وچ
 بانہیں اڑاتے گھوگھا چھڑ واون دی کوشش کیش پر کون ہووے جیہڑا مہراں دی وکیر وچ
 آئے وادھوکوں چھڑ وادے۔ ایوں لگدا ہا جو وادھو داسا ہنڑیں نکلیا سونکلیا۔

پتر کوں مردا ڈیکھ کراہیں اُونے چلبانڑیں وچوں چڑاٹھ چاتی تے ڈوں ترے
 مہراں دی کند تے رکھوئس پر سب کجھ اُجائی۔ مہراں دے گوگھے نال وادھو جیہا جُوان وی
 کہیں اَدھ موئے پگھی طرحاں اوندے چڈیاں وچ پھڑکدا پیا ہا۔ وادھودی ماء کوں گجھ ناں
 بُجھیا تاں اُو باہر ڈوبھی جو کہیں کوں امداد واسطے سڈے پر باہر لی گئی مینہہ توں بعد املک سُج
 ڈس دی پئی ہئی۔ کھمن ہُن وی ہولے ڈاہڈھے کھمدی پئی ہئی تے کن من داتروکا کہیں
 ویلے گھٹ تے کہیں ویلے ودھ، رکن دے آثار پرے توڑیں نہ ہُن۔ وادھودی ماء نے
 پاگلاں آلی کارائیڈے اوڈے سڈ مارے پر کہیں پاسوں کوئی جواب نہ آیا۔ بڈھڑ کوں یقین
 تھی گیا جواج وادھو نہ بچیا۔

اِس توں پہلے جو منہ سر پٹیندی وادھودی ماء کوئی بیا کندھت کریندی، اوندے
 گھرتوں ڈوں گھر چھوڑ کراہیں گئی دے موڑ توں کوئی جُوان وڈی سڑک تے ویندا نظریا۔
 وادھودی ماء تکھے تکھے اُون ڈوبھی تے بانہہ کنوں گھلیندی ہوئی اوکوں پک آن وچ گھر گھن
 آئی۔ وبلے ہوئے نینگر کوں اوندے کو کے راڑے توں چھڑی ایہا سمجھ آئی جو گھر وچ کوئی
 اتجھا مسئلہ تھی گئے جیندے کیستے اوندی فوری لوڑھ ہے۔ جیویں ای اُونینگر گھر وڈیا تاں اندر
 دا نظارہ ڈیکھ تے اُدھر تیج گیا۔ پک چوکی نینگر پک چنگے بھلے جُوان دے سینے تے کہیں
 شیرنی طرحاں بیٹھی ڈوباہیں ہتھاں دے پورے زور نال اوکوں گھوگھا چاڑھی پئی اے تے
 او کہیں چام چٹھے وانگوں اوندیاں چڈیاں وچ پھاتا پھڑکدا پیا ہا۔ باہروں آئے نینگر نے
 آپڑیں ڈوباہیں ہتھ مہراں دیاں ویریاں وچ کسئی اہُن دے انداز وچ گھتے تے تلے
 پھاتے جُوان دی گردن چھرواؤن دی کوشش کیتی پر نینگر دی پکڑ کراڑی ہئی۔ باہر لے نینگر
 نے پک پھیری ول زبانی دے زور دا امزودہ لایا تے ڈوں ترے واری پورے بُت دا زور
 لا کراہیں پکے جھٹکے وچ گردن توں اوندے ہتھ پُچوا پچھوں تے اِس طرحاں دھکیئیں جواو

کنڈ دے بھرنے وَنج ڈٹھی۔ وادھودی ماء دے گرلاٹ کہیں ویلے اُچے تھیندے ہن تے کہیں ویلے جھکے۔

”اوے اے تاں وادھو ہے“..... باہروں آئے نینگر نے تقریباً موئے ہوئے وادھودی نبض تے ہتھ رکھیا تاں اُوہالی ٹمکدی پئی ہئی۔ ”ناں رواں نال رو.... وَنج پئے پتر تیدا“۔ اے آکھ تے اُوہا ہر لائینگر وادھو دے ہتھاں دیاں تکیاں مُسلن لگ پیا۔ ہالی اُو نے مُسلن شروع ای کیتا ہا جو کنڈ دے بھرنے ڈٹھی مہراں نے وَلداساہ پٹیا تے ٹپ مار کراہیں وادھو دے سینے کوں چڈیاں وَج گھست تے اُجن باہون ای لگی ہئی جو باہروں آئے نینگر نے ہک ہتھ اوندی گت وَج گھتیا تے ڈوجھا اوندی کھبی کچھ وَج ڈے تے ایویں اُتوں تے چائس جیویں گاری وَج پھسے ہوئے چوہے کوں چمٹے نال چویندے۔ مہراں اوندے وکیر وَج آون دے باجوہ پھٹکارے مریندی پئی ہئی۔ مہراں دیاں پھٹکاریاں نال جتھ باہر لے چھوہر دا کھبا ہتھ وَل وَل اوندی کھبی چھاتی نال رگڑیندا پیا ہا اُتھ اُوندا دیگڑے جیڈا پیچھاوی کہیں چکی دے پڑطرحاں اوکوں دانہ دانہ پھیندا پیا ہا۔ کچھ منٹ بئے گزرے پر ہالی توڑیں مہراں باہر لے چھوہر دے قابو وَج ای نہ آندی پئی ہئی۔ چھوہر وی لگدا ہا جو بھترج گئے۔ ہک پاسے جو آن چھوہر دے ماسلے بُت داسیک تے ڈوجھے پاسے اوندی قہر دی وحشت، اناں ڈوہائیں نے رَل کراہیں اوند اچیتا گردان کر ڈتا۔ اوکوں سمجھ ای نال آندی پئی ہئی جو ایں صورت حال وَج اُو مٹھان دی اُنت تیں آئے رَس بھرے پھونڈے زناویں بُت دی چسولی پُخس چاوے یا اوندے وَج جران کیتی بیٹھے بھونترے ہوئے جن کوں قابو کرے۔

ایں دوران مہراں نے ہک واری وَل زور لیندے ہوئے باہر لے نینگر دے منہ تے چک پاون دی کوشش کیتی۔ چک تاں نہ پیا پر نینگر نے اوندی گت کوں ہی چھک ڈے

تے گردن ایں بے دردی نال نوائی جو اوندے ہوٹھ باہر لے چھو ہر دے ہوٹھاں دے
 املک نیڑے آگئے۔ اتنے نیڑے جو اُوچھو ہر مہراں دے ساہ دے شکارے تاں کیا
 اوندے ہوٹھاں دی گرمی وی محسوس کرن لگ پیا۔ اے شاید ایں کیفیت دا اثر ہایا مہراں دے
 بُت وچ کہیں بے معلومی کمزوری دی کوئی ڈلیک جو اوندی وحشت آپ کنوں آپے تلوہو ہیں
 تھیندی گئی تے کجھ دیر بعد اُو اوندیاں بہیں وچ جھو جھدی پئی ہئی۔ چھو ہر نے اوکوں
 باتھاں تے چا کراہیں کھڑے تے چا لٹایا تے وَلدے سروں وادھودی سُدھ لاہون لکيا
 جیرھا اٹھیا تاں بیٹھا ہا پر بیٹھا زمین تے ہاتے ماء اوندی اوندیاں تلیاں اڈھیندی پئی
 ہئی۔ باہر لے چھو ہر نے ہک نگاہ وَل مہراں ڈوڈھا پر اُوہن بالکل مکی، کھڑے تے سستی،
 ترثر ہوکوں ڈیدھی پئی ہئی۔ رناں وچ وی ایذا زور تھی سکدے ایندا اندازہ اُوں نینگر کوں پہلی
 واری تھیندا اپیا ہا۔

اُوں چھو ہر نے وادھو دے نیڑے ونج تے ہک دفعہ وَل اوندی نبض ڈٹھی۔ نبض
 پہلے کنوں تیکھی ہئی۔ ”سب خیر مہراے پر وَل وی ایکوں ادھ سیر جتی کھیر گرم کرتے پلا
 چھوڑو۔“

”تیکوں میں کتھائیں ڈٹھا ہوئے“۔ وادھو دے سنگ وچوں مہین جی اواز نکلی۔

باہر لا چھو ہر مُسک پیا۔ ”پر میں تاں تیکوں روز ڈیدھاں وادھو کا کا۔ تیڈی دُکان
 دے سامٹیں تاں ہوندا میں حکیم رام لعل کول۔ ناں میڈا فیاض ہے۔“

وادھو نے فیاض کوں غور نال ڈٹھاتے وَل تیکھے تیکھے آپنی ہمس ڈکھا ونڑں کیتے
 اٹھن دی کوشش کیش پر ایڈا تیکھے اٹھیا نہ گیا۔ فیاض نے اوکوں اُتھائیں بیٹھے راہون دا
 اشارہ کیتا تے گھروں باہر نکل گیا۔

وادھو نے فیاض کوں ویندا ڈیکھ کراہیں ہک واری دید مہراں ڈٹھنوائی، جیرھی سر

دے وال کھنڈائی کھڑے تے ایں طرحاں اُٹھی بیٹھی ہئی جیویں کوئی جہاں دی ماری زنائی
جن کھیڈن توں بعد شل تھی بیٹھی ہوندی اے۔ وادھو دے بُت وچ خوف دی سریر جی
چڑھی تے اوتکھے تکھے اُٹھی تے فیاض دے پچھوں پچھوں گھروں باہر نکل گیا۔ اوکوں یقین
تھی گیا ہا جو مہراں تے ضرور کہیں جن داسا یہ ہے نہ تاں کوئی رن کیویں ایں طرحاں کہیں
جو ان کوں گھوگھا چاڑھ سکدی ہے۔



(5)

فیاض گھر پہنچیا تاں عشاء دی نماز تھی چکی ہئی۔ محراب والے دی وڈی مسیت
وچوں چھیکڑی نمازی اصولوں بڈھڑے ہوؤن پاروں ہولے ہولے باہر نکلدے پئے
ہن۔ گھر دے دالان وچ اوندے پیوندیر حسین تے اوندے چاچے محمد حسین دے نال نال
انہاں ڈوبائیں دے سوتر جان محمد دا اُچا بلارا صاف ڈسیندا پیا ہا جو ترہے نماز پڑھ تے نماشی
دی چوکڑی جمائی بیٹھے ہن جیندا چوتھا ساتھی فیاض داماما محمد مراد ہوندا ہا۔ پر جڈن دی اوندی
رات دی ڈیوٹی صادق گڑھ محل دے وڈے گیٹ تے لگی محفل وچ باقی ترے رہ گئے ہن۔
فیاض نے انہاں سبھرائیں کوں سلام کیتا تے چپ کرتے چلہا نڑیں ڈوڑ گیا جتھ
اوندی ماء اوندی تانگھ وچ و سے چلبے دی بھاء ول ول گھتر یندی بیٹھی ہئی جو کیہڑے ویلے
فیاض آوے تے اے اُوکوں بھاجی پُھلکا گرم کر ڈیوے۔ نذیر حسین، محمد حسین تے جان
محمد ریاستی سیاست دیاں گالہیں وچ ایڈھے رُدھے ہوئے ہن جو کہیں نے نہ تاں فیاض
کوں آندا ڈٹھاتے نہ اوندے سلام دا جواب ڈتا۔ فیاض دی ماء نے پتر کوں ڈٹھاتاں ساہ

وچ ساہ آئیس۔

”کٹھاں رہ گئیں پُتر آج میڈی تاں جَد ٹنگی کھڑی ہئی۔“

”اماں ہُن اے جھڑ مینہ میڈے وسوں تاں باہر ہن۔“ فیاض نے چوکی گھیلی
تے چلہا نڑیں نال جُوتے بہہ گیا تے ماءِ اوندی چلے تے تو ارکھ کراہیں پھلکا سیکن لگ پئی
تے بھاجی والی منگری کوں انگارے کھتورتے اُتے رکھ چھوڑئیس۔

”اماں مانی ڈیندی پیس تاں میں حقہ تازہ کاٹنا کریاں ابے کیہتے۔“

”نہ کریں توں تازہ، میں پہلے کرتے ڈتی بیٹھی آں۔“

”اچھا..... دیر نال آون دا کجھ تاں فائدہ تھیا.....“ فیاض بے چنتا تھی تے
گرم تھیندی روٹی بھاجی کوڈیکھن بہہ گیا جیڑھی توے توں لتھی سو تھی۔

ڈوجھے پاس نذیر حسین، محمد حسین تے جان محمد وچ تھے دی داری تے ایہو
جھگڑ چلدا اپیا ہاجو پاکستان بن دی صورت وچ ریاست کیندے نال رلی تے کیندے نال
رلدی پئی ہے۔ نواب صاحب دے بارڈی گارڈ دستے دے ملازم ہوون سانگے تریہے
آپڑیں آپڑیں گوڑ کوں برحق سمجھدے پئے ہن۔ نذیر حسین تے جان محمد ایس گاہہ تے
پگ ہاجو ریاست بہاول پور پاکستان وچ شامل تھے بغیر رہنی سکدی جو ایندا قدرتی سنجوک
ہے وی پاکستان نال تے ہوسی وی پاکستان نال پرڈوجھے پاسے محمد حسین دی گاہہ وی سٹن
دی کاٹنا ہئی جو ریاست نے جے پاکستان نال رلنا ہوندا تاں ول نواب صاحب مانی لکشمی
کوں کیوں سڈی بیٹھا ہا۔ آخر کوئی گاہہ تاں ہوسی ناں۔ نہ مڑیں ہووے ہاتاں بندہ ایویں
دوروں ڈٹاڈے چھوڑیندے۔ پر پک تکڑی دلیل ہوون دے باوجود محمد حسین کول کوئی سمجھا
ٹھوکواں ثبوت ناں ہاجیڑھا اوندے گوڑ دی ضمانت بن سکدا۔ ایہو حال نذیر حسین تے
جان محمد دا ہا کہ جہاں کول ہاں دی ہیل توں علاوہ کوئی اتکھی بوخوشبوناں ہئی جیڑھی ریاست

دی پاکستان وچ شمولیت دی دلیل بن سگدی۔

ریاست بہاول پور دیاں گلیاں بزاراں چھوڑ پھیر کوئی اتکھا گھر نہ ہاجتھ روز
ڈیہاڑے ایہو رولا نہ مچدا ہووے کہ پاکستان بٹرن توں بعد نواب صاحب دا فیصلہ کیا
ہوی۔ فیاض دے گھر وچ ڈیہہ کون تاں ول وی کجھ سکھ ہوند اپر عشاء توں بعد گھٹ ودھ
ڈوں گھنٹے توڑیں اے بحث مباحثہ تاں روز دا معمول بن تے رہ گیا کہ جیندا آخری جواب،
آکھن دی حدتیں نواب صاحب نے ریاستی عوام تے چھوڑ رکھیا ہا۔ پر عوام کنوں وی تاں کوئی
چُکھے ہا۔ اوں ویلے توڑیں تاں جو کجھ ہا اُونواب صاحب دے کول ہا۔

مانی کھا کر اہیں فیاض کون ایویں لکيا جو اوندے بُت دی پک پک تہند وچ ہڈیاں
سمیت غضب دا تھکیرا ہولے ہولے سمد اویندے۔ اُونٹھیا تاں اوندے کنوں اُٹھیا نہ گیا۔
ول وی پورے بُت دی سکو جان ویہڑ سیہڑ تے اُو کہیں نہ کہیں طریقے اُٹھیا تے پُچو چاچیاں
دے جھگڑ کنوں پرو بھرا تھی کراہیں نویں سالہ تے سہانجریں دے وَن دے ادھ وچ موکلی
جاء تے پئے ماچے اُتے ونج ڈٹھا جتھ اوندی ماء نے کھیس سرہانہ پہلے ای چار کھیا ہا۔ ایں جا
تے مینہ دے بعد دی ٹھڈی ہیل کجھ چوکی تھی پئی گھل دی ہئی۔ ٹھاڈل نے نشہ کیتا تاں
سرہانے تے سر زکھن نال ای فیاض دیاں اکھیں ملہاریاں تھیونز لگ پیاں تے ڈیدھے
ای ڈیدھے اُونٹھے مٹھے گراڑے مارن لگ پیا۔

تندراں نے جھوکاں لایاں تاں خواب کیویں ناں مسافر تھیندے۔ پہلے تاں
فیاض کیے اُو ہونہت دا رولا، اندھاریاں وچ تھبا کے اُتے اپڑیں ہووَن یا نہ ہووَن
دا عذاب۔ اُو ہو پُہ انزاں خواب۔ جے اُو ہے تاں کتھ ہے، جے نیں تاں کیوں نیں۔ بھل
ہے تاں اپڑیں آپ کوں لہدا کیوں نیں تے جے کوئی تاں ہُن تیں اُوندا ہووَن محسوس کیوں
تھیندا اودے۔ خواب وچ ڈھک سارے خوابیں دا گرو دھال تے خواب دے اندر خواب۔

ونجی ہوئی سُجان دی تلاش تے ہر پھیری وَل وَل ہکو سوال جو اوندی کوئی سُجان وی ہے یا کوئتا۔ کیا ایہا نکلی جئی وَستی محراب والا ای اوندی سُجان ہے۔ جے اے وی نیں تاں کیا اے ریاست بہاول پور اوندی سُجان بنڑی جیندی اُپڑیں سُجان ہک بہوں وڈا سوال بنڑی کھڑی ہے۔ پاکستانی بہاول پور یا وَل ہندوستانی بہاول پور۔ ہونہہ! جتھ نواب صاحب دی مرضی، جتھ نواب صاحب دا حکم، اُتھاؤں دا بہاول پور۔

فیاض دے خواب کیا ہن بھنوالیاں ہن..... بھسوں ای بھسوں، چکرای چکر تے جئیں ویلے اے چکر اوندے کھڑے کوں ای چاتے بھنواؤن شروع کریندے تاں کوئی گرولا جیا ہتھ آتے اوندے بھاؤندے کھڑے کوں جھل گھندا۔ کئی عرصے توڑیں تاں اے سمجھ ای نہ آندی ہئی جو اے کون ہے تے کیندا ہتھ اے۔ کہیں ویلے کہیں شینگرداؤتا جیندے اُتے رنگ ای رنگ تے اناں رنگاں وچوں کہیں رنگ داسڈا فیاض کوں آپڑیں والے پاسے اُلرینداں راہندا۔ پر انہاں رنگاں نے اُج آپڑیں وجود کوں تُلسی دے جو بن دا چولا پو اچھوڑیا ہا۔ فیاض کوں اے زناویں رنگ کڈھائیں ایڈے دل کھسڑیں نہ لگے ہن تے نہ کڈھائیں رنگاں دی جنس دی سمجھ آئی ہئی۔ ہکو جئی پنگھ ہئی ہک بے دے وچ ہک ہک تھئے، ساہ گھندے اُتے جاگدے اناں سبھے رنگاں دی کہ جتھ عقل حیران کہ کھیڑے رنگ کوں فرآکھے تے کیکوں مادی۔ اناں رنگاں وچوں کہیں ویلے کوئی رنگ فیاض بنڑیں ویندا تے کہیں ویلے تُلسی جیندا ماسلا پیچھا چکی دے پڑاں وانگ جھو جھدا، جھمریں پیندا کہیں بے جہان داسڈھ سنیہا جا پدا۔ پر جئیں ویلے ایں سمھو راند وچ وی فیاض کوں آپڑیں آپ دے ہوؤن دا بھرواں احساس نہ تھیا تاں اوکوں آپڑاں ساہ بھارے اُتے ہاں کُتاوے کھاندا محسوس تھیون لگ پیا۔ اوچھر کی بھرتے اُنھی بیٹھا۔ مینہہ دے بعد دی بے معلومی پھوار دے نال لوڈے کھانندی ہوا کجھ نئی وی تیز تھی چکی ہئی تے اوندے کھڑے

دے کھے پاسوں اُچے سہا بنجریں دا گھانا وَن وی جھولدا کھڑا ہئی۔ فیاض نے وِبل تے ایڈے اُوڈے دید بھنوائی، پرے پرے توڑیں دلان وِچ کجھ وی تاں اُوپرا نہ ہا، گھر دے سمھو فردا پڑیاں آپڑیاں جئیں تے سُتے پئے ہن۔

فیاض نے اسمان ڈوڈ کیکھ تے ٹائم دا اندازہ لاون دی کوشش کیتی پر جھڑ پاروں کجھ سمجھ نہ آئی تاں وَلد اسرہانے تے سر رکھ کراہیں سوچن لگ پیا جو خواب وِچ ڈیدھا کیا پیا ہا۔ خواب تاں یاد نہ آیا پر نندر نے وَلدے سروں آون وِچ دیر نہ کیتی۔ نندر کیا آئی، نویں سروں خوابیں دی ہک وِچ ویندڑ تندر تے تندر تے چھیکڑ تے کجھ بے خوابیں دا انبار۔ پر اُج تاں ہر خواب وِچ چھڑی پکو مورت، پکو صورت مہراں دی مورت، مہراں دی صورت۔ اوکوں آپڑیں کھے ہتھ وِچ جلوں جیا تھیا۔ اے جلوں کیا ہا، سواد ای سودا ہا۔ اوندیاں اکھیں دے اگوں ہک واری وَل رنگیں دی پینگ تے پینگ وچوں ہر ہک رنگ دی آپڑیں آپڑیں پھوار اوندے بُت اُتے ٹھڈڑے کڈھ کراہیں سُرور دیاں سُریراں جگیندی پئی ہئی۔ اے سُرور تے اے پُرس جیڑھی مہراں دے وکیر وِچ آئے ہوئے بُت نے اوندے بُت وِچ جگائی ہئی، فیاض کیے اُلک اوپری ہئی۔ کیا سمھو عورتاں دا قُرب ایویں ای چسولا ہوندا ہوسی۔ کیا سمھو تریمتیں آپڑیں آپ وِچ کہیں مٹھڑے تے چسولے اُمب دی رَس لُکائی وِدیاں ہوندیاں ہوسن۔ اوکوں مہراں دے ہوٹھ یاد آئے جیڑھے اوندے اتنے نیڑے آ گئے ہن جو اُنہاں وِچ مٹھے مالے دی ڈلی جیہاں ڈلیکاں وی صاف نظردیاں پیاں ہن۔ فیاض کوں ایویں لکيا جو اُنہاں ڈلیکاں وچوں مٹھا رَس بتر کراہیں اوندے ہوٹھاں کوں سیراب کرو لسی پر اوندے ہوٹھ ایڈے نیڑے آتے وی ایڈے نیڑے نہ آ سکے۔

اے عورت دا کیہو جیا وجود ہا کہ جیندے وِچ ناگ پئے شوکدے ہن تے ناگ کیہو جنے ہن کہ جیہاں وچوں زہردی بجائے عجیب جی مستی تریڑ دے نلکے نلکے قطریاں

وانگوں فیاض دے بُت وچ بسدی پئی ہئی۔ اے تریر دتھ دتھ ڈھانڈی ہئی اُتھوں اُتھوں
 اوندے ماس کوں ایویں ڈالی ویندی ہئی جیویں مٹھان دے زور کنوں کماڈ لیج ویندے۔ پر
 ایں ڈلے وَنجن وچ ای کہیں درد دی بجائے اتجھی چس ہئی کہ جیندے اگوں آپڑاں ہوون
 یا نہ ہوون بے معنی لگدا پیا ہا۔ عورت دا اے روپ اُونے پہلی واری ڈٹھا ہا کہ جیندے وچ
 نزاکت اوندے ماس وچ تاں ہئی پر احساس وچ کوئنا۔ نسوانیت اوندے جُٹے وچ تاں ہئی
 پر غصے وچ کوئنا۔ عورت تے اے ویلا کیہڑے ویلے آندے جو اُو آڈھے وَنجن دی بجائے
 آڈھ چھوڑیندی ہے، مطلوب تھی تے وی طلب گار تے مفتوح ہوندے ہوئے وی فاتح بن
 ویندی ہے۔ کتھ لکائی راہندی ہے آپڑیں طاقت کوں۔ شاید آپڑیں ملوکی دے اولے وچ
 ۔ بنجواں دے پردے وچ نہ تاں ناز نہوریاں وچ۔ شے کیا ہے، مٹھی تھی راہوے تاں عرضو
 بندناں تاں دھرتال تاؤن لختیاں دی کھیڈ۔ ایں طرحاں اُکھیڑ مریسی جو گانا بھن رکھسی۔

فیاض خواہاں وچ وی اُج آپڑیں سَنجان دی تلاش بھل کراہیں تلسی تے مہراں
 دے بُتیاں وچ گُٹا وے ودا کھاندا ہا۔ کتھائیں ٹھڈی چھاں ہئی تاں کتھائیں بھاء دی
 کھیڈ۔ کتھائیں رنگاں دیاں وَنگاں ہن تاں مکھن ماکھی وچ گندھیا ہویا کنڑک دی مانی دا
 چسولا بھورا۔ فیاض کوں ایویں لکيا جواں لذت دی اوٹ وچ عورت تاں خود کتھائیں ہک
 اتجھی طاقت ہے جیڑھی مرد کوں پوری حیاتی ہنگوائی راہندی ہے پر ایں مخفی سرکش طبع دے
 باوجود آپ توں اُچی طاقت دا طواف کرن چاہندی ہے، چار پھیر وں تے ہر ویلے، اوندی
 کمزوری بن تے۔ اُتے ایہو اُوڑاں ڈکھا ڈکھا سہائی راہندی اے، رِجھائی راہندی اے،
 وَنجائی راہندی اے۔

فیاض کوں لکيا جواؤ ویند ر وچ ہوندے ہوئے وی جاگدا پئے۔ اُونے تلسی دے
 چسولے اُوڑیں تے مہراں دے رسولے بُت وچ آپڑیں آپ کوں گولن دی کوشش کیتی پر

کتھاؤں محسوس ای نہ تھیا جو اووی کوئی وجود رکھیندے۔ اُونے تھبا کے مارتے آپڑیں آپ
 کوں لمھیا پر او کتھائیں ہووے ہاتاں خود کوں محسوس تھیوے ہا۔ اُون ڈٹھا جو تلسی دارنگاں ا
 وڑاں تے مہراں دا گرد لاؤتا، ڈوہیں اوندے نہ ہووَن تے مُسکدے ہن۔ فیاض دے
 تھبا کیاں وچ بیاوی جنون آ گیا۔ جے اوند ا کتھائیں وجود نہ ہاتاں اے کون ہے جیڑھا
 آپڑیں آپ کوں گولیند ا پئے۔ اے سوچ تے اُکوں چھر کی جی آئی تے وبل تے اُٹھی بیٹھا۔
 لمبے لمبے ساہ گھنن نال ساہ وچ ساہ آیا تاں اُون نے آپڑیں آپ کوں، آپڑیں
 ہووَن کوں وَلدے سروں محسوس کریندے ہوئے ٹھڈا شکارا بھریا تے اسمان ڈوڈیدھے
 ہوئے چار پھیرے دیدھنوائی۔ ہالی فجر ویلے کوں چنگی بھلی دیرہئی۔ دور دلان دے ڈو جھے
 سرے تے اوندے ماہیو وڈے ماچے تے کھیس پاتی ہک بے کول کنڈ کیتی ایویں سٹے پئے
 ہن جیویں جو غُستان وچ نالونال ڈوں قبراں تے چادر اں چڑھیاں پیاں ہووَن۔ فیاض
 آپڑیں خواہاں دی گردش وچوں ہالی توڑیں باہر نہ نکل سکيا ہا۔ کیا اے وی عورت مرد
 ہوسن۔ کیوں نہ ہوسن۔ تے جے اے ہن تیں عورت مرد ہوسن تاں اناں ڈوہائیں دے
 رنگ کتھاں گئے۔ اناں دی پُرس رَس کیوں بے چسولی تھی گئی۔ اناں دا وجود ہک بے
 کوں آپڑیں منے چھیکیند ا کیوں نی۔ کیا ہک خاص عمر توں بعد ڈوہیں جی آپڑیں جنسی سُجھان
 ونجا باہندن۔ بھل جے اے سچ ہے تاں اداپڑیں سُجھان دی تلاش وچ ایڈا گالہا کیوں تھیا
 ودے۔ پچھے کرے اتجھی سُجھان کوں جیڑھی بندے کوں ہک جیہاڑے آپڑیں آپ توں
 وی بیگانہ کر ڈیندی ہے۔ اوتاں ہک انسان دے طور تے آپڑیں سُجھان چاہندا ہا پر ایں عمراں
 دا کیا کرے جیڑھی اوکوں بنیادی جنسی سُجھان توں وی اوپر اکر ڈیندی اے۔

فیاض کھنڈے توں اٹھی کھڑا تھیا۔ ٹھڈی ہیل کجھ بی وی ٹھڈی تھی گئی ہئی پر
 ہن مینہ دی مہین پھنگا ر دی بجائے ٹھڈی گری ہوا ہئی جیندے وچ سویر دے نندرا کے

نے مہار دی جاگ لاچھوڑی ہئی۔ اوکوں ایویں لکیا جو تلسی تے مہراں اوندے بچے گھبے آ
 تے بہہ گن۔ ڈوہیں پاسے ہک احساس ہا گروں وچ لیسویں سیک دا، جیندے بُت وچ
 لہندے سارای اوندیاں اکھیں آپ کنوں آپے ملہاریاں تھیندیاں گیاں۔ ایں کنوں پہلے
 جو فیاض دیاں اکھیں ول نوٹیندیاں، اوکوں محسوس تھیا جو مٹانہ پڑیندے۔ اوتکھے تیکھے اٹھیا
 تے دلاں دی ڈوجھی ٹکر وچ بنڑیں ہوئے پخانے دی بجائے سوہانجڑیں دے گھائے وں
 دے ڈوجھے پاسے کندھ نال ٹکر لا کر اہیں کھڑے تڑے مٹرن شروع تھی گیا۔ سکھ دا ہک لمبا
 احساس ہا کہ جیند امل لایاں نہ لایا وںج سکیا اہا۔ طبیعت دے قدرتی تقاضیاں کوں تسکین تھی
 تاں سارا بُت لولہا تھیندا گیا تے فیاض وَلدا کھڑوے تے آتے دَر ب تھیا۔



(6)

دھچر سویر دا پچھ پچھ تے تھک گیا پروادھو نے تاں جیویں چپ داروزہ رکھ گھدا
 ہا۔ نہ کوئی آلا نہ کوئی بول۔ نہ کوئی حال حوال نہ کوئی گول پھروں۔ اے سھو گچھ وادھودی طبع
 دے خلاف ہا، ہیں گالہوں تاں دھچر کوں چھدا اپیا ہا۔ ڈوہیں بلیتن دے سنگتی ہن، ہک بے
 دا اچا ساہ گھدا وی محسوس کریندے ہن۔ پر آج تاں وادھو نے کمال کر چھوڑی، گردن دے
 پھیر وں وڈا سارارو مالا و لیٹی ودا ہا بھل ڈسیندا نہ ہا جو تھیا کیا ہے۔ پہلے تاں وادھو سمجھیا جو
 بخار تھیا و دس پر ہتھ لایاں رنگ ٹھڈے دے ٹھڈے۔ نہ کوئی سر درد نہ کوئی ڈند دی پیڑ۔ ول
 اتجھا ہا کیا جو وادھو ڈسن نہ چاہندا ہا۔

عام طور تے ایہو تھیندا جو اناں ڈوہیں دی بٹ کڑاک ای چلدی راہندی تے کم
 کارای۔ وادھودی تاں لونی تیلی دی دکان ہئی، آئی چلائی چلدی راہندی لیکن ایں دوران
 دھچر دھوبی پنجوی چھوی جوڑے کپڑیاں دے استری کر گھندا۔ پر آج تاں اوندے کنوں
 شام تیں پنج جوڑے وی مشکل نال استری تھئے، کیوں جو نہ تاں یاردا بلار اتے نہ

کھنکھو را۔ نماشی تھی تاں وادھو دکان بند کرن دی بجائے جمنی بال تے گدی تے بیٹھا
ریہا۔ دھچر دا ہاں اوکھا تھیا تاں اووی بگھدی استری دے کولے تاسلے وچ مندھاتے
وادھودی دکان دے اگوں پئے نکلے موڑھے تے آن بیٹھا۔ کجھ دیر تاں چپ ریہا جو بھناڑنا
گا ہک وادھودی دکان کھلی ڈکھ کراہیں آندا ویندا پیا ہا پر جنیں ویلے واند تھی تاں اُونے ہک
واری ول وادھوکوں اَلوایا پر وادھو نے کوئی جواب ڈیون دی بجائے منہ ڈو جھے پاسے پھیر
گھدا۔

پہلے تاں دھچر کوں بہوں خندق آئی تے دل کیش جو دکان بند کرتے گھر ڈو
پاندھی تھیوے پر جنیں ویلے اُون وادھوکوں چب کڈھیندا ڈٹھا تاں رہ نہ سکیا تے اگوں نہا تھی
تے گدی تے پیراں بھر بیٹھے وادھوکوں بھاگل پا گھدس۔ وادھو دھچر دے دے ہاں نال کیا
لکھا، آپ کنوں آپے دسکن پئے گیا۔ ہنجوں ہن جو منہ پُسنائی ویندے ہن۔ دھچر سمجھ گیا جو
یار کوں ڈکھ کہیں جاہر جن دانی بلکہ کوئی اندردی چو بھ ہے۔ وادھو ایس حال وچ وی کجھ دس
کوں تیار نہ ہا بس چپ چپٹا رُنی ویندا ہا۔ ہن تاں دھچر کوں یقین تھی گیا جو کجھیا دھک ولی
وارث نہ ہو وُن توں علاوہ بیا کیا تھی سکدے۔

”صبر کرو وادھو خان..... اللہ دی ذات جوڑا پتراں دا ڈیسی آ، تے اووی حیاتی
آلا..... بس توں مونجھانہ تھی، دل کوں نہ لا“..... دھچر نے ہک واری ول وادھو
کوں لگی پا گھدی پر اے دلاسہ وی کم نہ آیا تے وادھو دے ہنجوں کجھ بے وی برہ وادھو
لگ پئے۔

”یاریکیوں آہدا تاں ہاں جو حکیم رام لعل کوں ڈکھا گھن پر توں تاں قسم چائی و دیں
میڈی گالہ نہ منزں دی“..... دھچر نے ڈردے ڈردے ہک واری ول کھس مس کیتی
کیوں جو اتجھی گالہ تے وادھو اوندی گچی پئے ویندا ہا۔ پر آج تاں وادھو کھسکیا ای ناں تے

اویس دُسیاں چڑھیا رہ گیا۔ دھچر سمجھ گیا جو گالہ کچھ بئی ہے، وادھو ایویں روون آلا نہ ہا۔
 ”اویا رہجائی تاں کچھ گھٹ ودھ نی آلا نی؟“ دھچر نے ہک واری ول پینترا
 بدلیا۔ لکيا جو ہن تیر نشانے تے لگے۔ وادھو نے جھٹ ڈوہیں ہتھیں نال اکھیں اگھیاں تے
 اکڑتج تے بولیا ”جرات ہے اویں گندی رن دی“..... دھچر سمجھ گیا جو جھیرے دامنڈھ
 گھروں بدھیا پے تہوں تاں جو آن دکان تے دیرہ لائی بیٹھے۔

”میں چاہندا تاں چیر رکھیندا اویں او ترک رن کوں پر جاتراں دی کھیڈ وچ
 کون ہتھ پاوے۔“ وادھو ہک واری ول بھرتج بیٹھا۔
 ”جاتراں دی کھیڈ؟“..... دھچر حیران تھی تے چٹھیا
 ”ماء ڈلاونی.... بیا کچھ نیسی سجھیا تاں جن کھیڈن پئے گئی ہے.... منہ تے آ
 گنیس گندی رن دے، گوگھا چا چاڑھس میکوں اوندے جن نے۔“
 ”کڈن؟“.....

”گل شام کوں..... اوتاں حکیم دا چھوہر اُتھوں لنگھدا پیا ہا تے میکوں چھڑوا
 گمڈس ناں تاں اویں رن نے میڈامنز کاٹھن چھوڑیا ہا۔“ وادھو دے ہاں توں کاوڑ دا دکل
 لٹھا تاں ساہ سوکھا تھی گیا۔ پر ڈوجھے پاسے اے دکل دھچر دے دماغ وچ حیران کر بیٹھا۔ او
 تاں سُن تے حیران ہا جو وادھو دی ذال کوں سایہ کیویں تھی گئے۔ ”یار کہیں بھوپے کوں ڈکھا
 بھر جانی کوں.... میں سُنوم جو مڑ پیچی والے بھوپے کول انا گھٹا ڈے کراہیں خمیس دی شام
 کوں جن کھڈواوتاں گراڑے کنوں گراڑا سایہ وی وان وٹیندا اویندے۔“

”دفع کرس گندی رن کوں.... میں تاں اویں سویرے کاوڑ ڈیندا پیا ہمس۔“
 وادھو نے دھوتی چھنڈ کی تے گدی توں اٹھی کھڑا تھیا۔

”او عقل کوں ہتھ مارتے چھوڑا ایں کاوڑ شاوڑ کوں۔ کیوں رُلیندے شودی کوں،“

یتیم چھوہر ہے بھجائی ساڈی“..... دھجروی اے آکھ تے اُنھی کھڑا تھیا۔

”کاوڑتاں ہُن تھی تے راہی..... میں نی رہ سکد ایں سنڈھ دے نال“...

وادھوی سارے ڈنہہ دی یوسیت چھوڑ کراہیں تیکھے تیکھے دکان بند کرن لگ پیا۔

”اچھایا ریتی مرضی..... جو دل وچ آوی کر..... پر اے تاں ڈس جو گھر

ویندا پائیں ناں؟“۔ دھجروی پڑیں دکان دے بھٹے جوڑن لگ پیا ہا۔

”میں تاں شکل ای نہ ڈیکھاں اوں چندری رن دی..... مسیتاں سے ہن

دیرے نواب وچ، سُم پوساں کہیں وی مسیت وچ“۔ لگدا ایویں ہا جو وادھو چھڑا مہراں نال

ای نی بلکہ پورے و سبے نال نراض ہے۔

اتنی دیر وچ ایویں آواز آئی جیویں کئی موٹراں احمد پور والے پاسوں آتے صادق

گڑھ محل آلے پاسے مڑ گیاں ہوون۔ وادھو تے دھجرب کجھ بھل کراہیں دکاناں وچوں

باہر نکل آئے تے آواز ڈو کو کرن لگے جو کتی موٹراں ہن تے ایں ویلے آیاں کیا کرن

ہن۔ کجھ بے دکاندار وی چوس سانگے بزار دے ادھ وچ آتے کھڑ گئے تے اکھیں دیاں

اشاریاں نال ہک بے کنوں کچھن کیے خود سوال بن گئے۔ حکیم صاحب دی دکان وچوں

کجھ مریضاں دے نال نال حکیم صاحب دے چھوہر وی باہر ڈونکلے جہاں وچ فیاض وی ہا

پیا۔ فیاض تے وادھو نے پکے ویلے ہک بے کون ڈٹھا پر ڈو ہاں دے مہاندریاں تے انجو

انج تاثر واضح طور تے محسوس کیے ونج سکیندے ہن۔ وادھو نے بظاہر نفرت نال جھکی

جھون چا گھتی تے امر ادا گئی تے ہتھ پھیرن لگ پیا۔ صاف لگدا پیا ہا جو جو آن دیل پکڑی

کھڑے۔ جئیں ویلے جو فیاض دیاں اکھیں وچ اوندے کیے ترس ہا، صلہ رحمی ہئی۔ وادھو کوں

ڈیکھ کراہیں فیاض اوندے پاسے ایں گالہوں اُریا جو اوندہ حال حوال چا دے پر فیاض کوں

آپڑیں پاسے آندا ڈیکھ کراہیں پہلے تاں وادھو آپڑیں آپ وچ ای لگن لکیتے ول جلدی

نال دکان دی تھلی تے چڑھ گیا۔ فیاض کوں ملن توں آخر وادھو نہ بجاوے ہاتاں بیا کیا کرے ہا۔

اے سھو گجھ ڈیکھ تے ارمانی تھیا فیاض اُتھائیں رُک گیا تے ایڈے اوڈے کٹھے تھئے لوکاں دیاں گالہیں آلے پاسے توجہ کیشس جیڑھے جو دیرے آون والیاں موٹراں بارے آپو وانزیں اندازے لیندے پئے ہن۔ گجھ دا خیال ہا جو ضرور قائد اعظم تے اُنہاں دی سنگت ہوسی ایس گالہوں جو نہرو دی بھین و جے لکشمی پنڈت دی آمد کنوں پہلے ای او نواب صاحب کوں مل تے ریاست بہاول پور کوں پاکستان وچ شامل کرن دا اعلان کراون پے چاہندن پر اکثریت کوں یقین ہا جو ہووے نہ ہووے اے ضرور و جے لکشمی پنڈت ای ہے جیڑھی رات دے کھانے ویلے نواب صاحب کوں ملن آئی ہے۔ ایس آن وچ و سوچڑھو یا وی بوہڑ والے چوک کنوں بجھدا ہو یا آیتے پرے کنوں ای بوکن لگ گیا جو مال اسباب سھو ہتھ ہتھیکڑا رکھو، گجھ نہ گجھ ضرور تھیون والا ہے۔

نہو گلیار نے جیندی بزار وچ اجناس دے و پار دی دکان ہئی پو اتھی تے اگوہاں تھیا تے و سو کوں جھل کراہیں پکھن لکھا جو کیا تھیون والا ہے تے کیہو جیہا مال اسباب سانجھ سنبھال رکھوں۔

”پورا پتہ تاں میگوں ای کائی پر محل دے وڈے دروازے وچ پوریاں پنچ موٹراں وڑن، کیا آکھئی پوریاں پنچ موٹراں“۔ و سونے ہوکدے سوکدے سچے ہتھ نال پنچ انگلیں دا بجا بنزیندے ہوئے ڈسایا۔ ”میڈا خیال ہے جو ضرور انگریز وائسرائے دا کوئی افسر ہے جیڑھا نواب صاحب کوں چتاون آئے جو ریاست بھادیس جو کرے پر پاکستان نال نہ رلے“۔ و سوچڑھوئے تیکھے تیکھے ہک بی دزر کھی۔

”کیوں نہ ونجے ریاست پاکستان ڈو.... ہائیں کیوں نہ ونجے۔ کیا قصور کیئے

پاکستان نے۔ ہوؤں مسلمان تے رَلوں کراڑیں نال، اے کیوں تھی سکہے۔ میں
آہاں یا تاں ریاست ایویں راہوے خود مختیار امن امان دے نال نہ تاں ول پاکستان ای
ٹھیک اے۔“ بُوٹھیا رڈاڑھی تے ہتھ پھریندا یکدم خدق وچ آ گیا۔

”اومیاں پتہ کہیں کوں ہے کائنا جو قائد اعظم آئے، لکشمی آئی ہے یا داسرائے دا
کوئی افسر تے ایویں مفتا گرد دھال مچائی کھڑے او۔ مسئلیاں کوں عقل نال سوچیندے،
ایویں ہر شے کوں دبر دوس فی کر چھوڑیندا.... جو ہونزیر، اوتھی تے راہی۔ فیصلہ دولہا
سنیں کرنے تے اوجو کر لئی ٹھیک کر لئی، ریاست تے ریاستی عوام دے حق وچ کر لئی۔
چلو ہن جلدے بنڑو گھر و گھری، بال بچہ تانگھ وچ ہوسی۔“ مولوی نورالحق نے چھیکڑی
دھک اتکھالاتا جو جمع خود بخود ویلا تھیون لگ گیا۔

فیاض نے وی حکیم صاحب دی دکان وچ ورن توں پہلے پک واری ول وادھو
ڈوڈٹھا جیڑھا بیلا پئے کراہیں کانی اکھ نال اوکوں تاڑی بیٹھا ہا۔ فیاض اوندے ایس رویے
تے حیران ہوؤن دے باوجود اے سوچ تے مُسک پیا جو کل دے جھپڑے دے بعد وی
جو آن آپڑیں وانی پیا و نجن ڈیندا۔



(7)

تلسی دا کئی ڈیہاں توں عجیب حال ہئی۔ نہ کوئی بکھ نہ کوئی تریہے۔ آلس ای
آلس ہئی گجھ ایس طرحاں دی جو اصلوں گھیل تھی تے رہ گئی۔ نہ کپڑے بدلاؤن دی سرت
تے نہ کہیں کم کارڈ و روح رجوع۔ بس چھڑیاں اُباسیاں اُتے تروڑ۔ ماء دے کھڑکے تے
اُٹھی تاں باہندی ہئی پر بُت وچ گھومری گھتی بیٹھے مٹھے مٹھے جلول دا کیا کرے جیڑھا ہر
سک کوں پرو بھرا کرتے ایہو ہکو تقاضا کریندا ہا جو کوئی او کوں ایس طرحاں مندھے، چھچھو لے،
نیڑے تے ول چھنڈکا مار کر ہیں ساری آلس باہر ڈو چھنڈک چھوڑے۔

تلسی جئیں ویلے وی ایس ”کوئی“ دی سوچ سوچندی تاں او ندے تصور وچ ہکو
ای مہاندر اُبھردا..... فیاض دا۔ او کوں ایویں لگدا جو اُوفیاض ای ہے جیڑھا او ندے چھکے
کوں ڈاؤن پا کر اہیں، او ندی آلس نیڑے تے ولدے سروں اُشاک کر سکدے۔ تلسی گجھ
گجھ سمجھدی ہئی جو او ندے بُت دی اچھی کوں جے کوئی شانت کر سکدے تاں اُوفیاض ای
ہے۔ پر او کوں سمجھ نہ آندی پئی ہئی جو فیاض نال دل دی گاہہ کرے تاں کیویں کرے۔ اُو

تاں کئی کئی ڈہنہاں دے بعد جھکی جھون گھت تے آندے تے وَلدا جھکی جھون گھتی
 واپس رُویندے۔ لیکن ایں ساری راند وچ اُوفیاض دا چھیکڑی واری حیران تھی تے اُوکوں
 ٹرُٹرُٹیکھڑاں ہالی توڑیں نہ بھل سگی ہئی۔ تُلّسی دا اُس نہ چلدا ہا جو اُوفیاض کوں سڈ واوے
 تاں کیویں سڈ واوے۔ اُوکوں ایں گالہہ دا وی چنگی طرحاں احساس ہا جو اُو اوّل آخر
 ہندوانی ہے تے ہندوانی راہی وَل وی پتہ نی دل ایہو کیوں کریندا ہا جو اُوچّی گھنّے فیاض
 توں اُو لے گھولے تھیوے پئی۔ پہلے پہلے تاں تُلّسی کوں مرد ذات دی ایں کشش دا احساس
 ای کوئنا ہا۔ گھر وچ پک پُجو ہا جیڑھا سویرا گیا رات کوں وَلدا ہاتے وَل آپڑیں کمرے وچ
 وڑوینداتے اُوں توں بعد چکھوں گھر وچ کہیں نہ کہیں بہانے اٹھے ویلے سوڈھی دیرہ لائی
 رکھینداتے تُلّسی دی ماء اوندے توں صدقے قربان۔ ایں گالہوں تُلّسی کیجے مرد ذات دا
 تصور پک اُن بھاندے گراں آلی کار ہئی جیکوں کھاوڑاں نہ وی ہووے تاں منہ وچ
 چوڑاں عورت دی مجبوری ہوندی اے۔ اُوکوں اے سوچ تے وی اُبّے شروع تھی ویندے
 جو پریشی تاں بھادیں وشنونال پر سوڈھی کنوں آپڑیں آپ کوں کیویں نکجی جیڑھا باہندا
 تاں کلبے کمرے وچ اوندی ماء نال ہا پردید اوندی ہوندے اُنک اُنک وچ سوراخ کریندی
 راہندی ہئی۔

ڈوں مردیں دے ڈیکھن دا فرق تُلّسی کوں اُوں ڈیہاڑے محسوس تھیا جڈن جو
 اُوکوں چھیکڑی واری فیاض نے ڈٹھا ہا۔ سوڈھی دا ڈیکھن ایویں ہا جیویں جو اُو بھرے بزار
 وچ ننگی تھی گئی ہووے پر فیاض دا ڈیکھن ایں ہا کہ اُوکوں آپڑاں سھو گجھ ڈکھاتے وی
 پردے دا احساس تھیا ہا۔ پک دا ڈیکھن زری اذیت تے بے دا ڈیکھن کمال محبت۔ تُلّسی
 حیران تھیندی جو اوندے احساس دے بالکل برعکس چاچا سوڈھی اوندی ماء کوں کیویں
 بھاندے تے فیاض دا آون اُوکوں کیوں نی بھاندا۔ کیا ایں وی تھیندا ہوسی جو پکو مرد ڈوں

عورتاں وچوں پک کوں بنی طرحاں لگے تے ڈوجھی کوں بنی طرحاں۔ آخر اُو کبھڑی شے
 ہوسی جیڑھی پک واسطے تاں ماکھی ہووے تے بے واسطے گوڑی رَسول۔ اُوکوں کُجھ کُجھ سمجھ
 آندی ویندی ہئی کہ ضروری نی جو عورت ہوں مرد کیتے ای بنڑی ہووے کہ جیندے نال اُو
 پرندی اے تے بال جمیندی ہے۔ ہوسکدے جو اونداجٹہ کہیں بے مرد دے میچے اُتے
 اُکیریا گیا ہووے کہ جیندے نال اونداسماجی مُکلاواتاں نی تھیند اپر اُوراہندی ہوندی بن
 تے ہے۔ پک بے دے میچے تے بنڑائے گئے مرد عورت بھاویں دتھ وی جمن جاوَن اُو
 پک نہ پک جیہاڑے کتھائیں نہ کتھائیں آپس وچ ضرور مل تے راہندن، جسمانی
 بنجوگ دافطری تقاضا پورا کرن کیتے۔ تُلّسی کوں ایویں لکيا جواے تقاضا قدرت دے اُدھار
 طرحاں ہوندے جیڑھا امانت دار کوں اُوندی امانت پُچاؤن تگ مسلسل بے چین
 رکھیندے۔ شاید تخلیقی میچے دی بنیاد تے تھیون والی جُوت، سماجی جُوت توں اُتر ہوندی
 ہوسی۔

تُلّسی نے اسکول دے زمانے وچ کہیں اُستانی توں سُنز یا ہا جو مرد عورت دے
 جوڑے تاں اسماناں تے بنڑن پرہن احساس تھیند اپیا ہا جواے جوڑے اُونی ہوندے
 جیڑھے سماجی پرنیوے دی صورت وچ زمین تے بنڑائے ویندن بلکہ اے تاں اسماناں
 توں بنڑے بنڑائے آندن تے زمین تے پک بے دی گول وچ راہ بھلیندے سماج توں
 اُوڈھرتھی تے کہیں نہ کہیں شکل وچ آپڑاں جوڑ بکائی راہندن۔

تُلّسی کوں شاید آپڑیں سوال دا جواب مل گیا ہا جو کہیں عورت دا بھاندا مرد کہیں
 بنی عورت کیتے اُن بھاندا کیوں ہوندے۔ اُوندی ماء دی شادی تاں بھاویں حکیم رام لعل نال
 تھئی ہئی تے ایس سماجی جبر نال پک دھی وی جمن پئی پر لگدے اُوندابوتا چاچے سوڈھی دے
 میچے تے اُکیریا گیا ہا۔

”تاں کیا میڈی ماء آپڑیں فطری خجگ سانگے میڈے پو نال بے وفائی کریدی پئی ہے“..... تلسی آپڑیں آپ کوں الواون دی کوشش وچ بنی وی گھمر گھیری وچ آگئی۔

”کیا سماجی خجگ وچ راہندے ہوئے فطری خجگ دا اُدھار پُکا ونڑاں بے وفائی ہوسی۔ اگر اے بے وفائی ہے تاں کیا میڈے پو کوں ایندا پتہ کائنی یا اُونے جان بُجھ تے اکھنوئی کیتی ہوئی ہے۔ کیا اناں ڈوہائیں صورتاں وچ قصور میڈی ماء دا ہے یا پو دا۔“ تلسی جھکی جھون گھست تے بہہ گئی۔ او کوں ڈوہیں صورتاں وچ قصور پو دا ای لگدا پیا ہا۔ جے پئے ہوندیاں وی او کوں آپڑیں ذال دیاں جسمانی ضرورتاں دا پتہ کائنی یا پتہ ہے وی سہی تے او آپڑیں ذمہ واری کہیں بے تے چھوڑ خود پسلا تھی بیٹھے تاں ول وی اوندی ماء کوں پورا حق ہے جو اتجھے بندے نال ایہو جیہا ای سلوک رکھے۔ اے سوچ تے تلسی کوں آپڑیں ذہن وچ چاچے سوڈھی دے خلاف نفرت دے نکاس دا رُخ اوندے پو والے پاسے تھیندا محسوس تھیا۔

”ہک لھلے کیتے جے اے بے وفائی ہے وی سہی تاں میں خود کیمڑی راہ تے نُر دی پئی ہاں۔ تے کیوں ناں نُر اں۔ بھاویں جو میڈی شادی وشنو نال گنڑیں پئی ہے پر میڈا جسم تاں فیاض دے میچے برابر جوڑ بنزایا گئے“۔ اے سوچ تے اُونے ہک بھرویں نگاہ آپڑیں آپ تے پاتی تے ول آپڑیں آپ کنوں ای شرما گئی۔ تلسی کوں ایویں لکھا جو اُو فیاض دے جسم دا میچا ڈیدھی پئی ہے۔ اُونے ڈوہائیں ہتھاں نال آپڑیں آپ کوں ٹولنا شروع کیتا تاں پورے بُت وچ مستی دیاں سریراں جاگن پئے گیاں۔

”اچھاتے اے جسم فیاض دا میچا ہو وُن سانگے فیاض دی تلاش وچ ہے..... تہوں تاں اُو میکوں آپڑیں ڈو جھکیندے“..... تلسی بنی وی شرما گئی۔ ”جے میڈا اے وجود

فیاض دی امانت ہے تاں کیوں ناں اے امانت اُوں توڑیں مَجا میں ہولی تھیواں۔“ تلسی
 کھڑے توں لہہ چھم چھم مُردی وڈے شیشے دے اگوں ونج تے کھڑگئی۔ پہلے تاں آپڑیں
 آپ کوں اُتر اُزوں دُٹھس تے وَل کجھ غور ناں تے وَل تاں اصلوں ای غور ناں۔ اُوکوں
 آپڑاں سھو کجھ اُوپرا اُوپرا لگدا پیا ہا۔ جیویں اوندی روح کہیں بے دے بوتے وچ آگئی
 ہووے۔ تلسی نے پک دفعہ وَل آپڑیں جسم تے ہتھ پھیریا۔ اے جووی ہا پر ہا بہوں ای
 چسولا۔ اُو مسک پئی۔ ”ہُن اکھ نوٹی دی واری وِشنودی ہوئی۔“

تلسی دے گناں وچ کتھاؤں کوئی ہلکا جیہا بلارا آیا۔ ”ہووے نہ ہووے توں
 اے راند ضرور پُرو دابدلہ گھنن کیے رچیندی پئیں۔“ اُو آمرادی کھل پئی ”ہینزیاں دابدلہ
 کون گھندے۔ پُرو میڈا تاں ہینزیاں دی اُوں نسل وچوں ہے کہ جئیں آپڑاں سھو کجھ
 چاچے سوڈھی دے حوالے کر جگ جہان دادار وُکریندا بیٹھے پر گھر والی دی نبض ہتھیں ای نی
 آندی پئی۔“ اے سھو کجھ سوچ سوچ جتھ تلسی کوں پُرو کنوں نفرت تھیندی ویندی ہئی اُتھ
 اُوکوں چاچے سوڈھی داتاڑ ناوی ایڈا اُردا نہ لگدا پیا ہاجتنا جو پہلے لگدا ہا۔ اوندے کنیں وچ وَل
 کتھاؤں ہلکا جیہا بلارا تھیا جو جیہڑا جی کہیں رن کوں آپڑیں وکیر وچ وکیرن دی رمز
 جانزدے، اُوکوں پورا حق اے جو آپڑیں میچ تے اُکری ہوئی رن کوں رن رن سانجھے تے
 گج وچ نیڑے۔

ایں آن وچ ای دردی کُنڈی کھڑکی تاں تلسی دا ہاں دھڑچ تھیا۔ ”ضرور فیاض
 ہوئی۔“..... دل دے اُلاتے اُو اُوئیں ای تھل تھل کریندی باہر وُجھی تاں نہ سرتے
 بوچھن ہاتے نہ پیراں وچ جتی۔ ہالی اُو اُدھا دلان ای نہ لنگھی ہئی جو اوندی ماء نے دروازے
 تے بچ کراہیں کُنڈی کھول چھوڑی۔ لگدا ہا جو رن پہلے کنوں ای تانگھ وچ بیٹھی ہئی۔ تلسی
 دے قدم تاں اُتھائیں جھلیج گئے پر ہاں کوں کون جھلے، اُوئیں ای دھک دھک لائی کھڑا

ہا۔ تلسی کوں بھوتاں ایں گاہہ داہا جو ماء اوندی فیاض کوں اُتھاؤں دا اُتھاؤں وَلدے پیرے
 واپس نہ ٹوری آوے۔ پر جنیں ویلے رادھی ڈیڈھی توں باہر نکلی تاں اوندے چکھوں چکھوں
 سوڈھی وی آندا پیا ہا۔ ڈوہائیں دے چہریاں تے ہک عجیب جیہی خوشی دی گھالی نے تلسی دا
 رنگ اصلوں پھکو ہڑ کر ڈتاتے اُتھاؤں دی اُتھاؤں سک دم تھی تے رہ گئی۔ رادھی کوں
 وی بالکل توقع نہ ہئی جو اوندی اتنی احتیاط دے باوجود تلسی ایں طرحاں اُنہاں دے سامنے آ
 ویسی۔ ایں صورت حال وچ وَل وی رادھی نے سُر ت سنبھالی تے تلسی کوں بلوا
 چھوڑ یس۔ ”خیر تاں ہے پتر! اے کیا تھیا کھڑے تیکوں، وَنچ اندر وَنچ تے منہ متھاٹھہا۔“
 تلسی وَل وی بوی تھی اُتھاؤں کھڑی رہی۔ اوندی ماء دے چکھوں چکھوں ٹردا
 چا چا سوڈھی نکلی نکلی مُسک مُسک اُوکوں ایویں ڈیدھا ویندا ہا جیویں جو آدھا پیا ہووے کہ
 توں کتھ ویسیں تلسی..... میڈے میچے دی رَن چھڑی تیڈی ماء ای کانتی، ایندے بعد
 تیڈی واری ہوسی۔“ اوندیاں اکھیں گندھوئے دی نوک طرحاں اوندے بُت دی ولی ولی
 وِچ ٹنگ کریندیاں ہویاں برآمدے دی اُوٹ وِچ پرو بھریاں تھیندیاں گیاں۔

تھوڑی دیر پہلے اوندے دِل وِچ جا بنڑیندا چا سوڈھی وَلدے سروں ہک
 اتجھی گجھ طرحاں گھنب جھنڈک تے اوندے سامنے آ گیا جیڑھی ہک مُردار دا گوشت
 کھاندے ویلے ڈوجھی لاش دا ٹوٹا بھوراوی آپڑیں چنے وِچ پھسائی رکھیندی اے۔ تلسی
 کوں اُبتے آندے محسوس تھے تاں اُونے وَلدا آپڑیں کمرے ڈو بھجن دی کیتی تے رنگے
 پلنگ تے بہہ کراہیں ہک پھیری وَل سوچن لگ پئی جو ایں طرحاں دی بے وفائی دا ذمہ دار
 کون ہوندے..... اسماناں تے تھیون والی کوئی راند..... یا وَل زمین تے تھیون والا کوئی
 اُن بھاندا، اُن سونہاں فیصلہ۔ جیندی نہ کوئی دواتے نہ کوئی دارو۔



(8)

ترتجھے ڈینہہ دی وی شام مُکلاؤن لگی تاں وادھودی مانو نہہ کوں رلے لا کراہیں
 دھچر دے گھر آن بیٹھی تے دھچروی منہ ہتھ دھوتے روٹی مانی کھادے بغیر ذال کوں پاسے
 نال بلہا انہاں دے سامنے آڈر سانگے جھکی جھون گھت تے بہہ تھیا۔ بھادیں جوڈوہیں
 ذالیں پردے پاروں گھنڈ کڈھی بیٹھیاں ہن پرؤل وی وادھودی مادیان اکھیں وچوں پر پر
 واہندے بنجوں صاف نظر دے پئے ہن۔ ایں توں پہلے جو وادھودی مانگجھ آہدی، دھچر خود
 ای بول پیا ”اماں کیتی تاں وادھونے ہے پر شرمسار میں آں“۔

اے سُنز ناہاتے وادھودی مادا سارا حوصلہ جواب ڈے گیا۔ ”پتر توں تاں چھڑا
 شرمسار ہیں پر ساڈی سنبھال کنیں لاہونڈیں ہے۔ یارتیڈے کوں تاں غیرت نی آئی جو گھر
 وچ ڈوں رناں ترے ڈینہاں توں کلہیاں مردیاں ہن بکھیاں ترسیاں۔ نہ گھروچ کھاؤن
 کوں گجھ ہے تے نہ اساں کتھائیں ونج سکدیاں ہئیں پر اوں وڈے غیرتی کوں پرواہ ای
 کانہی۔ میڈا سنبھا ڈے ڈے اوکوں، جے او گھرنی آندا تاں میں وی ایں چھوہر کوں نال

لاتے مسیت دے دَر تے وَنَج باہساں پنن کیتے۔“

اے سھو گجھ آہدے ہوئے وادھودی ماء دے منہ توں گھنڈتاں لٹھا سولتھا، مہراں دا گھنڈ وی پسلا تھی گیا جیرھی آپڑیں سس دے برخلاف املک نوں زروئی بیٹھی ہئی۔ نہ کوئی بَنج نہ کوئی رَنج۔ دچھردی نگاہ اچا چیت او ندے مہاندرے تے پئی تاں اُتھائیں ٹھہر گئی۔ ”ایڈی سوئی رَن.... اے تاں خرم سیں دی حیدر باندی کوں وی کچھوں سٹندی ہے کہ جیندے کیتے پورا ہند سندھ پاگل تھیا و دے۔ اُوکوں ارمان تھیا جو وادھو کیوں گالہہ گالہہ تے آپنی سونے سنوئیں ذال کوں کو جھی تے جگ جہان دیاں کو جھیاں رَنان کوں وی سوہنا سٹیندے۔ کیا او ندا دماغ خراب اے یا وُل کتھائیں آپڑیں کہیں کان قصور کوں لکا وں کیتے ذال کوں گندا کیتی رکھیندے۔“ دچھردا دماغ تیکھے تیکھے بھنوالیاں کھا وں لگ پیا۔ ”ایندا مطلب اے ہے جو وادھو دا بال بچہ نہ تھیون وچ قصور وادھو دا ہے، بھجائی دا کائی۔ اے بھاء وانگوں بگھدی ذال سٹھ تھی کیوں تھی سگدی اے۔“

دچھردے ایں گویڑ دوران مہراں کوں لکيا جو اُوکوں ڈھگ دیر دا تاڑی بیٹھے۔ اونے دیداتوں تے کیتی تاں دچھرنال اکھ وَنَج ٹکری۔ پر مہراں نے نہ تاں اکھ نیوئیں کیتی تے نہ گھنڈ کڈھن دی کوئی کوشش۔ اُلٹا اودھچر کوں اُوئیں ڈیکھن بہہ گئی جیویں جو اُوکوں ڈیدھا پیا ہا۔ دچھراوندے ایں طرحاں ڈیکھن دی تاب نہ گھن آیتے گھبراتے سیس زوا گھڈس۔ مہراں ساری صورت حال توں بالکل لاتعلقی آپ کنوں آپے مُسک پئی ”ہونہہ! مرد بنزئیں وَدِن۔ رَن دی دیدتاں سہہ نی سگدے پر ہمس مریندن اوکوں بدھ رکھن دی۔“ دچھردی اے حالت ڈیکھتے اُوکوں اُوں گھبر و فیاض دیاں بہیں دا وکیڑا آ گیا کہ جیندے وچ پھس کراہیں اُو پھسک وی نہ سگی ہئی۔ ”اے سارے جو آن فیاض وانگ کیوں نی ہوندے۔“ فیاض دا سوچ کراہیں مہراں دا اَنگ اَنگ خود بخود تھڑکن لگ پیا۔ اُونے وبل

تے خود کوں ڈٹھاپر ڈیکھن وچ تاں کجھ وی انوکھڑا نہ ہا۔ اوکوں محسوس تھیا جو تھڑکاٹ داتاں
چھڑا احساس ہا، اصل وچ اوندی روح تیں کجھ ٹرندا پیا ہا، تروڑ ہا کہ جیڑھا اندروں اندروں
ای ڈلیکاں پاؤن شروع کر چکیا ہاتے مہراں کوں دھچر دے گھر اوندی ذال دے سامنے
باہون اوکھا لگدا پیا ہا۔

ڈوجھے پاسے دھچروی ایس گویڑ وچ ہا جو ایڈی سوہنی زنانی دا اے حال بنڑاتے
وادھو خود گھروں کنارا کیوں کیتی و دے۔ بے او مہراں دے جو بن کوں جھلن دا حوصلہ نی
رکھیندا تاں چھوڑے اوکوں طلاق ڈیوے۔ طلاق دا لفظ سوچ وچ آون نال ای دھچر کوں
یاد آیا جو وادھو تاں خود ای مہراں کوں طلاق ڈیون دا فیصلہ کیتی و دا ہا۔ اپڑیں دھج بنڑاؤن
واسطے فوراً بولیا ”وادھو تاں کدوڈن ہے، آدھے میں تاں ذال کوں طلاق ڈے تے
راہساں۔ اے تاں میں اوکوں سمجھائے جو ایڈی چنگی بھلی ذال کوں طلاق ڈے تے رلسیں
تاں توں رلسیں۔ ول بیا ساکھ ای کہیں نی ڈیونڑاں۔“

دھچر دا خیال ہا جو اوندی گالہہ سُن تے مہراں روسی دھوسی، اوند امنت ترلا کر لسی جو
اودا دھوکوں کا وڑ ڈیون توں ہٹکے پر مہراں داروہیہ تاں ایویں ہا جیویں اُونے کوئی گالہہ سُنی ای
نہ ہووے۔ مہراں دی لا تعلقی تے لا غرضائی توں ہٹ کر ایہیں وادھو دی ماء نے پتر دی جند
کوں پٹن شروع کر ڈتا جو اُونے مہراں کوں طلاق دا سوچیا کیویں ہے۔ ”کنتے ویسی شودی
یتیم چھوہر، نہ ماء سرتے نہ پو۔ بے ہوون دی ہاتاں میں ول وی اے کدھت نہ گرن
ڈیواں ہا۔ مہراں تاں میڈی بھین دی دھی اے، میڈا خون ہے، میں جوڑتے تھیون ڈیندی
ہاں کا وڑ کوں۔“

”امّاں میڈی تاں نی منیندا“۔ دھچر نے ول بیا پینتر ابدلیا۔ ”توں ای کجھ سمجھا
جو بھجائی ساڈی کوں حکیم رام لعل کوں ڈکھاوے۔ چنگا بھلا سیانا ہے۔ اللہ مالک اے، پتر نہ

تاں دھی تاں کڈھائیں نی گئی۔“

”اُو خود کیوں نی ڈکھیندا حکیم کوں۔“ مہراں پہلی واری بولی تاں اُلا وچ گجکار ہا،
اُن وے جھڑ والا۔ ”جھڑی میں رہ گئی ہاں حکیمان کوں ڈکھاؤن کیئے۔ ادا آکھ اپڑیں یار
کوں کہ ڈیوے میکوں طلاق۔ ول اُو وی پر نیوے تے میں وی پر نیندی آں، ڈیدھے ہئیں
جو کیندا بال پہلے جم دے۔“

مہراں نے تاں جیڑھی گالہہ کرنی ہئی کر چھوڑی پروادھودی ماء حیرانگی تے شرم نال
گھنڈ وچ ای بڈ موئی تھی تے بہہ گئی۔ دھرتے اوندی ذال دا حال وی عجیب ہا۔ اُنہاں
دیاں اکھیں وی مہراں ڈواٹک گیاں ہن۔ وادھودی ماء نے دھچکوں یکا تڑیندا ڈٹھاتاں
ہتھ ودھاتے مہراں دا گھنڈ جوڑن لگی جو اوند پر دہ بے پردگی آ لے پاسے وچ چکھیا ہا پر مہراں
طرفوں کہیں قسم دا کوئی دا تاثر سامنے ای نہ آیا بس چپ کرتے دھچروالے پاسے ڈٹھی ویندی
ہئی۔ ڈیکھن آلیاں کوں سمجھ ای نہ آندی پئی ہئی جو کون کیوں تڑیندا پئے۔ ایں صورت حال
وچ کہ جنیں ویلے مہراں وی وادھوڈ و دید ٹکائی بیٹھی ہئی، اُو ادھر تیج تے اٹھی کھڑا تھیا۔ وادھو
اٹھیا تاں اوندی ذال وی اٹھی کھڑی تھی تے اکھیں اکھیں وچ اوں توں پچھن لگی جو اُنہاں
کوں روٹی مانی وی کھو اونزیں ہے یا کوئنا۔

دھچرتاں کجھ اتجھا و بلیا جو ذال دی سکھڑیں شارَت وی نہ سمجھ سکیا۔ ”اماں توں
بھجائی کوں گھن تے گھر جُل تے میں وادھو کوں گول کراہیں گھدی آنداں۔“ وادھو تکھے
تکھے گالہہ کریندا کوٹھے وچ وڑ گیا پر ذال اوندی وادھودی ماء تے گھر آلی کوں مُکھاؤن کیئے
اُتھائیں کھڑی رہی۔ پتہ نی کیوں وادھودی ماء کوں ایویں لگدا پیا ہا جو دھچرے نے اوندی گالہہ
اُتر اُتھوں سُزوی ہے تے اُو وادھو کوں گھر گھن آؤن والا کائی۔ ول وی ویندیاں ویندیاں
اُونے اُپے بٹارے وچ دھچر کوں سُزا چھوڑیا جو پتر وادھو گھر نہ آؤن چاہوے تاں میکوں

ڈسا ضرور ونجیں، میں بے مفتی تانگہاں نہ بیٹھی۔

اُوڈو ہیں گھردی دَرسال لنگھیاں تاں دھچر دی ذال پئے دے بگیں پئے گئی۔

”اِیں طرحاں وی ٹھاندا ہئی تیکوں یاردی ذال کوں تاڑتے باہونڑاں.....
ہوش ہئی تیکوں۔ اُج تاں اصلوں تھتھوں چُک گئیں۔ نہ اوندی سَس دالحاظ نہ میڈا کوئی
حیا۔ آخر کیہڑی انوکھڑی گالہہ ہئی اوندے وچ۔ کڈھائیں نی ڈٹھی جوان چھوہر!“.....

دھچر دی ذال نے دھاندل تاں تائی پر اُوکوں سمجھ نہ آندی پئی ہئی جو کیا جواب
ڈیوے۔ ”جوان چھوہر یں تاں بہوں ڈٹھن پرایہو جی پگی پگی تے اپڑیں ای زورنال ڈلی
ڈلی کڈھائیں نی ڈٹھی“۔ اُوگھڑا ونج تے ونج، گھڑا ہڈا اکا کرتے منہ تے ٹھڈے پانی دے
چھنڈے مار مار خودنال ای الیندا اپیاہا۔

”کیا بُو بُو لائی کھڑیں..... لُندھ پ دی وی کوئی حد ہوندی اے۔ اُو ذال پئے
تاں منیج پوسن، اُج نہ تاں کُل، پر تیڈی کیہڑی عزت رہ گئی جو گھر آیاں کوں پانی کانجی وی
نوی پُچھیا“۔ ذال دیاں گالہیں دھچر دے سر دے اُتوں لنگھدیاں پیاں ہن۔ اوتاں اِیں
گوڑ وچ ہا جو ہن تیں وادھو اوندے نال گوڑ کیوں مریندا ریہے۔ کیا ذال کوں کوجھا آکھ
کراہیں اوندی کہیں محرومی کوں تسکین ملدی اے یا اونی چاہندا جو اوندی اِیں حالت وچ
کوئی وی بیمار دوندی ذال وچ دلچسپی گھنے یا اُوں ڈو قدم و دھاوے۔ شاید ایہا گالہہ ہئی جو
وادھو بھجائی کوں حکیم کول وی نہ آون ڈیندا ہا۔ ایہا سوچ سوچیندا وادھو نال دے گھڑے
تے بہہ تے مونڈھے تے پئے رومال نال منہ پونجھن لگ پیا۔

”وادھو کریندا کیا پئے اپڑیں نال تے اُوں شودی چھوہر نال۔ ہن اوا یکوں
گوگھے نہ چاڑھے تاں بیا کیا کرے۔ میں سمجھداں جو اے بھجائی دی شرافت ہے جو ہالی
توڑیں اڈے اڈے منہ نسی ماریا، نہ تاں اوکوں کوئی تھوڑ ہے بھلا۔ خواخواہ ذلیل کیتی کھڑے

۔ علاج کراوے تاں آپڑاں کراوے نہ تاں جان چھوڑے اوندی، کاوڑ ڈیوے۔“ اے سارے سوال دھچر دی شکل توں صاف پڑھے ویندے پئے ہن پر ذال اوندی گئے تگ لبار مریندی، اوڑک چپ کرتے گھر دے کم کار وچ بخت گئی جو ویلے سر مکاتے نکے دے اٹھن توں پہلے ای فارغ تھی باہوے۔ پر پک گھبرا اوندی جان نہ چھوڑیندا پیاہا۔ آخر عورت ہئی، آپڑیں پئے دا کہیں غیر عورت کوں گرم شیرے دے کڑاہ وچوں نکلی تازی جلیبی سمجھ کے ڈیکھن کیوں بھل سکدی ہئی۔ خاص طور تے اوں دل بھنی عورت کوں جیڑھی جذباتی لحاظ نال تازی تازی مندھی گئی ہووے، مسلی گئی ہووے۔ اُونے کوٹھے ڈوجھات ماری، دھچر شیشے دے اگوں کھڑتے سیندھ کڈھیندا پیاہا۔ شاید اودھوکوں مناوَن ویندا پیاہا۔ ذال اوندی نے کجھ سوچ تے اڑنگی ماری۔

”روٹی تاں کھادی ونجو“.....

”وادھوکوں گھدی آواں..... ڈوہیں رل تے کھاندے ہئیں“۔ اے آکھتے

دھچر گھروں باہر نکل گیا۔



(9)

1947ء دی شروعات دے نال ای پوری بہاول پور ریاست وچ سیاست اتے سیاسی سرگرمیاں تے پابندی ہوون بے باوجود ریاستی مستقبل بارے سیاسی اُتھل چٹھل زور پکڑیندی ویندی ہئی۔ 1942ء وچ نافذ کیے گئے پبلک سوسائٹیز ایکٹ پاروں جتھ کوئی سیاسی پارٹی بناون دی ممانعت ہئی اُتھ کہیں ہندوستانی سیاسی جماعت دی کوئی برانچ دی ایتھاں قائم نہ تھی سکدی ہئی۔ لیکن ول وی ریاستی حکومت دی اکھ نوٹی سانگے کئی انڈین سیاسی جماعتاں ریاست وچ آپڑاں آپڑاں دفتر بنڑائی بیٹھیاں ہن لیکن اوپرے ناواں نال۔ مجلس احرار داناں حزب اللہ، مسلم لیگ، جمات المسلمین تے انڈین نیشنل کانگریس دا ریاستی ناں خدام وطن سبھ لوکاں کوں معلوم ہاتے ہندوستان دی تحریک آزادی کہیں نہ کہیں شکل وچ عملی طور تے اگوں تے ودھدی پئی ہئی۔ ترے جون 1947ء دا منصوبہ سامنے آون توں بعد سیاست گلی محلیاں وچوں نکل تے چوک چورستیاں تک آن پہنچی۔ غوغا صرف ایہو ہکو جو نواب صاحب دا فیصلہ کیا ہوسی۔ پاکستان، ہندوستان یا ول آزاد حیثیت۔

ریاست بہاول پور پنجاب تے سندھ دے اُدھ وچ ہوؤن دے باوجود قدرتی طور تے آپڑاں اُنچ وجود رکھیندی ہئی۔ ستلج دریا ایکوں پاکپتن، ملتان، وہاڑی تے لودھراں توں اُنچ کریندا ہاتاں ستلج تے چناب رَل کراہیں مظفر گڑھ نال حد بندی کریندے ہن۔ اے ڈوہیں دریا سندھ نال رَلن توں بعد بہاول پور کوں راجن پور تے گھونگی کنوں نکھیرتے روہی نال گنڈھ چھوڑیندے ہن جیڑھی جو بیکانیر، جیسلمیر تے سندھ وچ تھر نال رَل ویندی ہے۔ بھاویں جو ریاست وچ کوئی پہاڑی سلسلہ نہ ہا پر وِل وی اتھوں دے میدان تے پانی دی فراوانی نے چارے پاسے ساوِل ای ساوِل وچھا رکھی ہئی۔ لوک خوشحال تے ساوے سوکھے، جرائم نہ ہوؤن دے برابر تے بزار سماں تے گاہکاں نال بھرے ہوئے۔ مذہبی رواداری دے ہوندیاں ہوياں وی ریاست دی مجموعی شناخت اسلامی ہئی تے نواب صاحب اسلامی تعلیمات تے روایات دے سب توں وڈے پرچارک۔ ریاستی آبادی وچ بھاویں جو مسلمان اکاسی فیصد تے ہندو، سکھ، عیسائی وغیرہ انوی فیصد پر وِل وی ہندو آں سمیت سارے غیر مسلمان کوں ہر قسم دی مذہبی آزادی ہئی۔

ریاستی حکومت دا اخبار ”صادق الاخبار“ چھپائی دے لحاظ نال ست ڈیہنہاں پر ریاستی معاملات دے نال نال آسے پاسے دی وی خبر رکھیندا ہا۔ تحریک آزادی دے نگھن دے بعد ہندوستان دے بیاں علاقیاں طرحاں ریاست دے ہندو آں وچ وی آپڑیں بقا بارے بے چینی تاں ہئی پر تھولی گھٹ۔ ایں بے چینی کوں ڈیدھے ہوئے جتھ صادق انجرن کالج بہاول پور وچ ”انجمن رفیق طلباء“ بنی اتھ مسلم لیگی نظریات دے ودھارے کیتے ”مسلم بورڈ“ وی سامنے آ گیا جینے ”جماعت المسلمین“ دے نیڑے آتے ریاست دے پاکستان نال الحاق کیتے تحریک شروع کر ڈتی اتے ایں تحریک دے ایرے ڈو اخباراں ”نوائے مسلم“ تے ”انصاف“ تے بدھ گئے۔ پردیرے وچ انہاں ڈوہیں اخباراں دی

چلت نہ ہوون برابر ہی۔ جے کوئی کڈ ہائیں کتھاؤں لکاتے گھن دی آندا تاں ایہو سمجھیا ویندا جو اونو اب صاحب دی بجائے خود ریاست دے مستقبل دا فیصلہ کرن چاہندے۔

ایں ساری صورتحال وچ ریاست دی مذہبی اقلیت دا ہکواں وچار ہا جو بھادویں گجھ وی تھیوے انہاں کوں اناں دے گھراں وچوں نہ کڈھیا ونجے تے نہ ای وطن توں بے وطن۔ انہاں دا تاں جیون مرن ہیں و سبے نال ہے تے ایہو ای انہاں دی سُجھان ہے۔ ایں سوچ دا سبب نواب صاحب طرفوں ول ول دیاں یقین دہانیاں وی ہن کہ جہاں دے باوجود اتھوں دی ہندو آبادی کوں لگن لگ پیا ہا جو ریاست وچ انہاں دے ڈیہہ گنڑیں ونج چلن۔ آپس وچ نالو نال رہون والے ہمسایاں کوں وی ہک بے کنوں بے معلوماں ڈر محسوس تھیون لگ پیا ہا۔ صاف ڈسدا ہا جو ہر کوئی کہیں ان چتے موقع یا مصیبت دی ان سوئہی تاں گھ وچ چھر کیا و دے یا ول کہیں اتجھے موقع دی تلاش وچ ہے جیڑھا کہیں ویلے، کتھاؤں وی آسکدے۔ پر اے آکھراں مشکل ہا جو ایں موقع دے بعد کون شکاری ہوئی تے کون شکار۔

انہاں ڈیہہ انہاں احمد پور وچ ہک اتجھا واقعہ تھیا کہ جینے ریاستی آبادی دے مختلف طبقیات وچ ہک ان ڈٹھی ڈلیک پا چھوڑی۔ احمد پور دے دیرہ نواب دے ادھ وچ جتھ جی ٹی روڈ وچیں شہراں کوں انج کریندے، اتھ نادریاں دے موڑ نال ہک چوک جیہا بن گیا ہا تے چوک دے نال ای سجھ لاہ والے پاسے نہر دے بنے تے پرانا مسوان ہا۔ ہندو اتھ کر چھی سالوں توں گھٹ عمر دے بالاں کوں تاں دفنیںدے ہن پر ایں عمر توں وڈے بالاں دیاں لاشاں کوں ساڑیا ویندا ہا۔ اتھ کر لاش کوں ساڑن دی صورت وچ ترے ڈیہہ انہاں بعد اوندے وارث آتے ہڈیاں تے سوا کٹھی کرتے واہندے پانی وچ و ہا چھوڑیندے ہن۔ تھیا ایں جو ہک گھرو دی چتا کوں بھاء لاؤن توں بعد جنیں ویلے اوندے گھر والے

کو پری پھٹن دا انتظار کریندے پے ہن کہیں نے نہر دے ہتے کوں اُرداروں ٹک لا چھوڑیا
تے ول ڈیدھے ای ڈیدھے پورامسوان گوڈے گوڈے پانی نال بھرتج گیا۔ کجھ لوکاں نے
آتے گواہی ڈتی جوڈوں بندے جہاں نے مولھ ماری ہوئی ہئی، نہر کوں جان بُجھ تے ٹک
لیندے پے ہن۔ شرارت بھاویں جنیں وی کیتی پر ایں چھوٹی جہی گالہہ نال ہندو آبادی وچ
نہ صرف کاوڑتے کرودھ ودھی بلکہ ڈرتے بے اعتباری جیڑھی پہلے ٹانواں ٹانواں محسوس کیتی
ویندی پئی ہئی ہن کجھ اچھی تھی تے سامنے آگئی۔ اقلیتی مذہب دے لوکاں نے مشتعل تھی
تے بھلا کیا کر گھنڑاں ہا، بس ایہو تھیا جو اُنّاں نے ولرے تھی راہون دی بجائے پکے محلیاں
وچ راہون شروع کرڈتا۔ کاروبار جیڑھا پہلے ای ہندوواں تے سکھاں کول ہا، مندی داشکار
تھیندا گیا، ایں گالہوں جونواں پیسہ لاون براگھاٹے داسودا ڈسدا پیا ہا۔ اُنّاں لوکاں نے غیر
یقینی دے اناں حالات وچ نویں گھرتاں کیا بنڑوانے ہن، پُرانیاں دیاں مُرمتاں وی
اگوں تے کر چھوڑیاں۔ نواب صاحب دی پوری کوشش ہئی جو ریاست دی ساری آبادی
پک مُٹھ تھی تے راہوے تاں کوئی اتجھا فیصلہ تھی سکے جیڑھا عوام تے ریاست دے مفاد
وچ ہووے پر کانگریس تے مسلم لیگ دے حمایت یافتہ پریس نے آپڑیاں آپڑیاں خبراں
نال اتھوں دی آبادی کوں شعوری سطح تے کئی خانیاں وچ ونڈ چھوڑیا ہا۔ اے گالہہ یقیناً نواب
صادق محمد خان جیسے عوام دوست حکمران کیتے فکر مندی دا موجب ہئی جیندے وچ ہر آون
والا ڈینہہ ودھارا ای کیتی ویندا ہا۔



(10)

حکیم رام لعل اکثر گھر ڈوشام دے بعد آپڑیں گھوڑے ٹانگے تے دیرہ نواب توں
 احمد پور ویندا ہا۔ بھاویں جو کو چوان اوند ا ورہیاں داملازم تے اعتباری ہوون دے نال نال
 ہاوی ہندو مذہب دا پرول وی بدل دے حالات وچ احتیاط دا تقاضا ایہو ہا جو سمجھ لاہون توں
 پہلے او گھر آپڑ گیا کرے، سو اُونے کئی ڈینہاں توں ایہو چا نیستی تے مطب مغرب توں بعد
 عشاء توڑیں فیاض دے حوالے کر ڈتا۔ ایندا نتیجہ اے نکلیا جو مرد مریض تے بڈھڑیاں
 رناں تاں ڈینہہ کھڑے نال حکیم رام لعل کون ہتھ ڈکھا گھندے ہن پر نیٹنگر چھوہریں دی
 ایہا کوشش ہوندی ہئی جو کہیں نہ کہیں بہانے دیر تھیوے تے اُناں دی وینی بڈھڑے حکیم دی
 بجائے گھرو فیاض دے ہتھ وچ آوے۔ لیکن فیاض کون ایندے وچ نہ کوئی پُرس تے نہ
 کوئی رَس۔ اوکوں کیا جو گسنی کیندی ہے تے چھوہر کیہو جی ہے۔ اوتان بس نبض دی رفتار
 تے ماس دی گرمائش نال غرض رکھیندا تے بُجھ گھندا جو معاملہ کیا ہے۔ اوکوں اُناں
 چھوہریں تے وی کاوڑ چڑھدی جیڑھیاں کجھ نہ ہوندیاں وی محض بیماری مَھلاتے آن

باہندیاں ہن۔

اتجھیاں مریضاں کوں اُوکیا دوا ڈیندا تے کیا اُناں دادار وُ کریندا۔ پہلے پہلے تاں فیاض کوں کجھ سمجھ نہ آندی ہئی جو اے کبھو جیہاں بیمار ہن جہاں دی نبض اُناں دے خلاف گواہی ڈیندی ہے۔ ایں پاروں اُو اُناں کوں بھاویں جو چھنڈک چھوڑیندا پر اُو بیاں وی چڑھیاں پوندیاں۔ اتجھیاں دیاں ماواں وی مجبور ہن جو وُٹب تاں اولاد دی کرنی پوندی ہئی۔ ایندا نتیجہ اے نکلیا جو ڈو جھے ڈنہہ حکیم صاحب کو شکایتاں لگڑیاں شروع تھی گیاں جو نکا حکیم توجہ نال مریض فیاض نی ڈھیدا اے ایویں اُتر اُتر اُتر اُتر چلائی رکھیندے۔ حکیم رام لعل نے فیاض دی چھکائی کیتی تاں اُو نے ساری رام کہانی سنرا چھوڑی جو رَناں ایویں کوڑ دی بیماری پھلاتے دوا گھنن آن باہندن۔ خود ڈسو میں کیا علاج کراں اناں دا تے کیہڑی بیماری دا علاج کراں۔

”پُتر کنیں آکھے توں بیماری دا علاج کر، علاج تاں مریض دی نیت دا کیتا ویندے۔ ضروری نی ساڈے کول آون والے سارے مریض بیمار وی ہو وِن۔ اے جیزھیاں تنگیں ہوندن ناں، اناں کوں سب توں وُڈا وُلا گھروں نکل تے باہر دی ہوا جھٹن دا ہوندے، ایں سانگے اے بیماری پھلاتے ساڈے کول آن باہندن۔ ساڈا کیا ویندے ڈوں پُڑیاں پھکی دیاں ڈے تے۔ اُناں دی نیت دا علاج تھی ویندے تے ا ساڈی لائی چلائی وی تھی راہندی اے۔“

”پر حکیم صاحب! اے تاں بے ایمانی.....“

”بچہ بے ایمانی وی تاں بیماری اے، جے اُساں ڈوں پُڑیاں نال علاج کر چھوڑیوں تاں ساڈا کیا ویندے۔ اُساں نہ کریسوں تاں بیا کوئی کریسی۔ اُساں کیوں خواہ مخواہ آپڑیں روزی تے لت مارتے گا بکی خراب کروں۔“ حکیم صاحب اختا تھی تے بولیا۔

فیاض نے حکیم رام لعل دی گالہ سُنڑیں تاں اوندے ایمان دی ماڑی ہک لُحے
 وِچ دھرتی تے دڑیں آن تھئی۔ اُوکوں ایویں لکیا جو اوندے بُت کوں کہیں دُنڈ کیاں نال ایں
 طرحاں کُٹے جو ہڈیاں وی اُندرو اُندری ڈالے پھالے تھی تے بھور بن گئیں تے اُولوتھ بن
 کراہیں کہیں اروڑی تے پے تھیا جتھ مکھیاں دی بھنکارا بھنکارا ہے۔ فیاض کوں تاں حکیم
 رام لعل کہیں فرشتے طرحاں لگدا ہوندا ہا جیڑھا سارا ڈینہہ حکمت دی گدی تے بہہ تے
 لاچار مریضاں وِچ شفا و نڈیندا راہندے۔ پر جیڑھے حکیم داروپ آج اُونے ڈٹھا اوتاں
 کہیں طرحاں وی اُوں حکیم رام لعل نال نہ رَلدا ہا۔ اُوڈ کھارا تھی تے مطب دے باہروں
 نکل آیا تے باہر لے پھٹے تے بیٹھے مریضاں کنوں پرو بھرا تھی بیٹھا جیڑھے جو حقیقت ڈیون
 توں بعد وادی تانگھ تنگھیندے بیٹھے ہن۔

”جے حکیم لوکیں دی بے ایمانی دا علاج بے ایمانی نال کریسی تاں وَل حکیم دی
 بے ایمانی دا علاج کون کریسی“۔ اے سوچ سوچیندے اوندی دید سڑک دے پار گئی تاں کیا
 ڈیدھے جو وادھو تے دھچر، ڈوہیں بھاں لائی بیٹھن۔ وادھو اُونیں پہلے آلی کار خوش تے مگن۔
 پر جیویں اوندی نگاہ فیاض تے پئی اومتھے تے تریڑی پاکنڈ ولاتے بہہ گیا۔ فیاض کوں اُو ویلا
 یاد آ گیا کہ جڈاں اُوندی ذال اُوکوں گھوگھا چاڑھی پئی ہئی تے اُوکٹی وانگ اُوندی وکیر وِچ
 پھٹکدا اپیا ہا۔ فیاض آپڑیں اندر تھیون والی ساری تُرٹ بھج دی کیفیت دے باوجود مُسک پیا
 پر اے مُسکن ایویں ہا جیویں زہر دا گھٹ بھرتے بیٹھا ہووے۔

اُو حیران ہا جو کجھے لوک ہن اوندے چار پھیر۔ بغیر کہیں سُجھان دے جیون آ لے
 لوک پر ہر کہیں نے آپڑیں آپڑیں گھاڑویں سُجھان دے ٹوکرے سرتے رکھے ہوئے ہن۔
 ہک پاسے ایں ریاست دا حاکم ہے کہ جینے پندرہ لکھ دی ریاستی آبادی دی تقدیر دا فیصلہ
 چھڑی آپڑیں ہاں یا ناں نال کرنے۔ بے پاسے اُندا پو ہے جئیں ساری زندگی نواب

صاحب دے فوجی بینڈ دیاں سُر اں تے جگہاں مریندے گزار ڈتی ہے تے ہُن آپڑیں اگلی نسل کوں وی ہُن مُرلی دانا چا بنڑاون چاہندے۔ ہک اے حکیم ہے کہ جیندی قابلیت دا جگ جہان گواہ ہے پر اوہوں جگ جہان نال دروہ پیا کریندے۔ ہک اے وادھو ہے جیڑھا گھرتوں باہرتاں ٹیٹن جُوان پر گھروچ ڈال توں کھلے پیا کھاندا ہوندے۔ میڈا قصور اے ہے جو میں مُردے دی گردن چھڑوائی۔ ہونہہ! کیہو جے لوک ہُن اے جیہڑے آپڑیں نہ ہووَن کوں وی ہووَن سمجھدن۔ اوند اول کیتا جو اٹھی تے کہیں پاسے بھج ونجے تے ڈل ہوں ویلے واپس آوے جنیں ویلے آپڑیں آپ کوں گول گھنے یا اصلوں مٹی نال مٹی تھی ونجے۔

فیاض کوں ایویں لکيا جو اے سب لوک محض پچھاویاں دے پچھوں بھج دے ہُن۔ اناں دا مسئلہ آپڑیں سُجھان نہیں بلکہ اے کہیں بے دھیان وچ ہُن، آپڑیں اُج دے دھیان وچ۔ اناں کوں ایں گالہہ دی پرواہ ای کانتی جو نواب صاحب انہاں دیاں نسلاں دی سُجھان کوں کیویں لے مٹی کرن تے تکیا بیٹھے۔ ایہو نواب تاں ہے جنیں آپڑیں سازشی مشیراں دے آکھے لگ کراہیں پوری ریاست دیاں زمیناں تے پنجاب دے آبادکار آں بلہائیں۔ ہک پاسے بے مفتیاں زمیناں تے ایشام دے چار آنے دی سرکاری خزانے وچوں تے ڈوجھے پاسے تل وپنیاں کیتے چھڑا ڈٹا۔ اے کیہو جیہا دولہا ہے کہ جنیں آپنی ریاست دی بربادی دے ایرے خود آپڑیں ہتھیں گھٹ چھوڑن۔ خود تاں رُلسی سُرلسی پر آپڑیں عوام کوں وی صدیاں دے دھکے دھوڑیاں وات ڈے تے ویسی۔

فیاض ڈھگ زچکایا تھیا تاں اٹھی کھڑا تھیا۔ پہلے سوچنیں جو چپ کرتے گھر لکيا ونجیں پر گھر ہے کیا..... اوہو روز دا بحث مباحثہ جو نواب کیا فیصلہ کریسی۔ چلبے تے بیٹھی اماں اتے مسیت ڈو آندا ویندا ابا جیہڑا ہندو حکیم توں علاج تاں کروا سکدے پر اے قبول

کرن کوں تیار کائنی جو اوند اپتر ہوں ہندو حکیم کول نوکری کرے۔ اُو اے کجھن توں وی عاجز
ہا جو ہکو جیہا انسان محض آپڑیں مذہب، برادری یا زبان سانگے کتھائیں تعداد وچ گھٹ
ہو وے تاں گھٹیا کیوں تھی ویندے تے ودھ ہو وے تاں ودھیا کیوں۔

اِس چھک دھر وچ فیاض دے پیر اُتھائیں اُتھر تیج گئے۔ اُو نے گردن ولاتے
حکیم رام لعل دے مطب کوں ڈٹھاتے ڈکھار تھی گیا۔ کتنی اُمیداں نال اُو اتھ آیا ہاتے کیا
کجھیا ہا حکیم صاحب کوں۔ خالص تے کھرا انسان جیندے ہتھ وچ شفا ہے۔ شفا تاں واقعی
اوندے ہتھ وچ ہی پر اُو خالص تے کھرا انسان کتھاؤں نہ ہا۔ اوند اِ دل کیتا جو چیرکاں مار
مارتے لوکاں کوں ڈسے جو حکیم کوڑا انسان ہے تے کوڑیاں دے گج کجیندے۔ پر اوندے
سنگ وچوں اَلانہ نکل سکیا پر لیکن اے گالہہ بی جو اکھیں دیاں دُناں ضرور پُرس گیاں۔

اُو نے ٹرن سانگے پیرا گو نہیں کیتے پر ڈوہیں بارے بھک تھئے پئے ہن۔ اُو نے
سوچیا پیراں کوں گھیل تے ٹرے لیکن کہیں نے اوندی ٹور کوں مُند رگھدا ہا۔ اوکوں یکدم
ثلسی دا خیال آیا۔ اوکوں ڈیکھن دے بعد وی تاں اوندی ایہا حالت تھئی ہی۔ اُو جھ ہا،
اُتھائیں دا اُتھائیں بھائی تے کھڑ گیا ہا۔ اوکوں لکھا جو اُو ثلسی دے گھر دے باہروں کھڑے
تے ثلسی اوکوں ڈیکھ تے اندر ڈوبھج دی پئی ہے۔ ایوں ہولے ہولے ٹپولیاں مریندی تے
مڑ مڑ چکھوں تے ڈیدھی، اوندے دل تے آپڑیں پیراں دے نقش اُکیری ویندی ہی۔

کیا اے ثلسی ہے جینے میکوں اُن ڈٹھے کمند وچ ویرٹھیا ہوئے!

میں کتھائیں ثلسی پاروں تاں اوندے پیو دے مطب تے نی پہنچیا!

کیا ثلسی ای میڈی سُجان ہے!..... اے کیوں تھی سگدے جو کوئی چھوہر

میڈی سُجان بن ونجے..... میں کون تے اُو کون..... میڈی اوندی کیہڑی

سانجھ.....

”جے تیڈی میڈی کوئی سانجھ فی تاں میڈے بھیت کون ہے، تیڈے بھیت کون ہے۔“ تلسی ہک بھلا ندرے دی صورت سوال بن تے اوندے اگوں آن کھڑی تھی۔ فیاض اوند اویلا ویلا جو بن ڈیکھ تے ویل گیا۔ اوکوں محسوس تھیا جو دیرے دا پورا بزار اوکوں ڈیدھا پئے، کھلدا پئے، اشارے کریندا پئے۔ وادھو دے نچکے سب توں اُچے۔ ول ول دھچرکوں الویندا پے جو ڈیکھ ایکوں، اے میں تے کھلدا ہا جو رن داز پیڑا چاتی پیا ہم، ہُن خود کوں ڈیکھنس..... حکیم دی چھوہر دے جو بن ہتھوں مندریا کھڑے۔

فیاض نے پورے بُت دازور لاتے آپڑیں پیر گھیلن دی کوشش کیتی۔ اولکھتے کھن وچ ای پگھر و پانی تھی گیا۔ ہُن تاں اوندی حالت تے تلسی وی کھل دی پئی ہئی۔ ہر پاسے نچے ای نچکے، اُچے نچکے، لوکاں دے نچکے، وادھو تے دھچر دے نچکے، تلسی دے نچکے۔ پسینہ پورے بُت توں واہندا ہو یا گئیاں تاں پھنچیا تاں فیاض کوں لکيا جو اوندے پیر ولدے ہلکے پھلکے تھی گن۔ تلسی دا جادو مک گیا ہا۔ او ہک ڈوں قدم اگوں پچھوں ٹُریا تاں معلوم تھیا جو او ٹر سکدے۔ ایں احساس دے نال ای نچکیاں دیاں آوازاں وی گونگیاں تھی گیاں۔ بزار دے سبھے لوک آپڑیں آپڑیں جاتے ولدے موجود تے وادھو اوئیں اوں ڈو گنڈ کیتی دھچر نال بھاں ہکلی بیٹھا ہا۔ بزار داسب کجھ اوئیں دا اوئیں ہا پیا سوائے تلسی دے۔ بس چھوڑی خشبو ہئی اوندی جیر دھی جھمر گھستی کھڑی ہئی۔ او ہا خشبو جیر دھی فیاض نے اوں ڈیہاڑے حکیم رام لعل دے گھر دا ڈر کھڑکا دن توں بعد محسوس کیتی ہئی۔

اُونے ہک واری ول حکیم صاحب دے مطب ڈو ڈٹھا۔ ایویں لکيا جو اے خشبو کتھاؤں مطب دے اندروں آندی پئی ہے۔ کیا اوندی سُجناں ایہا خشبو ہے۔ اوندی سمجھ دیاں ساریاں تاکیاں دُرک دُرک تے بند تھیون لگ گیاں۔ اے خشبو کیا ہے۔ تلسی خشبو ہے یا خشبو تلسی ہے، کجھ سمجھ نہ آندی پئی ہئی۔ فیاض ایں خشبو دے پچھوں پچھوں، پیرا چائی

وَلَدَا مَطْبَ وِج وَزْگیا۔ حکیم رام لعل دے اگوں مریضاں دی لمبی قطار آپنی واری دی تا نگھ
 وِج بیٹھی ہئی تھئی۔ اُو حکیم صاحب دے نال والی گدی تے نٹھ تے بہہ گیا۔ حکیم صاحب نے
 فیاض آلے پاسے ڈٹھاتے ہو لے جیہا مُسک پیا۔ فیاض کوں ایویں لکھا جیویں حکیم رام لعل
 اُوں توں پُچھد اپیا ہا ”ڈس ووئے کا کا..... علاج مریض دی نیت دا کیتا ویندے یا بیماری
 دا۔ تے جیکوں توں بے ایمانی آہدیں، اُو کیا ہے، بیماری ہے ناں۔ تے وَل اِیں بیماری دا
 علاج کون کریسی، آپاں کریسوں ناں؟

فیاض نے سیس چا نوائی تے آپڑیں آپ کوں اَلو اَوَن پئے گیا ”منیند اں جو بے
 ایمانی ہک بیماری ہے پر اے کیویں مناں جو ایندے علاج اُوں توں وی وَڈی بے ایمانی نال
 کرنا چاہیدے۔“



(11)

اُوں ڈیہ نہہ دے واقعے توں بعد فیاض مطب وچ تاں شام توں عشاء توڑیں
 باقاعدگی نال باہون لگ پیا پر پوری کوشش دے باوجود جوان چھوڑیں دے رش کوں گھٹ نہ
 کر سکیا جیڑھیاں اوکوں نبض ڈکھاو دی سک وچ عصر توں بعد ای جھم تھیون لگ پوندیاں
 ہن۔ فیاض کجھ نہ سمجھ سکد اپیا باجوہ اوندی منزل کیڑی ہے تے سُجّان کیا ہے۔ کیا جنسی جس
 دیاں ماریاں اناں چھوڑیں دی وینی پکڑتے اناں دی شافت کوں اُساںس پچیندے راہونا
 ای اوندی سُجّان ہوسی۔ پرسوچیوں وی اوکوں کوئی جواب نہ ملدا۔ ہالی توڑیں اے سب کجھ
 کہیں گزودھال وچ ہا۔

حکیم رام لعل دی دکان تے ولدے سروں باہون دیاں اوندے کول ڈوں
 دلیلاں ہن۔ اوّل اے جو کوئی ہنرتاں ہووے جیڑھا اوندے ہتھ ہتھیکڑا ہووے تے ڈوجھا
 ایں کم وچ راہندے ہوئے لوکاں نال جڑ باہون تے انہاں دے ڈکھ ونڈاؤن دا جیڑا
 موقع ملدا اپیا ہاؤ بیا کہیں جاتے نہ ہا۔ مکرمل چھوہریں دا علاج اُونے اے کڈھیا جو اناں

کوں دھڑکا دھبا چہ ڈیون دی بجائے اُناں دی گالہہ تاں سُن گھندا پر دوا دی بجائے چھڑا
 پر ہیز ڈسیندا جو بے ایمانی وی نہ تھیوے تے مریض دی مرض دا کج دی کجیا راہوے۔ جے
 کتھائیں جوڑا چا ہوندا تے مریض چھوہر اُلٹا گئی پئی ویندی تاں بہوں مجبوری پاروں ہک
 ڈوں پڑیاں ڈیونڑیاں ای پئے ویندیاں۔ فیاض دی ایس حکمت دے سبب وڈے گھراں
 دیاں تنور دی تازی تھی روٹی طرحاں تئیاں تئیاں چھوہریں وی خوش تے حکیم صاحب
 وی راضی۔ بس گوڑا ہاتاں فیاض کیتے کہ جیڑھا کجھ نہ سمجھ سکدا پیا ہا جو او ہے کیا۔ کوئی
 مر داویں گشتی کہ جیندے کیتے ہک دکان دی گدی تے باہون سانگے آپڑیں مرادنگی کوں
 وچڑاں وی کوئی میہنڑاں نہ ہا۔

اُوڈیہہ وی کجھ عجیب جیہا ہا کہ دیرہ نواب دے بزار دیاں ادھے کنوں زیادہ
 دکاناں بند ہن۔ نہ وادھو، نہ دچھرتے نہ خیمسا تماخوں والا۔ ایویں لگدا پیا ہا جو پورے بزار
 وچ کوئی دیہہ پھر گیا ہووے۔ کہیں ڈسیا جو روہی وچ چھن پیر دے میلے دا پنجواں جمعہ ہے
 تے سبھے لوک ٹولیاں دیاں ٹولیاں خیمس دے سویرے سویرے روہی ڈولڈا رگن ایس گالہوں
 جو پنجویں جمعے میلہ بھریندا غضب دا ہے۔ فیاض کوں یاد ای نہ آیا جو خود اوند اُباتے بے سوتر
 مسات اُج سویر دے چھن پیر روانہ تھی گئے ہن تے او مجبور کرن دے باوجود اُناں دے نال
 نہ گیا ہا۔ ”کیا تھی گئے اوندے چیتے کوں“۔ فیاض سر پکڑتے بہہ گیا۔ اے اٹھاں دیاں
 قطاراں، رنگے کچاوے تے کچاویاں وچ بیٹھیاں سنگریاں پنکریاں نینگریاں تے اُناں دے
 بال تے اٹھ دی واگ پکڑتے اگوں دھڑکدے جتوال۔ پرے پرے توں اے میلہ وای
 اٹھاں دیاں ونج ویندڑ قطاراں بنڑا کر ایں ٹردے تے ول منزل گھن پنہہ کرن توں بعد
 جتھ کوئی چٹڑا آتے ویلا پدھر آندا، اُتھائیں اٹھ ہشتا تے روٹی مانی دے بند و بست کوں لگ
 ویندے۔

چن پیر دے میلے دی رت آونوں نال ای ہر منگل دی شام کوں احمد پوردی کلو
والی چنگی دے نیڑے، خانان دے پُرائیں باغ دے رڑھے میدان وچ میلے والیاں
دے قافلے منزل آن کرن ہاتے ول ستویں جمعے تیں بدھ کوں سویرے سویرے کیکی میکی
تے زان شران کرن توں بعد چن پیر دی اگلی منزل ڈوروانہ تھی ویندے جیڑھی عام طور تے
دیرے نواب دے پار ہوندی۔

ریاست بہاول پور دے دل احمد پور دے آسوں پاسوں بہار دی آمد نال ای
میلیاں دا سلسلہ شروع تھی ویندا جنیدے وچوں ترے میلے بہوں خاص ہوندے ہن۔ پہلے
پہلے فروری وچ چن پیر دے ست جمعیاں والے میلے دا پہلا جمعہ شروع تھی ویندا۔ پر ریش
صرف چوتھے تے پنجویں جمعے ہوندا۔ ہر کوئی ایہو آہدا جو ایں پھیرے چوتھا جمعہ ڈاڈھا
بھریندا پئے تاں ول ہر کوئی چوتھے جمعے دامیل بنڑا گھندا اتے چوتھا جمعہ آپ کنوں آپے
بھرتج ویندا۔ ہالی روہی وچ چن پیر دے میلے دا چوتھا جمعہ ہوندا تاں اُچ شریف دے میلے دا
پہلا جمعہ شروع تھی ویندا جیکوں بوہاری والا جمعہ اکھیندا اہا۔ بوہاری توں بعد ڈوجھا جمعہ چھنڈکا
والا تے ول چل سوچل پورے ست جمعے تے اتھ کروی چوتھے تے پنجویں جمعے دامیل بہوں
بھریندا۔ اُچ دے میلیاں دے چھیکڑ توڑیں اپریل دے ڈوجھے ہفتے وچ احمد پور دا وِساخی
والا ترے ڈینہا دامیلہ عظمت سلطان سیں دی دربار دے نال والے میدان وچ شروع تھی
ویندا۔ پر کمال ہئی کملے ہوون دی جو فیاض لوکیں کنوں کچھدا پیا ہا جو اُچ دیرے دا بزار
بند کیوں ہے۔

اُوں ڈینہہ حکیم رام لعل وی سمجھ لٹھے توں کتھائیں پہلے دیگر ویلے گھر ڈوروانہ تھی
گیا تے ہئی ہن رام دی بجائے فیاض دے حوالے۔ فیاض گدی تے کیا بیٹھا مریض
چھوہریں ماکھی دے گھنڈیں وانگ وکان وچ ایویں بھنڈکن لگ گیاں جیویں جو ماہنا

اتھائیں لاتھا ہووے۔ لمبی قطار بڑبڑندے بڑبڑندے عشاء تھیون کوں آگنی پر ہالی توڑیں
 دی ڈاہ بارہاں زنائیاں مطب وچ ٹوپی والے برقعے پا کراہیں اکھیں دے سامنے لگی
 کروشیئے والی جالی وچوں اکھیں بڑکیندیاں بیٹھیاں ہن۔ فیاض پتلی جالی والے پردے
 وچوں ڈیدھا بیٹھا ہا جو جیس ویلے ڈوں چٹے برقعے والیاں زنائیاں دی واری آندی ہے او
 سُرک تے ول چھیکڑ وچ ونج باہندن۔ او حیران تھیا جو پہلے واری گھنن دی بجائے او ول
 ول چھیکڑ وچ کیوں ونجن باہندن۔ ایہو گوڑ کریندے کریندے پورا مطب خالی تھی گیا پر او
 ڈوہیں آپڑیں جاجیویں ٹھ تے بیٹھیاں ہن، اوئیں بیٹھیاں ریہاں۔ عشاء دی بانگ
 تھیون کوں آئی تاں فیاض نے خود اَلوایا جو مائی بی بی ہتھ ڈکھا ونڑیں تاں ڈکھا گھنوںہ تاں
 دُکان بند کریندوں۔

فیاض دے اَلواؤن تے پک زنائی نے ڈو جھی کوں گوڈے نال اگوں تے دھکیا
 تے او سُرک تے فیاض دے سامڑیں آن بیٹھی ایں طرحاں جو ڈوہیں دے ادھ وچ چھڑا
 جالی والا پردہ ہا۔ اُونے برقعے وچوں ہتھ کڈھیا تاں لکھا جو کہیں جوان چھوہر دا گپلا گپلا
 ہتھ تے گرولی وینی ہے۔ چھوہر نے پردے وچوں کسنی اگوہیں کیتی تاں فیاض نے
 اوندے کئے مزید ڈٹھے بغیر انگلیں ایں طرحاں نبض تے رکھیاں جو اوند ا پورا ہتھ وینی
 باہروں بھوں گیا۔ پتہ نی منٹ سیکنڈ وچ کیا تھیا، فیاض نے آبرُغت اوندی وینی توں انگلیں
 ایویں چاتیاں جیویں جو بلدا انگارہ اوندے ہتھ وچ آگیا ہووے۔ ایں توں پہلے کہ
 سامڑیں بیٹھی زنائی کجھ سمجھ سکدی، اوند ا سجا ہتھ اوندی جھولی وچ زپ آن تھیا۔

فیاض نے ہن تیں پتہ نی کتیاں زنائیاں دے لنگ ڈٹھے ہو سن پر ایویں بلدی
 ہوئی وینی شاید ای کڈہائیں اوندے ہتھ وچ آئی ہوئی کہ جیندی نبض بخار دی کوئی ظاہری
 نشانی دے بغیر وی ایویں پئی ہئی جیویں جو رَن کئی کوہ پندھ توں دھروکڑی لا کراہیں

ہنزیں ہنزیں آئی ہووے تے ساکدی بیٹھی ہووے۔ فیاض کوں ایس چھوہر دالنگ سُجاپو
محسوس تھیا پر یاد نہ آندا پیا ہا جو کتھ اوند اہتھ اوندے اُنگ کوں لکیا ہا۔ شاید اتھائیں مطب
وچ!..... پر کونسا.... مطب وچ ایس طرحاں دی بلدی بکھدی بھاء وانگر ذال کڈ ہائیں نی
آئی.... جے کوئی نی آئی تاں ول اے کون اے۔ نہ چاہندے ہوئے وی فیاض دی نگاہ
ول ول چھوہر دے منہ والے پاسے اُلردی پئی ہئی۔

اتنی دیر وچ اوں چھوہر نے برقعہ اتوں تے کیتا تے سھو گجھ سو جھل تھی گیا۔ اے
تاں مہراں ہئی۔ پر اوں ڈنہہ دے غیظ غضب کنوں بالکل مختلف، سنگری پنگری تے لاٹاں
مریندی۔ فیاض آپڑیں آپ کوں وی بھوروں لگن لگ پیا۔ لیکن ایندی نبض تاں کوئی ہی
کہانی سُنزیندی پئی ہے۔ فیاض نے بھترتج تے اڈے اڈے ڈٹھا کہ کوئی ڈیدھا تاں نی
پیا۔ پرا تھ کون ڈیکھے ہا۔ اوکوں یاد آیا جو آج تاں بے ملازم وی چنن پیر دے میلے دی مٹھی
تے ہن تے بزار وی سارا بند ہے۔ ول وی اونے اٹھی تے چھوٹی دَری وچوں باہر جھاتی
ماری پر دور نزدیک نہ کوئی بندہ تے نہ بندے دی ذات۔ فیاض ول دے سروں گدی تے
بہہ تاں گیا پر گھبراہلی توڑیں نہ ویندا پیا ہا۔ فیاض دی اے حالت ڈیکھ تے مہراں مُسک پئی
تے ڈو جھی زنانی نے وی برقع چا چھوڑیا۔ اے مہراں دی سَس ہائی۔

سَس دے سُون تے مہراں نے ہک دفعہ ول اگوں تھی کراہیں آپڑیں بجی وینی
فیاض دے ہتھ وچ ڈے چھوڑی۔ لنگ اوئیں بھاء آلی کار سڑک دے تے نبض اوئیں ڈلکی
ٹور ٹردی۔ فیاض نے گجھ آکھن کیجے منہ کھولیا پر زبان سُک تے لکڑا تے ہوٹھاں تے وریاں
ای وریاں۔ اوڈوہیں زنانیاں فیاض دے منہ ڈوٹر ٹر ڈیدھیاں پیاں ہن جو نکا حکیم ہتھ
ڈیکھن توں بعد گجھ تاں ڈیسی۔ لیکن اوند امانہ کون کھولے تے کیویں کھولے۔

”پتر خیر تاں ہے نوہہ میڈی کوں“..... ادھ کھڑ ذال وی اگوں تے سُر تے

مہراں نال پک تے بہہ گئی۔

”کچھ نی سب خیر اے..... بس شادی کر ڈیوتاں سب ٹھیک تھی ویسی۔ دوا دارو

دی لوڑھ کائی“..... فیاض دے وِبلن تے مہراں دی سس تاں زور دی کھل پئی پر

مہراں داسکن بند تھی گیا تے اوا کھیں پٹ کراہیں فیاض ڈوڈیکھن بہہ گئی۔

”توں تاں اصلوں چریا تھی گئیں“۔ مہراں دی سس نے سر پکڑ گھدا۔ ”کیہو

جیہا حکیم بنڑیاں بیٹھیں، نوہہ میڈی چنگی بھلی پر نی پتری ہے..... مہراں ہے، واہو

دے گھر والی“.....

”پر نبض ایندی تاں کنواریاں والی ہے“۔ گاہہ تھلن دے باوجود فیاض دے منہ

اچوں کیا نکلی ادھ کھڑ ذال نے نہوریاں والے وین کرنے شروع کر ڈتے۔ وین کیا ہن

کہانی ہئی جیندے وِچ مہراں کوں پیٹ نہ تھیون تے ایں پاروں اوندی جد ممکن دے

اندیشے مورہی ہن۔ وین وین وِچ مہراں دی سس اے وی ڈی گئی جو بال نہ تھیون وِچ

مہراں دا قصور کائی۔ ”اے شودی تاں تھے دریادی بھوئیں طرحاں زور وِچ ہے، جے بکارا

ای گڑ تھی ونجے تاں بھوئیں کیا کرے“۔

”اماں! میں تاں ایہو اکھیاں جو واہو کوں آکھو سویلے حکیم صاحب کو حقیقت

ڈیوے، رب چنگائی کرے“۔ فیاض دا وِبلن کچھ کچھ ٹھار داویندا ہا۔

”توں تاں املک گاہا ہیں..... جے واہو حکیم کوں ڈکھاؤن تے راضی تھیوے

ہا تاں میں چھوہر کوں نال لاتے اتھ ایں ویلے تیڈے کول کیوں آواں ہا۔ توں آپ ڈنھی

تاں کھڑیں جو مہراں کوں بیٹھے بیٹھے کچھا دورہ پوندے۔ اوں ڈیہاڑے توں نہ ہوندا تاں

میڈا گھر برباد تھی گیا ہا۔ اے مہراں پئے کوں مارتے خود پھاسی چڑھ ونجے ہا۔ پتر! وال میں

ڈھپ وِچ چٹے نی کیے۔ سمجھدی آں جو جوان چھوہر کوں کیا لوڑھیندا ہوندے۔ پر کیا کراں

اگوں چاواں تاں آپ نگی، چکھوں چاواں تاں آپ..... وادھودی مادیاں اکھیں وچوں
 ول بنجوں واہون لگ پئے۔

فیاض ایں ساری رام کہانی توں بعد جذباتی طور تے سنبھل گیا ہا۔ اونے مہراں
 ڈوڈٹھا۔ خلاف توقع اوبالکل لاتعلق لگدی پئی ہئی جیویں کجھ ہے تاں ٹھیک نی تاں ول وی
 ٹھیک۔ لیکن ایں دوران کہیں کہیں ویلے اوفیاض کوں ایویں ڈیدھی ہئی کہ جیویں کجھ آکھن
 چاہندی ہووے، کجھ منکن چاہندی ہووے، کجھ گھنن چاہندی ہووے۔

فیاض کوں سوچاں وچ دگھریا ڈیکھ تے وادھودی ماء مہراں کوں چکھوں تے ہٹا
 تے خود اگی تے سُرک آئی۔ ”پتر میں آج تیڈے کنیں چھڑا اپنی نوہہ دے دے دارو
 واسطے نی آئی، میں تیڈے کول آپڑیں جد بچاون سانگے آئی ہاں۔ وادھومیڈا اہکو پتر ہے،
 جے اوندی اولاد نہ تھی تے اواوترک رُگیا تاں میڈی جد تاں ختم تھی گئی۔ کہیں نے ساڈیاں
 قبریں تے پھل پتری سٹن وی نی آونزاں۔ میڈا پتر ای توں ایں، حکیم ای توں تے
 میڈے جھگے دادارو وی توں۔ توں میڈا بھلا کر چا، اللہ تیڈا بھلا کر لئی۔“

”ٹھیک ہے اماں..... توں سویرے وادھوکوں گھن آویں، حکیم صاحب کوں
 تیڈی سفارش میں وی کرڈیاں۔ باقی جو رب کوں منظور۔“ فیاض گدی توں اٹھن لکيا جو
 مطب بند کرن دا آہر کرے پر وادھودی ماء نے یکدم ادھر تَج تے اُوکوں باہیں کنوں وٹھیا تے
 وَلدا بلہا گھدا۔ فیاض حیران تھی تے گدی تے دھڑپ تھیا۔

”میڈی پوری گالہہ تاں تیں سنی کاسنی۔ وادھو آج چنن پیر دے میلے تے گیا
 ہوئے۔ توں مہربانی چا کر۔ میں چاہندی آں جو تیڈی وٹیج پووے تے میں وی سکھی تھی تے
 مَرگاں جو کوئی تاں ہے جیر ہا میڈی قبر تے قل کلمہ پڑھن آسی..... وادھودی ماء نے
 تکھے تکھے گالہہ ملئی تے لمبا ساہ بھرتے وَلدی ہٹھ بیٹھی۔

”تِڈی وَٹاؤن! اے کیا ہوندے“..... فیاض نے حیرت دے نال نال زچ

تھی تے پُچھیا۔

”پُتر..... تِڈی وَٹاؤن“..... وادھودی ماء ہک ہک لفظ چتھ تے بولیا جو

فیاض سمجھ ونجے پر فیاض دیاں اکھیں وِچ اُونیں دا اُونیں اُوپر اَرنگ ہا۔ ”میں تاں اُج تک
نی سُنو یا تِڈی وَٹاؤن“۔ فیاض دی نگاہ اُلری تاں مہراں دے رُخ تے وَنچ ٹلکی۔ لالعلق
نظرن والی مہراں دیاں اکھیں وچوں ہنجوں آپ کنوں آپے ویہہ کراہیں گلہاں پُسا پُساتلوں
تے ڈھاندے پئے ہن۔ لالعلقی تھوڑی گھٹ تھئی تاں اوندی جا ہک عجیب جے اُن سونہے
شکوے نے گھن گھدی۔

”پُتر تیکوں کیویں سمجھاواں تِڈی وَٹاؤن“..... اُدھ کھڑاں سر پکڑتے بہہ گئی۔

”بہوں پُرانی ریت ہے، صدیاں پُرانی۔ ہے تاں زراز ہر دا گھٹ پر کیا کراں وادھودی نسل
وی تاں اگوں تے ٹورنی ہے۔ پُتر اے کوئی انوکھڑی گالہہ نی جیڑھی میں نیتی بیٹھی آں آپنی
نونہہ دا گھر بچاون کیتے۔ وادھوکوں چنگا بھلا پتہ ہے جوکان قصور ہوندے وِچ ہے وَل وی اُو
آپنے پراں تے پانی نی پون ڈیندا پیا۔ بُو اناں دا ویسب جو تھیا، مارن وی سہی تے پتھکن
وی نہ ڈیون۔ اُلنا مہراں شودی کوں طلاق ڈیون تے تلیا ودے۔ ڈس ہُن میں گھوگھا کھا
تے تیڈے کنوں آپنے خاندان دا وارث نہ پناں تاں کیہڑے دَر تے وَجاں“۔ وادھودی
ماء دیاں اکھیں وچوں وَل ہنجوں برہ وادھون لگ گئے۔

فیاض کُجھ کُجھ سمجھ گیا جو اوندے کنوں کیہو جے دارو دا تقاضا تھیندا پئے۔ ”تِڈی

کیوں جو بسترے دے تلے وِچھاؤن والے پڑچھے کوں آہن ایں گالہوں وادھودی ماء
آپنے خاندان دا وارث جماؤن کیتے میڈے ناں دی تِڈی آپنے ناکارہ پُتر دی تِڈی نال
وَٹاؤن چاہندی اے۔ کتنی غلیظ حرکت ہے۔ کتنی بے غیرتی ہے“۔ فیاض دا دماغ ہُن تکھے

تکھے سوچن لگ پیا ہا۔

”اماں نہ تاں میں اے بے غیرتی کر سکداں تے نہ تیڈی نوہہ ایں زورے مسائیں دے تعلق کوں قبول کر یسی۔ میں کیویں من گھناں جو میڈا بال تیڈے پتر دے گھر وچ حرام دا بال بن تے وڈا تھیوے تے وادھو کوں پتہ نہ لگے۔ فرض کرو پتہ نی وی لگدا تاں ول وی اے حرام کاری میں نی کر سکدا، خاص طور تے اتجھی ادھ ادھوری اولاد کیتے جیڑھی ساری زندگی آپنی شناخت دی تلاش وچ ای رلدی راہوے۔“

فیاض دی اے تقریر ہالی ادھ وچ ای ہئی جو مہراں بلدی بھادا شعلہ بن تے اُنھی کھڑی تھئی۔ فیاض کوں اوندا چہرہ اُونیں لکیا جیویں جو وادھو کوں گھوگھا ڈیندے ویلے ہا۔ بھال ایویں پوندی ہئی جو اُوندا سارا بُت ایں بھاء وچ ڈلیکو ڈلیک تھئی ویسی۔ فیاض کوں جیڑھیاں اکھیں نال اُوڈیدھی پئی ہئی اُناں وچ قہر، غضب، نفرت اتے ناراضگی دے سبھے رنگ رَل مل کراہیں شوکدے پے دِن۔ فیاض کوں اُناں اکھیں نال مسلسل ڈیدھے ہوئے اُونے پک ہتھ نال سَس کوں چوڑی کنوں پکڑیا تے گھیل تے اُٹھا کھڑا اُئیں۔ اُوندی پوری کوشش ہئی جو جلدی کنوں جلدی سَس آپنی کوں مطب دے دروازے وچوں باہر ڈو جھک ونجے۔ سَس اوندی ایں حالت وچ ای باہر نکلتن توں پہلے دروازے وچ رُکی تے فیاض کوں اَلواتے بولی۔ ”پتر توں ریت رَسَم کوں بے شک دفع کریں ہاپر ڈوں مجبور عورتاں نال اے سلوک تیکوں ٹھاہندا نہ ہا۔ توں سُجان دی گالہہ کرینی ناں، پک گالہہ میڈی وی یاد رکھیں، سُجان بھوئیں نال ہوندی اے، نجارے نال کائناں۔“



(12)

کجھ ڈینہہ تاں خیر و ہانی پر تھوڑے ڈینہہاں بعد حکیم صاحب کوں آپڑیں کوچوان
 دیاں حرکتاں تے بے معلوماں شک گزریا۔ کوئی بے حالات ہوندے تاں شاید اے گاہیں
 حکیم صاحب کوں محسوس وی نہ تھیندیاں پر حالات دی ایس گھڑی وچ کہیں وی انوکھڑی سُن
 گُن کوں گنڈ پچھو اں سڑاں عقل مندی دے تقاضیاں دے برخلاف ہئی۔ تھیا ایس جو ہک
 ڈینہہ حکیم رام لعل سویرے گھروں نکلدیاں ہو یاں روز والے ٹائم توں کجھ دیر پہلے نکل پیا
 ۔ اوکيا ڈیدھے جو احمد پور دا چھٹیا ہو یا پیری بد معاش اوندے کوچوان دے گن وچ گھن
 گھن لائی کھڑے۔ جیویں ای پیری دی نگاہ حکیم تے پئی اومنے پرتی تے کرتے ٹر پیا پر
 ویندے ویندے جیس طرحاں اوندے کافی اکھ نال حکیم صاحب ڈوڈھا، اوڈیکھنا خیری نہ لگدا
 پیا ہا۔ حکیم رام لعل نے کوچوان نال حال حویلا کیتا پر اوندے پکڑائی نہ ڈتی۔ ایندے سبب حکیم
 صاحب دی پریشانی ہی وی ودھ گئی۔

جون 1947ء دے بعد تاں ہندوستان دے سیاسی واقعات دی رفتار کجھ اتنی

تیز تھی گئی جو سویرے شام دا اعتبار نہ رہ گیا۔ عام لوکاں واسطے خبر دا کوئی خاص ذریعہ نہ ہا۔ تہوں ہر پاسے افواہاں دے جکھڑ جھولے چلدے راہندے۔ ہک ادھ بندہ جیندی پہنچ اخباراں یا آل انڈیا ریڈیو نال ہوندی ہئی اُونے وی لوکیں تک پہنچا وئی تاں گھاڑویں خبر ای پہنچا وئی جیندے نال ریاستی خلقت خاص طور تے اقلیتی برادری وچ پریشانی ہئی وی زیادہ تھی ویندی۔ لگدا ایویں ہا جو پاکستان تاں سویرے بنزیا یا شام تیں پر ایں گالہ دی پکی خبر کتھاؤں نہ آندی جو ریاست بہاول پور دا نواب کیا فیصلہ کر لئی۔ کیوں جو اوندے فیصلے تے ای لکھاں ہندوواں تے سکھاں دی جان تے جائیداد دا فیصلہ تھیونز ہا۔

ایں پریشانی وچ وی سوڈھی حکیم رام لعل دے گھر پھیرا پاؤن دا کوئی نہ کوئی موقع ضرور گول گھندا تے ول ٹھٹھک کرتے اندر کمرے وچ۔ کھا دا پیتا، ٹھنگور لاتا، خاطر داری کرائی تے بھج دی دامل تھی گیا۔ یلو بیڑیاں وٹیندی تلسی روز دعا منگدی جو آج تاں اوند لئیو جلدی گھر آنجیں تے لکھن ڈیکھے اعتباری ساندھوتے وفادار ذال بی بی دے۔ تے ول ہک جیہاڑے حکیم صاحب واقعی عین ہوں ویلے گھردی کڈی کھڑکا بیٹھا کہ جیوں ویلے او ڈوہیں کمرے وچ بلا ولیاں کریندے بیٹھے ہن۔ تلسی نے تاں ایں گالہوں بھج تے کڈی کھولی جو متاں فیاض نہ ہووے پر پوکوں ڈیکھ تے وی اوندے بھیتڑ کہیں لگی ہوئی خواہش کوں سکون جیہا ملیا جو ہن ڈیکھو پھا کا پوند اسو پوندا۔ حکیم صاحب آپڑیں کمرے ڈوونجن لکیا تاں تلسی نے خود آلوایا جو اوندی ماء تے چاچا سوڈھی اڈے ہن ایں کمرے وچ۔ لیکن ایندے باوجود حکیم رام لعل آپڑیں کمرے ڈوونہ کیتی گیا اے آکھ تے جو اناں ڈوہیں کوں اڈہائیں بھیج چا۔ پو دی گالہ سن تے تلسی جتھ ہئی اتھائیں اٹھرتیج تے رہ گئی۔

”اے کیہو جی منزل ہوندی ہے شادی شدہ زندگی وچ جو ہک بے دے چکھوں مرن مارن والے، ہک بے کنوں اختہ تھی کراہیں، ہک بے کنوں جان چھڑویندے

وَدے ہوندا۔ نویں نویں شادی توں بعد ہک ڈوجھے دے چکھاویں تے وی شک کرن والے، شک تاں کیا پگ تے وی توجہ نی کریندے تے اکھ نوٹی کر گھندن۔ اے وی نی جو ڈوہائیں وچ جسمانی تقاضیاں دی خواہش نہ راہندی ہوسی، خواہش ہے تاں چاچا سوڈھی اویا پوایا سھو کجھ چھوڑ تے ساڈے گھر آن باہندے۔ خواہش ہوندی ہوسی تاں میڈے پو کوں متھے تے تریری پاتے زچکائی نال ڈیکھن والی میڈی اماں ہک غیر بندے کوں چھڑے ڈیکھن نال ای ٹھڑھرویندی ہے۔“

تلسی دادماغ شاید بیاں وی بھنوالیاں کھاندا جے اوندی ماء تے چاچا سوڈھی بے شرمی نال اوندے کول آتے اے نہ چھدے جو کون آیا ہا۔ حکیم صاحب دے بے وقتے گھر آون تے ڈوہائیں نے حیران تھی تے ہک ڈوجھے کوں ڈٹھاتے ول اگوں چکھوں حکیم دے کمرے وچ وڑ گئے۔ تلسی ہالی توڑیں اویں دی اویں دلان وچ کھڑی ہئی تھی۔ اوکوں آپنی سوچ دے کہیں وی پکھ دا جواب نہ ملدا پیا ہا۔ تلسی کوں رہ رہ تے کاوڑ آندی پئی ہئی تاں صرف اپنے پو تے۔ ”کیا اوند کم صرف اتجھی گاں کوں پالنا رہ گئے جیر دھی کھیر کہیں بی جاونج تے ڈیندی ہے۔“

ڈوجھے پاے کمرے وچ سوڈھی نے حکیم رام لعل نال ایہو نامک کیتا جو اناں بدلے ہوئے حالات وچ جی جلدی تھی سکے تلسی دامکھاوا کر ڈتا ونجے کیوں جو چنگائی ڈوہیں گھراں دی پیندے وچ ہے۔ آون والے ڈینہاں دا کیا پتہ، کیا تھیندے۔ حکیم صاحب نے ذال کئے ڈٹھا۔ اوکوں کیا انکار تھی سکدا ہا۔ لہذا ایہو طے تھیا جو باقی قریبی رشتے داراں دی صلاح صباح نال بارہاں ڈینہاں بعد تلسی دی ڈولی ٹور ڈتی ونجے۔

سوڈھی کمرے وچوں نکلیا تاں راڈھی وی اوندے چکھوں چکھوں باہر نکل آئی تے تروخ تے بولی ”کیا ضرورت ہئی تلسی دے مکھاوے دی گالہہ کرن دی۔“

”ضرورت ہی ناں“..... سوڈھی اوکوں اکھ مارتے بولیا۔ ”کیا ڈساں ہاں جو اتھ میں کیا کرن آیا بیٹھاہم“۔

”ہونہہ.... جیویں اوکوں پتہ کانتی“..... راڈھی نے منہ وچ بڑبڑکیتی
 ”کیا آکھی!“..... سوڈھی ویندا ویندا کھڑو گیا

”گجھ نی“..... راڈھی نے اوکوں اوئیں سڑتے جواب ڈتا جیویں او پئے کوں
 ڈیندی ہوندی ہی۔ اتنی دیروچ اُناں دی نگاہ تلسی تے پئی جیڑھی دالان دی ہوں نکر وچ
 اُتھائیں اوئیں بُت بن تے کھڑی ہی کہ جتھاں اُناں دے حکیم دے کمرے وچ وُجن توں
 پہلے کھڑی ہی۔ آپڑیں مُکلاوے دی گالہہ سُن تے اوندے اندر دی ساری بے قراری
 اوندے رُخ تے جران کیتی کھڑی ہی۔ ایں کنوں پہلے کہ راڈھی گجھ اکیندی سوڈھی زوردا
 کھل پیا۔ ”کاکی.... مٹھی کیہڑی گالہوں، تیاری کر تیاری مُکلاوے دی، کیوں جو
 بارھویں ڈینہہ تیڈی ڈولی میڈے گھر“۔ اُج تاں ایویں لگدا پیا ہا جو سوڈھی دے مَن داسارا
 کھوٹ، لُندھپ بن تے اوندیاں اکھیں وچ تے لیلہوں بن تے اوندے منہ وچ آ
 گئے۔ تلسی تاں خیر چپ ہی پر راڈھی کیتے سوڈھی دی نیت دے وٹے حیندے جاگدے
 دُٹھوئیں بن تے اکھیں دے اگوں ٹرن پئے گے۔ ایندے باوجود اوکوں لگدا نہ ہا جو سوڈھی
 بے وفائی کر لئی۔

”کم از کم اے تاں ڈیکھ گھنسی جو اوندے کیتے میں کیا سلوک کیتم آ پئے پئے
 دے نال۔ پر مرداں دا کیا اعتبار... ہک لُختے وچ ساری راند کوں تھڈا مارتے ویندے
 تھیندن۔ جے سوڈھی نے تلسی دے مُکلاوے توں بعد اوکوں تھڈا مار چھوڑیا تاں مادے
 ڈیونزیز ہُن دھی کوں ڈیونزیز پوسن“۔ راڈھی سمجھن دے باوجود گجھ نہ سمجھن چاہندی ہی۔
 بس خواہاں وچ ای راہون چاہندی ہی۔

ڈو جھے پاسے پیری بد معاش تے آپڑیں کو چوان ملازم دے میل ملاپ کوں ڈیکھ
 کراہیں حکیم رام لعل وی اُج پک فیصلہ کرتے آیا ہا جو نواب صاحب بھائیں جو فیصلہ کرے
 اوکوں خاندان سمیت سنبھل تے راہونا پوسی۔ سنبھلن کیا جو سمجھو قیمتی اسباب ہو لے ڈاڈھے
 ویتج وٹا تے ہتھیکڑا کر باہوے، مطب تے گھٹ باہوے بس ڈو چار گھنٹیاں کیتے تے
 آندیاں ویندیاں پہلے کنوں زیادہ ہشیاری۔ اصل چنٹا اوکوں اے ہئی جو روز دی آمدن گھر
 کیوں چاتے آوے۔ پیری جیسے بد معاش وی ہیں کو ویتج ہن جو کہیں طریقے اوندی روز
 دی کمائی، جڈاں چوکی ہووے، لٹ گھدی ونجے۔ اناں ساریاں سوچاں نے ڈینہاں
 ویتج حکیم صاحب دی ہتھی لہا چھوڑی۔ ہرویلے ذہن ویتج پکو خیال رہندا جو اعتبار کرے تاں
 کیندے اُتے کرے۔ ”آخر کہیں تے تاں کرنا ہوسی“۔ پر ہر پاسے دی سوچ توں بعد پکو
 چہرہ اوندے ذہن ویتج ول ول اُبھردا، فیاض دا چہرہ۔ جے اکھیں نوٹ تے کہیں تے اعتبار
 تھی سگدے تاں او چھوڑا فیاض ہئی، بیا کوئی کائنات۔ مڈی سانھن بارے پک خیال اے وی
 ہئی جو فیاض کوں آپنے نال ٹانگے اُتے گھدی آیا کرے پر ہئی چنٹا ایں گاہہ دی وی ہئی جو
 فیاض اگر اوندے نال ای مطب توں اٹھی آیا تاں مطب دا کیا بنڑسی تے گاہکی دا کیا
 تھیںسی۔ جنیں ویلے پیسے نہ ریہے تاں احتیاط کدھ دی۔ اخیر فیصلہ ایہو تھیا جو تھولے بہتے
 پیسے حکیم رام لعل پھتوئی دے اندر لے خانے لکائی آندارا ہسی تے باقی دی ساری آمدن
 فیاض ڈینہہ لے تھے حکیم صاحب کوں ڈیون توں بعد ول گھر ڈو ویندارا ہسی۔

(13)

فیاض دے رویے نے مہراں کوں جذباتی لحاظ نال ڈال پھال چھوڑیا ہا۔ اوکوں اندازہ ای نہ ہا جو مرداں دی دنیا وچ عورت نال ایس طرحاں داسلوک تھی سگدے۔ اوکوں وادھوتے فیاض ڈوہائیں وچ کوئی فرق محسوس نہ تھیا۔ عورت کوں ٹھڈیاں وات رکھتے بے عزتا کرن دے معاملے وچ ڈوہائیں دا ورتاوا پکو جیہا ہا۔ اوسو چینی دی ہائی تے روندی ہئی جو عورت گئے محض عورت ہوون دے مان دے علاوہ بیا ہوندا کیا ہے پر اناں ڈوہائیں مرداں نے اوندے عورت ہوون کوں ای خوار کر چھوڑے۔ سدھا دھک اوندی تریمتا دے مان آتے سُجھان تے۔

عورت کیتے آپڑاں آپ، آپڑاں جسم، آپڑاں مان کہیں مرد دے حوالے کرن، اعتبار دی انتہا ہوندی ہے۔ اے کیہو جے مرد ہن کہ جہاں نے ایس اعتبار کوں چڑاں چڑاں کر چھوڑے۔ پہلے اوندے مایو نے وادھو دے حوالے چا کیتا، اے جاتے بغیر جو او عورت دے لائق وی ہے یا کائنا۔ اُونے ہر واری اوندے عورت ہوون دی بے حرمتی تاں

کیستی سُو کیستی اوندے اندر کمتری دا احساس اتا ودھا چھوڑیا جو اوکوں آپڑیں جسم کنوں ای نفرت تھی گئی اتنی نفرت کہ اوند ا جسم کہیں مرد دے اندر دا مرد جگاؤن توں وی وانداتھی گیا ہا۔ اے پک اتجھا مرحلہ ہا کہ جتھ اوندی سمجھ وی گتاوے وات آ گئی۔ کجھ سمجھ نہ آندا ہا جو دا دھونا مرد ہے یا اود خود نا عورت۔ شادی توں بعد جنس ویلے کتھاؤں بال بچے دے آثار نظر نہ آئے تاں پک ڈینہہ اوندی سس نے حال چاتا۔ مہراں جتنا جانڑدی ہئی، کھول سنا یا۔ سس اوندی سمجھ تاں گئی پر وِل دی نو نہہ کوں تلے لائی رکھن کیستے چھک چھوڑیُس جو اماں جو ان کوں جو ان رن بنڑیندی ہے۔ جے رن ای برف ہوسی تاں جو ان دے پانی وِچ اُبالا کتھوں آسی۔

سس دی گالہ سُن تے مہراں کوں ایویں لکيا جو اوند اود برف والے مٹھتے تے پئی کوئی باری بھک ہے، کچی برف دی بھک کہ جیندے وِچ لگن والا سواوی نہ تاں ایکوں کھتور سگدے تے نہ تر وڑ سگدے، محض بھور چھوڑیندے۔ سس اوندی نے مہراں کوں برف توں بھاء بناون کیستے کئی ٹونے ٹونکے شروع کر ڈتے۔ پنساری کنوں چھوہارے منگوا تے روز اُتاں کوں چلبے دی کیری وِچ پُرتے بھن کراہیں تے تے مہراں کوں کھوائے ویندے۔ رَس کٹ گڑ کوں دیسی گھیو وِچ تڑکا تے اوندی دھوں کڈھیندی لہری زرنہاں تے کرکناک لگودے انڈیاں دا حلوہ ڈینہہ لا توں پہلے پکھوایا ویندا جو کہیں طرحاں اوندے اندر دی سستی ہوئی عورت کوں جگایا وِجے اے سوچے بغیر جو اوتاں پہلے ای بھاء ہے، اوندے اندر دی عورت تاں پہلے ای جگراتیاں دی ماری ہے، جے بئی مجھڑ گئی تاں کیا تھیںسی۔ نتیجہ تاں اودھونکلیا جو نکلتا ہا۔ مہراں دے اندر دی بھاء نے دُکھ دیاں دُکھ دیاں بیاوی مچ مچا چھوڑیا۔ اوندے اندر دی عورت کوں بندرتاں پہلے ای کاٹنا ہئی، راہندی سہندی گسرٹونے ٹونکیاں نے پوری کر چھوڑی۔ باہر دیاں اکھیں تاں پہلے پلچ تے باہر ہن، اندر دی اکھ وی ہن تار

دَنج لگی۔

پراے سھو کجھ وادھو دے کیا لیکھے جتھ ٹھاڈل نے گوڈے گئیاں کوں چھوڑ،
سوچاں تک کوں گھیر نال مُندر چھوڑیا ہا۔ ایں ٹٹھے علاج دے سبب مہراں دا آوی تھیابٹ
جو کیا وی سہی تے جو کائس وی رَج تے۔ اوندے نیڑے آون توں چالو وادھو ہتھوں بَسج
تے بیاوی بھاڑی پئے گیا تے اٹھے ویلے دی شرمساری توں منہ لکاؤن کیتے اُلنا مہراں کوں
کھلا بُجا شروع کر ڈٹس جو رَن کہیں طرحاں تاں زور زبردستی نال قابو وچ آئی راہسی۔ ایں
ساری راند دا بھوگ تاں وَل وی مہراں بھگیندی وَدی ہئی سوائے ہک تبدیلی دے جو
سَس اوندی آپنی ہارمن کراہیں ہک بیادا کھیڈن تے آگئی۔ بظاہر اُدھر کم وچ آپنی نہونہ
دی وَب کریندی نہ تھکدی پراتا تاں مہراں وی سمجھدی ہئی جو اوندی سَس دیاں ساریاں
مہربانیاں، صرف آپڑیں پُتر دا گج گجن تے اوند اوارث جمان توڑیں ہن۔

ایں ساری کہانی وچ اَن ڈٹھا موڑ تاں اُوں ویلے آیا کہ جڈاں فیاض نے ہک
اَن سو نہی چھوہر کوں آپنی وَکیڑ اچ گھن کراہیں سنیہا ڈے چھوڑیا جو سارے جوان وادھوئی
ہوندے۔ مہراں بھاویں جو فیاض دی پگڑ وچ ذہنی طور تے پکڑ تیج چکی ہئی پر وَل وی اے
حوصلہ نہ رکھیندی ہئی جو اُوکوں پڑیں پئے دی گدی تے آن بلہا وے۔ اے میز تاں وَل
ہوندی سَس دی ہئی جینے اوندے دماغ وچ پاتا جو جو تڈی وٹاؤن وی کوئی اِتجھی ریت ہے
جیزہی عورت کوں آپڑیں خاوند تے آپڑیں خاندان دی پگ اُچی رکھن کیتے کہیں کہیں ویلے
نھاؤنی پئے ویندی ہے۔ پہلے پہلے تاں مہراں کوں ایویں لکيا جو سَس اوندی، اوکوں طلاق
ڈواؤن کیتے شاید کوئی نویں صلاح بنڑائی کھڑی اے پر جنیں ویلے جاس جو اوندی گھت
گھت پچھوں واقعی کوئی کجھی رَمز ہے تاں اوسدھی گھونٹی تھی اوندی گچی پئے گئی۔

وادھو دی ماء کوں جان چھڑاؤنی اوکھی تھی تاں اُو قسماں رماں تے منت ترلیاں

تے آگئی۔ مہراں کہتے تہاں اے سب کجھ سستی تھیونزاں ہا۔ فرق اے ہا جو اود سستی وچ ہک
 ذال پئے دے مرن دے بعد وی پئے دی لُج پالن کہتے آپڑیں آپ کوں بھاوچ ساڑ
 چھوڑیندی اے پر اے پئے تہاں آکھن کوں جیندا ہا لیکن اے بنی گالہہ جو مویاں توں وی بد
 تر۔ کیا ایندی خاطر، ایندی اُچی پگ تے ایندیاں مُچھا دے وٹ دی خاطر اوتی دنائون
 دی گناہگار تھی ونبے۔ تہوں اُونے سس کوں صاف صاف انکار کر ڈتاتے نال سیکو لیس
 وی سہی جو ڈھگ مجبور کیا گیا تہاں کجھ کھا مرساں۔ پر جنیں ویلے وادھو سویر شام اُوکوں سنڈھ
 ہوون دے طعنیاں توں باز نہ آیا تہاں مہراں دامنغز وی کھٹی تھی گیا۔

”اے خسی میکوں سنڈھ ذال آہدے ناں..... ہُن میں وی ایکوں ثابت کر
 ڈکھیاں جو نامرد کون ہے تے سنڈھ کون۔ ایندے واسطے ایہا سزا کوئی گھٹ ہوسی جو کہیں
 بے دابال ساری زندگی ایہو پلے پلے، پڑھیں، پڑھیں۔“ مہراں کوں لکھا جو ایہو تہاں اُونگنی ہے
 کہ جیندے نال اُو آپڑیں آپ کوں عورت ثابت کر سکدی اے۔ سنڈھ دی بجائے ہک
 بھر پور زرخیز عورت۔ آپنی پوری سُنجان دے نال ہک مکمل عورت۔

لیکن اُوکوں فیاض کنوں اے اُمید نہ ہئی جو اُوکوں ایں طرح، اتنی خواری نال تھڈا
 مار چھوڑیسی۔ مہراں کوں لکھا جو وادھو تے فیاض، ڈوہائیں وچ کوئی فرق کائنی، ڈوہیں ای
 نامرد ہن۔ ادھ ادھو رے مرد۔ بے وادھو جسمانی طور تے نامرد ہا تہاں فیاض دہنی طور تے
 نامرد۔ ڈوہیں عورت کوں سمجھن توں قاصر۔ وادھو تہاں اوندے تے ایں گالہوں جسمانی تشدد
 کریندا ہا جو اوند اتقاضیاں نال بھر پور وجود اُوکوں ڈریندا ہا۔ پر فیاض کیہڑی شے توں ڈر گیا۔
 کیا اے تہاں نی جو آپڑیں جسمانی تقاضیاں دا شعور رکھن آلی عورت کنوں سمجھے مرد، ڈر دن
 ریکدن تے بھاڑی پوندن۔ اے سوچ تے مہراں مُسک پئی، ہک زہر بھری مُسکان دے
 نال۔ اُوکوں پہلی داری آپنے عورت ہوون تے مان محسوس تھیا۔ جیڑھی عقل تے نما نال

وڈیاں وڈیاں دے گائے ٹھن چھوڑیندی اے۔

”جے عورت تے مرد دے تعلق دی کھیڈ بس اتی ہے تاں اواے کھیڈ، کھیڈ
کے ڈکھیسی، ڈوہیں نامرداں کوں، پر ہارن کیتے نی صرف جیتن کیتے۔ میں ڈیدھی آں ہُن
کون میکوں گھن نی کریندا“۔ فیاض دے ڈکھ کنوں ادھی رات تیں جاگدی مہراں نے
سویل تھیون داوی انتظار نہ کیتا تے سس کوں پٹ اٹھائیں۔

”اماں..... میں تیار ہاں تڈی وٹاؤن کیتے“

”پر تیدے تیار ہو وٹن نال کیا فرق پوندے.... تیدے وچ کچھ ہووے ہاتاں
لوک ایویں نہ پرے بھجن ہا“۔ سس اوندی جان بُجھ تے اُوکوں پکا کرن سانگے وُل
طعنیاں تے آگئی ہئی۔

پر مہراں نے اوندی سنی اُن سنی کر ڈتی۔ ”توں پک واری کہیں جتاں والے پیردا
آکھیا ہادی جیڑھ سَنڈھ رنیں کوں وی گھن کر ڈیندے“۔

”ہا ہا آکھیا ہم.... وُل“

”میکوں فجریں گھن چل.....“

”توں جن کھیڈسیں!....“

”بس ایویں سمجھ گھن، جن میکوں کھیڈسیں... پر پتر آ پڑیں کوں چتا ڈیویں....“

وُل نہ مہنزاں ڈیسی میکوں سَنڈھ ہو وٹن دا“۔



(14)

جوں جوں تُلّسی دے مُکلاوے دے ڈینہہ نیڑے آندے پے ہن اوندی فیاض
نال رل باہون دی سِک آتش بنزدی ویندی ہئی۔ گھروچ آئے گئے دی ودھن کاری نال
سوڈھی تے رادھی دیاں ملاقاتاں تاں مُنچ تھیاں سو تھیاں ایندے نال نال تُلّسی تے وی
عجیب قسم دیاں پابندیاں لگڑیاں شروع تھی گیاں۔ کُنڈی کھڑکے تے اُونہ ویسی بلکہ نویں
رکھی ہوئی نواں ویسی، دُھپ تے نہ باہسی، رسوئی وچ نہ وڑی، کم کار نہ کریسی تے کئی قسم
دے لیپ منہ توں علاوہ سارے بُت تے کرن کیتے ارا مین دا آونج اَنج شروع تھی گیا۔
ہر آون والے ڈینہہ دے نال تُلّسی دی زچکائی وچ ودھارا کوئی ایڈا انوکھڑاوی
کائنا خاص طور تے ایس گالہوں جو ہن تاں فیاض نے روز شام کوں اُناں دے گھر آونڑاں
شروع کر ڈتا ہا۔ حکیم صاحب اوکوں آپنے کمرے وچ سڈا گھندے تے ول کُجھ دیر دی
گُھن گُھن توں بعد اُوچٹھے پیراں باہر نکل ویندا۔ شادی کوں ہک ہفتہ باقی ریہا تاں تُلّسی
اُمک گالہی تھی گئی۔ سویر کون شام توڑیں فیاض دا انتظار کرنا، اوندے آون تے درگ درگ

کریندے ہاں دے نال اندروں دَری وچوں لُک تے ڈیکھواں تے وِل اوندے وَنج
 توں بعد مَنجھی تھی کراہیں بسترے تے موندھی ڈھئے تے برہنجوں و ہاونزاں، اوندی زندگی
 دی دلیل بن تے رہ گیا۔ اے پک اتجھی یکطرفہ مَن تروڑ ہی کہ جیندی فیاض کوں خبر تک
 نہ ہی۔ اوکوں کیا پتہ جو جیڑھے گھر وچ اوشام کوں آتے قدم رکھیندے، اُتھ اوندی تانگہ
 وچ کوئی جوان چھوہر سویر توں آپڑاں آپ پک اتجھے ناممکن ملاپ دی آس وچ وچھاتے
 باہندی ہے کہ جیکوں شام دے بعد ہنجواں نال ولیننا پوندے۔

ساڈے وسیب دیاں نینگریں وی کچھے نصیب نال اکھ بھلیندن کہ جتھ شعور دی
 پہلی بھال دے نال ای اناں کوں اپنی حیاتی آپ جیون دی بجائے پک اتجھی جلم ہوون دا
 یقین ڈواڈتاویندے کہ جیند امقدر پک مرد دے وجود نال جوتے راہون دے سوا کجھ وی
 کائنی۔ جلم سیانی ہووے تاں مہمبڑی راہسی، خون چوسیندی راہسی۔ جے آپڑیں پیراں تے
 قائم راہون دی دھج بنڑیسی یا آکڑ کر یسے تاں پٹ تے سٹ ڈتی ویسے، لحظہ لحظہ مرن کیسے،
 ایں طرحاں جو اوند آ پنا وجود ای اوند ابارا چاؤن توں انکاری تھی ویندے۔ لیکن ایں
 مخالفانہ بد قسمتی دے باوجود ایہہ نینگریں آپڑیں ادھورے کرڈتے ہوئے وجود کوں مکمل کرن
 دی خواہش وچ کوئی اتجھی سک پال گھنن کہ جیندے پورے تھیون دا امکان صفر توں
 ودھ نی ہوندا۔ لیکن ایں خواہش، ایں سک دے پورے نہ تھیون کوں ای اودوسی جبر دے
 سامنے اتجھی توانائی دے طور تے ورثن دا ہنر سکھ گھنن کہ جیندے تصور اتی سہارے وچ
 باقی دی زندگی گزارنا ممکن تھی ویندے۔ ایندے برعکس جیڑھیاں چھوہریں ایں خواہش
 کوں اپنی طاقت نی بنڑاں سکدیاں، اود آپڑیں خواہیاں دے ہتھوں بے موت ماریاں
 ویندن۔ لیکن ایں ساری راند وچ پک اچیری بد قسمتی وی کجھی کجھی اناں چھوہریں دے نال
 نال فردی راہندی ہے۔ پک عجب تماشہ جو اناں چھوہریں دی کہیں متبادل دی خواہش دی

کہیں بنے مرد دے حصول تک محدود ہوندی اے لیکن اطمینان دے ایں خود گھاڑویں
احساس دے نال جو ویسب دیاں جبری روایات دے خلاف اناں دی مزاحمت کتھائیں
رجسٹر تھی گئی اے۔ پراسوس جو ہک اُن بھاندے مرد دے ہوؤن دے احساس کوں مارن
کیتے وی، ہک اتجھے مرد دا سہارا گولنا پوندے کہ جیہڑا اناں نے خود لیکے تے اوندی ہوند
وچ خود آپنی مرضی دے رنگ بھرن۔ جے گل کوں اے خود گھاڑواں مرد وی ڈڈے کڈھ
کھڑے تاں ول شکوے شکایت کوں جا گولنی اوکھی تھی ویندی ہے۔ اتجھی صورت وچ
ویسب ای کھلدے تے ویسب دے پردھان وی۔

کہیں کہیں ویلے ہک معاملہ ایندے الٹ وی تھی ویندے۔ جتھ کوئی مرد کہیں
عورت کوں ویسبی روایات نال بغاوت کریندے ہو یاں آپنی طاقت بناون چاہندے اتھ
اوبا عورت ای اوندے سر تے پھوسی کر اوکوں لولہا کر چھوڑیندی ہے۔ اوکوں پیار کر و، ہک
زمانے کوں رنجاتے اوکوں سر اکھیں تے رکھو پر ول وی او ہوں راہ و تاؤ دی جیڑھا جو
اوکوں خواب ڈکھیندے، اوندے ہوؤن دی، اوندے وجود دی جس چنیدے تے ول توں
کون تے میں کون۔ جیڑھا عورت دا تھیا اوکوں عورت نے رول چھوڑیا۔ معاملہ ول وی
کتھائیں اتھائیں کھڑے تھیا جو تریٹ ہالی توڑیں ”تری مت“ دے جلول وچوں باہر آئی
نی سگی اناں مغل بادشاہاں دی باقیات آلی کار جیہڑے ”کمپنی بہادر“ دے آونجن توں بعد
وی بادشاہت دے ”کورنش“ تے ”آداب“ کنوں باہر نہ آسکے ہن۔

ٹلسی نال وی گجھ اتجھا معاملہ ہا۔ وشنو نال آپنا جسم سانجھا کرن اوندی سماجی
مجبوری ہئی پر اوندے تصور نے جیڑھا مرد اوندے دل تے اکیریا ہا اوندی بھاند ٹلسی کوں
کتھائیں اُن چتے فیاض وچ ڈس پئی تے اُونے اتھائیں اوکوں گنڈھ چاڈتی، دل آ لے پلو
دے نال۔ اوندے وچ اتنی ہمت نہ ہئی جو اوسماجی مرد دے نال بغاوت کر سکے پر اتنی ہمت

تاں ضرور ہئی کہ سماج دی ایس ڈت کوں ایس طرحاں تھڈا مارے جو ساری زندگی اوہوں جو تھتے گزارہ کریندا رہوے جیڑھا اوندی پسند دے مرد نے چبول تے اوں ڈوسٹیاہا۔ گو کہ پک کمزور چھوہر کول سماج دے خلاف مزاحمت دی اے سب توں ادنیٰ صورت ہئی لیکن آپڑیں اثرات دے لحاظ نال ایندی سٹ سب توں اترتے سب توں وادھویں۔

جئیں ویلے تلسی دے مکلاوے وچ چھڑے چار ڈینہہ رہ گئے تاں اوں کول آپڑیں اندر دی عورت دا وجود منواون کیتے بیا کوئی حیلہ نہ رہ گیا بجڑ ایندے جو فیاض نال وصال ممکن نی تاں موت کول گل چالاوے۔ اے تاں اوکوں کہیں صورت قبول نہ ہا جو وشنو اوندے کنوارے جسم کول ہتھ لاوے۔ ایندی ہکا صورت ول ول اوندے سامنے آندی ہئی جو کہیں طریقے فیاض دی امانت اوندے حوالے کرتے او اپنے آپ نال سُرخرو تھی ونجے۔ ول بھادویں جو وی تھیوے، اوکوں آپدے ادھورے ہوون داشکوہ خدا نال وی نہ ہوی۔ لیکن اے سب کجھ تھیوے تاں کیویں تھیوے۔ فیاض تاں اوندے دل دا حال تک نہ جانڑا ہا۔ جے جانڑا وی ہووے ہا تاں ایس آماں گھاماں وچ کیا کر گھنے ہا۔ چوی گھنٹیاں دی سوچ وچ ہُن تاں اے سوچ وی گھم گھت تے کھڑ گئی جو اوندا وجود فیاض دی امانت کیویں تے کتھوں تھی گیا۔ نہ اوندے نال وعدہ نہ وعید۔ نہ میل نہ ملاپ تے نہ کڈھائیں آمنے سامنے توں ودھ کوئی آلا رابلا رابلا۔ ایس نویں سوچ نے تاں اوندی خود گھاڑویں ”امانت“ دی ماڑی کو پدھرا کر چھوڑیا۔

اتھاں اوندے دل نے تاں کیا گواہی ڈیونی ہئی، تلسی دے اندر دی عورت نے گواہی ڈتی جو ”فیاض“ بیا کجھ نی، بس وشنو نال اوندی نفرت دی تخلیق ہے۔ جے وشنو دھپ ہے تاں فیاض چھاں، وشنو بدرا دی اُکرس ہے تاں فیاض ساون دی ٹھڈی ہیل۔ وشنو ہاڑ دی گرمی ہے تاں فیاض چتر دی گھم نال گھمی سجاک سویل۔ وشنو ایس

گالہوں اُن بھاندا جو حقیقت ہا، فیاض اِس گالہوں من بھاندا جو تصور ہا۔ وِشنونال نفرت دے
 کئی حوالے ہن پر فیاض نال محبت دا ہکو حوالہ اِی کافی جو اوند اوجود وِشنو دے وجود دی ضد
 وِچ اوندے اندر دی عورت نے لیکے۔ اصل وِچ فیاض داتاں نہ کوئی وجود تے نہ کوئی ناں۔
 وِشنونال نفرت دے اُون لکھے وِچ تلسی جیکوں وی ڈیکھ گھنے ہا اُو ہواوندے جسم دی امانت دا
 امین تھی ڈھکے ہا۔ اے ہن فیاض دی قسمت جو اُون ہک خاص لکھے وِچ اُو ہو تلسی دے
 سامریں آیا تے اوندی محبت دی علامت بن گیا۔ حقیقت وی ایہا ہئی جو فیاض محض ہک
 علامتی سُجّان ہا کہ جیندا ہووَن ہک عورت دے جنسی ردِ عمل تے جذباتی استرداد دے سوا بیا
 کچھ نہ ہا۔

مَن گھدا جو مادی دی تخلیق دا سبب اگلی نسل دی بقا دا بندوبست کرنا ہوندے
 پر ایندے وِچ کیا شک جو اِس ذمہ داری کون بنا ہون کیے تَر اُو آپنی مرضی دا چُتر دی ہے۔ اُو
 بے شک عورت ہووے یا کوئی بی مخلوق، نر دی چون وِچ آپنی مرضی کرن اوندی سرشت وِچ
 شامل ہوندے۔ کون حبیب تے کون رفیق، اِس منصب توڑیں اہون دی گنجی عورت آپڑیں
 کول رکھیندی ہے۔ آون والے زمانیاں کول کیہو جیسے نر دے نوج نال کیہو جی نسل ڈیونی
 ہے، اِس کول اوندے اندر دی مادی توں سوا بیا کوئی نی جانزدا۔ جنگلاں وِچ جانوراں دیاں
 مادیاں کول تاں شاید ایندی اجازت ہوسی پر انسانی وِسیاں وِچ فطری تقاضیاں دے برعکس
 اِس گالہہ دا حق مرد نے گھس کراہیں آپنے کول رکھ چھوڑے جو آج دی عورت نے آون
 والے زمانیاں کول اصل نسل ڈیونی ہے یا رلوڑ۔ اے ابجھا حق کہ جیندی الف بے دادی
 مرد کول پتہ نی ہوندا۔ آپڑاں ایہو حق ہتھیکڑا کرن سانگے تلسی دی اِس خواہش نے
 رکھائیں فیاض کول وِشنو دا اُتر بنزاتے اوندے سامنے کر چھوڑیا، اِس آس تے جو اُو
 اوندیاں خواہشاں دی نمکھانی کرن جو گاہنر مند ضرور ہوسی۔

پراے سب کجھ فیاض کیویں کر لسی، ایں گالہہ دا جواب تاں خود تلسی کول وی نہ
ہا۔ اُو خود وی نہ جانڑدی ہئی جو فیاض تیں اوندے شکارے مُجدے وی ہن یا کائنا۔ لیکن
اِندے باوجود پتہ نی کیوں اوکوں یقین ہا جو فیاض اوندی حالت کنوں ایڈا وی بے خبر کوئنا
ہوسی۔ اے ہیں بھلا ندرے دا نتیجہ ہا جو تلسی آپنی زندگی دے اناں اہم ترین ڈیہاں کوں
وی اُن ڈٹھی خجالت دی سولی تے چڑھائی بیٹھی ہئی محض ایں تانگھ وچ جو اوندے مُکلاوے
کنوں پہلے پہلے کوئی لحظہ نصیب دا ضرور اتجھا آسی کہ اُو فیاض دے ناویں لاتی تصوراتی
امانت دا بار لہا ہولی تھی باہسی۔



(15)

مڑ پچی والے بھوپے دے اُستان دے ونج ویندڑ حاطے وِچ سھیاں اُوازاں
گُتکیاں تھی گیاں ہن، سوائے دول دی بٹ بٹ تے دنا دن دے جینے اُتھاں موجود ہر شخص
کوں آپڑیں ردھم دے جادو وِچ ایں طور تے وکیریا ہو یا ہا کہ ڈیکھن والیاں دے دل وی
دول تے مڑھے ہوئے سکے چم تے پودن والی تھا پ نال دَن دَن لائی پے ہن۔

تے جہاں کوں ڈٹھا ویندا پیا ہا.....

اُونیگر یں ہن..... کوئی اٹھاراں، کوئی ویہہ تے کوئی باہوی دی.....

جہاں دے ٹٹھ بیٹھے سک دَم بوتیاں اُتے پھر کی وانگوں بھوندیاں گردنیں،
دول دی اواز دے اُچاڑ جھکاڑ نال آپڑیں لمبے لمبے والاں کوں کہیں چکی کل طرحاں ہکو جیسے
وقفیاں وِچ ایں طرحاں بھوندیاں پیاں ہن جیویں ڈھیر ساریاں کالیاں چھتریاں، آپ
کنوں آپے کھلدا یاں بند تھیندا یاں پیاں ہو وِن۔

جیویں جیویں دول دی بٹ بٹ اتے دَن دنا دن تیز تھیندی..... نیگر یں دیاں

گردنیں دیاں بھنوالیاں وی اویں اویں تیکھیاں تھیں ویندیاں۔ اویں ویلے تاں ایویں لگدا جو
انہاں دے مکے، گردن وچوں اُنک تے باہروں آپوسن۔

پر اُنہاں وچ تاں بلا دی لچک ہئی، جیویں فالے دی کوئی چھمک وچ ہوندی اے،
بُھرتی ہئی، جیرہی جو آؤدھرے ہوئے بگ دیاں جگہاں وچ ہوندی اے، اُنھاں تھکیرا کیا،
آلس داناں نشان تک نہ ہا۔ ایہہ پنجوی چھوی ننگریں، مڑپچی والے بھوپے دے آستان
تے آپڑاں آپڑاں جن کدھواون آیاں بیٹھیاں ہن۔ ادھ چکر بنڑائی بیٹھیاں انہاں جوان
چھوہریں دے نا آسودہ بوتیاں دے اصلوں ادھ وچ بیٹھا بھوپا کجھ کجھ لکھیاں بعد آپڑیں
ہتھ وچ لا تھا تلہڑ سجے کجھ بھنوائی راہندا، جیندے نال شراب دی آواز تاں آندی، پر کہیں
وی چھوہر دے منہ وچوں نکا جیا ڈسکا رتاں کیا نکلا، بُت وچ سریر وی نہ چڑھدی، کمباٹ
وی نہ پوندا، لگدا بُت تے تلہڑ نیں پیا بلکہ کہیں نے نکور کیتے نو سڑے کپڑے دا کولا و لاواں
ایویں چم نال لاتے ولدا چا گھدے۔ جن کھیڈ دیاں ننگریں دے ریشم وانگ تیکوویں
بُناں تے تلہڑاں دی شپرد و شپ کوں ایں توں علاوہ کیا ناں ڈتا ونج سکدا ہا کہ لوک ایہو سمجھن
جو بھادویں جن گراڑا تے گوڑیل ہے تاں بھوپا وی گھٹ زاہد کائنی۔

انہاں چھوہریں دے جوان بوتیاں وچ چنڑنگاں سُر نیدی، چوکھیری گرمی کوں
نکاس دی کوئی فطری راہ نہ لکھی تاں اویں نے انہاں دے اندر، اُن ڈٹھا بھانیر بھڑکا، انہاں
دے بوتیاں کوں بلد اتور بنڑاؤتا۔ جہاں جو آناں کوں انہاں بوتیاں دادار و بنڑا، اُنہاں دے
نال پرنا یا گیا ہا، اودار و ہوون دی بجائے اُلٹا بھر دی کندھ بن گئے تاں اُنہاں دیاں ذالیں دا
اے چوکھیرا بل ہن انہاں مکے چکے لوکیں کوں جن بن بن تے ڈریندا ہئی، ہسیندا ہئی،
یرکیندا ہئی۔

ڈھول دی تھاپ کجھ ہی تیکھی تھئی.....

ننگریں دیاں گردنیں تے پھر کی وانگ بھوندے والاں دی بھنوالی وی کجھ بنی

تکھی تھی گئی.....

جوان بوتیاں داسیک ودھ تے اُکرس بنڑیاں تاں اناں وچ اُبالے کھاندی وافر
توانائی نے وی آسوں پاسوں لمبے لاچھوڑے، اُستان دی چھت تیں اُچے، تکھے تکھے آسمان
ڈو ویندے، پرڈیکھن آلیاں دی دیدتوں اُوڈھر.....

چنگی بھلی دیرایویں بگیاں اکھیں نال گردنیں بھنوانون توں بعداے ہوکدے
ساکدے جسم بے سدھ، بے جان تھی کراہیں پک بے تے ڈھاندے گئے، اُملک سُک دم
اکھیں نُٹ کراہیں، آسودگی دے عمل وچوں گزر دے ہوئے.....

پگھر و پگھر تھئے دول والے نے سُکھ داسا گھدا تے دل ہتھیں کوں جھل
کراہیں، دھوتی دے پاند نال متھے توں ترم تے اکھیں وچ پودنڑں والے تریڑیاں کوں
پونجھن لگ پیا۔ اُتھ کر نٹھ بیٹھے تے کئی کھڑے تڑے سو، سواسو لوکیں نے وی کئی دیرتوں
آپڑیں جھلے ہوئے ساہ ولدے اندر ڈوچھکے، پک بے کوں ڈٹھاتے وَل ڈر بھسوتے تسلی
تپسی دے رلے ملے تاثرات دے نال، ایوں ہولے ہولے اُلا و نزاں تاں شروع کیتا پر،
پک بے دے کناں وچ پھسکار مریندیاں۔ اُناں دیاں اکھیں وچ شاباشی وی ہئی، بھوپے
دی کارگیری تے قابلیت تے اعتماد دا وٹ ڈیون سانگے کہ جینے اُناں دیاں ذالیں،
دھیریں تے بھینڑیں دے جُٹیاں تے ناجائز قابض جن بھوتیں کوں تلہ دی شاپڑ شپ نال
ہیکل چھوڑیا تے کڈھ بھجایا ہا۔

کجھ لوک تکھے تکھے بھوپے دے پیر چمن کوں اُلرے جیڑھا آپڑاں تلہ پر دھرا
کرتے ساکدا بیٹھا ہا۔ پر اُونے ایں طرحاں اگوں تے اُردی شکر گزار مخلوق کوں اشارے
نال نیڑے آون توں ہٹکن سانگے جھنڈک ڈتا، کیوں جو کم ہالی مکیا کتھوں ہا، ضروری

گاڈھے تاں ہالی ہن گنڈھڑے ہن۔ ہوکدے ساکدے بھوپے داساہ تھولا جیہا قابو وچ
 آیا تاں اوندی ہک گجھی شارت نال اوند اخاص باہنا، اوندے قد میں کون چم کراہیں اٹھیا
 تے بے سدھ پیاں نینگریں دے جسمیں کون اناٹومی دے کہیں ماہر طرحاں واری واری
 اکھیں ای اکھیں وچ ٹمیلیندا، اناں دامطالعائی جائزہ گھندا، ولد اپھر کی مارتے خلیفے دے کنیں
 کون آچمبڑیا، انسپکشن رپورٹ پیش کرن کیجے۔ ایں دوران لیہلوں و ہیندے بھوپے دی
 نیت اتے دل دی رفتار دا اندازہ اوندے دگرے ہوئے ڈھڈے شوکن پھوکن نال با
 آسانی لایا وونج سکدا اہا۔

رپورٹ سُنزن توں بعد بھوپے نے آپڑیں خاص باہنے کون رتے کپڑے دیاں
 پنج لیراں ڈتیاں، جیڑھیاں اُونے اُتھاں جن کھیڈ بے سدھ تھیاں نینگریں وچوں پنج دے
 کھنڈے ہوئے والاں دی لٹ نال بدھ چھوڑیاں۔ رتی لیر دا بدھیا وونجواں ایں گالہہ دا
 اعلان ہا جو اناں چوڑویاں نینگریں دے جن بہوں گراڑے ہن، ہالی بُت وچوں نکلے
 کائی، اندرواندری پکھا ماری پٹھن، ہووے ناں ہووے ہک کاڈھ بئی کڈھنی پوسی۔ اے
 رتیاں لیراں، چھڑیاں کپڑے دیاں تھگڑیاں نہ ہن، لگدا ہا جیویں رتے ناگ ہن جہاں
 ڈنگ مار مار کراہیں اناں پنج چھوہریں دے وارثیں دے منہ مایوسی دے لیپ نال پہلے
 ساوے پیلے تے ول کالے نیلے کر چھوڑے۔ پراوکرای کیا سکدے ہن، نویں کشال دی
 کھچل کنوں کرچی کرچی تھی کراہیں، کجھ تاں وسم تے کندھ نال لگ گئے تے کجھ ہک
 پاسے گڑی مارتے بہہ گئے۔

ڈوجھے پاسے اناں وارثیں دی خوشی ڈیکھن آلی ہئی جہاں دیاں تریمتیں دے
 جسم جتاں بھوتاں نے بھوپے دے تلہڑ دی مہربانی نال واگزار کر ڈتے ہن۔ جو آناں
 دیاں کھلاں ہن جو ماندیاں نہ ہن۔ اناں آپو آپڑیں پیو آں، پئے تے بھرانما مالکاں نے

کچھ خود تے کچھ بھوپے سیں دے خدمت گاراں دے منت تر لے نال، اُناں نینگریں دیاں
جگھیاں بہیں بنڑاں ٹھہراتے اُنیں کوں گھیل گھال کراہیں اُستان دے مخصوص حاٹے
وچوں باہر گھن و نجن لگے۔

اُستان توں باہر دارستہ وی بھوپے دی گدی دے اگوں تھی تے لنگھدا ہا۔
اُواتھاں رُکدے، جھُکدے تے بھوپے دے پیراں کوں چُم کراہیں، پگاں دے
پلو وچ بدھے ہوئے چُر مُر نوٹاں کوں املک عاجزی دے نال ڈوہائیں ہتھ بدھتے
اوندے قدماں وچ رکھیندے اگوہیں تھی ویندے۔

مجمع کچھ بیاوی وَاٹلا تھیا..... ہُن اُتھاں صرف اوہے لوک نظر دے پے ہُن
جہاں دیاں نینگریں دے بُت ہالی توڑیں جتاں دے قبضے توں واندے نہ تھئے ہُن۔
اُناں دیاں شکلاں تے آس، نراس، بھُن تروٹ تے پچھلا چوبھ دی رلی ملی کیفیت ہئی
جیکوں کوئی ناں نہ ڈتا و نجن سگدا ہا۔ اُتھاں نہ جیون دی سک ہئی تے نہ مرن دا ڈر بھسو۔ جبردا
رسہ گل وچ پاتے پھٹے تے جھولدے کھڑے ہُن، پرساہ ہا جونکلدا نہ ہا۔ دید ہئی جو ٹھاردی
نہ ہئی، دل دی دھیکل دی گنتری ہئی، جو مُکدی نہ ہئی۔

کافی دیر توں بعد بھوپے سیں دے خاص باہنے ڈکھالی ڈتی۔ لوکیں دے سُنکے
ہوٹھاں دیاں رویاں، کچھ بیاں ای کاتی تھی گیاں۔ ہر کہیں دے اکھیں وچ ہکواہی چھک کہ
بھوپے سیں دا خاص باہنا ہُن کیا آہدے تے کیکوں آہدے.....

بھوپے سیں دا خاص باہنا کچھ پرو بھرا تھی تے وڈے ماچے اُتے بہہ گیاتے وُل
اکھ دی شار ت نال واری واری، ہک ہک کوں سڈ کراہیں پوری رازداری نال ڈسن لکيا جو
ہُن اگوں تے کیا تھیسے۔ خاص باہنے دے ولدے بھوپے سیں دے حجرے وچ و نجن توں
پہلے اتنا ضرور تھیا کہ اناں تانگھ تنگھیندے لوکیں کوں، اُستان دے حاٹے وچ فرش تے بے

سُدھ پیاں پنج ننگریں اچوں آپڑیں آپڑیں دے کول وِجَن دی اجازت مل گئی کہ جہاں
دے بوتے ہُن ولدے سروں مَکھر کن لگ پے ہُن.....

ایویں لگدا پیا ہا جیویں کوئی بے معلوماں تماشے وال اُوڈھر کھرتے آپڑیاں
پتلیاں کول کہیں نویں تماشے کیتے ہو لے ہو لے جگاؤن دی کوشش کریندا پیا ہووے۔ ایں
حالت وِج وی اناں سکھوائیں وچوں مہراں آپڑیں ہڈ قد، منہ مہاندرے، اُٹھ اُٹھان، سوہن
سوہنڑپ تے اکھیں وِج لہہ وِجَن آلی کشش دے سبب املک سب توں اَنج تے نویکلی
ڈس دی پئی ہئی۔ اوندے نال کجھ زیادہ لوک نہ ہُن۔ اوندی ادھ کھڑس اُتے ایہو کوئی
تریہہ پینتری سالان دا ہک ننگر جیڑھا اپنی لا تعلق کنوں اوند پئے وادھو لگدا پیا ہا۔ مہراں
دی سس اُستان دے ادھ کچے تے ادھ پکے فرش تے بے سُدھ پئی مہراں دے پیراں
دیاں تلیاں ملیندی بیٹھی ہئی تے وادھو اُتھوں کجھ پرو بھرا حاطے وِج ای اُچے تھلے تے
بڑی ہوئی ہک کچی قبر دے تعویز نال ٹیک لائی فکرے اندیشیاں کنوں بے پرواہ بے سُدھ
پیاں رَناں کول تاڑی بیٹھا ہا۔

”وے وادھو آ..... کیا آہنے پئی بیٹھیں، رَن اے تیڈی، ایڈے آ، سر گھٹ
اَیندا“۔ وادھو دی ماء کوشش کیتی جو پتر آہنے کول ہکل کراہیں ولدے سروں گھر وِج
آپڑاں اُو اختیار بحال کرے جیڑھا جو وادھو اُتے مہراں دے آپسی جھیریاں وِج کڈھائیں
اڈے اڈے تھی گیا ہا۔ بیا کجھ نہ نظریا تاں اُستان دے ماحول دے مطابق نال لا تھی ڈنڈ
کوری دی ہک ڈوں واری کھڑکا چھوڑی۔

”پر کیوں..... میں کیوں وِجیاں جتاں دی ماری کول“..... وادھو نے وی ماکوں
اُول توں ودھ کھاؤرا تھی ہکلیا..... ”میں کیوں پوداں چاتراں دی ایں کھیڈ وِج..... توں
بیٹھی نوی بی بی مہراں دی ہمدرد..... تھولی ایں توں“۔

”میں بٹھ گھتاں..... میں کیوں کراں ایندی داری خدمت، میڈی پیٹ جائی تھولی اے، نونہہ ای ہے ناں، کوئی دھی تاں کائنی۔ میں تاں آجائی ایویں ماجائی سمجھ نال آ بیٹھی ہم، ہُن میکوں کیا۔ وادھودی ماء بھاگ بھری، مہراں دے پیر آڈھن چھوڑ کراہیں، منہ وٹا، پک پاسے تھی تے بہہ گئی۔

ایں توں پہلے کہ زہردی گندل وادھومنہ وچوں ول کوئی قہرز ہر کڈھیندا، بھوپے دا خاص باہنا یکدم ای اوندے سرتے آتے کھڑ گیا۔

”کون ہے ایں چھوہر دا ولی وارث“.....

”جی سیں جی حکم“..... ادھ کھڑ بھاگ بھری ولدی اٹھی کھڑی تھئی۔

”مبارکاں تھی گیاں، بھوپے سیں تہاڈی سُن ای گھدی اے“۔ بھاگ بھری دے منہ تے رونق آندی ڈیکھ تے خاص باہنا اوندے کن دے نیڑے تھی گیا..... ”فیصلہ تھے جواج رات بھوپا سیں تیڈی چھوہر دے جن کڈھن داچلہ کریسی۔ جن پک ای کائنی، پورا اجڑ ہے اجڑ۔ موکھ رکھ میڈی تلی تے سواروپے دی تے چھوہر کوں پچا چھوڑاؤں سامڑیں جتاں والے حجرے وچ“۔

”سوے روپے دی موکھ“..... بھاگ بھری داوات پٹج گیا۔

”تاں نہ ڈے، مجبوری تھولی اے..... بھوپا سیں کہیں بی چھوہر دا جن کڈھ چھوڑیسی..... اتھ کرتاں پوری گلید پئی لا تھی اے“۔ اے آکھ تے خاص باہنا ڈوجھے پاسے موندھی پئی چھوہر ڈوول تے اوندے وارثاں نال گالہہ مہاڑ کرن پئے گیا۔

”نہ سیں نہ، نراض نہ تھی میڈا سوہنا، میں ڈیندی آں موکھ تے ہتھ بدھ تے ڈیندی آں۔ آج رات میڈی چھوہر داچلہ تھی گیا تاں سوائی وی ڈیساں..... اے گھن سوا روپیہ..... ہے تاں بھانج پر ہے پورا..... پورہیا کر کرتے کٹھے کیتن“۔ بھاگ بھری نے

خاص باہنے دے اگوں ول تے کجھ ایس طرحاں منت زاری کیتی جو اوندی گالہہ تے کھو
کرن تے مجبور تھی گیا۔ بھاگ بھری نے گھگھرے دے نیفے اندر ٹیک طرحاں پھسائی
کپڑے دی پک چھوٹی جہی گتھلی کھولی تے اوندے وچوں بھانج کڈھ تے پک پک آنہ
گن کراہیں خاص باہنے کوں ڈیون لگی۔ اوند اُپڑاویں دا اویں تھلی تے بیٹھا کاوڑ آلی
حیرانگی نال اے سبھ کجھ تھیندا اڈیدھا بیٹھا ہا۔

کچھ لکھے بعد مہراں کوں جتاں والے حجرے وچ پچا ڈتا گیا۔ اندر دا ماحول کجھ اتنا
ڈراکلا ہی جو بھاگ بھری اگر بتی تے دھوپ سندور کوں دکھا کراہیں تکھے تکھے پٹھے پیراں باہروں
نکل آئی پر اے ڈوہیں چیزاں اتھ جران کیتی بیٹھے باہنے کوں ڈیون ول دی نہ بھلی جیندا دیہہ
برابر جٹ وی اوں ڈردا حصہ ہا کہ جیڑھا ڈیوے دی لاٹ دے کماٹ نال چار پھیر دیاں کندھاں
تے کھنڈیا ہو یا ہا۔

ڈوجھے پاسے مہراں دی حالت وی کجھ عجیب جہی ہئی۔ اکھیں کھلیاں ہن پر دید نہ
ہئی۔ نبض ٹپوڑے لائی پئی ہئی پر بت وچ جان نہ ہئی۔ ہتھ جھڑکھ ڈتے، اُتھائیں ہن تھئے۔ پیر
جھ دگیر چھوڑے، اُتھائیں لاتھ ریہے۔ آسودگی اندروی کتھائیں نا آسودگی دا جلول ہاتے بے
معلومی اچوی بت دے ریشے ریشے وچ مٹھی مٹھی پھر کاردا کارن ہئی۔

رات نے پہلے پہر وچوں نکل کراہیں ڈوجھے پہر دی گنڈی کھڑکائی تاں حجرے دے
اندر اتے باہر دی خموشی ہی وی ڈوڑی تھی گئی۔ جتاں والیاں چھوریں دے ”ولی وارث“ سارے
ڈنہہ دی کشال توں بعد جھ جالھی اُتھائیں کسرتج مسرتج گئے۔ ایس آن وچ بھوپا آپڑیں پنج
چھی چیلیاں دے نال ولایتی شراب دے نشے وچ کہیں ساہن آلی کار جھولدا ہو یا ایس طرحاں
اُتھاں آن پہنچیا جو اوندی سچی بانہہ پک چیلے دی گچی وچ تے کھسی ڈوجھے دی۔ اُستان دے
برامدے وچ پالے کنوں کمبے تے بندر کنوں گھلاں کھاندے ہوئے ملنگ نے بھوپے دی
مخصوص بو بنگھ کراہیں گھلاں گھلاں وچ ای دھمال پاوئی شروع کر ڈتی۔ اوندی گچی وچ لٹکے

ہوئے کٹھے، قلابے آتے مڑکیاں سمیت پیراں وچ بندھے ہوئے گھنگر وَاں نے آپنی جھنکار نال
، ماحول کوں کبا چھوڑیا۔ مہراں دی سس نے وی ادھی نندر وچوں جاگدے ہویاں اکھیں کھول
چھوڑیاں پر پتہ نی اے بھوپے نال عقیدت دابارہی یا آپنی مطلب براری دی مصلحت جواوندیاں
اکھیں وَلدے سروں اتجھیاں بویاں جوہولے ہوئے نوٹیج گیاں۔

جیویں جو بھوپا نجر بے وچ وڑیا، ملنگ دی دھال اُتھائیں تم تھی گئی تے اوسک دم تھی
کراہیں وَلدا آپنی جا وچ گسرد گیا۔ جنیں ویلے جو سارے چیلے اُتھائیں برآمدے وچ ہک ڈوجھے
دے سامنے پکتھی مارتے آپڑیاں آپڑیاں چلماں وچ چرس والا تماخوں بھرن بہہ رہیے۔ آپڑیں
آپ توں بے سدھ پئی مہراں دے پھیر لیلہلوں وہندے بھوپے نے چکر لاوڑیں شروع کر
ڈتے۔ نا آسودگی دے جلول نے مہراں دے موتے وچ اتجھی آتش سوری جواوندیاں لمبیاں نال
بھوپے دی شافت تاں ودھی سو ودھی پر نشہ وی ساراوان وٹیندا گیا۔ جگہاں وچ کانبا پیتاں اُناں
وچ ساہ نہ رہ گیا۔ اُونے تیکھے تیکھے دھوتی دی ٹیگ وچوں نیکی بوتلی کدھی تے ڈکدے ہوئے
ہتھاں نال منہ کو چالاتی کجھ ایں طرحاں جو لیلہلوں تے شراب رَل کراہیں کاک ٹیل بن گئی۔

بھوپا انساناں دے اُون گروہ دانما سندہ ہاجیر دھے کائنات وچ موجود دُسن دی پرستش
نی کریندا، اوندے واسطے روند اپٹیندا نی، ٹھڈے شکارے نی بھریندا، شاعری نی کریندا، موتی جیسے
لفظاں نال سدگار پنگارتے کہانیاں نی لکھدا، ہجر دیاں لمبیاں راتیں وچ جاگ جاگ تے محبوب
دی سک وچ لحظہ لحظہ فی مردا بلکہ آپنی قبضہ گیر آتے تصرف پسند فطرت تے اوندے نتیجے وچ پیدا
تھیون والی کمینگی دی موثر قوت نال ہر شے کوں پہلے آپنی مٹھ وچ گھسن آونزاں تے وَل کاٹھ
کباڑ بنزا ڈیونزاں اپنا حق سمجھدے۔

کچھ دیر بعد نجر دے دادروازہ کھلیا۔ منکیاں ہویاں لٹاں تے آپڑیں دیگڑے جیڈے
ڈھڈ دابار چا کراہیں بھوپا باہر نکلیا تے پھیر کھنڈے ہوئے اندھارے دے وڈے گھم گھم وچ
ہولے ڈاڈھے پرو بھرا تھیندا گیا۔ چرس دے نشے وچ دھواں دھواں تھئے صف بند چیلے جیڑھے

پہلے کنوں دَر گھلن دی تانگھ وچ بیٹھے ہن تھئے، کہیں نہر آلی کار تھپٹی مارتے اٹھتے تے سارے دے سارے پک دم حجرے وچ پہہ گئے دتھ بھوپے دے ادھ چبولیے ہوئے مہراں دے بُت کوں ہالی بیاوی کاٹھ کباڑ تھیونڑاں ہا۔

آندے ڈنہہ دی سویل مہراں کیجے اُن سو نہی آسودگی داسنیہا گھن تے آئی۔ اُدہ اٹھن چاہندی ہئی پر پورے بُت وچ کتھائیں کجھ تڑنڈا پیا ہاتے کتھائیں کجھ کھنڈا پیا ہا۔ کہیں زلزلے دے لنگھ وُجَن توں بعد دی کیفیت ہئی پردھیمے دھیمے، مٹھے مٹھے درد وچ گھلے ہوئے سُرُور دے نال، اے احساس ڈوائے بغیر جو ایں کیفیت دامرکز کتھاں ہے۔ عجیب جیہا احساس ہا کہ جیویں پک پک مسام وچ تازگی اُتے مستی واڑ ڈتی گئی ہووے پر وُل وی ایں مستی وچ پک آس جی ہئی، پک تھکیرا جیہا ہا جینے اوکوں اصلوں گھیکل بنزا چھوڑیا۔ فاقیاں دے مارے کوں ایندے نال کیا جو بھو جَن حلال ہئی یا حرام، کچا ہئی یا پکیا، پروتھا ہئی یا تازہ، بس پیٹ بھر بجنا چاہیدے۔ کیوں جو بکھ داناں تاں کوئی مذہب ہوندے تے ناں ای اے اخلاقی تے سماجی قدر راں دی جکڑ بندی وچ آسکدی اے۔ بکھ دا آپنا عقیدہ تے آپڑیاں قدر راں ہوندن۔

مہراں پچھلی رات دے چلے کنوں بے خبرتاں نہ ہئی پر لا تعلق ضرور ہئی۔ اوکوں وی کجھ کجھ یقین تھیون لگ پیا ہا جو واقعی کہیں جن نے اوندے وجود کوں اندروں پکٹا مار یا ہو یا ہاتے ہن اُواو پٹے وچوں آزاد تھی ہلکی پھل تھی گئی اے۔ ہالی اُوا ایں نویں سویل دی گھبلان وچ ای ہئی جو اوندی سس حجرے وچ آن وڑی۔ مہراں پہلے تاں چھر کی پر جیویں جائس جو اُو بھاگ بھری ہے، اُونے کھل تے اپنے چہرے کوں ڈوہیں ہتھاں نال لکا گھدا۔

ڈھلدی عمراں دی کا پٹ اُتے جہان دیدہ بھاگ بھری نے سکھ دالمبا ساہ گھدا تے بھوپے دے خاص باہنے کوں شکر گزاری دی سوائی ڈیون کیجے پٹھے پیراں حجرے وچوں باہر نکل آئی۔



(16)

تلسی دی شادی کوں ترے ڈیہ نہہ باقی رہ گئے پر اوندی عجیب جی ضد دے
 پورے تھیون دا کوئی امکان نہ دور تے نہ نیڑے۔ جتنا وی ڈاج پہلے دا تیار پیا ہا اتنا ای
 راہون ڈتا گیا کیوں جو باقی جو کجھ وی ڈیونزاں ہا کوشش ایہا کیتی گئی جو حالات کوں ڈیدھے
 ہوئے سھوڑ پوراں دی شکل وچ ہووے۔ وری داتاں نہ کہیں کچھیا تے نہ کہیں تقاضا کیتا۔
 ڈاج ای سنبھج ونجے تاں وڈی گالہہ۔ اویں وی سوڈھی کوں غرض مال نال ہی تے یاؤل
 چھوہر دی جوانی نال۔ وشنو لکن تاں نہ کہیں آل داتے نہ کہیں قال دا۔ اوڈے تلسی وی
 جانڑدی ہی جو وشنو تاں گھوٹ چھڑاناں دا ہوسی، ایں گالہوں اُونے لیہلوں وہندے
 سوڈھی کوں ہمیشاں کیتے نامراد رکھن کیتے آپڑیں کنوار بنڑن دیاں ساریاں سکاں تے
 مراداں فیاض نال جوڑ بکائی بیٹھی ہی۔

معاشرتی جبر نے اناں ساریاں کرداراں کوں گٹھا کرتے ایں طرحاں ہک
 دھاگے وچ پوچھوڑیا ہا جو نال نال پکے ہوون دے باوجود او ہک بے کنوں کئی کئی کوہ دور

اے انجوانج ہن۔ وشنو تلسی دا گھوٹ ہووون دے باوجود گھوٹ نہ ہاتے فیاض کجھ نہ ہوندے ہوئے وی تلسی داسب کجھ۔ ایں ازلی تکون وچ ہک عورت نے جیڑھا مقام تے مرتبہ ڈوں مرداں دالیک چھوڑیا ہا، اوڈوہیں اوندے توں املک ان سو نہیں، اصلوں بے خبر۔ ایندے نال نال جیڑھا رشتہ آندے ڈیہنہاں وچ تلسی تے سوڈھی دے درمیان ٹھہن تے راڈھی تے سوڈھی دے وچ تڑن ویندا پیا ہا، اوکوں اورتہ پرے کہیں سُدھ سنیہے دے بغیر وی جان چکے ہن لیکن نہ تاں ہک بے کوں جنڑا سکدے ہن تے نہ الواسکدے ہن۔

اوں ڈیہنہ پچھلے پہر ہک استجھا واقعہ تھی و ہانڑاں کہ جنیں توں بعد تلسی کوں ایویں لکھا جو قدرت نے اوکوں فیاض دا ڈیونڑیں دار ہووون توں بچا گھدے۔ تھیا ایں جو بہاول پور وچ حکیم رام لعل، اوندی ذال راڈھی تے ساندھو سوڈھی مل دامتھر کہ مسات تے ملیر بھگوان داس مکلا گیا۔ اوندی ارٹھی کیوں جورات کوں پونڑیں ہئی، ایں گالہوں اناں سکھوائیں دا بہاول پور وچ جڑاں وی ضروری تے رات راہوناوی۔ تلسی ایں گالہوں نہ وچ سکدی ہئی جو مینڈھی کھلن پاروں سوڑاں وچ بیٹھی ہئی۔ پہلے تاں اے وی سوچیا گیا جو شادی دی ترخا گوں تے کر چھوڑتے پر سبھے ایں گالہہ دے حق وچ ہن جو گل کوں پتہ نی کیا تھیوے، ایں گالہوں چنگائی ایندے وچ ہے جو بغیر کہیں ڈھول ڈھمکے دے سادگی نال ست پھیرے کرا چھوڑیجن۔ بہاول پور روانہ تھیون ویلے ڈوں نوانی کوں گھر دے اندر سمن دا پابند کیتا گیا تے گھر دے باہر ڈیڈھی وچ نگرانی کیتے سب توں اعتباری ملازم فیاض کوں مطب توں سڈا گھدا گیا۔ باقی تلسی دیاں اوسہیلیاں جیڑھیاں چکیوں دی رات کنوں روز ڈھوکی تے آن باہندیاں ہن، اناں کوں آکھ ڈتا گیا جورات بے شک تلسی کول ای آن سمن پر اناں ڈیہنہاں نہ تاں ڈھوکی و جسی تے نہ کوئی نچن گاؤن تھیسے۔

فیاض آیاتاں بڈھی نوان نے اوکوں ڈیڈھی وچ گھٹ وچھاڈتی تے ویندیاں

ہو یا آکھی گئی جو گجھ لوڑھ پوڑے تاں وِردی اندر لی گنڈی کھڑکا ڈیویں تے رات کوں سُمیں
تاں بے شک پر ذرا ہوشیار۔ فیاض ڈیڈھی وِچ آتے کیا بیٹھا اوندے سامنے کجھ مینے پہلے
دیاں اوساریاں یاداں ایں طرحاں ہک ہک کرتے اکھیں دے اگوں آون پئے گیاں
جیویں جو احمد پور دے چوک والے منڈو وے وِچ بہہ تے کوئی فلم ڈیڈھا بیٹھا ہووے
۔ اُوکوں اُوڈی نہہ یاد آیا جڈن جو اُونے پہلی واری ایں ڈیڈھی وِچ کھڑتے ہک گرولی تے
ماسلی چھوہر کوں چکھوں مُڑ مُڑتے ڈیڈھے ہوئے اُگی تے بھج دے ڈٹھا ہاتے ول ایں
طرحاں ہوش اچوں نکلیا جو دیرے نواب توڑیں پیدل ای ٹردا گیا تے پتہ اُون ویلے لکھا جو
جسیں ویلے عید گاہ آگئی۔

اُو ایں گالہہ تے وی حیران ہا جو اوندے بعد اُوکئی واری حکیم صاحب دے گھر آیا
پر نہ تاں اُو چھوہر نظری تے نہ ای اُونے اوندے بارے کجھ سوچن دی کوشش کیتی۔ شاید
ایں گالہوں جو اُو گرولی چھوہر حکیم صاحب دی دھی تلسی ہئی۔ حکیم صاحب دا شاگرد اُتے
ملازم ہوندے ہوئے اُوناناں دی گھر دی عورت بارے کوئی سوچ کیویں رکھ سکدا ہا۔ لیکن
اُن فیاض کوں ایوں لگدا پیا ہا جو اُو حکیم صاحب دی شاگردی تے ملازمت دی اخلاقیات دی
وِکیڑ وچوں باہر نکل چکے۔ اے احساس کیویں اوندے اندر پیدا تھیا، ایندا جواب خود
اوندے کول وی نہ ہا۔ شاید ایں گالہوں جو ریاست دے بدلے ہوئے حالات وِچ ہک
ہندو ہوندے ہو یاں حکیم صاحب دا اتھرا ہونزاں ہر آون والے ڈیڈھ نال مشکل تھیندا ویندا
ہا۔ ہک شاگرد ہوون دے سانگے تاں اوندے تے اے فرض ڈوڑا تھی گیا ہا جو اوناں
حالات وِچ اُو حکیم صاحب تے اوناں دے گھر بار دا پہلے کنوں زیادہ خیال کرے لیکن حیرت
ہئی جو اوندے ذہن وِچ تلسی دا خیال چچلا بن تے کتھوں آون لگ پیا ہا۔

گھر دے اندروں ڈھیر ساریاں چھوہریں دے اُچے اُچے نچکیاں دی آواز نال

فیاض وی سوچاں توں باہر نکل آیا۔ اُونے چار پھیرنگا پھنوائی تاں ہک تنگ ڈیڈھی وچ خود کوں سُتا ڈیکھ تے اوند اہاں اوکھا تھیون پئے گیا تے اوکھنڑے توں اُٹھی تے دردے باہروں نکل گیا۔

اُوڈے اندر کمرے وچ تُلّسی کوں چھی ست سہیلیاں ویرھی بیٹھیاں ہن۔ ڈھولکی نہ ہوون دے باوجود لطیفے سُنز اسُنز اتاڑیاں تے نچے۔ نوا مینی وی نال بیٹھیاں ہن تے وَل اُنّاں کوں ہتھکیندیاں بیٹھیاں ہن جو تھولا ہو لے نچکن، ہمسائے کیا اکھیں جو ایڈے نیڑے دے رشتہ دار دی مرگ ہوون دے باوجود تُلّسی دامکلا واتاں اگوں تے نی کیتا گیا پر نچکے پٹانے تاں نی ٹھاہندے ناں۔ چھوہریں نوا مینی دی گالہہ کتھوں سُنز دیاں ہن، تہوں نچکے وی اُوئیں لگدے ریہے تے تُلّسی نال بیٹھیاں مٹھیاں شرارتاں تے کھڑاند بازی وی۔ تُلّسی پہلے تاں ہاں ہوں کرتے سہیلیاں نال جُوی رہی پر جوں جوں وقت گزردا گیا اوند مزاج چوڑا تھیندا گیا۔ ایڈیاں ساریاں سہیلیاں تے اُنّاں دی کھل مذاق تُلّسی کوں ہک اکھ نہ بھاندی پئی ہئی۔ اُو اُج سویرے تیں سوچ نہ سکدی ہئی جو اُج دی رات ایں کلبے گھر وچ فیاض ایں طرحاں وی آتے سُم سکدے۔ بھاویں جو اُو ڈیڈھی وچ ہار پر ہاتاں ایں گھر وچ۔ تُلّسی کنوں ہن برداشت نہ تھیندا پیا باجو کیویں سہیلیاں کنوں جان جھڑواوے جیڑھیاں آپڑیں گھروں اُج دی رات تُلّسی کول گزارن دی موکل گھن تے آیاں بیٹھیاں ہن۔

رات دا پہلا پہر گزریا تاں تُلّسی دے دماغ دا چچلا وی ودھدا گیا۔ آخر تک تیں تھی تے اُونے سہیلیاں کوں آکھیا جو اُو آپڑیں آپڑیں گھراں کوں وَجن، سب خیراے، آپڑیں گھر کدھ دا ڈر۔ ماسیاں نوا مینی وی ہن پیاں تے باہروں ڈیڈھی وچ جو ان وی سُتا پے۔ تُلّسی دے وَل وَل آکھن دے باوجود چھوہریں نے ویندیاں ویندیاں گھنٹہ گھن بیالا

ڈٹاتے جس ویلے او وئجن لکیاں تاں تلسی اُناں کوں مُکھاؤن دے بہانے فیاض کوں
 دیکھن کیے ڈیڈھی توڑیں ٹُر آئی۔ چھوہریں دیاں کھلاں ویندیاں توڑیں وی مُکُن دانان
 نہ گھندیاں پیاں ہن۔ اوڈیڈھی وچوں لنگھتے دروازے ڈو وئجن لکیاں تاں سُتا ہو یا فیاض
 اُٹھی کراہیں تکھے تکھے کندھ والے پاسے منہ کرتے کھڑ گیا، اوں ویلے تیں کہ جے تیں
 یگیاں چھوہریں لنگھ نہ گیاں۔ تلسی وی دلان تے ڈیڈھی دے درمیانی رستے وچ کھڑ گئی۔
 دل اوند ایں طرحاں ٹھا کے مار مارتے ٹُر دا پیا ہا جو جیویں ہنڑیں سینہ پھاڑتے باہروں آن
 پوسی۔ آپنی منزل کوں اتنا نیڑے ڈیکھ تے اوندے ہتھ پیر ٹھہر گئے تے بُت وچ کہیں جا
 وسماٹ تے کتھائیں تھڑکاٹ شروع تھی گیا۔ ایں توں پہلے کہ اوں اگو نہی تھیندی، بڈھڑی
 نواؤن نے پچھوں ہنکل مار چھوڑی جو آبی بی سونزاں توں بعد ننگے سرتاریاں دی چھاں تلے
 نی کھڑیندا، رکھ ہوندی اے۔ تلسی کوں لکيا جو کتھاؤں دوروں آؤن والی آواز نے اوندی
 منزل کھوٹی کر چھوڑی اے۔ پچھوں مُڑتے ڈُٹھس تاں بڈھی نواؤن اوندے سرتے کھڑی
 ہئی تھی جیڑھی تلسی دا ہتھ پکڑ کراہیں او کوں اندر کمرے ڈو گھن گئی۔

کمرے وچ وئجن توں بعد تلسی دا دل کریندا پیا ہا جو دھاڑاں مار مارتے ایں
 طرحاں رووے جو فیاض آپ کوں آپے اوندے کمرے ڈو چھلکيا آوے تے او خود اوندے
 پیراں وچ بہہ تے سھو حال کھول سناوے۔ اوڈے جو اُونے کیس طرحاں او کوں آپڑیں
 اندر دی عورت دامو بھی منے۔ اوڈے جو عورت دا پیار کیا ہوندے تے او پیار کریندی کی کوں
 ہے۔ او، جیندے نال ماہیو او کوں زورے مسائیں پریندن یا او جیکوں او خود آپڑیں جسم
 اتے آپنی روح دا حاکم من گھندی اے۔ اے سوچ کراہیں تلسی دیاں اکھیں وچوں ہنجوڑ
 آیاں۔ بڈھی نواؤن نے تلسی دیاں اکھیں وچ ہنجوڑ ٹھے تاں پریشان تھی گئی۔

”اماں... نہ تھی مٹھی، ہر چھوہر نے ہک نہ ہک ڈیہ نہہ پرانے گھرتاں وئجواں

ہوندے... ہاتے جے توں ڈریں تاں اُساں ڈوہیں اتھائیں سُم پیوں“
 ”نہ نہ.... نی لگدا میکوں ڈر... میں اندروں کُڈا مارتے سُم پوساں تے تِساں
 دی نال والے کمرے وچ وَنچ سُموں“.... تُلّسی نے بوچھن دے پلو نال آپنے ہنجو پونجھ
 چھوڑے۔

”اماں سوچ گھن.... کل کوں حکیم صاحب آتے رنج نہ تھیوے... اُساں
 تاں غریب رِناں ہئیں، پھپھڑی کمبدی اے تیڈڑے اے کنوں“.... چھوٹی نواں ہتھ
 بدھ تے کھڑ گئی۔

”میں جو آہدی پئی آں.... نی لگدا میکوں ڈرتے نہ حکیم صاحب رنج تھیں،
 وَنچ سُموتے میکوں وی سُمں ڈیو“.... تُلّسی پیر پٹکا تے کاوڑ نال بولی تاں اُوڈوہیں کمرے
 وچوں باہر نکل گیاں۔ تُلّسی داہاں اوکھا تھیا تاں اُونے کمرے دادر وازہ اندروں چا بند کیتا
 تے پلنگ تے موندھی ڈھئے وَلدے سروں ڈُسکن پئے گئی۔ اُوکوں سمجھ نہ آندی پئی ہئی جو
 اے رُو وَن ڈکھدا ہے یا خوشی دا کہ اُو کتنے ڈیہاں دے کشالے تے راتیں دے جگاریاں
 توں بعد اخیر آج فیاض کوں ملن کیتے ویندی پئی ہئی۔

اے خیال آندے سارا ای اُونے جلدی جلدی آپنے بُت توں چیکوں کوں سنے
 بوچھن نال پونجھیا تے بے کپڑے پا کر اہیں منہ متھے کوں شیشے وچ ڈیکھن لگی۔ کئی ڈیہاں
 دی بھجدی پئی تُلّسی شیشے وچ خود کوں وی اوپری اوپری لگی اتجھی کنوار طرحاں جیندے جسم
 دی اصلی خشبو تازی تازی ہمبندی پئی ہوندی اے۔ میندی، چیکوں، گلاب دا عرق، بید
 مُشک کیوڑہ، ہلدی تے سیندور سونزیریں بیٹھی کنوار کوں کوئی نویں خشبونی ڈیندے بلکہ جوان
 چھوہر دی آپڑیں خشبو کو جگا ڈیندن۔ اُو خشبو جیڑھی جُو اناں کوں پہلے گالہا تے وَل چھتا کر
 ڈیندی اے۔ اُو خشبو جیڑھی ہاڑ دی شام کوں نکروی جھڑی دیاں مہین پھینگاں دے تسی

بھومیں تے خُرکانال اکھ بھلندی اے۔ تلسی نے وی اے خشبو محسوس کریندے ہو یاں نگ
نال لباساہ گھداتے ول ایندے ہو ون دے یقین نال شر ماتے رہ گئی۔ شیشے نال اکھ ملاونا
اوکھا تھی گیا ہا۔ اے خشبو کہیں تخلیقی عمل دا کاٹھ ہا ہی اُون خشبو طرحاں جیڑھی الویائی رن
دے بُت وچوں ویا ون دے پنچویں چھیویں جیہاڑے آون لگ پوندی اے۔ اے اولخط
ہوندے کہ جنیں ویلے عورت ویئم دیاں ساریاں تکلیفاں بھل کراہیں ولدے سروں آپڑیں
پئے وچ اُوہا کشش محسوس کریندی اے جیڑھی جو پہلی واری پیٹ تھیون تے محسوس تھی ہی۔
ہر سال اوکھیاں تھی تے بال جما ون والیاں عورتاں وی اُو جو ان دی وانی و نجن ڈیندیاں
جیڑھا جو ہر سال اُناں کوں گھن تھیون تے لائی رکھیندے۔ اے محبت کتھائیں اُون تخلیقی
عمل وچ بھرویں معاونت دی ڈت ہوندی اے جیڑھا جو قدرت نے ہر جنس دی مادی کوں
عطا کیتا ہوئے۔ کیا ذوال ہے جو اُساں عورت دے اگلی نسل کوں جما ون دے ایں فطری
فریضے کوں شافت جیہا گھٹیا ناں ڈے کراہیں معتبوب بنزا چھوڑے۔

تلسی نے فیاض ڈو و نجن کیتے گنڈی کھول تے پیر و روچوں کدھن دی کوشش
کیتی تاں ایوں لکيا جو اوندے ڈوہائیں پیر کئی کئی مَن وزنی تھی کراہیں ایں طرحاں بارے
تھی گن جو پون دے ای کائی۔ اُونے اک تے باہر کو کیتی تاں نوائینی داہلکا جیہا ہلارا
محسوس تھیا۔ تلسی زچ تھی تے ولدی پلنگ تے دَر تھی۔ اوندے پیر ولدے ہلکے پھل۔
رات دا ڈو جھا پہر مکھاون لکيا تاں تلسی نے پک واری ولا باہر جھات پاتی۔ کوئی الا اتجھانہ
ہا جیکوں الا آکھیا ونج سکیدا۔ اُونے ولا گنڈی کھولی تے ہولے ہولے پیر چینی کمرے
وچوں باہر نکلی پر پیر مَن وی اُوئیں بارے بھک۔ پون کوں نہ آندے پئے مَن۔ تلسی
واسطے اے موقع زندگی دا آخری موقع ہا کہ جیندے سبب او آپڑیں وجود دے آپڑاں ہو ون
دا ثبوت ڈے سکدی ہی۔ ورنہ کون جانز داہا جو اوند اے جسم ڈوں ڈ۔ نہاں بعد کیندی کیندی

بقضہ گیری وچ ہوسی۔ تلسی کنوں پیر نہ پچوے تاں اونے پیراں کوں ڈیڈھی ڈوگھیلنا شروع کر ڈتا۔ چار پھیرے کہیں دے ساہ گھنن دی آواز وی نہ ہئی پر ول وی اوندے کیے کمرے کنوں ڈیڈھی توڑیں ترے گھٹاں دا پندھ کوئی صدیاں دا پندھ تھی تے رہ گیا۔ تلسی دے اندر بلدی بھاء دے مچ تے دھونی طرحاں دُکھ دے ساہ دے باوجود اوندائت باہروں برف آلی کار ٹھڈا تے مکدے جیٹھ دے ہنالے وچ وی پالے کنوں تھڑکدا ہویا۔ ول وی او چھوہر کہیں نہ کہیں طریقے ڈیڈھی توڑیں اپڑای گئی کہ جتھ فیاض اصلوں بے سدھ، بے سرت سٹا پیا ہا۔

تلسی کوں سمجھ نہ آندی پئی ہئی جو کیا کرے، کیا آکھ جگاوے فیاض کوں۔ کیا اوکوں پتہ ہوسی جواے چھوہر آپڑاں سمجھ گجھ اوں توں وار بیٹھی اے تے ہن محض ایں پک پھر رات دے وصال دی اُرداسی ہے۔ کیا اوندے نال وِج تے سُم تھیوے یا اوندے بنائن وِج لکے سینے کوں رِج رِج چنیں بیٹھی۔ اوڈوں ترے قدم ودھاتے اوندی سرہاندی وِج کھڑی تے آپڑیں کنبدے ہوئے سچے ہتھ کوں فیاض دے سر دے وِگرے والاں وِج پھیریا جیڑھے آپس وِج گنجوے پے ہن۔ متاں وال بیچن تے او جاگ پووے۔ تلسی نے ہتھ چاگھدا۔ حالانکہ چاہندی ہئی جو فیاض جاگے۔ او اوندے پاسے کنوں ول تے پاٹی تے باہون لگی تاں پاٹی کڑک پئی اوندے بار نال۔ فیاض نے پاسا ولا یا تاں تلسی پیراں کنوں ول گئی۔ ہمت ای نہ پوندی پئی ہئی اوکوں جگاؤن دی یا اوندے نال باہون دی۔ ڈو جھے پاسے اے اُبالہ وی جورات دا چھیکڑی پھر شروع تھی گئے اتے اے خوف وی دامن گیر جو نوا مینی وچوں کوئی جاگ تے اڈے آگئی تاں کیا تھیسے۔

چھیکڑ ہمت جواب ڈے گئی تاں تلسی نے فیاض دی پواندی کنوں ڈیڈھی دے پکے فرش تے بہہ کراہیں ڈوہیں ہتھ اوندے پیراں تے چار کھیونس۔ فیاض دی جاگ نہ تھئی

تاں تلسی نے پاگلاں آلی کاراوندے پیراں کوں مچواں شروع کر ڈتا۔ فیاض اُجن دی گھوگھ نندر وِچ ہا۔ تلسی پیر چم چم تھکی تاں منہ اوندے پیراں تے چار کھنٹیں۔ مایوسی حدتوں وِدی تاں اُکھیں وچوں ہنواں دی برسات شروع تھی گئی۔

فیاض دے پیراں تے گرم گرم پانی دے نکلے نکلے تر پڑے ڈٹھے تاں اُوکوں نندر وِچ ای کہیں دے ہوون دا احساس تھیا۔ اُونے پیراں کوں اُمر ادا اُتوں تے چھکیا تاں ایویں لکيا جو اوندے پیر کہیں دے کولے کولے ہتھاں دی وٹھ وِچ ہن۔ اوندی جاگ تھی گئی لیکن اُو پھ ماری ستیارہ گیا۔ فیاض دا دماغ تکھے تکھے گویڑ کریندا پیا ہا جو اے کون تھی سکدے۔ جو دی ہے کوئی بجن ہے دشمن نی تھی سکدا۔ گھر وِچ تاں صرف ترے عورتاں ہن، ڈوں نوا سینی تے تر تجھی تلسی۔ ایڈے کولے ہتھ نوا سینی دے تاں نی تھی سکدے، تاں کیا اے تلسی اے۔ پر تلسی کیویں تھی سکدی ہے، اوندی تاں ڈوں ڈنہاں بعد شادی ہے۔ تھی سکدے تلسی بی بی دے سہیلیاں وچوں کوئی اتھ رہ گیا ہو دے۔ اے سوچ سوچیندے اُونے پیراں کوں ول اُتوں تے کھسکایا لیکن کولے ہتھاں دی پکڑ ایڈی گولی نہ ہئی۔ اتنا تاں فیاض کوں دی یقین تھی گیا کہ اے چھوہر جو دی ہے، چاہندی ایہو ہے جو اُو جاگ پو دے۔ لیکن جاگن دے بعد کیا تھسی، ایندے امکانات بارے فیاض دی ایڈا بھولا کا سنا ہا۔ گن منجھ باقی اتنی رہ گئی ہئی جو اُو اٹھی باہوے یا ایویں چھو ماری سنا راہوے۔

عجیب گھان وات آگیا ہا فیاض دی۔ اٹھی باہندے تاں نمک حرامی تھیدی ہئی تے جے سنا راہندے تاں آپنے اندر دے مرد کنوں شرمساری۔ کیا جواب ڈیوے اُوکوں جیڑھا پہلے ای اوندی شرم حیاتوں طعنیاں وات ہاپیا۔ حیلہ بہانہ بھاویں جو دی ہا پر حق گالہہ تاں اے ہئی جو تلسی پہلے ڈنہہ کنوں کہیں تھوئے آلی کاراوندے ہاں وِچ پڑی ہوئی

ہی۔ بھلی نہ ہئی۔ جے اے چھوہر تلسی ہے تے اُج خود اوندے پیراں وِچ آن بیٹھی ہے،
 تاں وِل ہک بلوچ کیے اُٹھن ای بندے، سمن کاٹا۔ ایں گالہوں جو گل کسیں دُٹھی ہے۔
 لیکن ایندے برابر ہک بیاگوڑ اُتھائیں دا اُتھائیں زٹ ماری پیا ہاتے اُوہی حکیم صاحب
 دے اعتبار دا۔ جے اُو اُٹھی بیٹھا تاں لعنت ملامت کھے اوندے تاں نہ آسی، پوری بلوچ
 قوم تے آسی۔

ایں دوران چھوہر دے کولے کولے ہتھیں دا جلول اوندے پیراں کنوں تھیندا
 ہو یا پورے بُت وِچ کھنڈن شروع تھی گیا۔ مستی دی ہک راند ہئی جیکوں چھیکڑی کھینڈ
 بناون کیے فیاض دے سارے جسم دا ہک ہک ریشہ آپنی جاتے دھرتال تاؤن کوں اُبالہا
 محسوس تھیندا اپیا ہا۔ فیاض نے بہوں کوشش کیتی جو اوندے ہوش حواس اونداسا تھ نہ چھوڑن
 پر اُکھیں دے اگوں آون والے شیشیاں کوں کجھ دیر بیا روکی رکھن اوندے دس وِچ نہ رہ گیا
 ۔ نہ فیاض کوں اے پتہ جو اُو کون ہے تے نہ اے جو کتھ ہے۔ چھیکڑی احساس ایہو ہا جو
 ہک گرولی تے کجھ کجھ ماسلی چھوہر اُوں ڈومڑمڑ ڈیدھی، آپڑیں پچھوں پچھوں آون دیاں
 شارتاں کریندی، ڈیدھی کنوں گھر دے دلاں ڈو بھجی پئی ہے۔ فیاض ڈھیر دیر نہ ٹھہار سکیا
 اتے اوندیاں شارتاں دے جواب وِچ اوندے پچھوں پچھوں گا با تھیندا گیا۔ ہالی اُو اُٹھ
 ڈاہ قدم ای اُگی تے گیا ہوسی جو اگوں بھجی چھوہر یکدم ٹھڈا کھا کراہیں اوندیاں بہیں
 وِچ ٹھول گئی۔ ریشم دا کوئی ٹول ہایا کوئی چھوٹا جیہا تنگا کہ جیندی ماسلی نر ماہٹ نے فیاض
 دے اندر دی اُتاوِل کوں بے طور اکر چھوڑیا۔ اُونے ہبلا سے وِچ ایں پُخو لے وجود کوں
 با تھاں تے چا کراہیں آپنی وکیر وِچ گھسن گھدا۔ ساری دی ساری نر ماہٹ کہیں آتش وِچ
 تبدیل تھی گئی، اتجھی آتش جیندے وِچ بچلن دا سواد دینا دے سکھے سوادیں تو اتر۔
 ایں توں پہلے کہ اے آتش اوندے وجود کوں سوا کریندی اوندے اندر آپڑیں

ہوون دا احساس کتھاؤں نوں سروں جاگ پیا۔ سرت نے سنبھال لدھی تاں معلوم تھیا جو نرم آتش دا احساس اوں چھوہر دا اپنے سیک وچ بگھدا کولا کولا جسم ہاجیر ہا اوندی پواندی کون گھڑے دے ادھ توڑیں آتے مکمل سپردگی دی حالت وچ لاتھتھ تھیا۔ اے تاں واقعی تلسی ہئی۔ فیاض وبل تے ہک پاسے تھی گیا۔ اونے اپنے آپ کوٹھولیا۔ ہالی توڑیں گجھ اتجھانہ ہا کہ جیندے پاروں اوندے متھے تے نمک حرامی دا ڈنہ لگ سکدا۔ ایس توں پہلے جو کھڑے توں لہندا، اوندی نگاہ تلسی دے چہرے تے پئی تے ول چہرے توں پیراں تیں تہلکدی گئی۔ شاید ہاڑ دے مہینے وچ وی روہی ایڈی تسی کوٹنا ہوندی ہوسی کہ جتنی تسی تلسی ڈس دی پئی ہئی۔ املک بے سدھ تے بے چنتی جیویں کوئی لمبے تھکیرے داما ریا ہو یا پاندھی منزل تے مچ کراہیں یکدم لوہا تھی تے ڈھے پوندے۔ سبھے فکرے اندیشیاں توں اچھا۔ بس ڈوں تریڑے پانی دی سک جو زندگی دی جوت ولدے سروں زندگی نال تھی ونجے۔

فیاض نے ایس توں زیادہ کہیں چھوہر کوں کہیں بے چھوہر کیتے آپڑیں آپ کوں دان کریندا نہ تاں سُنز یا ہاتے نہ ڈٹھا ہا۔ ایندے پچھوں رمز کیا ہئی تے راز کیا ہا، او اوندے کنوں بالکل اَن سونہاں۔ کیا تلسی کہیں کارن بھل پئی اے یا ول اے شادی اَن بھاندی ہے۔ جے شادی اَن بھاندی وی ہئی تاں ول وی اوندے تے اے مہربانی کیوں۔ ایس گوڑ پاروں اوسارا جنون وان وٹیندا گیا جیڑھا گجھ لکھے پہلے اوندامنکا نوائی بیٹھا ہا۔ فیاض نے تلسی دے چہرے تے کھنڈے ہوئے والاں کوں ہٹاتے اوندے تاثرات توں گجھ بچھن دی کوشش کیتی پر اوکوں لکھا جو ایس طرحاں تاں او اوندے رُخ دا بیاوی اسیر تھیندا ویندے۔ ایس توں پہلے جو فیاض آپڑاں ہتھ تلسی دے والاں توں پرو بھرا کریندا، بے بھدھ پئی تلسی نے ادھیاں اکھیں کھول تے فیاض کوں ڈٹھاتے مسکاتے اوندے والاں

وچ پئے ہتھ تے آپڑاں ہتھ چار کھئیں تاں جو اوتھ چانہ سکے۔ فیاض نے پک واری ول
 تلسی کوں ڈٹھا۔ اوندیاں اکھیں تاں ولدیاں بندہن پر چہرے دی مسکان کجھ بیاں پوڑیاں
 جھکی تھی گئی ہئی۔ فیاض نے ڈٹھا جو تلسی دی گردن وچ موٹے موٹے رتے موتیاں دی
 ڈوڑی مالا تکھے تکھے ساہواں دے نال نال اُتے تلے تھیدی پئی ہئی۔ فیاض نے اوندے
 والاں وچوں ہتھ جھڑواتے گردن تے چار کھیا۔ فیاض دا ہتھ تلسی دی گردن تے کیا لکھا،
 زور دا پک کا نبا اوندے پورے جسم وچ سرتوں لاتے پیراں تیں تھڑکاٹ پیندا گزر گیا۔
 تلسی سٹے سٹے، کھٹ تے بیٹھے فیاض کوں اچا چیت ولڑھ گئی۔

جتنے تکھاج وچ تلسی فیاض کوں ولڑھی، اوتوں ڈوڑی تیزی نال فیاض، تلسی
 دے وکیر اچوں نکلیا تے ٹپ مارتے فرش تے کھڑا تھی گیا۔ تلسی کوں پہلے تاں سمجھ نہ آئی جو
 تھیا کیا ہے۔ اوندی جانوں کوئی نواں اٹھی تے آگئی ہئی پر جس ویلے کوئی اڈے اڈے نہ
 نظریا تاں سمجھ گئی جو فیاض بھواتے پک پاسے تھی کھڑے۔ اندھارا ہا پر ایڈا وی نہ ہا جو اوتھ
 فیاض دے رویے دے اُپر کوں محسوس نہ کر سکے کہ جیندی وجہ اوندی سمجھ توں باہر ہئی۔ اوتھ
 پک واری ول اُتری تے تلے لہے تے فیاض دا ہتھ پکڑتے گھڑے ڈو جھکوں لگی پر فیاض
 نے بہوں ای سختی نال ہتھ جھڑوا گھدا۔ تلسی نے سوچیا جو فیاض مذاق کریندا پیا ہوسی کیوں
 جو کوئی وی بندہ ایس حالت وچ تاں ایس طرحاں دا سلوک نی کر سکدا۔ ایس پاروں او ول
 اٹھی تے کندھ نال لگ تے کھڑے ہوئے فیاض کوں رجواں بھاگل پا گھدس۔

فیاض وی شاید ہوش حواس و نجا چکیا ہا۔ اوتھ ڈوہیں ہتھاں نال پٹ تے تلسی
 کوں ایس طرح گھڑے تے دھکیا جیویں جو جلم کوں پٹ تے پڑے سٹیندے۔ تلسی
 گھڑے تے ونج ڈٹھی تاں احساس تھیا جو اے تاں کجھ بیا تھی گے کہ جیکوں ذلت دی انتہا
 توں علاوہ کیا آکھیا ونج سکیندے۔ کیا اے ہا اوتھ ان کہ جیندے کیجے اوتھ اپنا سب کجھ دا

تے لا چھوڑیا ہا۔ اتنا بد تمیز تے بد تہذیب کہ جیندے کنوں تاں جنگل دے جانگلی وی چنگے
ہوندے ہو سن۔ اے کتھوں تھی گیا میڈے عورت ہو وون دی گواہی دے لائق۔ اے تاں
مرد ای کائی تے مرد بن تے ڈکھیسی کیا۔ اے سوچ تے تلسی ہک واری ول اٹھی تے
فیاض دے سنمھلن توں پہلے ای او ندے منہ تے ترے چار چماتاں زپ چھوڑ یونس۔
ہُن یوے تھیون دی واری فیاض دی ہئی۔ کاوڑ نال شوکدی تلسی کون گھر دے
اندرویندا ڈیکھ تے اوکوں بی تاں کجھ سمجھ نہ آئی بس ڈیڈھی والا دروازہ کھول تے گھر دے
باہروں نکل گیا۔ دور دی کہیں مسیت وچوں سویل دی اذان دی آواز صاف سُنریندی پئی
ہئی۔



(17)

مہراں مڑپچی والے بھوپے دے اُستان تے جن کھیڈ تے کیا آئی، اوندی چال
 ڈھال اُتے رویہ مزاج سبھے تبدیل تھی تے رہ گئے۔ کتھاں اُوڑ چکائی دی ماری جھیرے کار
 چھوہرتے، کتھاں اے کھلن سوڈھی اُتے ڈھلک ڈھلک ٹردی شہتوت دی تلہڑی طرحاں
 دی بٹا کے مریندی نینگر۔ جن تاں لہہ گیا ہا پر ول وی کم کوں ہتھ نہ لیندی ہئی ایں گالہوں جو
 نخرے سہون کوں سس جو ہئی پئی۔ جن لتھا تاں وادھو دا مزاج وی بدل گیا۔ ہر ویلے دا
 سڑا بلدا اُٹوان ڈال اپنی کوں ڈیکھ ڈیکھ ٹھرن پئے گیا ہئی۔ لیکن گھیل تھی ڈال نے اُوکوں
 آپنے نیڑے آون ڈیون دی بجائے ہک بیادا کھیڈیا۔ وادھو جیویں جو اوندے اندروں
 باہروں تھیون کیتے آنے مارن لگدا، مہراں اُوکوں ڈیکھ ڈیکھ تے اکھیں اکھیں وچ مچکن
 شروع کر ڈیندی کہ جیویں چیلنج کریندی پئی ہووے ”آ... ہُن آناں، میں وی ڈیکھاں
 دُڑے جُوان کوں، ڈا ہڈ ہا شوق ہاناں تیکوں وی پیو بنڑن دا“۔

ڈال اپنی دااے گجھیا سنیہا وادھو سمجھدا تے یا ول مہراں خود، تہوں بیلا پئے کراہیں

دائیاں داتے جلیبیاں دا۔ پر جوڑا کپڑیاں داتے سوارو پے دی موکھ.... اوتوں ڈیویں....
 آندے منگل چلسوں بھوپے دے اُستان تے شکرانے دی سوائی ڈیون کیہتے۔ کیویں اُونے
 ساڈی جھولی بھر چھوڑی اے اولاد دے نال، ہُن میں بے وارثی کائنی تے نہ توں بے وارثا
 ہئیں۔ رنگ لگ گن میڈے جھگے کوں۔“

”ٹھیک ہے اماں جیویں تیڈی مرضی۔“ وادھو نے برآمدے ڈومڑ تے ڈٹھا۔
 مہراں اوندے آلے پاسے پاسا ولاتے گھٹ تے ایں طرحاں سستی پئی ہئی جو اوندی ہک
 جگھ پائی کنوں تلوں تے گھلکی لاتی ہئی۔ بھول بھلا ندرے وادھو دی نگاہ اوندیاں اکھیں
 وچ گئی تاں اُوہو ٹوک بازی دیاں شیخاں تے چچو اُون والا مچکان۔ جیویں جو اُلریندی پئی
 ہووے۔

”آ.... ہُن مار ڈکھا میکوں.... مارناں وڈا بوان خان۔ توں ویسیں کنتے ہُن
 گھروں بھج تے۔ جیڑھا گھوگھاتیوں میں ہُن چاڑھنے، اوکوں پٹوا ڈکھاویں تاں منیاں۔
 وڈا بال داپیو۔“

وادھو کوں ڈیدھیاں ہویاں مہراں نے زور دا کھنگو را مار کراہیں تھک تاں
 زمین تے سٹی پر پتہ نی کیوں وادھو کوں ایویں لکیا جو آئی سدھی اوندے منہ تے ہے۔ اُو اُن
 چٹا ہک ہتھ نال منہ اُگھیندا ہو یا گھروں باہر نکل گیا۔



(18)

جیڑھی رات تلسی تے فیاض تے باری گزری اُورات ریاست بہاول پور وچ دی
مختلف مذاہب دے درمیان بھائی چارے تے اُمن امان دی چھیکڑی رات ثابت تھئی۔
بھگوان داس دی اُرتھی بھاویں جو اُدھ راتیں چاتی گئی پر انتہائی نازک حالات وچ وی کہیں
نہ کہیں پاسوں شرارت تھی تے رہی۔ ڈسٹرکٹ مجسٹریٹ بہاول پور داسخت حکم ہا جو کہیں
طرفوں وی مذہبی منافرت دی گالہ نہ چلے پر ہک صوبیدار تے چار سپاہیاں دی نفری دی
نگرانی دے باوجود کہیں شوشی لا چھوڑی جو ہندو آپڑیں مُردے ساڑن توں بعد اُناں دی
چونڈھی چونڈھی سُو اُسیتاں دے دَر دے اگوں کھنڈا ویندن۔ اِیں شوشی سبب پہلا گم تاں
اے تھیا جو مڑھی دی راہ وچ آون والے مدرسے دے طالباں نے وڈے وڈے ڈھینگر مار
رکھے جو اُتھوں کوئی لنگھ ای نہ سکے۔ ڈھینگراں دے اگوں کیکر دے لڑے تے لڑیاں توں
بعد بکھر دے دے جھانے اِیں طرحاں بکائے جو پورے دا پورا لانگھا بند تھی تے رہ گیا۔
اِیں توں پہلے کہ کوئی پھا کا پوندا صوبیدار نے منت ترلا کرتے اُرتھی کوں واپس

مردا کراہیں بے رستے توں مڑھی مہجھا ڈتا۔ پر اُتھاں ولدی احمد پور والی صورت حال جو کہیں نے نزدیکی مائنس ٹرڈواتے پورے ایکڑ وچ گئے گئے پانی چھوڑ ڈتا ہا۔ ہک واری ول اُرتھی کوں نال دے پدھرتے رکھ کراہیں نویں سروں سکیاں لکڑیں منگواون دا اہر کیتا گیا۔ لکڑیں آریہاں تاں کہیں نے ڈوں ترے مشکلی نانگ اُرتھی دے آسوں پاسوں چھوڑا ڈتے یا اوآپے کتھاؤں نکل آئے، گجھ پتہ نہ لکيا۔ ہالی بھگوان داس دی اُرتھی کوں بھاء ای نہ لگی ہئی جو شہر والے پاسوں کہیں نے خبر اڈا چھوڑی جو بہاول پور شہر وچ ہندواں دے مکاناں کوں بھاء لاڈتی گئی ہے تے کل دی واری احمد پور دی ہے۔

ایں خبر دے سُنز دے سار ای سبھے لوکاں وچ بھاجو پئے گئی جو کہیں طرحاں آپڑیں آپڑیں گھراں تے بال بچیاں کوں بچا گھسن۔ ایں ساری ہائے ہائے کار وچ زلیا تاں شودے بھگوان داس دا کریا کرم زل گیا۔ گھراں کوں بھج دے وڈکیاں نے چار پنچ چھوہراں کوں پنڈت دے نال کھڑاتے آکھ ڈتا جو اودوی فارغ تھی راہون تاں گھراں کوں پہنچن۔ پر جنیں ویلے اے سبھے لوک روندے پٹیندے گھراں کوں ولے تاں اگوں سھو گجھ اُونیں دا اُونیں۔ ہر پاسے امن امان۔ کہیں نے کوڑی خبر اڈا ساری ہندو آبادی کوں اپنی پاچھوڑی ہئی۔ لیکن ایندے باوجود حکیم رام لعل تے راہی اوہلاں توہلاں جو اے کوڑی خبر کتھائیں احمد پور دے بارے سچ ثابت تھی گئی تاں اُناں دی دھی تلسی دا کیا بنڑی کہ جیندی رکھوالی کیتے او ہک مُسلے کوں گھر بلہا آئیں۔ ایں سارے رولے گھولے وچ سوڈھی وی ڈھیر ابا لہا جو دیر نہ لگے تے تلسی کنوار بن کراہیں اوندے ویڑھے آن باہوے۔

بساں والے اڈے توں احمد پور والی بس دا پتہ کیتا گیا تاں معلوم تھیا جو پہلی بس سویرے بجھ اُبھرے ویسی۔ پر ول وی احمد پور وں آئے اے سارے برادری وال رات دے چھیکڑی پہر اڈے تے آتے بہہ تھئے۔ سویرے بس چلی تاں چھت اُتے دی

سواریاں بیٹھیاں ہن۔ حکیم رام لعل، راہی تے سوڈھی مل کوں بس اندر جاتاں مل گئی پر
 آخری سیٹ تے۔ سفر دے دوران ٹپاں لگن ایذا مسئلہ نہ کہ جتنا اُو خبراں جیڑھیاں ہر شاپ
 تے سُزون کوں ملدیاں پیاں ہن۔ خانقاہ شریف پتہ لکیا جو سویلے سویلے نماز کنوں پہلے
 احمد پور وچ ہندواں دے گھراں کوں بھاء لاڈتی گئی ہے پر مسافر خانے بس رُکی تاں پتہ لکیا
 جو اے خبر اصلوں کوڑی اے۔ بس ہیں گن منجھ تے خبریں دی عذاب وچوں لنگھ کراہیں
 ترے گھنٹیاں دے سرفرتوں بعد اے سب لوک احمد پور پہنچے تاں پتہ لکیا جو سب خیر ہے۔
 نواب صاحب نے ہر محلے وچ ایں طرحاں دی نگرانی دا بندوبست کرایا ہو یا ہا جو کہیں لُڈے
 لُڈو رکوں پھٹکن دا موقع ای نی ملدا اپیا ہا۔ لیکن ایندے باوجود نہ تاں کہیں کوں یقین ہاتے نہ
 کہیں کوں اطمینان۔ ہر کوئی ایں ڈر بھسو وچ جو پتہ نی کہیں ویلے کیا تھی ونجے۔

حکیم رام لعل تے اوندی ذال گھر پہنچے تاں تُلّسی ڈینہہ چڑھے وی سستی پئی ہئی،
 نو اینی گھر داکم کارمکا کراہیں پک بے دے رنڈ کڈھیندیاں بیٹھیاں ہن تے فیاض
 عصور ویلے دامطب تے وُنج چکيا ہا۔ ماپو کوں ڈکھ تے تُلّسی اُٹھی تاں بیٹھی پر املک پیلے ڈڈا
 ، بُت وُنج جان نہ کہیں ڈودھیاں۔ حکیم صاحب بُجھ گئے جو دھی کوں ماپو دے گھروں
 وچھوڑے دا احساس ہن تھیندا پئے۔ جئیں ویلے جو راہی جائز دی ہئی کہ ہر عورت کوں
 مُکھاوے ویلے اوسھے خواب تڑندے محسوس تھیون لگ پوندن کہ جتاں دی من پسند تعبیر
 دیکھن کیے اُناں نے جندڑی کوں داتے لائی رکھیا ہوندے۔ اتجھے خواب نہ تاں کہیں کوں
 ڈسائے ویندن تے نہ ای اُناں دے ادھادھورے رہ وُنجن دے ڈکھ کہیں نال سانجھے تھی
 سکدن۔ ایں طرحاں عورت دی پر نے دے بعد دی پوری حیاتی ایں ڈکھ وچوں نکلن دی
 کوشش وچ ای گزر دی ہے پر نکل نی سکدی۔

حکیم صاحب نے مطب تے تاں کیا ونجواں ہا، تھوڑا سکون تھیا تاں براہ دے

وچ پے ہوئے موڑھے تے بیٹھا بیٹھا گھلاں کھاؤن لگ پیا۔ کجھ لچلے بعد ہمایاں وچوں
 ٹکسی دیاں سہیلیاں آیاں تے گھروچ و لدی اُوئیں آماں گھاماں تھی گئی۔ حکیم صاحب نے
 نکلی نواں کون حقہ تازہ کرن کون آکھیا تے خود موڑھے دے نال پئی گھٹ تے لتاں لمبیاں
 کرتے ایں طرحاں لیٹ گیا جو لگدا ہا کہ اٹھیا بیٹھے۔ کنوار دے کمرے وچ چھویریں دا گٹھ
 تھیا تاں مرگ دی بندش دے باوجود ہولی ہولی آواز وچ مُکلاوے دے سہرے سُنو بجن
 لگ پئے کہ جہاں دے نال کہیں کہیں ویلے ڈھولک دی آواز وی آویندی ہئی۔ جنیں ویلے
 جو راہی رات دی کشال توں اختا تھئی برامدے دے ڈوجھے پاسے و نچ تے سُم پئی ہئی۔

حکیم صاحب نے ہالی حقے دے ڈوں چار کش ای لائے ہون جو سوڈھی مل
 وشنو دے نال و بلیا ہو یا گھر وڑیا تے آندے سار ای حکیم رام لعل دے کن وچ ایں طرحاں
 کجھ آکھیں جو حکیم کون خود وی سمجھ نہ آئی۔ ”کیا آکھی.... خیرتاں ہے۔“

”خیرتاں کا مینی.... سوڈھی ول ہو لے جیہا اَلانڑاں۔“

”کیا خیر کا مینی..... حکیم وی گھبراتے اٹھی بیٹھا۔“

”آج رات کون مڑھی، نکلی بزار، محلّہ پھلو رام تے کٹڑے احمد خان وچ
 ہندواں دے گھراں کون بھاء لاون دا پروگرام بن چکے“..... سوڈھی مل ول ہو لے
 ہو لے اوندے کن وچ گھسکیا۔

”پرتیکوں کنیں آکھے..... حکیم پریشان تھی تے اٹھی کھڑا تھیا تے ایڈے
 اُوڈے ٹہلن پئے گیا۔“

”ہک پلسیا میڈا یار اے صوبے دار محمد نواز خان۔ تیڈے کول وی آندا ہوندے

دو ادارہ کیجئے.....“

”اُو مچھاں والا؟.....“

”جیا.... اوہو... اُونے اے سنیہا خاص طور تے لالہ تیڈے کیتے ڈتے جو حالات دا کجھ پتہ کائنی، آپنی جان آپ بچاؤ۔ شہر وچ پلس دی نفری ایڈی کائنی جو ہر جاتے فساد کوں روک سکے۔“ گالہہ کریندے ہوئے سوڈھی داسنگ پریشانی کنوں وَل وَل سُلدا اپیا ہا۔ حکیم رام لعل سر پکڑتے موڑھے تے بہہ گیا۔ کجھ سمجھ نہ آندی پئی ہووے جو کیا کیتا ونجے۔ ہر ویلے نویں خبر تے ہر خبر نال بے یقینی آتے خوف دانواں عذاب۔

”لالہ! میں تاں ایہوا کھیاں جو آج شام کنوں پہلے تلسی تے وشنودے پھیرے کراتے کہیں پاسے نکل جلوں۔“ سوڈھی نل آپنی جائزں بہوں سیانڑاں بن کراہیں اوندے سامنے کھڑے تے بہہ تھیا۔

”وئے لکن آں.... میکوں اے فکر جو جان بچاتے ونجوں کنتے تے توں آہدیں جو پھیرے پوا گھناں ایں بے نکوے لکن دے۔“ کڈہائیں نہ کوڑیجن والا حکیم رام لعل وی سوڈھی دی گالہہ تے خدق کھاتے اٹھی کھڑا تھیا۔ حکیم کوں کوڑیندا ڈیکھتے سوڈھی تاں چھو مارتے بہہ ریہا جنیں ویلے جو وشنووی ڈرتے برآمدے دے تھمبے پچھوں اُوڈھرتھی گیا۔

حکیم دے اُچے بلارے نال برآمدے دی نگر تے بیٹھیاں نوائینی وی اٹھی تے پچھاڑے ڈو کھسک گیاں تے بند راکی تھئی رادھی وی جاگ کراہیں سوڈھی دے نال آن کھڑی تے حکیم کنے ایں طرحاں ڈیکھن لگی جیویں جو پچھدی ہووے گالہہ کیا ہے۔ رام لعل نے ذال کوں ساری گالہہ کھول سُنوائی تاں پیلے ڈڈے رنگ دے نال اُووی پریشان تھی تے سوڈھی دے رلے کھڑے دی پواندی کنوں بہہ گئی۔ ایں حالت وچ اکھیں وچوں ہنجواں دا تر آوناوی کوئی انوکھڑی گالہہ نہ ہئی۔ ہر کہیں دے چہرے تے ہکو سوال ہا جو کیا کروں تے کنتے ونجوں۔

حکیم رام لعل نے آپڑیں حکمت دی تشخیص طرحاں زندگی داسب توں وڈا فیصلہ
 کرن وچ وی ڈھگ دیر نہ لائی تے سب توں پہلے تلسی دی شادی کوں پچھواں کرتے کہیں
 چنگی مند وچ کرن دا واضح اعلان کر چھوڑیا۔ اے گاہہ سُن تے بظاہر تاں سوڈھی دامنہ ڈھلا
 پئے گیا ہا پر اندرو اندری اُپچت دے بھرنے وَنج ڈٹھا۔ جئیں ویلے جو راڈھی بظاہر پریشان
 نظر دیاں ہویاں وی اندرو اندری خوش تھئی جو ایندے وچ بھاویں اوندی جت نہ ہئی پر
 سوڈھی دی ہار ضرور ہئی جیڑھا تلسی کوں گھرنیون تے چوتابڈھی بیٹھا ہا۔ باقی ریہا اُوکڑا لسن
 وشنو، تاں اُوندا کیا ہا، اوتاں تھمبے دے اُوڈھرتھی کراہیں اسمان تے اُڈدے کبوتر تازی کھڑا ہا،
 ایں گاہہ توں بے خبر جو زمین تے دانہ کون کھنڈائی بیٹھے تے دُز کا کیندے ہتھ وچ ہے۔

ڈو جھا فیصلہ حکیم رام لعل نے اے کیتا جو سوا گجھ قیمتی چیزاں دے باقی سھو گجھ
 اتھائیں گھر وچ راہون ڈتا وَنجے کہ جیندی رکھوالی فیاض کر لسی تے حالات ٹھیک تھیون
 توڑیں گھر دے سارے جی دیرے نواب وَنج کراہیں اُوندے مطب دے پچھلے پاسوں
 گودام دے نال بنڑے ہوئے ڈوں کمریاں وچ راہسن۔ کیوں جو حکیم رام لعل کوں پورا
 یقین ہا کہ فساد دیاں اناں گاہیں پچھوں ضرور پیری بد معاش جیسے لوکاں دا ہتھ اے ورنہ
 ریاستی مسلمان تاں اتجھی کوئی گاہہ سوچ وی نی سکدے کہ جتھ صدیاں کنوں سھو اقلیتاں
 اناں دے پیار محبت دے کارن ہک مُٹھ تھی گزران کریندیاں آندیاں ہن۔ حکیم کوں
 صوبیدار محمد نواز دی مخبری تے وی ایڈا پگ نہ ہا۔ ہے تاں آخر کوں پلسیا۔ تھی سکدے جو
 اُوندی راہ پیری بد معاش جیسے لوکاں نال رسی ہوئی ہووے تے ایں بہانے فساد دیاں دے
 فساد دی آڑ وچ خود لٹ مار کرتے خواجواہ ریاستی مسلماناں کوں بدنام کرن دی کوئی سازش
 ہووے۔ لہذا اُو شک دی صورت وچ وی اے برداشت نہ کر سکد اہا جو اُوندے اُون
 خاندان دی عزت خراب تھیوے جینے ایں شہر وچ کئی نسلاں توں عزت آبرو نال وقت

گزار یا ہا۔ بھاویں جو سوڈھی مل تلسی دے مُکھاوے بغیر حکیم نال دیرے نواب وچ راہون
 کوں تیار نہ ہا پر وِل وی ایں گاہوں تیار تھی گیا جو تھی سکہے حالات بدل دے ڈیکھتے حکیم
 داد ماغ وی چنگائی والے پاسے بدل پووے۔ ایں دوران بیا گجھ نہ تاں پکے کوٹھے وچ تلسی
 تے راڈھی ڈوہائیں نال کٹھے راہون دی پُرس توں علاوہ ایں گاہہ دی پُرس چاونڑں داموقع
 وی مل ویسی جو آخر لالے حکیم کول مال کتنا ہے۔



(19)

فیاض ڈینہہ لُتھے حکیم رام لعل دے مڑھی والے گھر دا جنڈرا کھول تے اندر وڑیا
 تاں ڈیڈھی اوندے پیراں کوں ولڑھ گئی۔ اُج دے ڈینہہ دی سویر تھیون تک ایں جاتے
 ہک سوہنی نینگر نے اوکوں آپنے تَن دا بھیتی بنڑاؤن دی کیا کیا کوشش نہ کیتی ہئی تے ایں
 جاتے ای اوندے انکار نے اوکوں نینگر دے قدماں وچ باہون جوگا وی نہ چھوڑیا۔ کیا او
 نینگر کوئی کھڈکار چھوہر ہئی جیڑھی کجھ لکھیاں دی پُرس چاؤن کیتے پُو دی عزت نال کھیڈن
 آگئی ہئی یا کوئی مَن مرضی کرن والی مَن موجن کہ جیندے کول مایو دے کیتے ہوئے زور
 مسائیں دے رشتیاں دے خلاف بغاوت کرن دا ایں توں علاوہ بیا کوئی طریقہ نہ ہا۔

فیاض کوں آپنے چار چھیر تلسی دے جسم دی خشبو محسوس تھیون لگی کہ جیکوں
 میندی، چیکوں، عرق گلاب، کیوڑے تے سندور دیاں خشبوئیں نے رَل تے جگایا ہا۔
 فیاض دے سامنے وَلدا اوہو سوال کہ کیا او نے غلط کیتے۔ خاندانی آبروتاں آہدی ہئی جو ٹھیک
 کیتے پراوندے اندر دا نینگر مرد اوکوں ہن تیں لعنت ملامت کریندا پیا ہا جو عورت طرفوں خجگ

دی خواہش دے رد کیجئے وِجن کوں تاں شاید مردانگی دا خداوی معاف نہ کر سکے۔ فیاض کوں
اُوں ڈکھ دا احساس وی سارا ڈیہ نہہ تلہڑیں وات ہکلی رہ گیا کہ جیندے بعد اوندے پیر
چُمن والی تُلّی اوکوں چماتاں مارن تے مجبور تھئی ہوسی۔ اُونے آپڑیاں ڈوہائیں گلہاں تے
ہتھ پھیرتے تُلّی دے ہتھاں داسیک محسوس کرن دی کوشش کیتی پر اُتھ سوائے نفرت دیاں
چھینڈکاں دے بیا کجھ وی نہ ہا۔

اُوڈیڈھی کنوں گھر دے دِلان وِچ وڑیا جیڑھا بھاں بھاں کریندا پیا ہا۔ کتنی آماں
گھاماں ہئی کل رات اِس گھر وِچ تے ہُن کوئی وی کائنی۔ کہیں نے کل سوچیا ہئی جو اُج اتھ
کیا ہوسی۔ شاید تُلّی نے سوچیا ہووے تے اِس گالہوں اِیکوں چھیکڑی رات سمجھتے اوندی
کول آئی ہووے۔ پر میکوں خبر نہ تھئی۔ کیا میں اُناں لوکاں وچوں ہا کہ جیڑھے اِس خوش فہمی
وِچ زندگی گزار ڈیندن جو اے سھو کجھ ایویں دا ایویں رہ ویسی۔ کیا میں تہوں ناکام ہاں،
ادھورا ہاں کہ جیکوں نہ منزل دا پتہ ہے تے نہ منزل تیں پہنچن دی کوئی صورت۔ کیا زندگی
موقعیاں توں فائدہ چاؤن داناں ہے یا موقعیاں کوں رد کرن دا۔ کیا کہیں وڈی خوشی کوں
حاصل کرن دی سک وِچ لوکاں دیاں نکلیاں نکلیاں خوشیاں کوں پیراں تلے مندھی آؤنا ای
پھنے خانی ہے یا وِل بے وقوفی ہے کہ جیندا اِن ت کچھتا ویاں توں سو بیا کجھ نی ہوندا۔

اوکوں وادھودی ذال مہراں یاد آئی کہ جیڑھی اوندے کئے آپڑیں ادھورے گھر
والے دی پگ اُچی کر اُون آئی ہئی پر اُونے اوکوں وی چھنڈک چھوڑیا۔ فیاض نے باہرلی
سفیل تے پئے لائین دی وٹ کوں بال تے اُوند ایشیشہ بند کریندے ہوئے آپڑیں آپ
کوں ڈٹھا۔ اُوجیں ویلے وی لائین دے سو جھلے وِچ آپڑیں سر کوں ڈیدھا تاں دھڑنہ نظر دا
تے جے دھڑتے نگاہ مریندا تاں لگدا کہ سرائی کائنی۔ فیاض ڈر گیا کہ شاید اُودی کوئی
ادھورا مرد ہے کہ جیندی مہراں اُوندی پگ اُچار کھن سانگے کہیں فیاض دے اگوں تَر لے

پنڈی و دی ہوسی یا اوندی کوئی تلسی کہیں ادھ ادھورے و شنو نال مُکھا دن توں پہلے چاہسی جو آپریں اندر دی باغی عورت کوں کہیں وی اوپرے دے پیراں اُتے انتقاما گھول گھستے۔

فیاض نے گھبراتے زور داسر چھنڈ کیا تے گندھ نال لٹکی ہوئی کھٹ کوں دلان دے ادھ وچ وچھاتے لیٹ پیا۔ ہر پاسے پرے پرے تک چُپ ہئی۔ شاید اوائے پوائے دے گھراں وچ وی کوئی نہ ہا۔ سوچاں نے ہک واری وَل اوکوں چارے پاسوں گھیر گھدا۔ ”کیڈے شوق نال پیسہ پیسہ جوڑتے انسان اے گھر تاڈے بنزیندے، ہک ہک سلھ کوں سچیندے، سنوریندے پر جنیں ویلے جان تے بنزیدی ہے تاں سھو کجھ سٹ کراہیں وَنج ویندڑ تھیندے۔ تاں سمجھ اے آئی جو انسان کول سوائے اپنی جان دے بیا کجھ وی بچاون کوں نی ہوندا۔ جے کجھ بیا نکھسی تاں نہ جان نکھسی تے نہ کجھ بیا کم آسی۔ سھو کجھ پرایا تھی تے کہیں بے دے کم آسی تے ایہو ای دنیا دی ریت ہے۔

فیاض نے پاسا ولا تے بانہہ سر ہاندی چا کیمتی۔ ہلکی ہلکی ہیل گھلی تاں اوندیاں اکھیں وچ وی ملہار لہہ آئی۔ اُونے ہک لمبا ساہ چھلکيا تاں محسوس تھیا جو کھٹ دے وان وچ ہالی توڑیں تلسی دی کل رات والی خشبو آندی پئی اے۔ اکھیں وچ بندر دی ملہار کجھ بنی لٹھی تاں وان وچوں آون والی تلسی دے جسم دی خشبو جسم دے احساس وچ بدلن پئے گئی۔ فیاض کوں ایویں لکيا جو تلسی ولا آئے اپنے گھر وَل آئی ہے تے ہک واری وَل اوندے اندر دے جو ان کوں کیس کیس کریندی پئی ہے۔ ایں توں پہلے کہ فیاض تلسی بارے کوئی فیصلہ کریندا، تلسی دے پچھوں لکے ہوئے ڈھگ سارے جنگجواں نے یکدم اوندے اُتے حملہ کر ڈتا۔ فیاض ایں حرکت واسطے بالکل تیار نہ ہا، ایں گالہوں وبل تے اُنھی بیٹھا۔ جاگ تھئی تاں اُوئیں پہلے آلی کار دور دور تک نہ کوئی احساس تے نہ کوئی آواز۔ ہر پاسے اُلک چُپ ہئی۔

پر ایندے باوجود فیاض دے دل وچ کتھاؤں کوئی خوف ضرور موجود ہا پیا، کہیں
اُن جتنی مصیبت دا خوف۔ اُو اٹھی تے برآمدے وچوں موڑھا گھیل آیا تے کھٹ تے سُن
دی بجائے موڑھے تے چڑھ تے بہہ گیا۔ کیوں جو ہالی ڈھیر ساری رات باقی ہئی تے
فسادی آپنی دھمکی دے مطابق کہیں ویلے وی حملہ کرتے لُٹ مار کر سکدے ہن۔

اڈے آپڑیں گھرتوں ترے میل پرے دیرے نواب دی بزار دے پچھاڑے
کنوں بنڑے ہوئے ڈوں کچے کوٹھیاں وچوں ہک کوٹھے وچ تلخی تے اوندی ماتے کوٹھے
دے باہروں کھٹاں تے حکیم رام لعل، سوڈھی مل تے وشنوئے پے ہن یا جاگدے کہیں کون
کجھ پتہ نہ ہا البتہ تلخی ضرور جاگدی پئی ہئی۔ کُل جو کجھ تھیا اُوندا اُبال اُونے فیاض کون
چمٹاں مارتے کڈھتاں گھداہا، پر نتیجہ کیا جو ہن اُکوں فیاض تے پہلے کنوں وی ڈوڑا پیا
آون لگ پیا ہا۔ شاید کُل اُو ہک ڈیہ نہ بعد تھیون والی شادی دے وکیر وچ آکر اہیں ہوش
ونجا بیٹھی ہئی۔ جے پتہ ہوندا کہ شادی نی تھیونی تاں اُو اتجھی اُبالہہ کریندی کیوں کہ جیندے
سبب فیاض کون ایں طرحاں داروہ اختیار کرنا پوندا۔ اُکوں باہر سٹے ہوئے سوڈھی مل تے
وی ترس آندا پیا ہا کہ جیندی ساری کیتی کرتی تے ساریاں سکاں مٹی سوا تھی گیاں۔ تلخی
دے دل وچ وی ہک عجیب جئی خواہش پیدا تھئی جو اے حالات ایویں ای خراب رہ وئجن،
کم از کم سوڈھی مل کنوں تاں جان چھٹی راہی۔ سوڈھی دا خیال آیا تاں اُونے ماڈودید
بھنوائی جیرہی کئی ڈیہ نہاں توں بعد پہلی واری سکون دی بند رستی پئی ہئی۔

کوٹھے دے باہروں حکیم رام لعل بھادویں جو اکھیں ٹوٹی پیا ہا لیکن پیا جاگدا ہا
لا تعداد سوچاں دے انبار تلے ساکدا جو پتہ نی احمد پور کیا تھیا، گھر سڑ تے سوا تھی گئے یا بج
گئے۔ جے گھر نہ رہیا تاں اُو کینتے ویسی جوان دھی تے ذال کون نال لاتے۔ پرانی جاتے
کون سُجھ ویسی اُکوں۔ کیا اوندی شہرت تے سُجھان دا سفر اتھائیں مک ویسی۔ اے کجھی

شناخت تے کجھی سُجّان ہئی کہ جیر دھی اوندے ہنر تے قابلیت دی بجائے ایں چھوٹے جیہے
 قصبے دی چھوٹی جی دکان دے سبب ہئی۔ کیا مقام اوپر اتھیون نال انسان دی سُجّان وی
 اوپری تھی ویندی ہے۔ کیا نویں جاتے وَنَج تے اوندی قابلیت وچ کسر آویسی یا او املک
 چریاتے گالہا بھولا تھی ویسی۔ جے اے سب فی تھیند اتاں لوک اوکوں سُجّو یسن کیوں ناں۔
 اوکوں پچھاڑن توں انکاری کیوں تھی ویسن۔ اتنا عرصہ زندگی دا گزارن توں بعد وی جے
 حاذق حکیم رام لعل داناں دیرے نواب دی بزار دے کہیں کچے کوٹھے دا محتاج ہے تاں بھاء لئو
 اتجھے حکیم رام لعل کوں تے اوندی ادھ ادھوری شناخت کوں۔ بندہ بے نام کیوں نہ جیوے
 تے بے نام کیوں نہ مرے۔



(20)

سویرے سویرے فیاض احمد پوروں خیر خیریت نال مطب تے دیرہ نواب آیا تاں
 حکیم رام لعل دی جان وچ جان آئی۔ گزریل رات کوں فسادیاں طرفوں ہندواں دے
 مکاناں تے حملیاں دی خبر محض کوڑنگلی۔ لگدا ہا جو اے خبر وی جرائم پیشہ لوکاں نے آپڑیں
 مقاصد کیے جان بُجھ تے اُڈائی ہئی۔ سوڈھی مل دا خیال ہا جو خبر تاں سچی ہئی پر پلس دی
 ویلے سرکار وائی دی وجہ نال فسادیاں کوں فساد دی مہلت فی ملی۔ بہر حال گالہہ جو وی ہئی،
 فساد توں تاں بچا تھی گیا ہا تے ہُن حکیم صاحب دے خاندان والیاں کیے گھراں کو واپسی
 کوئی مسئلہ نہ ہا۔ ایں یکدم بدل گئی صورت حال وچ سوڈھی مل دا خوش تھی وںجواں جتھاں
 کوئی انوکھڑی گالہہ نہ ہا اتھ تلسی تے اوندی مارا دھی دا فکر مندی دے گھر گھیر وچ بھنوالیاں
 کھاؤن وی حق ہا۔ پر اے گالہہ بنی جوڈو ہائیں دی پریشانی دی وجہ ہکو بندہ ہوندے ہوئے
 وی انجوانج ہئی۔

تلسی واسطے مطب دی ایں گھڈی وچ راہون ایں گالہوں وی گھر دے سکون

توں اتر ہا جو کم از کم ڈنہہ کوں تاں فیاض دے نال آمو سائے آون دا امکان ہا پیا۔ او اے
 ڈیکھن کوں اتا ولی ہئی جو اوں رات سمھو معاملہ کھل وئجن توں بعد اوند اچہرہ مہرہ کیا
 ڈسندے۔ کیا اوکوں، آپنے اوں رات دے رویے تے کچھتا وادی ہے یا کائنا۔ کیوں
 جو تلسی کوں ایویں لگن لگ پیا ہا جو آون والے ڈنہہاں وچ وی اوندی حیاتی دی لکیر
 کتھائیں نہ کتھائیں فیاض دی حیاتی نال بنجگ۔ بنڑاتے راہسی ورنہ اوندی وشنونال شادی
 داعین وقت تے ڈال پئیندے وئجڑاں کہیں رمز توں علاوہ نہ ہا۔ ایندے باوجود اُونے سوچ
 گھدا ہا جو شادی تھی وی گئی تاں امانت حقدار کوں ڈتے بغیر او کہیں بے کوں آپڑیں نیڑے
 نہ آون ڈیسی۔ ڈوجھے پاسے رادھی وی ہیں بھن تر وچ جو کہیں نہ کہیں طریقے تلسی دی
 شادی کوں لٹکائی رکھے تے مکلا وہ نہ تھیون ڈیوے۔ کیوں جو ہک وار تلسی اوندے گھر چلی
 گئی تاں سوڈھی مل جیہے دید پلٹ نے اوندی بات کتھوں کچھنی اے۔

اے سبھے فکرے اندیشے چھڑے تلسی تے رادھی توڑیں نہ ہن پئے، گالہہ کوں
 ایڈی ساکھڑی نہ سمجھن والا سوڈھی مل وی حالات آپنے حق وچ بدلن دے باوجود اُون
 ویلے توڑیں بے چٹنا نہ تھی سکدا ہا کہ جڈن تیں ولدے سروں پھیریاں دی ترخ نہ گن
 گھدی وئجے۔ ایں سارے معاملے وچ تلسی اوکوں اتجھی گابی وانگ جا پدی ہئی کہ جیڑھی
 ہر دم رے تڑواون کوں تیار تے رادھی اوں گاں وانگوں جیڑھی جو پھنڈ رتھی تے وی خود
 کوں سووی سمجھدی ہئی۔ ریہا حکیم رام لعل تاں اوسوڈھی جیہے میسنے چلتر کیتے ہک بھونی دی
 مار ہا۔ تہوں جئے ویلے حکیم گھنڈ گھن مطب وچ لاون توں بعد نران کیتے اندر آن بیٹھا تاں
 سوڈھی ولدا اوندے سر تھی گیا۔

”لالہ..... ہن تاں خیر مہر تھی گئی۔ شگن وی آج دا او میں گنڑیا ہو یا ہے پیا۔

کیوں نہ ست پھیرے پو اچھوڑوں؟“

حکیم نے حیران تھی تے پہلے سوڈھی تے ول پرو بھری بیٹھی راڈھی گن ڈٹھا جویں جو پچھدا پیا ہووے.... کیا کروں۔ راڈھی نے حکیم کوں جواب ڈیون دی بجائے سوڈھی کنے ڈٹھا پر متھے تے تریڑی پاتے۔ سوڈھی نے اوندی کا وڑکوں مچھنڈ کیا ہک پاسے تے ولدا حکیم کوں الوائس۔

”ڈکھناں لالہ.... حالات دی اُچ جھک تاں لگی راہی۔ کیا ایندے پچھوں بندہ دھی دھیانی کوں وی بلہائی بیٹھا راہوے۔ سر دابار ہولانہ کرے!“۔

حکیم نے کھیر تے اسبغول دے چھلکے دا پیالہ ہک پاسے رکھیا تے رومال نال منہ منجھیندے ہوئے راڈھی کوں اپنے کول آون دا اشارہ کیٹس۔ راڈھی آئی تے ڈوہیں ہتھ کچھرتے رکھتے منہ تاں حکیم والے پاسے کرکھڑی پرکانی اکھ نال ڈیدھی سوڈھی مل کوں پئی ہئی جو کہیں طریقے باز آوے۔

”بختاں والی! ملیر تیڈا گالہہ تاں ٹھیک کریندا پئے۔ دھی دھیانی تاں اوڑک پرانے گھردی۔ مُکھا واتاں اوئیں وی سادگی نال کرناہاتے ول آج کیا تے کل کیا“۔ حکیم نے گالہہ تاں کرچھوڑی پر صلاح صباح دے انداز وچ، کوئی فیصلہ کیتے بغیر۔

”نہ تلسی کوئی یتیم ہے، مسکین ہے جو ایں طرحاں چُپ چُپاتی مُکھا چھوڑتے، ہک دھی ہے میڈی تے میں اوندے نال اے درودہ کا ناکھیاں ڈیاں.... تلساں سارے سُن گھنو، میں پرینساں تاں اپنی دھی کوں گایاں واجیاں دے نال، ایں طرحاں کا ناکہ جیویں تلساں نیتی بیٹھے او“۔ اے آکھ تے راڈھی پھوکی ٹوکی ڈوجھے کوٹھے وچ وڑگئی پر وُجن توں پہلے سوڈھی کوں نگ سنگیڑ تے کیہڑا ضرور کیتی گئی۔

سوڈھی مل کوں راڈھی دے ایں طرحاں ٹپن دی اُمید تاں ہئی پئی پراڈی دی کا ناکھیاں اکھیں متھے تے چار کھنسی۔

”نُجی شے تے ویہڑے دی وِسوں“.... کوٹھے ویندی راہی کوں اے مندا
 ہاں سوڈھی نے دل وچ کڈھیا پر اُتلے ہاؤں سڈ مار چھوڑئیں جو ملیر گالہہ تاں سُنو دی
 وُنج۔ پر راہی نے سُنوں تے وی سُنویں کوں اُن سُنو یا کر چھوڑھیا۔
 حکیم نے بے وِساتھی تے سوڈھی کئے ڈٹھاتے اُٹھی تے کوئی سوچ سچیندا نکلی
 طاقی وچوں لنگھ کراہیں مطب وچ وڑ گیا۔
 ”نُج تھی گندی رَن“۔ سوڈھی نے ساری صورتحال وچ ہاں دی بھاء کڈھن کیتے
 منہ ای منہ وچ ایں طرح راہی کوں مندا کڈھئیں جو اُلا اُوں تیں کوٹھے وچ بچے ضرور۔



(21)

وادھوتے اوندے نال دیرے دی بزار دے کجھ بے دکاندار وی گزریل شام
 دے ایں گوڑ وچ ہن جو آخر حکیم رام لعل دے مطب وچ رولا کیا ہے جورات تھیون دے
 باوجود نہ تاں اواحد پور گیا تے نہ ای اوندانا نگہ جتیا گیا۔ کوچوان وی ہک پھیری نظریاتے
 ول غائب۔ مطب بند تھیون دے بعد وی لیکھیاں وچوں لائین داسو جھلا اویں دا اویں۔
 فیاض جیڑھا شام تیں حکیم دی گدی تے باہندا ہا اوی ڈیہ نہہ لٹھے توں پہلے گم۔ آج وی
 سویرے سویرے فیاض دی جاتے حکیم خود آیا بیٹھا ہاتے فیاض کتھائیں دیر نال آیا۔ وادھو دا
 خیال اے ہا جو حکیم دیرے نواب وچ فساد کراون چاہندے تہوں اتھ اوپرے لوکاں کوں
 کٹھا کرتے کہیں میز پکاون دی کوشش وچ ہے۔

جئیں ویلے جوکل مغرب دی جماعت توں بعد مسیت وچ وی ایہو بحث مباحثہ
 چلدا ریہا کہ حکیم اتھ کریندا کیا پے۔ کہیں آکھیا جو تھی سگدے ادا احمد پوروں آپڑیں بال بچے
 اتھ گھسن آیا ہووے۔ پر باقی سبھوائیں نے ایں کالہہ کوں ایں گالہوں رد کر چھوڑیا جو ایں

سامی کوں کیا آپی ہے کہ اپنی پگی ماڑی دے عیش آرام چھوڑ کراہیں ذال بال کوں مطب دے کچے کوٹھیاں وچ بسرام آن کراوے۔ ہک پنساری جیڑھا آج ای بہاول پوروں ولایا ہا اے خبر چائی ودا ہا جو آج پاکستان دے ناں نال نواں مُلک بنڑا پے پر امام صاحب نے اوندی گالہہ کوں ایس گالہوں نہ منیا جو نواں مُلک بنڑنا ایڈا سوکھانی ہوندا، کڈن دے تاں سُر دے پئے ہئیں بر بنڑیا تاں آج تک نی۔

عشاء دی جماعت ویلے نواب صاحب دا خدمت گار حاجی الہی بخش وی ڈیوٹی توں بعد گھر ویندا اُتھائیں جماعت نال آن رلیا جو نماز قضا پئی تھیندی ہئی۔ نماز توں بعد حاجی صاحب نے وی مسیت وچ بیٹھے سنگتیاں دے گن وچ رازداری نال اے گالہہ ٹور چھوڑی جو آج تاں ناں، پر کُل چوڈاں تے پندرہ اگست دی ادھ وچلی رات کوں پاکستان بنزن داسرکاری اعلان تھی ویسی۔ حاجی صاحب نے اے وی تاکید کیتی جو گالہہ ہالی اگوں تے کہیں کوں نی کرنی۔ بھل ہُن کہیں بے دی گالہہ دا اعتبار تھیوے ہا یا نہ پر خدمت گار حاجی الہی بخش دی گالہہ کوں کون کوڑا کرے۔ سب نے آمین چا آکھی۔

وادھو کوں حکیم رام لعل دی دکان وچ تھیون والے معاملے دی کجھ سمجھ آون لگ پئی ہئی پر ہالی وی ڈھگ گالہیں آپس وچ نہ جُودیاں پیاں ہُن۔ ایس گالہوں آج دکانداری کرن دی بجائے او ایس گالہہ تے چوتابدہ تے بہہ رہیا جو جتھ اُو کوئی گالہہ آپس وچ نی پیا جوڑ سگدا تاں ایڈوں اُوڈوں سُن گن چاتے ٹاکا تاں فٹ کر باہوے۔ کیوں جو اوندے نیکے لاتوں حکیم دی مطب والی ایس دکان تے اوندے پیودی نگاہ ہئی پر غریبی سانگے ایڈی وڈی دکان اُو کیوں گھنے ہا۔ تہوں اے دکان وادھو دے ہاں وچ ہُن تیں گنڈے آلی کار پڈی آندی پئی ہئی۔ جے ہُن موقع ملدا پیا ہا تاں اُو کیوں نہ فائدہ چاوے۔

گل رات کوں حاجی الہی بخش خدمت گاردی کچھ لوکاں دے گن وچ کیتی گئی
 گاہہ آج دیرے دے پورے بزار وچ ہلدی پئی ہئی۔ جے کوئی بے خبری وچ ہاتاں بس حکیم
 رام لعل تے اوندائمر۔ پاکستان بزن دی خبر وچ وادھو سنوئیں کنیں دھوتیاں نے اے گاہہ
 وی جو چھوڑی جو آج کل وچ یا تاں ہندو آپ اتھوں منہ کروئیں تے جے نہ گئے تاں اتھوں
 گھلے کھاتے ویں۔ ڈھگ سارے جرائم پیشہ لوکیں نے آج رات کہیں ویلے لٹ مار دے
 انڈر گراؤنڈ منصوبے وی بزار اوٹریں شروع کر چھوڑے۔ وادھو کوں پگ اوں ویلے تھیا جڈن
 جو اوند پک سنگتی احمد شاہ اوکوں ڈوپہار ویلے احمد پور آپڑیں کہیں سکے دے گھر گھن گیا کہ
 جتھ بہوں وڈی حویلی وچ پک ریڈیولکیا پیہا۔ گھٹو گھٹ چووی پنجوی بندے کھڑیاں تے
 بہہ کراہیں ریڈیو تے خبراں سنزدے بیٹھے ہن۔ بھاویں جو ریڈیو دی سنز تہ ہر پاسے ہئی پر
 وادھو کیے ریڈیو کوں ڈیکھڑاں پک نویں شے ہئی۔ اوسوچ وی نہ سگدا ہا جولا ہور بیٹھا ہویا
 بند اتنے پرے پئے ہوئے پک کھو کھے وچوں آلا سگدے۔ اوند ادل کیتا جو ایں کھو کھے
 دے چکھوں وچ تے ڈیکھے جو ایندے وچ کوئی سچی سچ دا بندہ تاں نی لکیا بیٹھا پر ہمت نہ پئی
 جو احمد شاہ دا سنگتی کیا اگھسی۔

ریڈیو توں آلا آند اپیا ہا جو ترے جون سن سنتالی دے منصوبے تحت آج رات بارہ
 وچے توں ہندوستان دے ڈوں ملک بزارے ویندے پن تے بہاول پور سمیت اتھوں
 دیاں ریاستاں کوں پوری آزادی ہوسی جو بھاویں کہیں ملک نال رل وچن یا انج راہون۔
 ریڈیو تے اعلان سن تے اتھاں بیٹھے ہوئے لوکاں وچوں ڈھگ سارے پک پک کرتے
 کھسکدے گئے۔ احمد شاہ نے اوکوں وی شارٹ کیتی جو باہروں جل۔ وادھو تاں خود چاہندا
 پیہا جو کہیں نہ کہیں طریقے بھیج تے دیرے بجے تے ایں توں پہلے کہ کوئی بیادالا وچیں، اوحکیم
 دے ٹوٹے کرتے دکان تے قبضہ کر گئے۔ باہروں نکلے تاں احمد شاہ نے سنتی موگل دی

گالہہ کہتی تے ڈیدھے ڈیدھے فروٹ تھی گیا۔ لگدا ایہو ہا جو جو ان احمد پور شہر وچ کہیں ہندو
دا کوئی مکان یا دکان تازی کھڑے۔

وادھو ارمانی تاں بہوں تھیا جو احمد شاہ اوندی امداد کرن دی بجائے خود مطلبی بنزدا
تے بھجن دی کیتی ہس پر دنیا تاں پیندا ناں ہے، آپ تڑاپی دا۔ اُونے سوچیا جو کہیں طریقے
بزار دے ڈاہ بارہ دکانداراں کوں نال رلا گھنے تاں حکیم دی دکان تے قبضہ کر سگدے پر
ول اے سوچ تے پریشان تھی گیا جو اُنّاں وچوں کوئی ایں دکان دا اوندے کنوں زیادہ محبتی
نکل آیا تاں اوندے آپنے ہتھ وچ کیا ٹوآسی۔

تے ول کیا کیتا ونجے۔ کون ایہو جیہا تھی سگدے کہ جیکوں ایں جائیداد نال
محبت نہ ہووے۔ اواہیا گویڑی سوچ سُچیدا حویلی دی باہرلی گلی دی ٹکڑے بنزی ہوئی
گھوڑیاں دے پانی پیون والی حوضی دی بنی تے چڑھ بیٹھا۔ لکھلکھن دے بعد دماغ وچ
ایویں شوشنی جی چھٹی جو وڈے مدے دے مولوی صاحب پنجوی تریہہ طالب نال کر
چھوڑن تاں کم فٹ بنز سگدے۔ خیال کیا آیا۔ وادھو اُنھی تے گالہیاں آلی کار دھروکڑی
چالاتی پر تھولا جیہا اگوں ونج تے ٹھاہرنا پئے گیا جو پلس دے گھر سوار سپاہی چار چار دیاں
چوڑیاں وچ گشت کریندے و دے ہن۔ وادھو داساہ چڑھیا ڈکھ تے ہک سپاہی نے اُون
ڈوشک دی اکھ وی پاتی پر وادھو نے جھکی جھون چا گھتی تے سپاہی نے وی اکھ نوٹی کرن
وچ دیر نہ لاتی۔

احمد پور توں دیرے توڑیں کوئی ٹانگہ سڑک تے نہ ہا تہوں مکدے ساون دی
اُکرس نے پیریں رُردے وادھو کوں گھرو پانی کر چھوڑیا۔ دیرے دی بزار تیں اپڑن توں
پہلے عید گاہ دے نال سوڑی گلی وچوں نکل کراہیں وادھو وڈے مدر سے دے درتے بجیا
تاں اندر لی مسیت وچ عصر دی جماعت کھڑی تھیون کیتے تکبیر تھیندی پئی ہئی۔ وادھو دی

کوشش ہئی جو اوکوں امام صاحب دے سجے یا کھجے کہیں پاسوں جا ضرور ملے کیوں جو جیویں
 ای اوسلام پھیرن وادھوتے دید ضرور پو دے۔ وادھو دا وضوتاں کا سنا ہا پر جے اُو وضو کیجے
 سقاویاں ڈو ویند اہاتاں مدرے آون دا مطلب پورا نہ تھیند اہا۔ ہک لکھلے کیجے وادھو وضو کیجے
 سقاویاں ڈو اُلریا پر وُل خیال آیا جو وضو ہے یا کانتی، اے تاں کہیں نی ڈیکھڑاں پر اُونماز وچ
 ہے یا کانتا، ایندی کتو سب نے رکھڑیں ہے، تے وُل کیوں نا اُو ہو کم کیتا ونجے کہ جنیں وچ
 تے خیراں تے سکھڑیں چنگائی۔ اے سوچ تے وادھو بلا نگاں مریندا مسیت وچ وڑیا تے
 سدھا ونج تے پہلی صف وچ امام صاحب دے کھجے پاسوں نماز نیت تے کھڑ گیا۔ سلام
 پھرن ویلے وی جنیں ویلے امام صاحب کھجے پاسے سلام ولیندے پئے ہن، وادھو نے اپنا
 منہ چوکی دیر سجے پاسے ای رکھیا تاں جو امام صاحب دی دید نہ پوندی وی اوں تے ضرور
 پو دے۔

پر اے ساری کیتی کرتی وادھو دے کہیں گم نہ آئی۔ سبھے نمازیاں دے اُو ڈھرتھی
 ونجن دے بعد جنیں ویلے وادھو نے مطلب دی گالہہ ٹوری تاں امام صاحب نے دُکان تے
 قبضے کیجے طالب ڈیون توں صاف انکار کر ڈتا۔ وادھو نے مدرے دی امداد سا نگے پیسیاں دا
 لاچ ڈیون دی کوشش وی کیتی پر امام صاحب نے وُلدا کھڑکا چھوڑیا۔

”وادھو توں چاہندیں میں ایس مسیت دی امامت توں ای ونجاں۔ تیکوں
 بھادیں پتہ ہے یا کانتا پر میکوں پتہ ہے جو نواب صاحب کنوں کوئی گالہہ نی لکدی۔ بہوں
 ظالم بندہ ہے تے ٹھشکا ڈیندے دیر ذرائی لیندا۔ میں تاں تیکوں وی اکھیاں جو باز آ۔ سارا
 شہر جائز دے جو اے دُکان حکیم رام لعل دی اے تے تیڈا وندے نال کوئی لاہنا ڈیونا کانتی۔
 اُوکس وی نواب صاحب نے تمام خلقت کوں بھادیں اوسکھ ہے یا ہندو، امان ڈتی ہوئی
 ہے۔ کیوں خود ڈھکیندیں تے بیاں کوں ڈھکیندیں۔ ونج شابش، ہن رُدا نظر آ۔“

وادھو مدر سے وچوں نکلیا تاں اصلوں چریا تھیا ہو یا۔ کاوڑ کنوں کجھ سمجھ نہ آندی
پئی ہئی جو کیا کرے۔ امام صاحب کنوں اوکوں اے اُمید نہ ہئی جو ہک مسلمان کوں چھوڑ
تے کافر دی وَٹب کر لیسی۔

”اُوں تقریراں وچ تاں ڈاڈھی گالہہ کریندی کافراں کوں مار مُکاؤن دی۔ پر
کھڑکے.... ہُن دُلدی اے نواب دے ڈر کنوں۔ اُونہہ۔ نواب دا ڈر کیا، آپڑاں مطلب
ہو دے ہا تاں نواب دا ڈر ڈاں پئیندا ونجے ہا۔ اتھ مفاد جو میں جیسے غریب دا ہاتھوں مُلاں
کوں نواب تاں آپے یاد آونڑا ہا۔ میں ہُن ایہا دُکان مدر سے کوں دان چا کراں تاں وَل
ڈیکھساں جو سارے جگ جہان دے مُلاں ڈانگ سوٹاتے تلواراں کڈھ تے بزار وچ نہ
آئے کھڑے ہو وِن تاں“۔ وادھو دماغی طور تے خفتار مریندا دُکان تے آیا پر دُکان
گھولے بغیر دھچر دی دُکان تے اگوں پئی چوکی تے چڑھ تے حکیم دے مطب ڈومونجھیاں
اُکھیں ڈیکھن بہہ گیا۔

دھچر گاہکی توں فارغ تھیا تاں وادھو کوں مونجھا ڈیکھ اَلوایس۔ ”کیوں یار خیر
تاں ہے، نہ دُکان کھولی نہ کوئی بونی شونی تے مونجھا تھیا چوکی چڑھیاں بیٹھیں۔ گھربار
ساڈی بھجائی تاں چنگی بھلی ہے ناں۔“

”ناں اُوں چندری کوں کیا تھیو نڑیں۔ بندہ بشر ہاں میں وی، میکوں رَن توں
علاوہ کوئی مسئلہ نی تھی سکدا“۔ وادھو نے اختا تھی تے جواب ڈتا۔ پر دھچر کوڑیجن دی
بجائے کھل پیا تے وَل استری چھوڑ کراہیں وادھو دے اصلوں نیڑے بہہ تے ہو لے جیا
الانڑاں۔

”حکیم دی دُکان دی فکر ہے ناں میڈے یار کوں۔“
وادھو نے حیران تھی تے دھچر کوں ڈٹھا جو اُوکوں کیوں پتہ ہے۔

”یار بھل وَنج اِس دُکان کوں، اے تیڈے نصیب وَنج کائنی“۔ لگدا ہا جو دچر
دے دِل وَنج کوئی راز ہے پروادھو وی ایندی ٹوہ لاتے بغیر اُو کوں ہیکل چھوڑیا۔ ”وَنج وَنج،
آپنا کم کر..... تیکوں کیا پتہ“۔

”پتہ ای تاں میکوں ہے“۔ دچر دیاں اکھیں وَنج سنجیدگی دے نال نال شرارت
ہالی توڑیں وی ہئی پئی۔

”اچھا گالہہ سُن.... توں ہُن وڈے مدرسے وچوں تھی تے آنداں پئیں ناں
تے تیکوں امام صاحب نے دُکان کیجے امداد دیون توں انکار کر چھوڑے“

”تیکوں کیویں پتہ ہے“۔ وادھو نے سبھے ہتھیار سٹ چھوڑے۔ ”میکوں اِس

گالہوں پتہ ہے جو تیڈا یار احمد شاہ خود اِس دُکان دے پچھوں ہے تے امام صاحب ہوندی

وَنب پیا کریندے۔ مدرسے دے کجھ طالب ظہر کنوں پہلے اِتھوں دے ڈوں پھیرے مار

رگن۔ اُناں وچوں ہک چھوہر میڈا وی جائزوں ہا، اُوں ڈسائے جو اِس دُکان وَنج اُجھو

احمد شاہ آپنی حکمت چلیسی تے اَنج رات عشاء توں بعد بس ایویں سمجھ کم ٹھک پھک تھی گیا۔

”یار تاں نہ تھیا، وُل تاں یار مار تھیا۔ ہُن میں وی ڈیدھاں جو اے دُکان کیویں

مِل تے راہندی اے احمد شاہ کوں۔ امام صاحب دے طالب تاں عشاء پڑھ تے آسن

ناں، ہُن توں ڈیکھ جو وادھو کیا کریندے“۔ اے آکھ تے وادھو نے دچر دی دُکان دی

تھلی توں دَر پھ ماریا تے گھر ڈوڑی پئی تھی گیا۔



(22)

فیاض نے اُج پہلی واری تلسی کوں چنگی طرحاں اُکھیں بھال تے ڈٹھا ہاتے لگدا
ایویں ہاجو اودی اُج اُوکوں ڈیدھی پئی ہے۔ اُوئیں تاں اے موقع ای کا سنا ہا پک بے کوں
ڈیکھن دا پر جنیں ویلے اے پتہ ہووے جو ول کڈھائیں جیندے جی پک بے کوں
ڈیکھراں نصیب ای فی تھیونزاں تاں ول بندہ ساریاں اُجھکاں پر و بھریاں کرتے ایویں
دید کنوں دل داکم گھندے جیویں جو فیاض تے تلسی گھندے پے ہن۔

14 اگست دی ڈوپہار کوں جیڑھے ویلے داجمعدار محمد نواز دے آکھن تے حکیم
رام لعل نے روہی والے پاسوں بارڈر پار کرن دا فیصلہ کیتا تاں سوڈھی مل تے وِشنو ہوں
ویلے دے جھکی جھون گھت تے پک بنے دے آمو سامے سک دم تھی تے بیٹھے ہن
تھے۔ احمد پوروں آندے ویلے اُو آپڑاں پیسہ نکال چائی آیا ہاتے ہن تاں بس ساہ ہا پیا
پک آپڑاں تے پک پتر دا۔ حکیم دی ذال راہی تاں اصلوں بے طوری تھی وِدی ہی۔ بھریا
تریا گھر چھوڑ کراہیں مہاجر تھی وِنجراں ایڈا سوکھا تاں نہ ہا۔ ساریاں سکاں ساریاں آساں

مِل وچ مٹی تھی گیاں ہن۔ اونے بہوں آکھیا جو جلد بازی وچ کوئی فیصلہ کرن دی بجائے
نواب صاحب دے فیصلے دا انتظار کر گھدا ونجے پر حکیم تاں بنی کوئی گالہہ سُزن کوں تیار ای
کائناہا۔ جمعدار نے اوکوں کوئی اتجھی خبر سُزائی جو اوندے بعد جوان حوصلہ ای چھوڑ گیا
ہئی۔ کجھ دیر تاں فیاض کوں آپڑیں نال بلہاتے نکلیاں نکلیاں پارتاں ڈیندارہ گیا جو کیندا
کیندا کیا کرنے۔ ول اپنی صندوق قری چاتے ہک پاسے تھی بیٹھاتے کجھ نویں نویں اسام
کڈھتے فیاض دی تکی تے چار کھیونس۔

”اے میڈے مکان تے دکان دے کاغذ ہن۔ ڈوہیں تیڈے ناں لوا چھوڑن
۔ اے سھو کجھ تیڈا، ٹانگہ گھوڑا وی تیڈا۔ قسمت ہوئی تے ول پُورے تاں نویں سویں ڈنھی
ویسے۔“ کاغذ گھنڈے ہویاں فیاض دیاں اکھیں وچوں ہنجوں تریاں تاں حکیم وی روپا۔
پرو بھرے بیٹھیاں ماواں دھیاں سب کجھ ڈیدھیاں بیٹھیاں ہن، اناں دے نیر چھڑے
اکھیں وچ نہ ہن بلکہ گلہاں تیں واہندے پے ہن۔ اے سھو کجھ فیاض دے حوالے کرتے
حکیم رام لعل ڈوجھے کوٹھے دی چنڈ وچ ونج کراہیں رُب جانے کیہڑی گتھلی کھول تے کھڑ
گیا۔ کئی ڈینہاں دی گم سُم ٹلسی وچ یکدم پتہ نی کتھوں ایڈی ہمت آئی جو مادے سامنے
گھنڈ اُتاواں کریندے ہوئے فیاض دے نیرے آئی تے یکدم اوندے بچے ہتھ داخنہ
آپڑیں چنے وچ مھسا کراہیں سینہ تان تے اوندے سامنے کھڑ گئی۔

ایں اچا چیت حرکت توں بعد نہ رادھی وچ ایڈی سکت جو دھی کوں ہٹکے تے نہ
فیاض وچ ایڈی جرات جو ٹلسی کنوں ہتھ جھڑوا سکے یا اوندے چہرے توں نگاہ تک ہٹا سکے
۔ اُوڈوہیں ہک بے کوں اُج پہلی واری ڈیدھے پے ہن شاید ول کڈہائیں نہ ڈیکھن کیتے
۔ اُوں لکھے دے پندھ وچ پتہ نی کتیاں صدیاں گزر گیاں۔ ٹلسی کوں فیاض دا ہتھ آپڑیں
ہتھ وچ گھن تے اوسوا آندا پیا باجیرہا اُوں رات دیاں کشالیاں وچ وی نہ آیاہا۔ فیاض دا

ہولے ہولے کمبدا ہویا ہتھ جسمانی شراکت دیاں تمام پوڑیاں بلا نگار چڑھدا ویندا پیا ہا
تے تلسی دیاں انگلیں دی گرفت فیاض دے بُت داسارا سیک آپنے بُت دی روہی اُتے
جھاری ویندی ہئی۔ تلسی کوں ایویں لکيا جو ہک فیاض کیا، محبت داسارا جہان کیا، خود محبت دا
دیوتا اوندی نسوانی وکیر وچ ہے۔ تلسی جسمانی شراکت دے ایں مکاشفے وچوں گزر دے
ہوئے اوں مقام تک پہنچی کہ جیندے بعد اوں محسوس کیتا جو عورت مرد دی جسمانی سانجھ کجھ
مخصوص اعضاء دے ملاپ دی محتاج نی ہوندی بلکہ ایں عمل وچ ہک اتجھی منزل وی آندی
ہے کہ جہاں محض ہتھ دا ہتھ کوں لگن تے اکھ داہی اکھ کوں ڈیکھن ای جھیکڑی منزل تیں
ہُجا ڈیندے۔ شاید ایں گالہوں جو عورت مرد دا پورا جسم ای جسمانی سانجھ دا تقاضے دار
ہوون سانگے ایں عمل وچوں گزردیاں ہویاں آپنا آپ بے تے کھول، سمجھ کجھ ظاہر کر
ڈیندے۔ اُناں ڈوہائیں نے شاید کٹھا سوچیا ہو سی جو حکیم دے کہیں مریض دی نبض تے
انگلیں رکھن سارا ای اوند ا پورا جسم حکیم کوں آپڑیں گجھے راز ڈیون کیتے اوں تے کھل
ویندے۔

لحظہ کیا گزریا، اُبالے کھانڈیاں اکھیں والی تلسی دیاں اکھیں نو گیاں تے فیاض
دے ہتھ تے اوندیاں انگلیں دی پکڑ وی ڈھلی پئے گئی۔ فیاض نے اوند ا ہتھ زور دا گھٹ
تے چھوڑ ڈتا ایں ارمان دے نال جو اُو اوں گزری رات کوں واپس کیویں ولاوے۔ تلسی
دیاں اکھیں نو یاں تاں گھنڈ وی تھولا جیہا تلوں تے تھی گیا۔ فیاض دی نگاہ اوندی گردن وچ
پئی رتے رنگ دے موٹے موتیاں دی مالہاں تے وَنج ٹکی جیندے موتیاں داساہ دے
نال نال اُتے تلے تھیونزاں ہولے ہولے ٹھاہردا ویندا ہا۔ آپنی جان تلسی نے اُوڑک اُو
امانت وی فیاض دے حوالے کر چھوڑی ہئی کہ جیندے سامنے اوندے اُبے دے ڈتے
ہوئے مکان تے دُکان دی کوئی حیثیت نہ ہئی۔ اُو ایں گالہہ تے دی راضی جو حق دار دی

پُچون اوں کملی دی وی اُدا ہئی جیڑھی اُوندے سیانے ویانے بابے حکیم صاحب دی ہئی۔
 راہی اے سب کجھ ڈیکھ تے املک کنگ، ہتھوں وسم تے بہہ گئی۔ حکیم صاحب
 کوٹھے وچوں باہر آیا تاں پتہ لکیا جو اوند ایا ر محمد نواز جمعدار پلس دی جیپ گھن تے مطب
 دے پچھلے پاسوں آگئے۔ رام لعل نے فیاض کوں گل نال لایا تاں ہنجوول اکھیں وچوں سم
 آئے۔ جنیں ویلے جوتلسی، راہی، وشنو اتے سوڈھی مل دے چہریاں تے کہیں قسم دا کوئی
 تاثر نہ ہا، اُوئیں جیویں ہتھیار سٹی کھڑے سپاہی کوں ایندے نال کوئی غرض نی رہ ویندی جو
 اُوندی باقی دی عمر اں قید وچ گزری یا اُو پھٹے لکسی۔ زندگی کہیں ویلے اتنی وی غیر متعلقہ تھی
 ویندی ہے جو اوندے سامڑیں جیون دی سک آپڑیں معنی و نجا باہندی اے۔

فیاض کوں مکلیندے ہوئے حکیم کول لفظ تاں نہ رہ گئے، چھڑیاں اکھیں ہن
 جہاں وچ ولدے سروں وطن نصیب تے سُجناں یافتہ ہوون دی سک ہئی کہ جیندے
 پورے تھیون دا امکان ہنجواں دے سوا کجھ نہ ہا۔

آپڑیں ہم وطنان کنوں چوری اے پنج جی جیپ دے پچھلے پاسوں گسر مُسڑ تے
 بہہ گئے تے ڈرائیونگ سیٹ تے بیٹھے ڈرائیور دے نال پک مسلح سپاہی جہاں نے اناں
 کوں قلعہ ڈراور دے اگوں مز پچی والی جھوک تے جُجا آونزاں ہا۔ ویندے ہویاں کوں محمد
 نواز جمعدار دے نال نال فیاض نے وی ہتھ ہلاتے مُکلا یا پر جیپ دے اندروں کجھ نہ ڈِسیا
 جو مسافراں کول نہ تاں ہتھ ہلاؤن جتی جا ہئی تے نہ ایں جتی حوصلہ۔



(23)

بھاویں جو ریاست بہاول پور وچ کجھ دی اتجھا تھیون کوں نہ ویندا پیا ہا کہ
 جیکوں ہندوستان دے بیاں علاقیاں دی سیاسی بھن تروڑ خاص طور تے پنجاب نال رلا
 سگوں ہاپر ول وی 14 اگست 1947ء دی اُکرس دی ماری شام کوں پک عجیب جیہا خوف
 ہر پاسے نازل تھیا محسوس تھیندا پیا ہا۔ ساون دے مہینے دی ایس جھیکڑی شام کوں اُکرس نے
 چوکھا جو بن ڈکھایا تاں دیرے نواب وچ ڈیہ نہ لاه والے پاسوں پہلے جھڑتے ول کھمین
 دے ڈکھالے شروع تھی گئے پر بارش کوں ہالی دیر ہی۔ لیکن ایڈے اوڈے دیاں خبراں توں
 بعد بن تاں ہر بندے کوں یقین تھی چکیا ہا جو آج چوڈاں تے پندرہاں اگست دی وچلی رات
 کوں جنیں ویلے بارہاں وچ راہسن تاں اگلے سکینڈ دے کھڑکار نال ای ہندوستان دے
 مسلم اکثریتی علاقیاں تے مشتمل، پاکستان ناں دے پک اتجھے ملک دالیکا لیک ڈتا ویسی
 جیندے مغربی تے مشرقی حصیاں دے ادھ وچ پک ہزار میل دی انڈین وٹھ ہوئی۔
 مغرب دی نماز کڈو کڑیں تھی چکی ہی پروادھو سمیت آج کئی دکاندار سمیت ڈونہ

گئے ہن۔ کچھ نے تاں نماز گھر پڑھی پر وادھو دا پتہ بظاہر کہیں کوں وی نہ ہا جو او کھنٹے
 گئے۔ دیرے دی بزار وچ کمیٹی دا ملازم گھنٹہ گھن پہلے دا آتے چمنیاں بال گیا ہا پر اندھارا
 کہیں طرحاں وی قابو وچ نہ آندا پیا ہا۔ ہک عجیب جیہا اندھارا کہ جیندے وچ شام دی
 رتا نجن رات تھیون دے باوجود ممکن کوں نہ آندی پئی ہئی۔ سڑکاں تے پلس تے نواب
 صاحب دے گھڑ سوار باڈی گارڈ دستیاں دی گشت وی اوں ڈرکوں گھٹ نہ کر سگی کہ جیڑھا
 جو بچھ لہن دے بعد ریاست دے ہراو علاقے وچ جران کر گیا ہا کہ جتھ مسلماناں دے
 نال نال ہندو، سکھ تے عیسائی وی راہندے پے ہن۔ نواب صاحب طرفوں امن امان
 دیاں تسلیاں دے باوجود ہندو آتے سکھاں وچ اے احساس روکیاں نہ رُکدا پیا ہا جو نواب
 صاحب دا فیصلہ بھاویں جو وی تھیوے اُناں کوں ریاست چھوڑنی پوسی۔ اے احساس پہلے
 تاں ایڈانہ ہا پر ریاست وچ مسلم لیگ تے کانگریس دیاں پر کسی جماعتاں دیاں سرگرمیاں
 نے مسلم اکثریت دے دلاں وچ نفرت تے ہندو آں سمیت سبھے اقلیتاں دے ذہناں وچ
 خوف کوں اوں حد توڑیں ودھا چھوڑیا کہ جتھوں واپسی ممکن نہ ہئی۔ اے ہیں خوف دی انتہا
 ہئی جو ریاستی ہندو آپڑاں مذی دسترا پاکستان بزن دے اعلان دے نال ای بدھ بیٹھے
 ہن۔ اُناں وچوں وی جیڑھے جیڑھے اپنی ریاستی سُنجان کوں وسارن کیتے کہیں صورت
 تیار نہ ہن، آپڑیاں جائیداداں امانتاں آپڑیں اعتباری ہمسایاں کوں ڈتی ویندے ہن۔

عشاء دی اذان توں تھوڑی دیر پہلے چار گھڑ سوار باڈی گارڈ بوہڑ والے چوک
 توں دیرے دی بزار وچ وڑے تے گھوڑیاں کوں دُلکی ٹور ٹوریندے ہوئے عید گاہ ڈو
 ویندے تھئے۔ ہالی مسائیں اُوہائی اسکول دے سامڑیں توں ای لنگھے ہو سن جو پنج چھی
 بندیاں دا جتھا، مولہاں مارتے بلدیاں مشعالاں چاکرا ہیں سدھا حکیم رام لعل دی دُکان
 تے گیا تے دُکان کوں گھیرا پاؤن توں بعد وڈے دروازے تے مٹی دا تیل سٹیا تے بھاء لا

ڈتی۔ آج بھاء نے لکڑیوں پکڑا یا ای نہ ہا جو یکدم دروازہ اندروں گھلیا تے پک باراجیہا واٹوایاں مچھاں والا ٹیٹن پلسیا وردی وچ درمل تے ایس طرحاں کھڑ گیا جو پستول دامنه فسادیاں والے پاسے ہا۔ اوندے پچھوں وی تڑے پلس دے بندوقاں والے سپاہی کہیں کندھ دیاں سلہاں آلی کار پکے کھڑے ہن۔ فسادیاں دا بجھا اٹھائیں اٹھرتج تے رہ گیا۔ پئے ہوئے آنہیں صاف ڈیسندے پئے ہن جو اے سارا کجھ اناں دے خواب خیال وچ وی نہ ہا۔ پرؤل وی اناں دا پردھان اگوں تے ودھیا تے ہکل ڈے تے آکھیس جو اسلحہ اناں کول وی ہے پیار ٹھاندی نی جو او پلس والیاں تے ہتھ چاون، تہوں پک پاسے تھی تے حکیم تے اوندے گھر والیاں کول اناں دے حوالے کرتے دکان واندی کرو۔

”اُوئے وادھو چیل آ.... اے خوی ڈیندا کیوں پیس.... محمد نواز جمدار کول۔ میں تیڈے ست جڑیں جانزداں تے اے وی جانزداں جو تیڈے کول اسلحہ کتنا ہے۔ اے کنوں پہلے جو میں تیکوں وٹھی کراہیں حوالا ت وچ ٹن ڈیواں، ویندا نظر آ بھاڑی آ۔“ اے آکھ تے جمدار محمد نواز نے موہری جو ان دے منہ تے پک اتجھا بھو گتھیا جو مولھ وچوں وادھو نکل آیا۔ وادھو نے شرمسار تھیون دی بجائے ولدی آکر ڈکھائی۔

”میں تیکوں ای جانزدا جمدار صاحب، چار پھلڑا پڑتے پک کافر دی وٹب کریندا پیس، اے سارے غازی اوندے نال نال تیکوں ای ساڑ سوا کر ڈین۔ دکان میڈی ہے تے حکیم کرائے دار، میں تاں قبضہ گھن تے راہساں۔“ وادھو دا اے آکھراں ہا تے تریبے سپاہی بندوقاں تان تے جمدار دے اگوں آگئے تے انہاں دے پچھوں فیاض دی نکل تے سامنے آ گیا۔

”لالہ وادھو.... آجائی دے ابھر نہ تروڑ۔ دکان حکیم صاحب دی ہئی تے او ویندے ویلے ایکوں میڈے ناں چڑھا گئے۔ تے اے ہے ایندا کاغذ۔“ فیاض نے پرے

کنوں پک سرکاری اسٹام کڈھ تے ڈکھایا۔ فیاض کوں ڈکھ تے تاں وادھو دا چیتا بیاوی رل گیا۔

”اوئے چل چل..... اے سب کوڑ ہے۔ سدھی ریت نال حکیم کوں باہروں کڈھ نہ تاں دکان دے نال نال تیکوں ای ساڑ تے سوا کر ڈیاں۔“ وادھو گجھ بیاوی ہمسائیں ڈکھاون تے آ گیا ہا۔ اتنی دیر وچ پرے کنوں گشت تے پھر دے ہوئے باڈی گارڈاں دے گھوڑیاں دی ٹپ ٹپ آون شروع تھئی تاں وادھو دے مولہاں والے ساتھی تکھے تکھے ایڈے اوڈے تلک تے اندھارے نال اندھارا تھی گئے۔ جنیں ویلے جو وادھو سپاہیاں دے ہتھ آ گیا۔ اناں نے تاں کٹاس چاڑھی سو چاڑھی، باڈی گاڈاں نے وی آتے اصلوں پھے رکھیا۔ منہ سر بجیا تاں جمعدار محمد نواز دے آکھن تے کاں کوڑا کرتے پلس چوکی روانہ کر ڈتا گیا جنیں ویلے جو دکان کوں لگی بھاء جچن توں پہلے ای وسم چکی ہئی۔

”کا کا! ہن تاں کہیں داڈرنی ناں.... اے موزی تاں گیا ہن سرکاری مزامنی وچ۔ میں تاں ہن ایہو دعا کریندا پیاں جو ساڈا بھرا حکیم صاحب تے اوندائیں کہیں طرحاں بارڈر کر اس کر گیا ہووے۔“

مونجھے تھے فیاض نے جمعدار کوں ول ای روک گھدا جو تھی سگدے کوئی بیا جتھا حکیم صاحب دی دکان دے سر ہاندی تھیا وادھو دے۔ وادھو تاں کھلا دشمن ہا، تہوں سامنے آ گیا۔ تھی سگدے جو کوئی گجھیا باڑی وادھو دے تے وار کرتے ٹرونجے۔ فیاض دی گالہ سنوں تے جمعدار محمد نواز دیندا دیندا رُک گیا تے گشت تے پھر دے پلیاں تے باڈی گارڈاں کوں وی چتو اچھوڑیئیں جو اتھوں نیڑے رہوئے، متاں پرے ونج پے۔

اوہو تھیا جیندا ڈر فیاض کوں ہاپیا۔ عشاء دی نماز توں کوئی گھنٹہ بعد آون والا جتھا ہوسی کوئی پنجوی تریہہ بندیاں دا۔ اناں نے وی مولہاں ماریاں ہویاں ہن تے ہتھاں وچ

اُدیں بلدیاں مشعلاں اُتے پرے کنوں نعرے مریدے آندے ہن۔ شور شراباُس تے
 محمد نواز جمدار تے اوندے تریبے سپاہی باہروں نکل آئے تے دوروں مجمع کوں آنداں
 دیکھ کراہیں وِسلاں مارن شروع کر ڈتوئیں جو گشت والی پلس تے باڈی گارڈ ڈوہیں پہنچ
 دَنجن۔ لیکن پلس تے باڈی گارڈاں دے آون توں پہلے فسادیاں دااے جتھا اُلک نیڑے
 آ گیا۔ ایں توں پہلے جو اودکان کوں بھاء لیندے یا قبضہ کرن دی کوشش کریندے، جمدار
 محمد نواز نے بزار والی سڑک دے اُدھ وچ آتے ڈوں ترے ہوائی فائر کیتے تے باقی دے
 سپاہیاں نے وی اوندے پچھوں پوزیشن گھنڈیاں ہویاں سڑک تے گوڈی ماری تے بہہ
 تھئے۔

ہوائی فائراں دی آواز تے اے ڈوجھا جتھاوی چھرک تے اُتھائیں کھڑ گیا۔
 اُناں کوں سمجھ نہ آندی پئی ہئی جو اے فائر کریندے لوک کون ہن تے اِتھ کیویں آگن۔
 اُناں نے تاں بے چلتے حکیم تے اوندے ٹبر کوں ساڑتے سوا کرنا ہا پر اے کیا تھی گیا۔ شاید
 کوئی بے لوک ہن کہ جہاں نے اُناں دے آون توں پہلے حکیم دی دکان تے قبضہ کر
 گھدے۔ ایں بھن تر وچ اُناں نے مشعلاں اُچیاں کرتے فائرنگ والے جو اناں کو
 سُجاڑن دی کوشش کیتی تاں ایویں بھلا ندر اپیا جیویں جو پلس ہووے۔ کہیں نے سڈ ماریا
 جو حکیم نے جان بچاؤن سانگے کرائے دے نقلی پلسیے منگا بلہائیں۔ کہیں بے نے اے شوشی
 چھوڑی جو اودھو نے دکان کھلا ڈے کراہیں ایں بد معاشی دا چکر چلا چھوڑے، بہر حال طے
 ایہو تھیا جو بھادویں جو تھیوے تے بھادویں جو دی ہن، حضرت صاحب دے حکم دی تعمیل ضرور
 تھی تے راہے۔ اے آکھ تے جتھے دے سبھے ساتھیاں نے ولدے نعرے مارنے شروع
 کیتے تے حکیم دی دکان ڈوسدھ چا کیتو نے۔ ہالی ایویں ہک ڈوں قدم چوے نہ ہن جو محمد
 نواز جمدار نے ڈوں ترے فائر سڑک دے اُدھ وچ اِتھھے کیتے جو چہڑیاں پچ پچ تے

فسادی مارکہ دے پیراں پیاں وچ ایں طرحاں لکیاں جیویں جو چھریاں والی بندوق دا چھنڈا لگدے۔ اجن اُومر سے دے طالب سنبھلے نہ ہن جو بوہڑ والے چوک پاسوں گھوڑیاں والی پلس تے عید گاہ والے پاسوں گھر سوار باڈی گارڈاں نے ڈوہیں پاسوں ولاڈے تے بھجن دے رستے بند چا کیتے تے ول لوہے دی ٹوپي والے بیتاں نال جو کٹیو نے مار کے داسر کٹیو نے۔ کڈے گیاں مشعلاں تے کڈے گئے ہا ہودے نعرے۔ کجھ لکھلے بعد سڑک اصلوں پدھر تھی گئی۔ جیندا جتھوں دا لکھا، اُتھاؤں بھجن دی کیتی۔

شور شرابا مکیا تاں فیاض دکان وچوں باہر نکل آیا۔ جمعدار نے اُوکوں ڈیدھے سار ای سڈ ماریا۔ ”توں پتر ٹھیک آہدا ہاویں۔ اتھ کئی فسادی اکھیں پوڑی پٹھن شودے حکیم دی جائیداد تے۔ پتہ نی اوڈے احمد پور والے مکان دا کیا بنڑیا۔ بندوبست تاں میں ٹھیک کر آیا ہم۔ پر ول وی اتھ کجھ نی آکھیا ونج سگدا۔ ایں شہر وچ حکیم نے بابے ڈاڈے کنوں حکمت کرتے ہزاراں لوکاں کوں نویں حیاتی ڈتی ہوسی پر آج چھڑی ہک رات وچ نہ تاں اُوندی جان ہتھیکڑی رہی تے نہ جائیداد۔ ساڈے یار حکیم نے سبزپ کیتے جو میڈا آکھامن تے بارڈر لنگھن ٹر گئے نہ تاں پتہ نی آج کیا تھیوے ہا۔“

فیاض دامنہ تاں لٹھا سولتھا، چیتاوی گردان تے حیاتی ول ہک نویں گھان دے وات۔ اُوولدا دکان دے اندر ونجن لگا تاں جمعدار محمد نواز نے ہک واری ول چتایا جو پتر توں آرام کر، میں سویرتیں بیٹھاں باہروں۔ کل دا ڈنہہ چڑھ پووے، ول اللہ بھادیں خیر

ہے۔



(24)

حکیم رام لعل دے ٹری سمیت چوری چوری بارڈر ڈونکل و نجن نے جتھ فسادیاں
 دیاں سکیمیں کوں سوا کر چھوڑیا اتھ فیاض کیتے وی ہک لمبے عرصے توڑیں عذابیں دا اتجھا
 سلسلہ چھوڑ گیا کہ جیڑھا ممکن کوں ای نہ آندا پیا ہا۔ محمد نواز جمعدار نے حلالی بھواناں طرح ہر
 مشکل گھڑی وچ کہیں لو بھ لالچ دے بغیر اوندے نال مونڈھا رلائی رکھیا۔ بس اوکوں فکر
 ہئی تاں ایہا ہکا جو حکیم رام لعل دی کوئی خبر کتھاؤں نہ آندی پئی ہئی جو او گئے تاں کڈے
 گئے پر ایں گالہ تے او شکر کریندا ہا جو او نے حکیم دی دکان دے نال نال گھر کوں وی قبضے
 کیراں توں بچا گھدا ہا۔

شروع شروع وچ تاں دادھوتے امام صاحب، ڈوہائیں نے دکان واسطے
 بہوں تن ماریا جو کہیں طریقے فیاض ہینزاں پئے ونجے یا کہیں لالچ وچ آونجے پر جیئیں
 ویلے کجھ نہ بنزیا تاں اوندے اُتے مقدمے چاٹھو کیونے۔ اوں زمانے احمد پور وچ انور ناں
 دے ہک نینگر وکیل نے نواں نواں پھٹا لایا ہا۔ جمعدار صاحب نے ڈوہیں دعوے اوندے

ذمے چالاتے۔ اوڈوں حکیم صاحب وی فیاض دے حق وچ رجسٹریاں کرا کم تگوا کر گیا ہا
 تہوں ڈوہیں مقدے ڈیہاں دے وچ ای وان وٹیندے گئے۔ مقدمیاں کنون جان تھیں
 تاں پر ہا پنچائیتاں شروع تھی گیاں جو فیاض دکان مسیت دے ناویں لو اچھوڑے، ایندے
 کبھڑے پو دی اے۔ دکان فیاض دی آپنی ہووے ہا تاں شاید اومن ونجے ہا پر دنیا کوں
 کیویں ڈسے جو اے سھو گجھ اوندے کول امانت ہے کہیں دی۔ تے جے اصل مالک آکھڑا
 تاں کیا منہ ڈکھسی اوکوں۔ پنچائیتاں نال وی کم نہ بنڑیا تے اوندے خلاف ہر نماز توں بعد
 تبرا شروع کر ڈتا گیا۔ جیندا نتیجہ اے نکلیا جو رلدے کھلدے مریض آونڑیں وی اصلوں تم
 تھی گئے۔

اوڈے احمد پور والے گھرتے پہلے تاں پیری بد معاش سر ہاندی تھیا پر جئیں
 ویلے جمعدار محمد نواز ادھ وچ آیا تاں خود ای ایڈے اوڈے تھی گیا۔ ہالی پیری دے کڑکار
 دی دھڈڑاڈ دی و دی ہئی تے اتوں فیاض دا چا چالیہوں و ہیندا آ گیا۔ پہلے تاں آپنی دیرہ
 داری کیتے مکان عارضی طور تے منگیس پر جئیں ویلے فیاض انکاری تھیا تاں حقہ پانی بند
 کراون دی پھتر یڑتوں بعد محکمہ متروکہ وقف املاک وچ درخواست چاڈئیں جو اے مکان
 دے دیرے والی دکان ڈوہیں ہک ہندو دیاں متروکہ جائیدادیں ہن پر فیاض نے حکومت
 کوں دھوکہ ڈیون کیتے اناں دے جعلی کاغذات آپڑیں ناں بنڑا گھدن۔ تہوں محکمہ دا
 فرض بنڑدے جو اناں جائیدادیں کوں قبضے وچ گھسن تے ہندوستان توں آونڑوں والے
 مہاجراں کوں آلات کرے۔

جائیدادیں دا قیمتی ہوونڑاں تے خود سکے چاچے دا مخبری کرنا فیاض واسطے چنگا
 بھلا عذاب بن گیا۔ محکمہ دے افسر نے کاروائی شروع کرن توں پہلے فیاض کوں ہولے
 ڈاڈھے بہوں بلوایا جو کہیں طرحاں جو ان کجھ تیل پھل ڈیون تے راضی تھی ونجے پر اوڈوں

فیاض کوں وی آپنے کاغذاں دے سچے ہووَن داماں ہا، تہوں اوندے جانڑں پُچی کدھ
 سانگے۔ پرافسرای گراڑا ہا۔ اُونے کیس بنڑا جوڑتے اُتے ہیڈ آفس بھیج چھوڑیا تے پک
 آرڈر بیا کدھ چھوڑیا جو جے تیں اُتوں کوئی حکم نی آندا، فیاض نہ تاں مکان وچ وڑسکدے
 تے نہ دُکان وچ۔ فیاض ہر پاسوں وکیر وچ آیا تاں پک واری ول جمعدار محمد نواز ای
 پگرایا جس اُنور وکیل کوں آکھ کراہیں عدالت وچ نہ صرف محکمے دے حکم دے خلاف دعویٰ
 کرا چھوڑیا بلکہ اوندے حق وچ سٹے وی تھی گیا کہ مقدمے دے فیصلے تک اوجیویں چاہوے
 مکان تے دُکان کوں ورت سکدے۔ اے سٹے تھیا تاں کم بھادیں جو لمبڑ وچ پئے گیا پر
 اوائے پوائے تے جن دشمن وچ ٹھاڈل پئے گئی جو عدالت دا سٹے فیاض دے حق وچ ہے
 تے جیڑھا دخل ڈیسی اُوہو ڈھکیسی۔ پیشی تے پیشی رُردی رہ گئی تے ہر پیشی ڈوں ترے
 مہینیاں بعد دی۔

حالات کجھ پگڑ وچ آئے تاں مطب تے وی رونق لگنی شروع تھی گئی۔ وادھو نے
 ہن ہمسائے دکھاویناں تاں چھوڑ دیاں ہن پرول وی متھے تے تریڑی اُوئیں دی اُوئیں۔
 آندے ویندے فیاض نال ٹوک بازی اَنج۔ کہیں ویلے جو فیاض کوں کہیں چھوٹی موٹی شے
 دی لوڑھ پوندی تاں اُوکوں بوہڑ والے چوک وچوں منگواو نی پوندی ہئی، وادھو طرفوں ہمیش
 انکار۔ فیاض آہستہ آہستہ عادی تھیندا گیا جو چار چھیر دشمنی دے ماحول وچ وی جیون دی
 رمز کیویں گلیندی ہے۔ پر سارے ڈی نہہ دی کشال توں بعد جئیں ویلے رات تھیندی تاں
 اے سوچ تے ہاں وات کوں آویندا جو پتہ نی حکیم صاحب تے اُناں دی بُری کیہڑے حال
 وچ ہوسی۔ نویں جاتے وَنج تے آپنی سُنجان کراو نی کیڈی مشکل ہوندی ہوسی خاص طور توں
 اُوں ویلے جئیں ویلے جو پک وڈی سُنجان توں بعد بندہ یکدم آپڑیاں تل وٹنیاں وچ وی
 اُن سونہا تھی تے رہ ونجے۔

ریاست دے حالات ہر آؤن والے ڈینہہ دے نال ای عجیب کنوں عجیب
تھیندے ویندے ہن۔ جہاں ڈینہاں وچ فیاض کون حکیم صاحب دے مطب تے
اوندے گھر کون قبضے گیراں کنوں بچاون کیتے بھرم مارنا پوندا پیا ہا اُنہاں ڈینہاں پاکستان
بزن تو ڈیڈھ مہینہ بعد اکتوبر وچ نواب صادق محمد خان خاص عباسی نے ریاست دے انڈیا
دی بجائے پاکستان نال الحاق دا اعلان کر ڈتا۔ بھاویں جو ایں فیصلے دی توقع کیتی ویندی پئی
ہئی پر وِل وی ریاست دی مسلمان آبادی نے ایں فیصلے کون سراکھیں تے رکھیا تے کئی
ڈینہاں توڑیں خوشیاں مناوَن دا اہتمام کیتا۔ پراگست تے اکتوبر دے ایں درمیانی عرصے
وچ ریاست دی ہندو اُتے سکھ آبادی تقریباً تقریباً ریاست کون مُکھلاتے انڈیا ڈوروانہ تھی
گئی ہئی۔ اُون ویلے بھاویں جو ریاست وچ پاکستانی قوانین لاگو کوسا ہن وِل وی مشرقی
پنجاب توں آؤن والے مہاجراں دی ہک بہوں وڈی تعداد متروکہ ہندو اُتے سکھ
جائیداداں تے قبضہ کیتے ریاست دے ہر اُون شہر پہنچ گئی کہ جتھ چنگیاں چوکھیاں
جائیداداں دی سُون رُون ملدی پئی ہئی۔

ایں دوران نواب صاحب نے نویں مُلک پاکستان دی ہر قسم دی امداد کرن توں
علاوہ ریاست چھوڑ تے ویندی پئی ہندو اُتے سکھ آبادی دی حفاظت دی کوشش دی وی اخیر
کر چھوڑی تے سھو قافلے با امن امان ریاست وچوں روانہ کیتے گئے کیوں جو مقامی
فسادیاں تے قبضہ گیراں کون پہلے ای نتھ پاڈتی گئی ہئی۔ لیکن ہک گالہ ضرور ہئی۔ بھاویں
جو پاکستان وچ شامل تھیاں باقی ڈاہ ریاستاں طرحاں بہاول پور دار ریاستی وجود وی ہالی
توڑیں قائم ہا پیا لیکن ستمبر 1948ء وچ قائد اعظم دی وفات توں بعد پاکستانی حکمران
اشرافیہ دا نواب بہاول پور نال رویہ اُون طرحاں دانہ ریہا جیویں جو قائد اعظم دی حیاتی وچ
ہوندا ہا۔ ایں مترے سلوک نے نواب صاحب کون جذباتی لحاظ نال اصلوں مھن ترور

چھوڑیاتے جنیں ویلے پاکستان دے گورنر جنرل خواجہ ناظم الدین نے ریاست کوں
 1935ء دے گورنمنٹ آف انڈیا ایکٹ دے تحت ہک صوبے دے طور تے پاکستان وچ
 شامل کرن تے زور بھریا تاں نواب صاحب الملک تہ نہ جھل سکے تے چپ چاپ ایں
 بارے تھیون والے معاہدے تے 30 اپریل کوں دستخط کر چھوڑے جیندے تحت دفاع،
 مواصلات تے خارجہ دے امور مرکزی حکومت دے حوالے کرن توں بعد بہاول پور وچ
 49 ممبراں والی صوبائی قانون ساز اسمبلی دے الیکشن کراڈ تے گئے کہ جینے 1952ء توں
 آپڑاں کم شروع کرنا ہا۔ باقی دے محکمے صوبائی قرار ڈے کراہیں بدستور سابقہ ریاست کول
 رکھے وئجن دے نال نال نواب صاحب کوں صوبے دا آئینی سربراہ وی تسلیم کر گھدا
 گیا۔ البتہ اے آکھ ڈتا گیا جو اے بندوبست بیاں ڈاہ ریاستاں وچ بطور مثال دے کوننا
 گھدا ویسی۔

ریاست توں بعد صوبہ بنڑن دے ایں عمل نے عوامی زندگی دے ہر پکھ کوں ہلا
 تے رکھ چھوڑیا۔ ریاستی ملازماں دی ہک وڈی تعداد نوکریاں توں فارغ تھی تے گھراں کوں
 آن بیٹھی۔ ہڈ بھنیا تاں کماوے پر دل بھنیا کتھوں کماوے والا حال تاں پہلے ہاپیا پر اگلی
 کنوں چنگی کر چھوڑی اتھاں آباد تھیون والے مہاجراں نے کہ جناں آپڑیں محنت نال پوری
 سابقہ ریاست دے کاروبار خاص طور تے جنس اجناس دیاں منڈیاں کوں چنگی طرحاں
 سنبھال گھدا تے مقامی آبادی صرف آپڑیں گزرے گل کوں یاد کرتے ہنجو و ہاون تے لگ
 گئی۔

کہیں ویلے ویل ملدی تاں فیاض موڑھا گھت تے مطب دی باہرلی تھلی تے
 چڑھ باہندا۔ وادھو دی دکان تاں ہئی پئی پر مال اسباب کنوں خالی۔ نہ کوئی چلت نہ کوئی
 دکانداری۔ اوکوں ایہو وہم جو رب نے پتر تاں ڈتے پر اصلوں منحوس، جڈن دا جے

دکانداری منج تھی گئی اے۔ ایں گالہوں نہ اُکوں چنڈا تے نہ کھڈیندا۔ ماء آکھے یا ذال،
 وادھوگناں تے چا مریندا۔ اُوئیں وی حق ہمسائے ایہو آہدے ہن جو شکر ہے بال ماتے
 گئے پو طرحاں گنوں نی تھیا۔ پترکوں منحوس سمجھن والے کوں کون سمجھاوے جو دکاندار ای
 موڑھی کھاو تے آونجے تاں دکان کتھوں چلے۔ ایہو حال دھچر دا کہ جیندے کول کوئی
 مانواں مانواں گاہک آیا راہندا۔ پرہن نہ او پہلے والے پھلو دے تے نہ راہیاں ملائیاں
 ۔ ڈیدھے ڈیدھے دیرے نواب دے پورے بزار تے نحوست آپڑاں بوچھن کھنڈا تے بہہ
 گئی۔ فیاض کوں گزرے ڈینہہ یاد آندے تاں ہاں وات کوں آویندا۔ کوئی ویلا اودی ہاجوا
 آپنی سُنجان دی گول وچ گردان رہندا ہا پرہن تاں پوری ریاست دی سُنجان گھان وات
 آگئی ہئی۔ نواب صاحب نے وَنچ تے ولایت دیرے لاگھدے تے شہزادیاں نے
 گھروں باہر نکلن چھوڑ ڈتا۔ بس خوشامدی باہنے تاش وچ لائی رکھیندے یا مٹھ مروڑے
 تے بندراں دیاں جھوکاں وچ لوڈن لوڈے۔

صاحبزادے سڈیجن والے نواب صاحب دے دور نیڑے دے رشتے داروی
 بے روزگار تھئے تاں پہلے پہلے چا پلوس سنگت دی واہ واہ دے سرور وچ کجھ ڈیہاڑے کڈھ
 گئے تے جئیں ویلے کھینسا خالی تھیا تاں سنگت ساتھ وی ہرڑا۔ اُلٹا توں کون تے میں کون۔
 نصیب نال جھیرا تاں نی بنڑا پر اے صاحبزادگان مچھاں کوں وٹ ڈے کراہیں بوہڑ
 والے چوک وچ گھٹاں وچھواتے لکڑ بٹیرے لڑوان دے محبتی بن بیٹھے۔ کہیں ساوی داپیالہ
 پلا چھوڑیا تے کہیں نے چلم والا سونا لٹا چھوڑیا۔ پہلے پہلے تاں گھروں چنگا چوکھا کھانا پک
 تے چوک وچ منگا گھداویندا پر کجھ ڈینہہ بعد نوبت دال دی آئی تاں اُناں دے چوک وچ
 آباہون دے باوجود کوئی سلام وی نہ الویندا۔ بٹیاں تے دکانداراں نے اُدھار سودا سود
 ڈیون توں بچاونا شروع کیتا تاں عزت بے عزتی گھروں نکل تے چوک بزاراں وچ آ

گئی۔

اڈے احمد پوری حال تاں ایہو ہا پر فرق اے جو اتھ نہ شہزادے ہن تے نہ
صاجزادے بس مقامی تے یاؤل مہاجر۔ مقامیاں دا حال ایں گالہوں گسا جوریاستی سُجّان
دے خاتمے تے نواب دے ولایت دیرے لاؤن پاروں ایویں لگدا جو یتیمی ویڑھ گئی اے۔
تہوں نہ تاں گھروچ دل لگدا تے نہ کم تے۔ جنیں ویلے جو مہاجرین ہر اودکان سنبھال
گھدی کہ جتھ تھولی جی وی لائی چلائی لگی راہندی ہئی۔ نتیجہ اے نکلیا جو شہر دا تمام کاروبار
اُناں مہاجرین دے ہتھ وچ آ گیا جیڑھے جوریاست کول اپنی سُجّان بناؤن کول تیار کوننا
ہن تے مقامی لوک، ریاستی ہوندے ہو یاں وی غربت اُتے احساس کمتری دے گھان وچ
اتکھے آئے جو اپنے گھروچ ای اپنی سُجّان ونجا بیٹھے۔ بہاول پور ریاست، چھڑاناں دا صوبہ
بزن توں بعد مہاجر اُتے مقامی آبادی دا اتکھا غیر فطری بنوگ بن تے رہ گئی ہئی کہ جتھ
کہیں وسنیک دی وی کوئی سُجّان باقی نہ رہی ہئی۔ کیا نویں کیا پُرانے سھے لُڈے لُورے،
اُدھ اُدھورے لوک۔

فیاض دے چاچے طرفوں مخبری والے واقعے توں بعد اُلٹا فیاض دے ابے اُتے
بے سکیاں نے بول اُلا، آؤنڑاں ونجڑاں اُتے ملڑاں ملاؤں وی چھوڑ ڈتا۔ اُماں ول وی
کہیں ویلے آتے مل ویندی ہئی پر پے توں چوری جو اُونے تاں فیاض دے محراب والے
آون تے وی پابندی لا چھوڑی ہئی۔ سب ہکی گالہہ دے ارمانی ہن جو چندرے نے مفت
ہتھیں لگی کراڑ دی جائیداد سکے چاچے کول عارضی طور باہون واسطے وی نی ڈتی۔ ایں گالہہ
تے کوئی چاچے نال رنج کاٹنا ہواؤن نے بہتر تہجے دے خلاف مخبری کرتے اُکوں کچھاری
چاڑھ چھوڑیا ہا۔ حدتاں ایں مکی جو محراب والے دی پوری وستی ول وی چاچے دی حمایتی تے
اونڈے نال ہک ہک۔ اُماں نے وی کئی واری سمجھایا جو پتر دفع کر ڈے چا مکان چاچے

کوں، کبھڑا اوموا کراڑ ہندوستانوں والد اپنے پر فیاض دے ہر واری انکاری تھیون توں
بعد اودی کنارہ کرتے بہہ گئی۔

کہیں کہیں ویلے اوند ایل وستی واسطے بہوں پٹیندا اتاں خیال ضرور آندا جو اوبھے
کرے، مکان چاچے کوں ڈیوے چا پر وُل جئیں ویلے اے چو بہہ لگدی جو حکیم صاحب وُل
ای پیا تاں اُدا کوں کیا منہ ڈکھسی تاں وَلدے سروں ہاں کوں تگڑا کر گھندا۔ فیاض ”ہاں“
تے ”نہ“ وچ گتا دے ایں گالہوں وی کھاندا ودا ہا جو حکیم صاحب دے ایں مکان نے
او کوں اُوں ویلے آپڑیں ہو وُن دی سُجّان ڈتی ہئی کہ جئیں ویلے اُونہ ہو وُن دے
اندھارے وچ تھبا کے مریندا ودا ہا۔ جڈاں کوئی اوندے تے اعتماد نہ کریندا ہا اُوں ویلے
حکیم صاحب نے اُو کوں گھر دا فرد بنڑا تے مان ڈتا تے تلسی جی نینگر نے آپڑاں آپ
حوالے کرن دی نینہ رکھ تے اُوں مان کوں اُسمان جتی اُچا کر چھوڑیا۔ ہُن اُوصرف چاچے
دی لو بہہ دیاں لیہلوں پونجھن کیتے ایں سب کچھ کوں کیویں بھن تر وڑتے مٹی سوا کر ڈیوے
۔ فیاض کوں اے مکان بہاول پوردی ریاست طرحاں لگدا ہا جو اے ہے تاں اوندی سُجّان
دی آس وی ہے تے جے اے کوئی تاں کہیں بہوں وڈے میلے وچ رُلے ہوئے بال آلی
کار اوندی سُجّان وی کوئی۔

فیاض نال ہک عجیب واردات اے وی تھی جو اُو کوں اُوں رات دی کوئی گالہ
یاد نہ رہ گئی جڈن جو اُو حکیم رام لعل دی ڈیڈھی وچ سُتا ہا پر دیرے نوابوں ویندے ویلے تلسی دا
او کوں اکھیں بھرتے ڈیکھنا آتے اوندے ہتھ کوں پکڑتے اپنے ہتھ دیاں انگلیں وچ گھٹ
گھنڑاں بھلدا ای نہ ہا۔ اُو کوں ایویں محسوس تھیندا جو تلسی دیاں انگلیں دے سیک وچوں
کوئی جیندی جاگدی نینگر اوندے جسم وچ داخل تھی کراہیں ہناں رکھ تے بہہ گئی ہے کچھ ایں
طرحاں جو نہ تاں اُوں سیک دا احساس گھٹ تھیندا ہا تے نہ اُونٹنگر دا وجود اوندے وجود توں

باہر آندا ہا۔ کوئی قید جی قید ہی کہ اوندے اندر جران کیجے ہک ترمیت دے جزو نے اوندے
 گل کوں وکیر وچ گھن گھدا ہایا کہیں بندی نے پورے بندی خانے تے آپنی عملداری دا
 اعلان کر ڈتا ہا۔

اے وی تاں انوکھڑی گالہہ ہی جو فیاض کوں تلسی یا تلسی دے بُردی کڈ ہائیں
 اُون طرحاں فکر نہ تھی کہ جیویں جو محمد نواز جمعدار کوں تھیندی ہی۔ اوندے آون تے فیاض
 کوں سوچ آندی جو ایڈے عرصے کنوں جو اُنناں دا پتہ کائنی، اُو پتہ تاں کر ڈیکھے۔ پر جنیں
 ویلے چاچا جمعدار ژویندا، فیاض دے اندر اُو ہا ساری آماں گھاماں وَلدی اُونیں شروع تھی
 دیندی جیویں جو حکیم رام لعل دے ہوندیاں ہوندی ہی۔ کجھ مہینیاں بعد جنیں ویلے جمعدار
 محمد نواز وی مُکلا گیا تاں فیاض دا کوئی بانہہ بلی، کوئی سہارا باقی نہ ریہا۔ اُونیں وی دیرے
 دی بزار وچ بکھ نے دیرے لاتے تاں آپ تڑاپی وچ کہیں کوں کہیں دا ہوش نہ ریہا۔ ہر
 آون والا ڈینہہ بھاویں جو فیاض کیجے سماجی لحاظ نال سکھ دے سنیے گھن تے آون لگ پیا
 ہا پر اوندے اندر دا اندھا را پہلے کنوں زیادہ کالاتے ڈرا کلا کہ جیندے ہوندے ہوئے اوندی
 سُجان دا پندہ ہر قدم تے اگوںہاں تھیون دی بجائے کچھو نہاں تھیندا اویندا ہا۔



(25)

نویں بنڑیں ہوئے مُلک پاکستان وچ سیاسی استحکام دانہ ہوونڑاں، پاکستان دے نال نال، ظاہری طور تے صوبائی حیثیت دتی گئی سابقہ ریاست بہاول پور کوں وی سیاسی، معاشی اتے سماجی طور تے گُتاوے وات دتی کھڑا ہا۔ اپنی آئینی سربراہی دے باوجود ولایت ونج بیٹھے نواب صادق محمد خان خامس عباسی نے وی بہوں گھٹ اتھ پھیرا پاوونڑاں۔ نتیجہ کیا نکلیا جو ہندوستان وچ بیٹھے ہوئے لوکاں کوں خبر تھی گئی جو اتھ قیمتی زمیناں لگے بھاء تھی گن لہذا سن پنجاہ توں بعد ڈھگ ساری آبادی اتجھی وی سابقہ ریاست بہاولپور وچ آباد آن تھی کہ جیندی نگاہ صرف زرعی زمیناں تے ہی۔ نواب کڈھائیں آوے ہاتاں اوکوں ایہار پورٹ ملدی جو مقامی آبادی تاں کم چور ہے، آلسی ہے لہذا زمیناں اُنہائیں کوں ڈیوجیڑھے آبادکاری دا گُر جائز دین۔ نواب صاحب اناں نویاں لوکاں تے ایذا مہربان تھیا جو زمیناں تاں دُتیاں سو دُتیاں، اِشام دے اٹھ آنے وی سرکاری خزانے وچوں ڈیون دا حکم ڈے چھوڑیا۔

اے اودور ہاجڈن جو بیوروکریسی نے، پاکستانی حکومت اُتے سیاست، ڈوہیں سیاست دانان دے ہتھوں تلکا کراہیں آپڑیں کھیسے وچ پا چھوڑے ہن۔ گورنر جنرل ملک غلام محمد بن بیٹھاتے وزیراعظم محمد علی بوگرہ۔ مشرقی بنگال دی عوامی اکثریت کوں گھوگھا چاہن کیجے ملک غلام محمد نے سوچیا جو اُردو دے سبھے صوبیاں دا ہکو یونٹ بنڑاتے اوند انان رکھ ڈیو تے مغربی پاکستان تے پار دے یونٹ دانان مشرقی بنگال دی بجائے مشرقی پاکستان، تاں جو بنگالیاں نال برابری دی سطح اکھ وچ اکھ پاتے گالہ تھی سکے۔ ایں تجویز دا باضابطہ اعلان کریندے ہوئے وزیراعظم محمد علی بوگرہ نے آکھیا جو ہُن کوئی بنگالی، پنجابی، سندھی، پٹھان، بہاول پوری یا خیر پوری کوئنا ہوسی۔ ایں اعلان دا اُلٹا اثر جیرہا سندھ، سرحد تے خیر پور دے عوام تے تھیونڑا ہا سو تھیا پر بہاول پور دی مقامی آبادی جیرہی پہلے ای آپڑیں ونجی ہوئی سُخان دے پیرے ڈیدھی و دی ہئی، ایں نویں اندھاری توں بعد تاں اصولوں دُدھڑ دھوں تھی کراہیں راہندی ساہندی سُخان وی ونجا بیٹھی۔ ایتھوں دی لوکائی کوں ایویں لکیا جو بنگالیاں دی سُخان مٹاون دی کوشش وچ سندھی، پشتون اُتے ریاستیاں دی شناخت تے وی بوہاری پھیر ڈتی گئی ہے۔

ست دسمبر 1954ء کوں پاکستان دے نویں وزیراعظم چوہدری محمد علی نے نواب بہاول پور دی گردن تے لت رکھ کراہیں بہاول پور دے صوبہ مغربی پاکستان وچ شامل تھیون دے معاہدے تے دستخط کرا گھدے۔ پوری ریاست دی مقامی آبادی ایں شمولیت تے باقی دیاں چھوٹیاں قوماں دے نال رَل کراہیں کھلی مخالفت تے آگئی۔ اُنان کوں اے توقع نہ ہئی جو نواب صاحب سابقہ وزیراعظم محمد علی بوگرہ دے قدیم پاکستانی قوماں تے اُنان دیاں زبانان دا مذاق اُڈاون توں بعد وی وِن یونٹ وچ شامل تھسی۔ بہاول پور دے ریاستیاں دی تاریخ، تہذیب، ثقافت، زبان اُتے خود مختیاری دا مل بَری لکھ روپیہ

سالانہ لکھیا تاں نواب صاحب اے وظیفہ کھیسے وچ گھت تے ولدا ولایت ٹر گیا۔ ایں معاہدے دے حوالے نال پاکستان دی آئین ساز اسمبلی نے 30 ستمبر 1955ء کوں ویسٹ پاکستان ایکٹ چا منظور کیتا جیندے اُتے عمل درآمد چوڑاں اکتوبر توں تھیونڑاں ہا۔ اے چوڑاں ڈیہاڑے احمد پور تے دیرے دے لوکاں تے بہوں اوکھے گزرے۔ دیرے نواب وچ تاں ول وی معاملہ چھڑا ہڑتال تیں رہ گیا پر احمد پور وچ ہڑتال دے نال نال جلے جلوساں نے عوامی زندگی کوں تلے اُتے کر چھوڑیا۔ لوکاں نے ایکوں باقی پاکستانی اکائیاں دے خلاف پنجابی سازش دے طور تے گھدا کہ جیندا مقصد گریٹر پنجاب قائم کرنا ہا۔

وَن یونٹ دے ردِ عمل وچ فوری طور تے خان عبدالغفار خان نے ”اینٹی وَن یونٹ فرنٹ“ دے ناں نال سابقہ صوبہ سرحد وچ ہک سیاسی تنظیم قائم کیتی۔ ایں تنظیم نے بہوں جلدی اُناں علاقیاں وچ زور پکڑ گھدا کہ جیرہ وَن یونٹ دے سبب آپنی لسانی تے ثقافتی سُجھان و نجا بیٹھے ہن۔ ایں تنظیم دا فوری مقصد وَن یونٹ دا خاتمہ تے خاتمے توں بعد متاثرہ ثقافتاں دی بحالی ہا پر کجھ ایں طرحاں جو ریاستاں دی سابقہ سُجھان توں الگ کوئی نئی شکل لیکن بہاول پور کوں ایں گالہوں استثناء ہی جو اے ثقافت دے نال نال لسانی طور تے وی اَنج شناخت رکھیندا ہا۔

فیاض کوں ایں سیاسی تنظیم وچ آپنی ونجی ہوئی سُجھان دی بھال نظری تاں اُونے ایندا ورکر بنڑن وچ تھٹ دیر وی نہ لائی۔ کیا انقلاب ہا جو جیرہ وَن یونٹ دی چاکری اُوندے پُیو دی سُجھان اُتے عزت آبرو دا باعث ہئی ہُن ہوں نواب دے خلاف، ہوں چاکر دا پتر گلی گلی محلے محلے تقریراں کریندا ودا ہا۔ وَن یونٹ دے خلاف نعرے مریندے دیلے فیاض دے سامنے اُوندے پُیو دا چہرہ ہوندا کہ جنیں اُوندی بقادی کوشش وچ اونداسا تھڈیون

دی بجائے آپڑیں غاصب بھرادا ساتھ ڈتا ہا۔ اے تاں محمد نواز جمعدار اوکوں پکریا نہ تاں
 چاچے دی مخبری دے بعد اوندے جیل و نجن وچ کوئی کسرباقی نہ رہ گئی ہئی۔ وَن یونٹ دے
 خلاف تقریراں کریندے ویلے فیاض کوں کہیں کہیں ویلے آپڑیں پُجو دی صورت وچ نواب
 بہاول پور داوی بھلا ندر اپوندا شاید ایں گالہوں جو ڈوہائیں نے آپنی آپنی جاتے اوندی تل
 وٹنی سُجان دا پندہ کھوٹا کیتا ہا۔ فیاض دا پُجو پُتر کنوں ایں گالہوں نفرت کریندا ہا جو اُونے
 نواب دا باڈی گارڈ بن تے اوندی مَن منشا پوری نہ کیتی تے نواب ایں گالہوں آپنی ریاست
 توں بھگل جو سَن سنتالی دے وکیرے وچوں آپنے قد میں بھار نکلتا اوندے وِس داروگ نہ
 ہا۔ اینٹی وَن یونٹ تحریک وچ شامل تھیون توں بعد تُلسی دی وَلدی بھال دی سک تے ریاستی
 جھوکاں وَل پک صوبے دی صورت آبا تھیون دی خواہش، ڈوہیں ایں تحریک دا مقصد بن
 تے رہ گئے ہُن۔ اناں سبھے مقاصد دا اَلتا تاں پکو ہا جو آپڑیں تہذیبی، ثقافتی اَتے لسانی
 سُجان دی رکھوالی۔

اینٹی وَن یونٹ فرنٹ دی قیادت نے بہوں جلدی وَن یونٹ ٹرٹن دی صورت
 وچ مغربی پاکستان دے پنج صوبے یعنی پنجاب، سندھ، بلوچستان، سرحد تے بہاول پور
 بناون دا مطالبہ کر ڈتا کیوں جو اُنچ صوبہ بناوَن دیاں پنج شرطیں ہُن؛ جغرافیائی لحاظ نال
 طبعی وجود، معاشی خود کفالت، انتظامی سہولت، مستقبل وچ ترقی کرن دی وقعت تے لسانی
 اقدار دا تحفظ کرن دی اہلیت۔ لیکن فیاض جیسے ہزراں ورکراں دے ذہناں وچ اُون ویلے
 مایوسی دے نال نال پک نویں قسم دے ردِ عمل نے وی جابز اگھدی جو جنیں ویلے فرنٹ
 دے مرکزی قائدین خان عبدالغفار خان تے عبدالصمد خان اچکزئی کوں گرفتار کرن دے
 بعد اناں دے خلاف لاہور ہائی کورٹ وچ بغاوت دے مقدمے دی سماعت شروع تھی گئی۔
 فیاض کوں پتہ لکھا جو عبدالصمد خان اچکزئی دی پیروی بہاول پور داکیل ریاض ہاشمی کریندا

پے تاں اُونے ہفتے وچ ہک واری جھٹی والے ڈینہہ ریاض ہاشمی وکیل دے دیرے تے
 ونجواں شروع کر ڈتا کہ جتھ وکیل صاحب دی لاہوروں واپسی تے اٹھے ویلے سینکڑاں
 لوکاں دا کٹھ تھیون لگ پیا ہا۔

ریاض ہاشمی وکیل کوں پورا یقین ہا جو نہ صرف اُوڈو ہائیں لیڈر مقدمے وچوں
 بری تھی ویسن بلکہ وِن یونٹ ٹرٹن دے نتیجے وچ بہاول پور دی صوبائی حیثیت وی بحال تھی
 ویسی۔ ریاض ہاشمی وکیل دی شکل وچ فیاض کوں اپنی ونجی ہوئی سُنجان تیں اُڑن دی راہ
 نظرن لگ پئی۔ اوندے اندر ولدے سروں اُوہو جوش تے جذبہ جاگ پیا جیڑھا جو
 پاکستان بنڑن دے ڈینہاں وچ ہک نویں اُمید دی سریر وانگوں بُت دے مسام مسام وچ
 جھمریں کھیڈا ہا۔ اُوں سمیت ریاست دی پوری نویں نسل دا خواب ہا جو بہاول پور
 پاکستان دا حصہ بنڑیں کہ جتھ اُو اپنی لسانی، ثقافتی اَتے تہذیبی سُنجان دے نال ایں نویں
 مُلک دی تگدائی دا باعث ہو سَن۔ بھادویں جو وِن یونٹ دے قیام نے ریاستی عینکراں دیاں
 سبھے اُمیداں کوں ڈالے پھالے کر چھوڑیا ہا پر ہُن لگدا ہا جو وِن یونٹ ٹرٹن دی صورت ڈکھ
 دے ڈینہہ مُلکَن والے ہُن۔

فیاض نے آپڑیں مطب دے باہروں ”اینٹی وِن یونٹ فرنٹ“ دے دفتر دا بورڈ
 لا کھڑایا تے آئے گئے نال اوسبھے گالہیں سانجھیاں کرن لگ پیا جیڑھیاں جو اُو ہر ہفتے
 ریاض ہاشمی وکیل دے دیرے توں سُن تے آندا ہا۔ بہوں جلدی اُونے دیرے دے بزار
 دے دُکانداراں سمیت کجھ نینگریں دا اتجھا گروپ تیار کر گھدا جیڑھے نہ صرف اوندی
 گالہ سُنو دے ہُن بلکہ اُوں توں سُن کراہیں اگوں تے وی ودھیندے ہُن۔ اے گروپ
 بنڑن توں بعد فیاض دی حیثیت ہک چھوٹے موٹے قوم پرست سیاسی لیڈر دی تھی گئی کہ
 جیکوں ریاض ہاشمی وکیل توں علاوہ احمد پور تے دیرے نواب وچ کم کرن والیاں بیاں سیاسی

پارٹیاں دے مقامی رہنما وی توجہ نال ڈیکھن تے سُنزن لگ پئے ہن۔

لیکن اے اُمید افزاء صورت حال بہوں جلدی مایوسی وچ بدلن شروع تھی گئی۔
خان عبدالغفار خان دے وکیل میاں محمود علی قصوری نے کہیں نہ کہیں طریقے فرنٹ دی
قیادت کوں راضی کرتے آپنی سیاسی پارٹی ”آزاد پاکستان پارٹی“ کوں فرنٹ وچ شامل
کراون توں بعد ڈوہائیں دے ملاپ نال نویں سیاسی جماعت ”نیشنل پارٹی“ دی بنیاد رکھ
چھوڑی جینے پہلا وار ای بہاول پور صوبے دے مطالبے تے کیتا۔ وَن یونٹ دے خاتے
توں بعد بھاریں جو چار صوبیاں توں علاوہ پنجویں صوبے دا مطالبہ وی نیشنل پارٹی دے
مقاصد وچ شامل ہا پیا پر اینداں ناں بہاول پور ختم کرتے ”کوئی وی بیا صوبہ“ کر گھدا گیا۔
ایں انتہائی مایوس گن تبدیلی توں بعد ریاض ہاشمی وکیل واسطے ممکن نہ رہیا جو اُعدا عبدالصمد خان
اچکڑی دی وکالت کرے یا نیشنل پارٹی دا حصہ بنڑیں۔ ایندا نتیجہ اے نکلیا جو ڈوہائیں
خانیں کوں مقدمے وچ جرمانے دی سزا تھی تے ایندے نال ای پوری سابقہ ریاست وچ
جھ جھ فرنٹ دا دفتر ہا اُتھ چھاپے مار کراہیں مقامی قیادت کوں جیلاں وچ تھن ڈتا گیا۔

فیاض تے وی منجھ چوری دا پرچہ کٹیا گیا تے مجسٹریٹ کول چالان پیش کیتے بغیر
ای اوکوں اندھے وکیل وچ سٹ ڈتا گیا۔ ہُن کون اوندی سُدھ لاہوے ہانے کون ضمانت
کراوے ہا۔ تہوں لاوارثا سمجھ تے جوڈیشل ریمانڈ دی کوڑی چھی مہر جیل وچ ای لا کراہیں
اُوندی پیشی بدلاؤتی ویندی۔ جیڑھے جرم دی سزا مہینیاں وچ ہی اُوندے وچ کہیں سماعت
توں بغیر سال توں سال گزر دے گئے۔ تھانے والے وی اوندے خلاف پرچہ گٹ کراہیں
نہل گئے جو اوندی تفتیش وی کرنی ہے تے چلان وی عدالت ڈو بھجواوئیں۔ پُچھا چاچے تاں
پہلے ای حقہ پانی بند کیتی کھڑے ہن لہذا اُناں کوں کیا پرواہ جو جو ان جیندا ہے یا مویا۔ ہا
اے ضرورتھیا جو اُوندے اندر تھیون توں بعد مطب والی دکان تے پہلے وا دھوتے ول وا دھو

کوں ڈٹاڈے تے مولوی صاحب نے قبضہ کر گھدا۔

ایویں احمد پور والے مکان داوی جڈاں جو کئی مہینیاں تیں جندر انہ کھلیا تاں ہک
 ڈینہہ فیاض دی گرفتاری دا پک کرن توں بعد پیری بد معاش نے جندرے کوں ڈوں دھک
 مارے تے اندر پہہ گیا۔ اوندی جانڑں جو فیاض بغاوت دے مقدمے پاروں کاں کوڑا کر
 تے لاہور دے شاہی قلعے وچ سٹ ڈٹا گئے جتھوں جیندے جی نکڑاں مقداراں دی کھڈ
 ہئی۔ مشہور ایہو تھیا جو فیاض مکان دے پیسے وٹ تے کہیں پاسے منہ کر گئے۔ چاچا اوندا
 تاں پہلے کھو وچ ہا، مکان وکن دا پتہ لگئیس تاں بیاوی ارمانی تھیا۔ دھاں چاتے اوندے پو
 کول وی گیا جو چار چلھڑ وٹڑیں وی ہانس تاں اوندے کنوں وٹ گھنے ہا پر جییں طرحاں کر
 گئے ایں طرحاں کہیں حلالی کوں ٹھاندی نہ ہئی۔ ماپو تاں پہلے ای اوندے توں عاجز تھئے
 ودے ہن، اے دھاں سن تے چار لفظ پٹ پلوط دے کڈھن توں سو ابیا کروی کیا سکدے
 ہن۔



(26)

فیاض دی گرفتاری توں بعد اوکوں کجھ ڈہنہہ تاں دیرے نواب دے تھانے دی
حوالات وچ رکھیا گیا تے ول بہاول پور دی سنٹرل جیل بھجوا ڈتا گیا جیرہی محض ہک سال
پہلے 1955ء وچ بنی ہئی۔ تقریباً بیاسی ایکڑاں تے دگھری ہوئی ایں نوں نکور جیل دی آپنی
دنیا ہئی۔ بھادیس جو فیاض کوں ہالی تیں سزا نہ تھی ہئی تے او محض حوالاتی ہاپر ول وی اوکوں
جیل دیاں کندھاں چونا کرن تے حاطیاں وچ پھلاں دیاں کیا ریاں بنڑاؤن دی مشقت
تے ایں گالہوں لا ڈتا گیا ہا جو جیل دے کھاتے وچ اولاد وارثا ہا۔ نہ اوندی کوئی ملاقات
کڈہائیں آئی تے نہ اوندی طرفوں کوئی آنہ نگہ ڈیون والا۔ جیل داسپر نٹنڈنٹ اتجھے
قیدیاں کنوں بہوں خار کھاندا پر اتھوں دا چیف چکر پتہ نی کیہڑی گالہوں فیاض تے اتنا
مہربان ضرور ہا پیا جو مشقت مشقت وچ اوکوں اوں کٹاس توں بچائی رکھیندا ہا جیرہی جو
خمیس دے خمیس سپرنٹنڈنٹ دی فرمائش تے محض اوندی ہیبت قائم کرن سانگے سبھے لا
وارث قیدیاں کوں چاڑھی ویندی ہئی۔

جیل دی دنیا فیاض کوں ایں گالہوں آپنے مزاج دے قریب لگی جو اتھ نہ کوئی
 سُجّان دامنہ تے نہ کوئی کہیں دی سُجّان تے قبضہ گیری کیجے اُبالہا اُتے شوقین۔ اتھ تاں
 ناں، قومیت، شہرتے علاقے جیہاں سھیاں شناختی علامتاں محض ہک نمبر دی شکل اختیار کر
 گیاں ہن۔ ہر قیدی دا ہک نمبر ہاتے اُوہو نمبر ای اونداناں، قومیت، شہرتے علاقہ۔ جے
 تیں کوئی قیدی اتھوں مُکلا نہ ویندا، اوندانمبر کہیں بے کوں اُلاٹ نہ تھیندا۔ نہ کوئی اناں
 نمبراں داسفارش تے نہ کوئی اناں واسطے اُتاولا۔

جیل وچ خبراں دا وی نو یکلا نظام ہا۔ شاید باہر دی دنیا وچ لوکیں دی خبراں تک
 پہنچ ایڈی ساکھڑی کاٹنا ہی جیڑھی اتھ جیل وچ ہی۔ ہر بیرک وچ کوئی نہ کوئی قیدی اتھ
 ضرور ہوندا ہا جیڑھا کہیں وی آئی پی یا بی کلاس قیدی دامنہ مشقتی ہوندا۔ اوندی زبانی نویاں
 نویاں خبراں تے خبراں تے آپووانے تبصرے سب توں پہلے بیرکاں وچ پہنچدے تے ہک
 بیرک توں بی بیرک تیں پندھ ای کتنا ہوندا۔

کئی ڈینہاں بعد فیاض کوں پتہ لکیا جو ”انٹی وِن یونٹ فرنٹ“ دیاں ورکراں
 وچوں اُوکھلا ای جیل وچ کائنی بلکہ پشاور تک دے کئی بے ورکروی اوندے نال ایں جیل
 وچ ڈھکے ہن۔ بہاول پور دی صوبائی حیثیت دی بحالی کیجے کم کرن والے بہوں سارے
 سیاسی کارکن ملتان تے لاہور دیاں جیلاں وچ سٹ ڈتے گئے ہن۔ اناں وچوں جیڑھے
 تاں وارثاں والے ہن اوتاں ضمانتاں کرا گھر گئے بیٹھے ہن پر فیاض جیسے کنائیں لوکیں
 کوں بندی خانیاں وچ پُچاؤن توں بعد تاں شاید حکومت ای بھل گئی ہی جو اناں گائیں
 نبھیں چوراں کوں باہروں ای کڈھنے یا کوننا۔

فیاض دی عمر دے قوم پرست نینگراں کیجے اے بہوں وڈا دھابہ ہا کہ جینے اناں
 دے اندر جیون دی آس وی مُکا چھوڑی۔ اے تاں وِل وی کارکن ہن جیں ویلے جو اے

دھباجتاں ریاض ہاشمی جیسے وکیل وی نہ سہہ سکے تے سیاست کنوں بدظن تھی تے بہہ گئے۔
 صوبہ بہاول پور دی بحالی کیتے جنونی تھئے اے نینگر سوچ وی نہ سکدے ہن جو خان غفار
 خان تے اچکزی جیسے لیڈروی اناں نال روند کریں کہ جیڑھے جو اپنی قوم کیتے انگریزاں
 دی مار پیتی و دے ہن۔ ایڈے وڈے قد کاٹھ دے لیڈراں دا آزاد پاکستان پارٹی دے
 لیڈراں دے آکھے لگ کراہیں بہاول پور دے ریاستیاں نال دروہ کرنا کہیں طرحاں اناں
 کوں ٹھاندانہ ہا۔ ایندے نال بہاول پور صوبے دی تحریک کوں تاں جو نقصان تھیا سو تھیا،
 ہک گالہہ بنی اوندے توں وی چگلی تھی۔ ریاست دے فیاض جیسے نینگریں دے دلاں وچ
 ہمیشہ کیتے ڈلیک پئے گئی جو وں یونٹ واقعی غیر فطری تے چھوٹیاں قومیتاں دی حق تلفی کیتے
 بنزایا گئے۔

ایں دوران ہر پاسوں ولیٹی کھڑے لگھ اندھارے وچ سو جھلے دی نکلوی جئی
 گئی اوں ویلے ظاہر تھی جڈاں جو ست اکتوبر 1958ء کوں پاکستان دے پہلے صدر اسکندر
 مرزا نے 1956ء دے آئین کوں ولیٹن تے اسمبلی کوں دا بڑ دوس کریندے ہوئے مارشل
 لاء لا چھوڑیا۔ ایندے محض ویہہ ڈیہہ بعد پاکستانی فوج دے کمانڈر انچیف جنرل ایوب
 خان نے اسکندر مرزا کو دیس نکالا ڈے کراہیں اقتدار خود سنبھال گھدا۔ ایں انقلاب دی
 فوری وجہ وں یونٹ اسکیم دی ناکامی وی ہئی کہ جینے سیاست دانان کیتے حکومت چلاونی
 مشکل بناؤتی ایں طرحاں جو بہوں ای گھٹ عرصے وچ چار وزیر اعظم بدلنے پئے گئے۔
 حکومت دی اے تبدیلی پوری ریاست وچ خوشی دی خبر دے طور تے سُزی گئی ایں آس تے
 جو شاید وں یونٹ ٹرے تے ریاست ہک صوبے دے طور تے بحال تھیوے۔ مارشل لاء
 دے لگن نال فیاض جیسے انٹی وں یونٹ فرنٹ دے کارکناں کوں اپنی ڈوں سالاں توں
 ودھ دی قید وی ہاں تے نہ پوندی پئی ہئی جیڑھی اوماں مویشی چوری دے الزام وچ بغیر کوئی

مقدمہ چلائے گزر ریندے پئے ہن۔ اناں کوں یقین تھی گیا جو ہن اناں دی رہائی دی کوئی نہ کوئی سبیل تھی تے راہی۔

پر اے سھو کجھ محض خیال ای ثابت تھیا۔ نہ تاں وں یونٹ تڑیا، نہ صوبہ بنزیا تے نہ فیاض کوں قید توں رہائی ملی۔ کہیں نے آکھیا جو نواب صاحب دے ناں عرضی بھیج تاں ڈیکھ جو اتھ بلا قصور ڈھکیا پیاں پر کئی چٹھیاں دے بعد وی نہ کوئی ڈٹا تے نہ کوئی جواب۔ املک چپ غرپ۔ مارشل لاء توں بعد جیل دے چیف چکر نے ہمدردی کیتی تے مغربی پاکستان دے مارشل لاء ایڈمنسٹریٹر دا پتہ لکھواتے فیاض کوں ڈٹس جو اتھ عرضی بھیج پر فیاض کہیں اتجھے حاکم کوں اپنی رہائی دی دہائی نہ ڈیون چاہندا ہا کہ جیندے ناں یا عہدے ناں مغربی پاکستان لکھیا ہو یا ہووے۔ فیاض دا جواب سُن تے چیف چکر بہوں زور دا کھلیا تے آکھیس۔ ”جو ان توں وی اصولوں کا وڈن ہئیں، تیڈے نہ منن نال مغربی پاکستان کوں کیا فرق پوندا پئے، ڈھکیا تاں توں پیس۔ ہن توں اکھیس جو جیل تاں بہاول پور دی ہے، منیا جیل تاں بہاول پور دی ہے پر ہے تاں مغربی پاکستان وچ۔ چل چھوڑ نہ بھیج عرضی۔ تیڈے جئے احمق جمدے ای ڈکچن مریجن کیستے ہن۔“

”میں عرضی اؤں ویلے پیساں جڈاں جو ایوب خان وں یونٹ تروڑتے میڈے بہاول پور کوں صوبہ بناؤن دا اعلان کر لسی۔“ فیاض دے اُلا وچ ڈوں سالاں دی قید دے باوجود اُوہا پہلے ڈینہہ والی لا پرواہی ہئی۔ چیف چکر نے وی اوندے بے وقوفانہ جواب تے ہک داری ول خچکا ماریا تے چھیکو تے چکھن لکيا جو ”حکیمن یار، کوئی چنبل دا علاج تاں ڈیس ہا، پنجویں بیرک دے ڈوں حوالاتی کڈاں دے ایں عذاب کوں پگڑے وِڈن۔“

(27)

1966ء دا پہلا سمجھ چڑھیا تاں فیاض دی قید کوں وی ڈاہوں سال لگ گیا ہا۔
ایوب خان دے مارشل لاء نال لکیاں سھو اُمیداں لے مٹی تھیاں تاں پوری سابقہ ریاست
وچ مونجھ تے مایوسی نے دیرے لاگھدے۔ پاکستان بنڑیں کوں اُنوی سال تھی گئے پر
مقامی لوکاں دی آس، اُمید تے توقع دی پونہل نہ پھھوڑنی ہئی تے نہ پھھوڑی۔ اناں اُنوی
سالاں وچ مہاجر تھی تے آون والیاں دی پک نسل جوان تھئی تاں مقامی ریاستیاں دی او
نسل جیندے سامنے ریاست دا الحاق پاکستان نال تھیا ہا، اگلے جہان ٹر گئی۔ پک جا، پک
محلے تے پک شہر وچ راہون والیاں دے دل اجن تیں پک پک نہ تھئے ہن۔ پک عجیب
جی کھچل ہئی ڈوہاں دے وچ۔ مہاجر آتے آباد کاراں کوں ریاست وچ آباد کرن کیتے
نواب صاحب نے خصوصی فنڈ قائم کیتا تے ریاستی وسائل دے دراناں واسطے کھول ڈتے۔
ایندے نتیجے وچ مہاجر تھی تے آون والیاں کوں اپنے پیراں تے کھڑے تھیون وچ آسانی
تھی گئی پر مقامی لوک جہاں دی معاشی حالت پہلے وی ایڈی چنگی نہ ہئی، احساس کمتری وچ

پئے گئے جو ریاستی وسائل تے اُناں دا پہلا حق ہوون دے باوجود اُناں نال مَتر یا سلوکر تھیند آپئے۔ مقامی لوکاں نے اِیں صورت حال کوں آپڑیں مہاجر بھراواں دی امداد کجھن دی بجائے آپنی حق تلفی سمجھیا تے دل کوں لاتے پرو بھرے تھی بیٹھے۔

زیادہ کماون کیتے زیادہ کم کرنا مہاجر ایں دی بقاء دے نال جُویا ہو یا ہاتھوں اُناں کوں مقامی لوک آلسی تے نکھٹو لگدے ہن۔ بزار، کاروبار آتے و پارتاں پہلے ڈینہہ دا مہاجر ایں کول ہاپیا، آباد کاری کیتے زمیناں دی وَنڈ نے ایندے اُتے زباناں تے ثقافت دا فرق اِیں طرحاں چوکھا کرتے لاتا جو ہر آون والے ڈینہہ دے نال اُناں ڈوہائیں طبقیات وچ بعد و دھن کارر رہیا، گھٹن دانان ای بھل گیا۔

مقامی آبادی اندر احساس کمتری دے پیدا تھیون وچ نواب صاحب دی نہ ہوند دا وی دخل ہا۔ ریاست دے صوبہ مغربی پاکستان دا حصہ بنن توں بعد نواب صاحب کول چھڑا امیر آف بہاول پور دالقب تے بتری لکھ سالانہ وظیفہ رہ گیا۔ انتظامی اختیارات نہ ریہے تاں نواب اتھ بہہ تے کیا کرے ہاتھوں ولایت دیرے لاتے بہہ ریہا۔ لوکیں کیتے نواب صاحب ہن وی امیر آف بہاول پور ہاجیکوں انگلینڈ ہوون دی بجائے اُناں دے سر تے ہتھ رکھراں چاہیدا ہا پر نواب صاحب دے ایڈے دور ہوون پاروں ریاستیاں وچ ہک یتیمی تے لاوارثی دا احساس ودھدا گیا جیندے اُتے اٹھے ویلے تیلی اتھ تعینات تھیون والے اوپرے افسر لائی رکھیندے ہن۔ قدرتی گالہہ ہئی سرکاری دفتراں وچ مہاجر ایں دی پہنچ زیادہ تھیندی گئی، اُناں دے تعلقات ہراووں جا جھ اختیار تے اقتدار شروع تھیندا ہا۔ کیوں جو ہر سمجھی جاتے اُناں دا کوئی نہ کوئی جائزن والا موجود بیٹھا ہوندا ہا۔ اِیں صورت حال پاروں سابقہ ریاست بہاول پور وچ جتھ سیاسی قیادت دا خلاء پیدا تھی گیا اتھ سماجی گنڈھاں وی چیرھیاں تھیندیاں گئیاں۔ فیاض کوں جیل دیاں کندھاں اندر

اے خبراں مُجھ یاں تاں اود عامنگد اجواندی رہائی کڈہائیں نہ تھیوے۔ کیوں جو سچھے خبراں ہون دے باوجود اوندے کول نہ آپڑیں گھر دِردی خبر اُتے نہ اُوں امانتی جائیدادی جیڑھی حکیم رام لعل اوندے حوالے کر گیا ہا۔ چالھی سالان دے نیڑے بچن والے فیاض کیتے نہ تاں ہُن اپنی سُجّان دا معاملہ کوئی ایذا ضروری رہ گیا ہاتے نہ کوئی بیا سوال جواب۔ اوندی سُجّان اوند جیل دا نمبر تے اوندی شناخت جیل دی چار دیواری۔

اے مارچ 1966ء دی کوئی چکنی سویرہی۔ فیاض زران کرتے بیرک دے سامڑیں کیاریاں وچ کھڑے ہوئے پھلاں کول آمر ادا تاڑی بیٹھا ہا۔ کیا کم ہُن قدرت دے جو اوندے آپڑیں ہتھاں نال لاتے ہوئے ڈوں ڈوں بجاں دے چوپے پہلے ساوی پونبل بن تے زمینوں باہر نکلے تے ول ودھدے ودھدے ایں طرحاں رنگے پھل چا کھڑے جو نہ رنگ مُکدے پئے ہُن تے نہ پھل۔ ہالی سویل دے اٹھ ای نہ وجے ہو سن جو جیل دا وڈا ٹل کھڑ کیا تے چارے پاسوں سیٹیاں دیاں آوازاں شروع تھی گیاں۔ ایں ہو کے دا مطلب ایہو ہا جو جیل دے مرکزی گراؤنڈ وچ جمع تھی ونجو، کوئی خاص خبر ہے یا کوئی بہوں وڈا افسردورے تے آندا ہے۔ پندرہ منٹاں دے بعد سوائے سزائے موت دے چکی لگے قیدیاں دے باقی ساری گنتی ترتیب نال قطاراں بناتے کھڑی تھی گئی۔

جیل دے وڈے لانگھے دے ڈوں دروزے ہُن۔ پک باہر لاتے پک اندر لاتے اناں دے درمیان کوئی پنجوی فٹ چوڑی تے پنجوی فٹ لمبی ڈیڈھی۔ باہر لا دروازہ سڑک تے گھلدا ہاتے اندر لا ڈیڈھی کول جیل دے اندرونی حصیاں نال گنڈھیندا ہا۔ جنیں ویلے جو ڈیڈھی وچ جیلر سمیت بے جیل افسراں دے دفتر تے ایندے پک پاسوں ملاقات والی بیرک بنی ہوئی ہئی۔ باہروں آون والے وزیر باہر لا دروازہ لنگھ کراہیں پہلے جیلر دے دفتر وچ باہندے تے ول آپڑیں آپڑیں عہدے دے مطابق ہوں عہدے دے

جیل افسر دے رے جیل دادورہ کریندے۔ قیدیاں کول وڈے میدان وچ گٹھے تھئے کوئی اڈھا گھنٹہ گزریا تاں جیلر، ڈپٹی تے ڈوں اسٹنٹ سپرنٹنڈنٹ دے نال ہک وڈا صاحب، ڈوں بیگماں، کچھ عملے دے بندے اندر لا درگھلن توں بعد اُناں ڈو آندے نظرے جناں دے اگوں اگوں چیف چکر پریڈ دے انداز وچ لیفٹ رائٹ کریند آندا پیا ہا۔ اوسھے نیڑے آئے تاں اعلان تھیا جو مغربی پاکستان دے گورنر دے حکم تے ریڈیڈنٹ مجسٹریٹ صاحب قیدیاں دے مسئلے مسائل تے معمولی جرائم وچ گرفتار قیدیاں دی ضمانت دابندوبست کرن کیئے تشریف گھن آئیں۔ بیگمات بارے معلوم تھیا جو اوسوشل ویلفیئر دی اتجھی تنظیم چلیدن جیڑھی بے گناہ قیدیاں کیئے قانونی امداد دا انتظام کریندی اے۔

مجسٹریٹ صاحب تے باقی دے افسر سامڑیاں کرسیاں تے بہہ گئے تے چیف چکر نے واری واری ہک ہک قیدی کول مجسٹریٹ صاحب دے اگوں لنگھا ونڑاں شروع کر ڈتا۔ ہر قیدی دے ہتھ وچ ہک کارڈ ہوندا ہا جیندے تے اوندے مقدمے دی پوری تفصیل لکھی ہوئی ہوندی ہئی۔ چیف چکر قیدی دے ہتھ وچوں کارڈ گھن کراہیں اوندے اعمال نامہ پڑھے ہاتے مجسٹریٹ صاحب اُتھائیں موقع تے سزا جزا تے ضمانت دی کارروائی کر چھوڑیندے۔ جرم وڈا ہوندا تاں ہوکا تھیندا جو ضمانت دی درخواست سیشن جج صاحب کول ڈیو۔ فیاض دی واری نیڑے آئی تاں اوندیاں جگہاں وچ تھڑکاٹ پئے گیا۔ اوکوں یقین ہا جو آج اوکوں جیل وچوں باہر دھک ڈتا ویسی۔ لیکن او جیلوں باہر ونجن ای نہ چاہندا ہا۔ اوندے دل ٹھاکے کرن لگ پیا جو اُنھی تے دھروکڑی مارے چار پر مجبور ہا، چار پھیرے جیل دی فورس تے بھجن دی کوئی راہ نہ ہئی۔ باہر نکلیں دے خوف کنوں اوندے چہرہ اصلوں پیلا ڈڈا تھی گیا پر ول وی آخراوندے ناں دی پکار تھی ای گئی۔

فیاض دا مجسٹریٹ صاحب کول پیش تھیو ونڑاں کہیں توپ دے گولے دے پھٹن

کنوں گھٹ کاٹنا ہا۔ ہک دفعہ تاں مجسٹریٹ سمیت سبھی وزیر زدے آہنے باہر ڈوا گئے تے
 سپرنٹنڈنٹ دے نال نال جیل دے بیاں افسراں نے وی جھکی جھون چا گھتی۔ فیاض دا
 بغیر کہیں عدالت وچ پیش کیے ڈاہ سالان تیں جیل وچ راہونا جتھ فوجداری نظام انصاف
 دے ناقص ہون دی دلیل ہا اتھ عدالتی تاریخ دا اتجھا واقعہ ہا کہ جیندے سبب بہوں
 وڈیاں وڈیاں گریاں نہ صرف ہل سکدیاں ہن بلکہ ترٹ تے ڈھے سکدیاں ہن۔ اے
 ہک اتجھا مقدمہ ہا کہ جیندے ملزم آپڑیں تے لگے الزام دے ثبوت، سماعت تے فیصلے دے
 بغیر ای جرم دی مقرر کیتی گئی سزاتوں ترے گنا زیادہ قید بھوگ چکیا ہا۔ جیل حکام دے
 کانزیر مجسٹریٹ نے وی جیل افسراں کوں بچاون سانگے تکھے تکھے فیاض کوں بری کرن دا
 حکم سنوایا تے اگلے قیدی کوں پیش کرن دا اشارہ کر چھوڑیا۔ سپرنٹنڈنٹ سمیت جیل دے
 سبھی افسراں دیاں گردنیں کوں ولدا مایا لگ گیا۔ کیوں جو ساڈا لوڈے کھاندا نظام انصاف
 ولدا محفوظ کر گھدا گیا ہا۔

شام کوں جیل دا باہر لا دروازہ کھلیا تاں فیاض کوں دھک تے باہروں کڈھ ڈتا
 گیا۔ ڈاہ سالان بعد باہر دی دنیا توں او کوں ایویں خوف آندا پیا جیویں جو او کوئی حرامی بال
 ہے جیکوں ماؤندی پیٹ وچوں کڈھ تے کہیں روڈی تے سٹ گئی ہووے۔ او اتھائیں
 سک دم تھی تے کھڑ گیا۔ ہر آندا ویندا فیاض کوں ایویں جا پدا جیویں جو کوئی نہر، کٹیا جنگلی پلا
 ہے جیڑھا او کوں جھٹ مارتے چا ویسی۔ اوند اچیتا گردان تے ہوش حواس گٹا دے وات جو
 دنجے تاں ونبجے کتھاں۔ محراب والے وچ شاید ای اوند کوئی جانورہ گیا ہووے۔ دیرے
 والے اوئیں ویری کہ کتھائیں دکان نہ ولا گھنے تے احمد پور و نجران وی اتنا ای مشکل
 جیویں کھکھر وچ وٹا مارنا، اتھ کرای پیہ نی گزرے انوی سالان وچ حکیم صاحب دامکان
 کتنے ہتھاں وک چکیا ہوسی۔ او اپنی سبجان گولیندا گولیندا ہتھوں بے نام و نشان تھی تے رہ

گیا ہا۔

”تاں کیا بہاول پور ای رہ ونجاں؟..... لیکن بہاول پور راہساں کتھاں،
کھا ساں کتھوں، ویساں کیندے کول“..... ایہا سوچ سوچیندا فیاض کندھ دے نال پئے
ٹالہی دے مُنڈھ تے چڑھ تے بہہ گیا۔ سڑک تے منہ ڈیکھن والا شیشہ لڈی کھوتا ریڑھی
لنگھی تاں ہک لکھتے کیتے فیاض کول آپنا آپ ڈکھا گئی۔ اُونے بُت تے ہتھ پھیرتے باقی
بچدا آپڑاں آپ محسوس کیتا۔

”میں تاں چنگا بھلا ہاں.... نینگر نمی تاں جُوان تاں ہاں، تکڑا ہی، کھٹ کما
سگداں، حکمت ولدی شروع کر سگداں، اے میڈا شہراے، میڈی ریاست ہے۔ نہ میں
حرامی تے نہ اے رُوڑی۔ بس کجھ ڈیہناں دی کاڈھ کڈھنی پوسی۔ تے کیوں ناں ریاض
ہاشمی وکیل دے دیرے تے ونجاں، بیا کجھ ناں تاں نویں سروں جیون دی تڈتاں ملیسی،
تگڑائی تاں ملیسی“۔ اے سوچ کراہیں فیاض کول ایویں لکيا جیوں جو اوندے بُت وچ
ولدیاں اُوہے سریراں بھمیری وانگ بھوندیاں وں جیڑھیاں انٹی وں یونٹ فرنٹ دے
ڈیہناں وچ چین نہ گھنن ڈیندیاں ہن۔ اُوٹالہی دے مُنڈھ توں اٹھی کھڑا تھیا۔ دل کریندا
پیا ہا جو بندے کٹھے کرتے زور زور دے نعرے مارے..... بہاول پور کول صوبہ بناؤ،
بہاول پور کول صوبہ بناؤ۔

ایں توں پہلے کہ فیاض واقعی نعرے مارن لگ پوندا، ہک مدھرے قد دا ادھ کھڑ
بندہ اوندے کول آیتے اوندے ناں دی تسلی کرن توں بعد سڑک دے پار کھڑی بگھی ڈو
اشارہ کرتے آکھنئیں جو بی بی صاحب سڈیندے وں۔ فیاض نہ چاہندے ہوئے دی
اوندے نال ٹر پیتے بگھی کول آتے پوچھتاں کراہیں ایڈے اوڈے ڈیکھن کھڑ گیا۔ بگھی دا
چکھلا پاسا موٹے ریشمی کپڑے دے پردیاں نال ایں طرحاں بند ہا جو بگھی دا ہر گنڈا

پردے دے کُڈے نال بُنکيا ہو یا ہا۔ جنیس ویلے جو بگھی دی اگلی سیٹ خالی ہئی۔ مدھرے قد والے نے فیاض کوں اگلی سیٹ تے باہون دا اشارہ کیتا پر ادا تھک تے اُتھائیں سڑک نال ای تھمبڑ تھی گیا۔ اتنی دیروچ بگھی دی اگلی تے پچھلی سیٹ دے اُدھ وچ لکيا ہو یا پردہ ہلیا تے اوندے وَلیکھے وچوں فیاض کوں اُنّاں بیبیاں وچوں پک بی بی دا چہرہ نظر آیا جہاں نے اُج مجسریٹ صاحب نال جیل وچ آتے اوندی بریت دا اہر کیتا ہا۔ اُوہتھ دی شارت نال فیاض کوں بگھی وچ باہون دا آدھی پئی ہئی۔ فیاض چُپ کرتے کہیں باہنے آلی کار بگھی وچ بہہ گیا۔ اوندے باہون نال ای مدھر اوندہ وی ٹپ مارتے ٹانگے دے کبے بمب دے نال بنے ہوئے آسرے تے ٹک گیا تے کوچوان اڈوں سجے بمب تے بہہ کرائیں گھوڑے کوں ہکل ڈے چھوڑی۔

کچھ دیر بہاول پور شہر دے سرکلر روڈ تے پھر دی ہوئی بگھی ریلوے اسٹیشن دے نال پک بہوں وڈی کوٹھی وچ وڑی تے پک لمبی سڑک کوں تھیندی ہوئی سدھی گھر دے وڈے دردے اگوں جھتے ہوئے برآمدے وچ ونج تے رُکی۔ کوٹھی دے اندر بھونڈی ہوئی ایں سڑک اُتے بٹھے دی کیری وچھی ہوئی ہئی کہ جیندے ڈوہیں پاسوں ساوے کچوچ گھا دے وڈے وڈے پلاٹ تے پلاٹاں توں باہر پھلاں دیاں کیریاں رونق لائی پیاں ہن۔ مدھر اوندہ تے کوچوان ڈوہیں تَرپ تے تلے تھے تے فیاض کوں تلے لاہون دا اشارہ کیتا تاں اُووی تلے لہہ آیا۔ بگھی دی ٹلی دی آواز سُن تے اندورں ڈوں بانیاں تھکے تھکے نکلتیاں تے آتے بگھی دا پچھلا پردہ کھولن لکياں تاں جو بی بی تلے لہہ سکے۔ بی بی تلے تھی تاں فیاض کوں مُسکاتے ڈٹھس تے اندر ڈوڑ گئی۔ بانیاں وی فیاض کوں حیرانگی نال ڈیدھیاں ہو یاں بی بی دے پچھوں لکياں گياں۔ مدھرے قد والے نے فیاض کوں اَلوایا تے اوکوں آپنے نال گھن کراہیں مہمان خانے مَجاون مُر پیا۔

مہمان خانے وِج تے فیاض کوں پتہ لکیا جو مدھرے قد والے داناں رسول بخش
میرانی ہے تے اوبی بی دا کار مختیار ہے۔ جیئیں ویلے جوبی بی سیٹھ بدرالدین دی کلمی دھی
سلمی بی بی ہے۔ سلمی بی بی دی شادی میجر تو قیر داد پوترے نال تھئی ہئی تے ہک نکا اکبرناں
داوی جایا پر شادی دے ترے سال بعد ای میجر تو قیر روہی وِج جیپ گلی تھیون پاروں
جھوک لڈا گیا۔ لاہور کنیر ڈکالچ دی پڑھی ہوئی سلمی بدرالدین جوانی وِج ای بیوہ تھئی تاں
بابے نے کجھ ڈینہاں بعد ڈو جھی شادی دی گاہہ چولی پر سلمی بی بی نے صاف صاف ڈس
چھوڑیا جو شادی اوباہی جیڑھی تھی گئی، ہُن گل وِج نواں گلاواں ٹھاہندانی۔ بابے ول صلاح
ڈتی جو شادی نی تاں چھوہریں دا کوئی وڈا کالج کھولیا ونجے پردھی طرفوں ہُن وی انکار۔
اوڑک اُونے سماجی بھلائی دے کماں کاراں کیتے ”سماج سیوا“ دے ناں نال تنظیم قائم کیتی
تے کئی وڈے گھراں دیاں پڑھیاں لکھیاں بیبیاں کوں نال رلاتے عورتاں، بالاں،
بڈھیاں تے قیدیاں کیتے امدادی تے فلاحی کم شروع کر ڈتے۔ سیٹھ بدر نے وی سکھ داسا
گھدا جو بیا کجھ ناں، دھی وِندلی تاں راہی۔

وِج چھی سال مسائیں گزرے ہو سن جو سیٹھ بدرالدین وی قضاوات آگیا تے
ایندے کجھ مہیاں بعد سیٹھ دی بیگم صاحبہ وی مُکلا گئی۔ ایڈے وڈے گھر وِج سلمی بی بی دا
پتر دے نال کلہارا ہونزاں تاں ایڈا مسئلہ نہ ہاں کہ حتی وڈا رگڑ دھال سیٹھ بدر دیاں ڈوں
کاشن فیکٹریاں تے زرعی اجناس دے کاروبار دے رولیاں کوں سنبھالناہا۔ ایندے کیتے
رسول بخش میرانی بہوں وڈی ڈھارس بن تے سامڑیں آیا۔

رسول بخش میرانی پُیو ڈا دے کنوں سیٹھ بدرالدین دی ملازمت وِج آندا پیاہا۔ او
نہ صرف بارہاں جماعتاں پاس ہا پیا بلکہ سیٹھ صاحب دے پورے کاروبار تے اوندیاں
کاروباری پالیاں توں وی اتنا واقف ضرور ہا پیا جو کہیں طور کم کوں دھاہ نہ آون ڈیوے۔

میرانی نے پہلے دے ملازماں وچوں وی آپنی مرضی دی پُون کیتی، گم دیاں کوں رکھیا تے
 باقیوں کوں جھنڈی کرائی اُتے ایندے نال نال ہر یونٹ تے ہک ہک آپنا اعتمادی میجر وی
 لاچھوڑیا تے اُنوں کوں سارے اختیار ڈے کراہیں خود بی بی دا کارمختیار بن بیٹھا۔ رسول بخش
 میرانی بھانویں جو جتنی کا پٹ ہاپر بی بی کیتے پُوی گھنٹے عرضوں بند۔ زبان ہلن توں پہلے گم تھیا
 پیا ہوندا۔ تہوں سلمیٰ بی بی سارا کاروبار اوندے حوالے کرتے خود فلاحی کماں کیتے آپنی تنظیم
 ”سماج سیوا“ کوں پورے بہاول پور ضلع وچ کھنڈایا تے ہر تحصیل وچ اوندادفتر بنزاون
 توں بعد ڈھگ سارے منصوبے شروع کر ڈتے گئے جہاں دی نگرانی خود سلمیٰ بی بی کریندی
 راہندی ہئی۔ ایں دوران اکبر سکول ونجن جوگا تھیا تاں اوکوں گھر دے نال بنڑے ہوئے
 صادق پبلک اسکول وچ داخل کرا ڈتا گیا۔ تھی سگدا ہا جو کھلی ماء دے لاڈ پیار نال بال و گڑ
 ویندا تہوں اوکوں ڈسپلن وچ رکھن سانگے اوندی رہائش دا بندوبست وی ہوٹل وچ کرا
 چھوڑیا گیا۔

اگلی سویر ناشتے توں بعد سلمیٰ بی بی نے فیاض کوں اندر ڈرائنگ روم وچ سڈایا۔
 فیاض ہک وڈے سارے کمرے وچ وڑیا تاں سامنے والے صوفے تے بیٹھی زنانی کوں
 ڈکھ تے پچھان وی نہ سکیا جو اے گل والی سلمیٰ بی بی ہے۔ گل والی زنانی تاں ادھ گھڑ لگدی
 ہئی پر آج والی تاں چنگی بھلی نینگر لیکن پُر وقار۔ فیاض سامنے گیا تاں اکھیں نہ ملا سکیا،
 اکھیں آپ کنوں آپے نو گیاں۔ سلمیٰ بی بی اوکوں دردے نال پئے صوفے تے باہون دا
 اشارہ کیتا۔ فیاض تاں جھکی جھون گھست تے کچھ اگوہاں تھی کراہیں صوفے تے بہہ ریہا
 جنیں ویلے جو رسول بخش میرانی ولدا باہر ڈونکل گیا۔ سلمیٰ بی بی جیل دے ریکارڈ موجب
 فیاض داناں نانواں تے کیتا ہویا جرم تاں جان چکی ہئی ول وی اوندے بھوگے گئے عذابیں
 دی دلجوئی کیتے اونداحال سُنون بیٹھی تاں پھر ڈنہہ داچڑھ آیا۔ اوجیران ہئی کہ ایں طرحاں

دی تھی سگدے جو کہیں بندے دی حیاتی وچوں پورے ڈاھ سال اِجکھی واردات نال چوری
 کیے وَنجن جو نہ اوندی رپٹ تے نہ اوندی جزا سزا۔ مجسٹریٹ صاحب نے وی چھڑے
 رہائی دے پروانے تے دستخط کیے ایں گالہ دی انکواری کرائے بغیر جو ڈاھ سالوں توڑیں
 کیہڑے سب نہ تاں اوندے خلاف کوئی چلان تیار تھیا تے نہ ای اوکوں کڈھائیں جیل
 وچوں کڈھ تے مجسٹریٹ دی عدالت وچ پیش کیتا گیا۔ جنیں ویلے جو جیلر کچی حوالات
 والیاں کوں تاں ہر چوڑاں ڈینہاں بعد علاقہ مجسٹریٹ کول پیش کرن دا پابند ہوندے۔
 عجیب رولا ہا جو نہ کہیں کنوں کچھ گچھ تے نہ ذمہ داری دالین۔ ہر شے تے مٹی تے ہر شے
 لے مٹی۔

”ہُن کیا ارادے ہن.... میڈے کول راہونڑیں یا احمد پور ونجڑیں“۔ سلمیٰ بی بی
 نے فیاض دیاں اکھیں وچ اکھیں پاتے ایں طرحاں ڈٹھا کہ جیویں آہدی پئی ہووے ”توں
 میڈے کول ای راہونڑیں“۔

فیاض کوں وی کل راتیں دا ایویں احساس تھیندا پیا ہا جو پک واری ول حکیم رام
 لعل دی دکان توڑیں تاں منج گئے پرگدی تے باہون یا نہ باہون دا خواب ولدے سروں
 ڈیکھن دی ہمت نہ ہئی۔ اوقدرت دی گن منجھ تے وی حیران ہا جو پہلے تاں اوکوں بے
 سُجان تے لاوارثا کیتا ویندے تے جنیں ویلے کہیں پاسوں کوئی آس نی راہندی تاں اوکوں
 پک نویں کوشش، پک نویں کھیڈ دا حصہ بنڑاؤ تا ویندے۔ جیل وچ وی ڈاھ سال رزڈے
 کوکدے گزراے پر جنیں ویلے اوکوں اپنی سُجان تے آپڑاں گھر بنڑایا تاں جڑھیں سمیت
 پٹ تے باہروں سٹ ڈٹا گیا۔ فیاض نے پہلی واری سوچیا جو قدرت اوکوں منج تاں کرٹے
 ہُن پتہ نی اگوں تے بنی کیہڑی راند اوندی تانگھ وچ ہے۔

فیاض کوں سوچیندا ڈیکھ تے سلمیٰ بی بی ول اوکوں آلوایا۔ ”اِناں ڈوں جنیں توں

علاوہ کوئی جانتی وی ہے؟.....

”بئی جا.....؟؟؟“ بئی جادا تاں کڈھائیں فیاض کون خیال ای نہ آیا ہا.....
 ”کیوں نہ او اٹھیا ونجے تے حکیم رام لعل کون لھہ کراہیں اوں توں معافی منگے جو او اوندی
 امانت دی حفاظت نی کر سکیا۔ پر او کبھڑے منہ نال ٹلسی دے سامنے ویسی کہ جینے چھوہر تھی
 تے وی جو نیتی سوکیتی لیکن او جو ان تھی تے وی چھڑا آپڑیں آپ کون لھن کیتے خُہا کے
 مریند ارہ گئے۔ او ٹمرا تاں ول وی آپنی ہوند دے یقین نال ہک بے مُلک ونج بیٹھا بغیر
 کہیں سُجان دے گرد و حال دے پر اوں کیا کیتا، سوا آپنی حیاتی وچ ڈاھ سالاں دا ٹک
 نو دا نزن دے۔“ فیاض دا دل کیتا جو سلمیٰ بی بی دی منت کرتے پار لکھا ونجے مہاجر بن تے
 گھٹو گھٹ سُجان تاں ہوسی جو مہاجر ہاں۔ جنیں ویلے جو ایں ریاست وچ رہ کراہیں وی
 ریاست دی تلاش وچ او آپڑاں آپ ای کیا، آپڑاں سھو کجھ ونجا بیٹھے۔

فیاض طرفوں کوئی جواب نہ ملیا تاں سلمیٰ بی بی اٹھی کھڑی تھئی۔ ”لگدے توں کوئی
 فیصلہ نی کر سکدا پیا..... کوئی گالہہ نی، آرام نال سوچ گھن۔“

فیاض وی اٹھی کھڑا تھیاتے پورے اعتماد نال بولیا ”میں فیصلہ کر گھدے بی بی،
 میں اتھائیں راہساں تہا ڈے کول، پر ہک دفعہ احمد پور تے دیرے نواب ویساں ضرور، چھڑا
 ڈیکھن کیتے جو بھوکیں دی تاریخ کیوں بدلدی ہے تے جغرافیہ کیوں نال ٹرن توں انکار کر
 ڈیندے۔“

”ہا..... ہا.... کیوں ناں، احمد پور تے دیرہ چوکھے پرے ہن۔ میں اتھہ آپڑیں
 پر اچیکٹس دے دورے تے ویندی راہندی ہاں، میڈے نال موٹر تے ونجیں پیا، کم کاروی
 ڈیکھ آویں تے جے ڈھیر اُبالہا ہو ویں تاں کہیں جیہاڑے لاری تے لکھا ونجیں۔ پر ڈیکھ
 لڑائی بھڑائی کہیں نال نی کرنی۔“ سلمیٰ بی بی اے آکھ تے اندر لے پاسے ویندی تھئی۔

فیاض وی ایس وڈے کمرے وچوں نکل تے باہر و جن لکیا تاں رسول بخش میرانی سامڑیں
 آگیا۔ فیاض کوں ایویں لکیا جیویں او باہر کھڑ تے اندر دیاں گالہیں سُنو دا پیا ہا۔ باہر نکلن
 نال ای اُونے فیاض کوں پولا پولا غلی توں وٹھیا تے ٹریندا ٹریندا مہمان خانے چھوڑ
 آیا۔ ایس دوران ڈوہیں چپ داروزہ نیتی ریہے۔ نہ میرانی بولیا تے نہ فیاض۔
 ~~~~~

(28)

فیاض کوں سلیمی بی بی دے مہمان خانے وچ آئے ڈو جھا ہفتہ شروع تھی چکیا ہا پر  
 ایں دوران ہک واری وی نہ تاں اڈوں کوئی سدھ سڈا آیا تے نہ ای فیاض نے کہیں پاسے  
 ونجن یا ایڈے اڈے تھیون کیجے کوئی اُتاول کیجی۔ مہمان خانے وچ ترے ٹائم دی روٹی مانی  
 چنگی چوکی تے کپڑا تھگڑا دھوتا ملدا ہا۔ فیاض آیا تاں اوندے بُت تے ہکو جوڑا کپڑیاں دا  
 ہا۔ بے جیہاڑے اُکمرے دے نال بنڑے ہوئے سقاوے وچ ونج تے کپڑے دھوون  
 باندھا ای پیا ہا جو کالو نال دا ملازم اوندے میچے دے نویں سیٹے ڈوں جوڑے کپڑیاں دے  
 تے نویں گرگابی چاتے آگیا جو بی بی ہوراں بھجوائن۔ ویندے ہوئے اُواوند امیلا جوڑا وی  
 نال چائی گیا جو مہماناں کول کپڑے اندروں دھوتج تے آندن۔ کھاوون پیون چوکھاتے  
 آرام بے حساب ملیا تاں ڈنیہاں وچ ای فیاض دامنہ متھا چمک آیا۔

مہمان خانے وچ اوندی سب توں وڈی عیاشی ریڈیو دا ہونا ہا۔ مرنی کمپنی دا وڈا  
 سارا کھوکھے نما ریڈیو مہمان خانے دی نگر وچ میز تے لا تھا ہا جیندے اُتے کروشیے داؤنڑیا



ہو یا گول رومال اُدھا اگوں تے ادھا چکھوں، جھال طرحاں لٹکيا ہو یا ہا۔ بجلی نال چلن والے  
 ایس ریڈیو دے اُرتھ دی تار فرش تے پئے مٹی والے گھوگھڑے وچ بھری لا تھی مٹی وچ رمی  
 ہوئی تے ایریئل دی تار دَری دی جالی وچوں کڈھ تے کوٹھے دی چھت تے لگے ہوئے  
 ایریئل نال گنڈھی ہوئی۔ سویرے سویرے ریڈیو سیلون تے رات کوں ریڈیو ایران زاهدان  
 توں علاوہ ڈوپہاریں کوں ریڈیو لہور دے پروگرام پُرس لائی رکھیندے۔ پہلے تاں کئی  
 ڈینہاں تک فیاض چھڑے گاؤن سُنو دا ریہا پر وُل ہو لے ڈاڈھے خبراں دی پُرس وی  
 پوؤن لگ پئی جیندے وچوں زیادہ مزہ ریڈیو بی بی سی دا آندا ہا۔

فیاض حیران تھیندا جو صرف اُنوی سال پہلے سُن سنتالی وچ دنیا کیڈی بے خبری  
 وچ تے کتنی بے چنتی ہوندی ہئی تے ہُن ڈیکھوتاں ہر وڈے گھر وچ گاؤن ای چلدے  
 وچ تے خبراں وی۔ دنیا با خبرتاں تھئی ہے پر بے چنتی نی رہ گئی۔ سویر سویر دی کوئی ہک خبر  
 ساری ڈینہوار کیتے چیتا بھنوائی رکھیندی ہے۔ جے اے گاؤن وی ریڈیو تے نہ آندے  
 تاں بندہ کڈے ونجے ہا۔ خبراں سُن سُن ہک بے داسر پاڑے ہا۔

اُوں ڈینہہ سجھ اُبھرے خبراں والے ڈسیا ہا جو سُن چھیاٹھ دے پنجویں مہینے دی  
 پُوی ترخ ہے۔ فیاض روز آلی کار ریڈیو سیلون توں محمد رفیع، لتا مگیلشکر، مکیش تے آشا  
 بھونسلے دے گاؤن سُنو دا ہو یا سقاوے وچ دھاؤن وڑ گیا تے جئیں ویلے باہروں نکلیا  
 تاں ریڈیو تے خبراں والا ڈسیندا پیا ہا جو بہاول پور داناوب سَر صادق محمد خان عباسی ولایت  
 دے شہر لندن وچ رضا تھی گئے تے میت کجھ ڈینہاں توڑیں ڈیر اور دے غُستان وچ  
 دفناؤن کیتے دیرے نواب گھن آئی ویسے۔ فیاض اُتھائیں دا اُتھائیں سُنک دم تھی گیا۔  
 ”ریاست دادولہا سئیں اُج مُکلا گیا“۔ فیاض کیتے آپڑیں بلیں توں لاتے ہُن تیں داسارا  
 زمانہ کہیں منڈوئے تے لگی فلم طرحاں اکھیں دے پردیاں تے چلن شروع تھی گیا۔ پہلی تے

دو جھی لام دے زمانے وچ پریڈ گراؤنڈ وچ تھیون والی گاڈ رجو اناں دی پریڈ تے ”کھڑی  
 دیندی آں سنیڈا اناں لوکاں کوں، اللہ آن و ساوے ساڈیاں جھوکاں کوں“ جیسے ریاستی  
 ترانے دی سینے وچ لہندی دھن۔ پوری ریاست وچ تعمیر تے ترقی دادور، خوشی تے خوشحالی  
 تے ول ریاست بہاول پور دی پاکستان وچ شمولیت تک تاں سمجھو کجھ ٹھیک تے عوام دی  
 خواہش دے مطابق۔ پر اے ون یونٹ دا تاں کہیں نے سوچیا تک نہ ہا جو ایں طرحاں  
 ریاست تے ریاستیاں دی سُنجان تے مٹی پاڈتی ویسی۔ اے تاں خود نواب صاحب دے  
 تصور وچ ای نہ ہا جو اوندی ریاست ون یونٹ دے ناں تے کہیں سُنجے عُثمان دی تعویز  
 سمیت اندر ڈوڈھی بے نام و نشان قبر بناڈتی ویسی کہ جتھ ریاست دے واسی آپنی زمین دی  
 پیداوار، آپڑیں دریاواں دے پانی تے آپنی لسانی تو قیر کوں وی ترس وین۔ شاید ایہو گالہ  
 ہی جو نواب صاحب آپنی رعایا کنوں شرمسار تھی تے ولایت ونج بیٹھاتے ہُن اوند ا جنازہ  
 آندا پیا ہا۔ فیاض نے تصور دی نگاہ نال ڈٹھا، نواب صاحب اوندے نال اکھ ای نہ ملا سکدا  
 پیا ہا۔ فیاض نے ول سوچیا جو موئے دے نال ایڈا وی کیا جھیرا ”میں نواب صاحب کوں  
 معاف کرینداں، ڈاھ سال دی بے قصور قید ای معاف کرینداں، پر ون یونٹ دا گناہ میں نمی  
 معاف کر سکدا، کیوں جو ایندے کیتے نواب میڈے کلہے دانی بلکہ پوری ریاست تے  
 ریاستیاں دا ڈیوئیز دار ہے۔“

نواب صاحب دی میت آون دی اطلاع ملی تاں فیاض بے چین تھی تے لاری  
 تے بیٹھاتے احمد پور ونج پہنچیا۔ لاری اڈے کنوں بہوں پہلے دیرہ نواب چوک وچ کہ جتھ  
 جی ٹی روڈ احمد پور تے دیرہ نواب کوں ادھ وچوں انج کریندی ہے، اتنی خلقت ہی جو اتھوں  
 کراگوں تے کوئی سواری ونج ای نہ سکدی ہی۔ فیاض لاری توں لہہ تے خلقت دے نال  
 رَل گیا۔ پتہ لکیا جو نواب صاحب دی میت کراچی کنوں نواب صاحب دے آپڑیں سیلون

تے دیرہ نواب صاحب ریلوے اسٹیشن تے نہ صرف پہنچ چکی ہے بلکہ بگھی وچ رکھ کراہیں  
 اسٹیشن توں ڈیرا ور کیتے روانہ تھی گئی ہے۔ لیکن خلقت اسٹیشن کنوں لاتے دیرے نواب تک  
 سڑک تے ایویں پک چکی ہئی جو بگھی دے لنگھن دی راہ ای کاٹا ہئی۔ تہوں سویری دی  
 ڈوپہار تھی گئی ہئی پر دیرہ نواب چوک توڑیں داڈوں میل دارستہ مکد ای نہ پیاہا۔ بڈھڑے  
 ریاستی پک بے کوں گل گئی لاتے روندے پئے ہن تے نیگیں دیاں اکھیں دی آپڑیاں  
 وڈکیاں کوں روند اڈکھ تے گھمیاں کھڑیاں ہن جسیں ویلے جو بال حیران ہن کہ اے سھے  
 لوک روندے کیوں ہن۔

کئی گھنٹیاں دے انتظار توں بعد قینچی موڑ مڑی تاں دیرہ نواب چوک تک  
 لوکیں دیاں دھاڑیں نکل گیاں۔ ولی عہد محمد عباس عباسی کالی عینک پا کراہیں بیاں بھراواں  
 دے نال بگھی دے اگوں بیٹھا ہاتے صندل دی لکڑا تا بوت اُوں بگھی دے ادھ وچ رکھیا کہ  
 جیندے اُتے نواب خود آپنی ملکہ دے نال باہندا ہوندا ہا۔ بگھی نال آئی تاں کہیں نے دھاڑ  
 ہلکی جو لکھ مرے پر لکھ پال نہ مرے۔ ڈکھارے تھے لوکاں دیاں باکاں آسمان جی  
 اُچیاں تھی گیاں تے بگھی وی جوں جوں دیرے نواب دی چھاونی دی حدود وچ داخل  
 تھیندی گئی۔

فیاض دیاں اکھیں دیاں ڈناراں وی پس گیاں۔ اوندے پورے خاندان نے  
 نواب صاحب دی فوج دی ملازمت وچوں روٹی روزی کتی ہئی۔ بھاویں جو اوندی پرورش  
 دی نواب طرفوں ڈتی گئی تنخواہ نال تھی ہئی پر فیاض دے نزدیک اے تنخواہ ریاستی خزانے  
 وچوں ادا تھی ہئی نہ کہ نواب دے ذاتی کھیسے وچوں۔ تہوں اُوں نے آپڑیں خاندان وچ تاں  
 کیا پورے محراب والے وچ نواب صاحب دی فوجی ملازمت دے خلاف مزاحمت دی  
 بنیاد رکھی ہئی۔ لیکن آج اوکوں احساس تھیندا پیا ہا کہ جے اُوں نواب صاحب دا بارڈی گارڈ

بھرتی تھی ورنے ہاتھ کم از کم اوندی ریاستی شناخت تاں باقی رہ ورنے ہا۔ لیکن ہن اوندے کول ہک سُنجان ہئی جو اُونے وَن یونٹ دے خلاف مزاحمت وِچ آپنی زندگی دے ڈاھ سال ڈے چھوڑے ہن لیکن ریکارڈ تے ناں تاں وُل وی ریاستی سُنجان دا کائنی، اوندی سُنجان تاں وُل وی ہک منجھ چوردی ہے۔ ایں توں علاوہ کجھ کائنی۔

فیاض دا ہاں گُستاوے کھا وَن لکھا تاں اُولاری تے بہہ کراہیں وُلدا بہاول پور ڈو روانہ تھی گیا۔ اوند اُل کیتا جو اُوا احمد پور مڑھی ڈو ورنے، حکیم رام لعل دا اُوگر ڈیکھے جتھ اُونے پہلی واری تُلّسی کول ڈٹھا ہاتے چھیکڑی رات آپڑیں آپ کوونجا بیٹھا ہا۔ اُوگر جیندی ہک ہک سلھ تے اوندے امین ہوون دی مہر ہئی پر اُوگر ہن کہیں بے دے نا جائز قبضے وِچ ہا۔ اُو دیرے دی بزار وِچ وَنج تے اُول دُکان کول ڈیکھن چاہندا ہا کہ جتھ اُونے ریاستی نوکری کول تھڈا مار کراہیں آپنی روایتی شناخت نال بغاوت کیتی تے وُل اُوہو ای وِنجا بیٹھا۔ اُو چاہندا ہا جو اُول دُکان کول ہک دفعہ وُل ہتھ لاتے محسوس کرے کہ جتھ تُلّسی نے ریاست مُکَلیندے ہویاں اوندے ہتھ کول آپنے ہتھ وِچ گھن تے رب جانے کیا اتجھا محسوس کیتا تے کرایا جو خود تاں شانت تھی گئی پر اُوکول ہمیشہ کیتے آپڑیں آپ کنوں گھس گئی۔ اوندے ہتھ دے سیک وچوں سَمَن والی پُرس اُوکول ہن دی سُنیاں راتیں کول جگا ڈیندی ہئی کہ جیویں تُلّسی آپڑیں پورے چسولے سراپے سمیت اوندے اندر جِراں کیتی بیٹھی ہووے۔ پر دیرے نواب دے بزار دی اُو دُکان ہن اوندے واسطے ایویں اوپری ہئی کہ جیویں جو وَن یونٹ دے بعد اے ریاست۔

لاری بہاول پور ویندیاں ہویاں پگی پُل توں لنگھی تاں اگوں محراب والے والا موڑ ہا کہ جتھ وستی وچوں آون والی سڑک بہاول پور روڈ نال آن رلدی ہئی۔ بہاول پوروں آنندیاں ہویاں ایں مقام تے بہاول پور احمد پور روڈ یکدم غلیل طرحاں ڈو شاختہ تھی

دیندی ہئی، سچی احمد پور ڈوتے کھبی محراب والے۔ ایں موڑ توں تھولا اگے محرابیاں دی وستی  
داغستان ہا کہ جتھ فیاض دے وڈ کے وی پورے پئے ہن۔ لاری وچ بیٹھے ہویاں او  
بھادیں جو غستان توں پرے ہا پر ول وی آپڑیں وڈکیاں دی موجودگی تے خشبو محسوس کر  
سگدا ہا کہ جیزھے اوندے نال رنج ہو وں دے باوجود اوں توں منہ نہ موڑ سگدے ہن۔  
اوند ایل کیتا جولاری کھینچ پو وے تے اواتھائیں لہہ کراہیں گھر ڈوڈرک چا مارے۔

گھر کیہڑا پرے ہا، گھر وڑتے اماں کول چلہانے تے وچ باہوے تے آکھے  
میں تاں کانا آندا پیاہم، اے تاں بس کھینچ گئی ہے تے ٹر آیاں۔ اماں اوند اے بڑا سُن  
تے ضرور مسکے ہاتے کوئی پتہ نی ڈوں چار چمے وی زپ ڈیوے ہا۔ فیاض دیاں اکھیں وچوں  
ہنجوں تر میں تاں اُونے سر دے صافے نال بے معلومیں اُگھ چھوڑے۔ نال بیٹھے  
بڈھڑے نے اُکوں روند اڈٹھا تاں تسلی ڈٹس کہ پتر تیڈا رو وں برحق ہے، صادق ہا جو لکھ  
پال، نواہیں دانواب۔

فیاض بڈھڑے کوں کیا سمجھیندا جو اُکھڑے صادق کوں روند اپے۔ اُونے کوئی  
جواب ڈتے بغیر لاری دی دری دے شیشے کوں گجھ بیابڈا کا کیتا تے باہروں ڈیکھن لگ پیا  
۔ پرے پرے تک کنڑک کٹائی توں بعد زمیناں اگلی فصل دی تانگھ وچ سکے بھوں دے نال  
بھوں تھیاں پیاں ہن۔

”میڈی ماوی تاں میڈی تانگھ وچ ایویں بھوں تھی موئی ہوسی۔ جے میں ہک  
واری اماں کول ٹر ویندا تے چاچے داسارا حال خود سُنرا ڈیندا تاں اُو ضرور چاچے دی بجائے  
میڈی وٹب کریندی۔“ فیاض دیاں اکھیں پُسن توں بعد ہن تر من تے آیاں تاں اُونے  
منہ لاری دے باہر ڈو پھیر گھدا۔



(29)

احمد پوروں واپسی توں بعد فیاض کئی ڈینہہ وِسمیا وِسمیارہ گیا۔ ریڈیو وی اکثر بند راہندا تے ٹرن پھرن وی چھڑا کرے توڑیں محدود تھی گیا۔ اناں ڈینہاں وچ وی نہ تاں بی بی ہوراں اوکوں سڈایا تے نہ پہلے آلی کاراؤنے خود ملن دا کوئی اہر کیتا۔ بس رسول بخش میرانی آتے کہیں کہیں ویلے اوندے نال آؤ جی کرویندا۔ ایویں لگدا اپیا ہا جو رسہ کشی دی کھیڈ وانگ بی بی تے فیاض ڈوہیں ہک بے کوں تہہ اچ رکھی کھڑن تے از میندے پن جو پہلے کون دینزاں پئے کراہیں کلی والی لائن کراس کریندے۔ ڈٹھا ونجے تاں ڈوہیں دے درمیان کوئی اتجھا رشتہ وی نہ ہا جو ہک بے کوں تہہ وچ رکھن دی نوبت آن دی ول وی فیاض دے دل وچ گھٹ گھٹ ضرور ہئی جو اے سھو مہربانی کتھہ سانگے۔ ضرور اوندے کنوں کنوں کوئی اتجھا کم گھنزاں مقصود ہے کہ جیڑھا کوئی بیانی کر سکا۔

”کیوں کوئی بیانی کر سکا۔ کوئی تھوڑ ہے اوندے کول بندیاں دی یا پیسے لگے دی“..... بے کاری کنوں زچ تھی تے اواکثر آپڑیں آپ کنوں کچھن بہہ تھیندا پر کہیں

پاسوں کوئی جواب نہ ملدا۔

”جے میں ایذا کوئی خاص بندہ تے میڈے کنوں کوئی بہوں وڈا کم ای گھنڑیں  
تاں ول بی بی گھندی کیوں نی اتنے ڈینہاں توں۔ کیوں میکیوں کھو اکھو از چھن کیتی  
آندی اے۔“ فیاض کوں ایویں محسوس تھیندا اپیا ہا جو او کوئی شکاری کُتا ہے جیکوں خاص دشمن  
دا شکار کھیڈن کیتے زنجیر نال بدھ کراہیں کہیں مناسب ویلے دی تانگھ وچ پالیا ویندا پے یا  
ول کوئی قربانی داسا نہہ جیکوں ایس گالہوں کھو اکھو امونا کیتا ویندا پے جو گھن تے گوشت  
چوکھا نکلسی۔ ایس زچکائی دا ہک سبب نواب صاحب دی موت وی ہئی۔ جے تک نواب  
صاحب جیندا ہا فیاض دی بغاوت کوں نفرت دی چان ماری کیتے ہک نشانہ ملیا ہویا ہا پر  
جڈاں دا نواب مُکلا یا فیاض کوں سمجھ نہ آندی ہئی جو آپنی ونجی ہوئی سُجناں دا ذمہ دار کیکیوں  
آکھے۔

ڈوپہار دا ٹکر فیاض نے کھادے بغیر ولا چھوڑیا تے بانہہ سر ہاندی ڈے کراہیں  
کملیاں آلی کار امب دے بوٹے دی ادھی چھاں تے ادھی دُھپ تلے ستا ریہا۔ دیگر  
ویلے اُٹھی تے رَمبا چائس تے آمرا دا باہر لیاں کیا ریاں دی گوڈی کرن بہہ گیا۔ پسینہ  
پیراں تھائیں واہون لکیا تاں اوکوں ہوش آیا جو میل کنوں نئی تھیا بیٹھے۔ میل دے احساس  
نال گریٹ تھئی تاں فیاض رَمبا ہک پاسے سٹ تے اُٹھی کھڑا تھیا۔ پسینہ آون نال نہ صرف  
بُت گھل گیا ہا بلکہ ہلکی ہلکی بکھ وی لگن لگ پئی ہئی۔ کمرے وچ آتے اُونے الماری وچ  
ہتھ ماریاں تاں ہک پڑی وچوں تل شکاری دا ٹونا نکل آیا جیڑھی جو اُونے احمد پور نواب  
صاحب دے جنازے دے انتظار وچ ہک ریڑھی والے کنوں گھدی ہئی۔ تل شکاری  
دے ایس بھورے نے اوندی بکھ کوں چھتے تھیون توں بچا گھدا ہا۔ بکھ مٹھی تھئی تاں دل  
کیتا جو کیوں نہ آج وکیل ریاض ہاشمی نال ملاقات کیتی ونجے۔ اے سوچ تے اُونے نکھے

تکھے دھوتے ہوئے جوڑے کوں الماری وچوں کڈھتے سدھا کیتا تے خود سقاوے ڈوپانی  
وہاؤن ٹر پیا۔

آج کافی ڈینہاں بعد اوکوں بُت وچ حیاتی دیاں سریراں جھمیریں پیندیاں محسوس  
تھیاں۔ ٹھڈے پانی دی دھار نے اوندی رگ رگ وچ سُتے ہوئے جذبیاں کوں تکرار جگا  
کھڑایا ہا۔ شاید اوندے کیتے ریاض ہاشمی وکیل نال ملاقات دا تصور ای رکتھامیں وَلدے  
سروں آپنی سُجبان دے سفر تے روانہ تھیون دا پروانہ ہئی۔ اوکوں ڈاھ سال پُرانا ویلا یاد  
آ گیا۔ دل کیتا جو وَنچ تے ڈھیر سارا جھیر الاوے جو اوندا لیڈر ہوندے ہوئے وی ہاشمی  
وکیل نے اوندی پوندی نہ کیتی۔ اُوچا ہوئے ہاتاں اوکوں جیل وچوں جھڑ واسکد اہا پُر اُونے  
تاں اصلوے خبر ای نہ لَدھی، اَلَمک وِسار ڈٹس۔

”اے وی تاں تھی سگدے جو اوکوں پتہ ای نہ ہووے جو میں بہاول پور جیل  
وچ ہاں۔“

”اے کیا گالہ تھی جو لیڈر کوں آپنے درکراں دا پتہ ای نہ ہووے۔ وَل کیہڑے  
کم دی اتجھی لیڈری۔“

”وَل وی جو کجھ ہے، لیڈر نہ سہی سنگتی تاں ہے وَن یونٹ دے خلاف کوشش دا۔  
اے وی تاں ہو سگدے جو اُو خود کہیں جیل وچ کہیں عذاب وات آیا رہیا ہووے۔ جو وی  
ہے ہک ملاقات تاں بنزدی ہے، اگوں دی آپے ڈٹھی ویسے۔“ فیاض تیار تھی کراہیں  
کمرے وچوں باہر نکلیا تاں رسول بخش میرانی اوندا انتظار کریندا کھڑا ہا۔  
”بی بی یاد کریندے وَن تیکوں۔“

”بی بی صاحبہ کوں کیویں پتہ لگ گئے جو میں آج اتھوں نسیا وینداں۔“  
میرانی پہلے تاں تھوڑا جیہا بچکیا، حیران تھیا تے وَل خچکا مارتے کھل پیا۔



”توں کیا سمجھدیں بی بی ایڈی بے خبر ہے، پتر نی ہلد ایں گھر وچ اُوکوں دے

بغیر۔“

”نہ میں تاں نی سمجھداں پر تھئی میڈے نال بے خبری ہے۔ میکوں تاں اے پتہ  
کائی جو میکوں اتھ گھن کیوں آندا گے۔ میڈا کم کیا ہے، میں کرنا کیا ہے۔ میکوں تاں  
ایویں لگدے جو ہک جیل وچوں نکل تے بی جیل وچ آگیاں۔“ فیاض تاں ایویں پھٹ  
کھڑا تھیا ہا جیویں جو آسرے لگدا کھڑا ہا۔ میرانی نے چپ چا کیتی تے کجھ لکھے بعد اُوڈوہیں  
سلمی بی بی دے ڈرائنگ روم نماؤڈے کمرے وچ کھڑے ہن۔ سلمی بی بی دے اتھ نہ  
ہوون پاروں ڈوہیں چپ ہن۔ میرانی دے چہرے تے ناگواری تے فیاض ہاں دی ہواڑ  
کڈھ تے اپنے آپ کوں بہوں ہلکا پھلکا محسوس کریندا پیا ہا۔

سلمی بی بی آئی تاں فیاض کوں پہلے آلی کار صوفے تے باہون دا اشارہ کئیں  
جئیں ویلے جو میرانی پٹھے پیراں باہر ڈونکل گیا پر ویندے ویندے اکھیں اکھیں وچ اُوکوں  
اسجھا اشارہ ضرور کر گیا جیکوں سلمی بدرالدین جانزدی وی ہئی تے سمجھدی وی ہئی۔ سلمی بی بی  
صوفے تے باہون دے بعد وی کجھ دیر خموش رہی تے فیاض وی جھکی جھون گھت تے بیٹھا  
ریہا۔ لکھے گھن بعد سلمی بی بی ای الائی ”میں سنزویں توں تنگ تھی گئیں اتھ۔“

فیاض ہالی جواب ڈیون چاہندا ای پیا ہا جو سلمی بی بی اُوں کنوں پہلے بول  
پئی۔ ”ٹھیک ہے، تنگ تھیون تاں بنزدے کیوں جو ہکی جاتے کہیں کم کار دے بغیر تیڈے  
جیہا جو ان نکما باہوے تاں پریشانی تاں آسوں پاسوں ضرور راہی۔ توں وی سوچیندا تاں  
ہوسیں جو میکوں اتھ گھن کیوں آئیں، میڈا کم کیا ہے، میں کرنا کیا ہے، ہے ناں ایویں؟“

فیاض نے حیرانگی نال سلمی بی بی کوں ڈٹھا۔ اُوکوں حیرانی ایں گاہہ دی ہئی جو بی بی  
کوں اُناں گاہیں داوی پتہ ہا جیڑھیا جو اُو نے چھڑیاں سوچیاں ہن، کیتیاں نہ ہن پر ول

وی اُونے اوندی خبر نہ لَدھی تے ہُن سا مڑیں بہہ تے اُوندا ہاں ساڑن کیے مُسکدی بیٹھی  
ہئی۔

”جے تہا کوں پتہ ہا..... تاں وَل اے سب گنجھ کیا۔ کم از کم میڈی سُدھ تاں لہوآ۔“ فیاض دے لہجے وچ ڈھیر سارا شکوہ ہا۔

”سُدھ ہئی تاں پئی۔ دُسی نہی۔“ سلئی بدستور مُسکدی بیٹھی ہئی جیویں اے سارا  
گُجھ اوندے کیے انتہائی غیر اہم ہووے۔ اُو ایویں لگدی پئی ہئی جیویں کوئی سولہاں سال  
دی شرارتی چھوہر کہیں منہ لگدے کوں چچویندی پئی ہوندی اے۔ فیاض نے اکھ بھرتے  
اُو کوں دُٹھاتے وَل جھکی جھون چا گھستی۔

”لگداپئے جواج ریاض ہاشمی بہوں یاد آندا پئے“۔ فیاض نے وبل تے ول سملی ڈوڈٹھاواو اویں مسکدی بیٹھی ہئی۔ فیاض حیران ہاجو ایں گالہہ دا ایکوں پتہ کیوں لگ گئے۔ اے تاں ہالی تیں اوندے دماغ وچ ہئی تے ارادہ بنڑدی ودی ہئی۔ سملی بارے لائے ہوئے اوندے سارے اندازے غلط ثابت تھیندے ویندے ہن۔

”پتہ ہے جو ایوب خان نے مارشل لاء لاؤن توں بعد ایبڈو (EBDO) ناں دا قانون نافذ کیا ہا اٹھ سالوں کیتے؟“ سلمیٰ بی بی نے یکدم پینتر ابدلیا تاں فیاض کیتے حیرت دی ہک بنی چھمک جیویں جو تانگھ وچ ہئی۔ اوندی نگاہ ہک واری ولا سلمیٰ تے پئی تاں ایویں لکيا جو اوتاں اوندی ہک پل دی وی سونہی کائینی۔ مسکان دی جا انتہائی سنجیدگی تے اودوی اتنی جو کہیں کوں چہرے تے نگاہ روک رکھن دی جرات ای نہ تھی سکے۔

”جی ایس قانون دے تحت سیاست، سیاستدانان تے منتخب اداریاں تے اٹھ سالوں کیتے پابندی لاؤتی گئی ہئی۔“ فیاض نے جواب ڈتا تاں ول وی سلمیٰ بی بی دے چہرے دے تاثرات نہ بدلے۔ او ولدی ہوں رُکھے لہجے وچ گالہہ کریندی پئی ہئی۔

”تے اٹھ سالوں دی اے پابندی ایں سال یعنی 1966ء دے دسمبر وچ

ملک دی پئی اے۔ Elected Bodies Disqualification Order ناں  
دے ایں کالے قانون تحت نیشنل عوامی پارٹی تے مشرقی پاکستان عوامی لیگ دے 75  
لیڈراں کوں نا اہل قرار ڈے ڈتا گیا ہا۔ قصور اناں دا وی ایہو ہا جو تید اقصو یعنی ون یونٹ  
دی مخالفت کیوں۔ جنیں ویلے جو مسلم لیگی لیڈراں کوں ہتھ تک نی لایا گیا۔“  
”جی سھو کجھ جائز داں..... ڈاہ سالوں دی جیل نے بہوں کجھ ڈسا چھوڑے،

بہوں کجھ سکھا چھوڑے۔“ فیاض کافی حد توڑیں سکون وچ آ گیا ہا۔  
”اے پابندی ختم تھیون وچ صرف پنج مہینے رہ گن لیکن اٹھ سالوں دی ایں  
پابندی نے سارے سینئر لیڈراں کوں ذہنی تے جسمانی طور تے مُکا چھوڑے۔ ایڈو دی  
پابندی چون توں بعد سارے مُلک وچ ہک بہوں وڈا سیاسی خلا پیدا تھیونز تے ایں خلا  
کوں پُر کرن تے ون یونٹ دے خلاف تحریک کوں وَلدے سروں جوڑن سانگے نویں  
تے نوجوان سیاسی قیادت دی لوڑھ ہوسی۔ کیا اساڈے کول اتجھی قیادت ہے کہ جیڑھی ون  
یونٹ دے خلاف مزاحمت کوں اُتھاؤں شروع کر سکے کہ جتھوں ایکوں ایڈو دے بندی  
خانے وچ ڈھک کراہیں آپڑیں جائزں ختم کر ڈتا گیا ہا۔“

”ہونہہ.....!“ فیاض نے ہک لمبا ساہ گھدا تے صوفے تے ڈھلا پئے گیا۔  
اوسجھدا پیا ہا جو بی بی سماجی کم کاراں توں بعد ہُن سیاست وچ دھوگر بندی پئی ہے تے  
اینڈے کیے اُداوندے تجربے کنوں فائدہ چاون دی فکر وچ ہے۔ فیاض کوں ہک لمبی سوچ  
وچ بڈیا ڈکھ کراہیں سلمیٰ آپنی جا چھوڑ تے خلاف معمول اوندے نال آ بیٹھی۔ فیاض  
اُدھر تے کھڑا تھی گیا پر سلمیٰ نے اوند اہتھ پکڑ تے وَلدا صوفے تے پہا گھدا۔ فیاض  
دے ہتھ وچ جھڑاٹ جئی تھیون لگی۔ اُوکوں جھٹ تلسی دے مُکلاون دا ویلا یاد آ گیا۔

اونے دی تاں ایویں اوند اہتھ وٹھیا ہا۔ پر اے پگڑاؤں طرحاں دی تاں نہ ہئی۔ تلسی دے ہتھ پکڑن نال پک سالم ثبوتی عورت اوندے اندر آئی تے ول اُتھائیں چران کرتے بہہ گئی ہئی۔ جنیں ویلے جو سلمیٰ بی بی دے ہتھ وچ نہ عورت ہئی تے نہ عورت ہو وں دا احساس۔ کیا خبر ایس عورت دے احساس کوں رد کرن وچ اوندے اندر چران کیتی تلسی دی مزاحمت دا کوئی ہتھ نہ ہووے۔ عجیب مشکل وچ پھسا ڈتا ہئی فیاض کوں ڈوں عورتاں دے ڈوں انجو اُنج جسمانی سیک تے سیک دے احساس نے۔ تلسی نے پک لچھے دی نسوانی گرفت نال اوندے اندر پک وں یونٹ بنڑا چھوڑیا ہا تے اُنج سلمیٰ دی پولی جی پگڑا ناں تمام وں یونٹاں دے خلاف مزاحمت دی بنیاد رکھیندی پئی ہئی۔

فیاض دے آپڑیں آپ وچ گم تھیون سبب سلمیٰ سمجھی جو اوندے نال آتے باہون تے ہتھ پکڑن پاروں گھبرا گئے۔ تہوں ذرا سُر بیٹھی تے پچھیس۔ ”توں جائز دیں جو بہاول پور وچ کیہڑی اتجھی شخصیت ہے جیڑھی نواب صاحب تے سیاسی قیادت، ڈوہیں دی کمی پوری کر سکے۔“

فیاض کہتے اے سوال اُن چتا کا سنا ہا تہوں تھوڑا جیا بیا پرے کھسک تے بولیا۔  
”میکوں تاں کوئی فی نظر دا۔“

”جیل دیاں کیا خبراں ہن“..... سلمیٰ دے چہرے تے ولدی مسکدی ہوئی ملائمت آ گئی ہئی۔

”جیل وچ تاں ایہا خبراں ہن جو نواب صاحب نہ خود آسی تے نہ کہیں کوں آون ڈیسی۔ پر اؤں ویلے تاں نواب صاحب جیندا ہا۔ ہن پتہ فی کہیں دے کیا ارادے ہن۔ نواب صاحب دی اولاد وچوں تاں کوئی آون توں ریہا۔“ ہولے ہولے فیاض کجھ بیا دی سکون وچ آ گیا ہا۔

”میکوں پگی خبر چاہیدی ہے“۔ سلمیٰ دی ملائمت وچ ول عجیب جی نختی آ گئی

ہئی۔

”پگی خبر تاں ریاض ہاشمی وکیل دے دفتر توں پتہ لکسی“۔ اے آکھ تے فیاض  
اٹھی کھڑا تھیا۔ فیاض کوں اٹھد اڈیکھ تے سلمیٰ بدرالدین وی کھڑی تھی گئی تے ہک واری  
ول اوند اہتھ پگڑتے آکھ وچ آکھ پاتے بولی۔

”فیاض! پہلے تاں میں کہیں تے اعتماد کریندی نی تے جے کر گھناں تاں  
ونجیندی نی۔ ایں ویلے اے آکھڑاں ضروری ہے جو میں تیڈے تے اعتماد کر گھدے۔ ہا،  
ہک گالہہ بئی۔ نہ میں دھوکہ ڈیندی آں تے نہ کہیں کوں ڈیون ڈیندی آں، لہذا سوچ سمجھ  
تے میڈے نال ٹرنا پوسی“۔ سلمیٰ دے مُسکدے چہرے تے اکھیں دی خطرناکی دی حد تک  
استقامت ڈیکھ کراہیں کہیں کوں وی پسینہ آسکدا ہا۔ تہوں فیاض نے کوئی جواب ڈیون دی  
بجائے جھکی جھون چا گھستی تے کمرے توں باہر نکل گیا



(30)

فیاض، ریاض ہاشمی وکیل دے دفتر پہنچیا تاں اُو بھاں بھاں کریندا پیا ہا۔ جیڑھے  
دفتر وچ اُج توں ڈاھ سال پہلے چوئی گھنٹے آماں گھاماں لگی راہندی ہی اُتھ اُج ڈیکھن کوں  
دی بندہ نہ لکھدا پیا ہا۔ اُو اے پوائے توں پتہ لکیا جو ہاشمی صاحب آپنی مرضی تے کچھری  
آندن تے مرضی نہ ہووے تاں کئی کئی ڈینہہ شکل ای نی ڈکھیندے تے منشی عدالتاں وچ  
پیش تھی کراہیں پیشیاں گھندا راہندے۔ فیاض دفتر دے باہروں پئی پک ادھورانی کرسی  
گھیلی تے چھنڈک تے بہہ تھیا۔

اُو کوں یاد آیا جو ایہا اُو جا ہی کہ جتھ او نے پہلی واری ہاشمی وکیل دی زبانی جاتا جو  
ریاستیاں دی صدیاں دی شناخت کہیں غیر نے نی بلکہ اُتھوں دے ہوں نواب ختم کیتی ہے  
کہ جیکوں سارے پیارنال دولہاسیں سڈیندے ہن۔ دولہاسیں دا فیصلہ سر اکھیں تے کہ  
ریاست پاکستان نال شامل تھیوے پر نواب صاحب کوں اے اختیار کینے ڈتا جو اُو اٹھارہ  
لکھ ریاستیاں دی شناخت دی قربانی ڈے کراہیں خود منہ لکاتے ولایت وچ باہوے۔

فیاض نے اکھیں اُتوں تے چاتے آسمان ڈوڈٹھاتے آپڑیں آپ نال اُلاپیا۔ ”دولہا سیں  
تہاکوں ریاستیاں نال کیتے گئے سبھے دروہ معاف پروں یونٹ دا گناہ تاں اتھوں دی دھرتی  
ای معاف نی کر سگدی۔“

فیاض داہاں اوکھا تھیا تاں اکھیں وچ ہنجوں آ گئے۔ ڈینہہ لتھا تاں نہ ہا پرلہندا  
ویندا ہا۔ اونے چار چھیر کچہری وچ نگاہ بھنوائی تاں ایویں لکیا جیویں جو کوئی حملہ آور آن لتھے  
تے کچہری کوں برباد کرتے ٹر گئے۔ سویرے ڈینہہ چڑھے لوکاں دی بھیڑ بھاڑ ولدی  
کھنڈ کراہیں کانوکان تھی چکی ہئی۔ فیاض دا مقدمہ وی عجیب مقدمہ ہا، اوندی اغواء شدہ  
سُجناں دی تلاش تے برآمدگی دا۔ پر نہ کہیں تھانے وچ ایندا پرچہ درج تے نہ کوئی عدالت  
ایکوں سُنزون کو تیار۔ نہ کوئی منصف، مُنصفی تے راضی تے نہ استغاثہ چلان پیش کرن تے  
آمادہ۔ گواہ تاں پورا جہان ہا پر گواہی ڈیون دی کہیں وچ ہمت نہ حوصلہ۔ جیل وچ ہوندیاں  
فیاض ہک واری سوچیا ضرور جو آپنی شناخت دی چوری دا پرچہ تاریخ دے تھانے وچ درج  
کروسی پر جیلوں باہر آتے پتہ لکیا جو تاریخ دے تھانے دا محررتاں لکھن ای نی جائز دا،  
اصلوں اُن پڑھ ہے۔ اوچھڑے اوہے پئے جوڑ ایف آئی آر دار جسر بنڑائی راہندے  
جیڑھے جو اوکوں حاکم دی دربار وچوں قاضی دے ٹھپے نال وصول تھیندے راہندے۔

آج دے ڈینہہ نے تاں فیاض کوں اصلوں چبول سٹیا ہا۔ سویر دی مونجھ منجھاری  
توں بعد سلمیٰ بی بی دارویہ اوندے کیتے کہیں عذاب توں گھٹ نہ ہا۔ گذشتہ چھی مہینیاں وچ  
اونے کیا کیا نہ سمجھیا ہا ایس بی بی کوں۔ ہک اللہ لوک امیرزادی جیندی جوانی ای رنڈیا  
اوندے گل پئے گیا، کیس طرحاں ہمت کرتے نہ صرف لوکاں دے کم آندی پئی ہئی بلکہ  
آپڑیں خاندانی کاروبار کوں وی سنبھالی کھڑی ہئی۔ فیاض کوں سمجھ ای نہ آندی پئی ہئی جو  
ایڈے مضبوط کردار دی تربیت چھی مہینیاں بعد ای یکدم اونداتھ وٹھی گھنسی تے اودی

مھل آہنی سیاست کوں جھاگ لاؤن کیتے۔ اوشاید سلمیٰ دے ہتھ پکڑن کوں کوئی اُن چتی حرکت سمجھے ہا پرچیں طرحاں اُونے فیاض کوں آپنے سخت گیر مزاج دی سخت گیری بارے ویندے ویندے چتایا ہا اُونے اوندیاں ساریاں مہربانیاں تے پانی پھیر چھوڑیا ہا۔

فیاض حیران ہا جو لوک اوکوں کیا سمجھدن۔ اوندے اہے اوکوں کیا سمجھیا۔ اُونے حکیم کول کم سکھن دی خواہش کیتی تاں حکیم صاحب نے اوکوں کیس طرحاں آپنے مفادات کیتے ورتیا۔ بھاویں جو اعتماد ہا پر ایں اعتماد دا مفاد کیندے لیکھے ہا۔ مہراں اوندے تے مہربان تھی تاں گھن تھیون دی آپنی سک ساگے۔ تلسی نے وی اوکوں شاید ڈاک خانے دا لیٹر بکس سمجھیا جو وشنونی بھانڑاں تاں آپڑیں کنوارے بُت دی چابی دا پہلا بیرنگ پارسل ایندے وچ ای پچھوڑے تاں جو اوساری عمر جوٹھ تے گزارا کرے۔ اُوندا چا چاتے باقی دے گھروالے صرف اُون صورت اوندے نال راضی تھی سکدے ہن جو اُو حکیم صاحب دی امانت اُنّاں دے حوالے کر ڈیوے ہا۔ آپنی ریاست داناں نشان چھڑواؤن کیتے اُونے اینٹی وِن یونٹ فرنٹ دا دفتر کھولیا تاں ڈاھ سالاں دی جیل گئی تے اُو وی بغیر کہیں مقدمے دی سماعت دے۔ ڈاھ سالاں وچ نہ ریاست نے اوندی خبر گیری کیتی تے نہ ریاستیاں نے۔ ریاست دی سُجّان گولیند اگولیند اُو خود آپنی سُجّان وِنجا بیٹھا۔

جیل وچوں نکلن دے بعد بیگم سلمیٰ بدرالدین اوکوں گھر گھن آئی تاں اُونے زندگی کوں پہلی واری ہک نویں طرحاں محسوس کیتا کہ جیندے وچ سُجّان نہ ہووَن دے باوجود سُجّان دی تلاش دا پہلا سانہ ہا۔ اوکوں لکیا جو زندگی بغیر کہیں شناخت دے وی گزاری وِنج سکدی ہے۔ ضروری نی جو زندگی دا کوئی مقصد ہووے، زندگی بلا مقصد وی چسولی تھی سکدی ہے۔ ریڈیو، خبراں، گاؤن، کھاون اَتے سُمن زندگی دا کوئی بیارستہ ڈکھیندے ہن کہ جتھ جگ جہان نال یکطرفہ جوت وی اگوں تے وِنج تے کئی رستیاں نال جُو ویندی ہئی



لیکن اوتاں شاید یکطرفہ بنزت دابندہ ای کا سنا ہاتھوں بہوں جلدی اختا تھی گیا۔

شروع شروع وچ اوند اخیال ہا جو بیگم سلمیٰ بدرالدین اوکوں کہیں غرض سانگے گھر گھن آئی ہے پر جنیں ویلے سھو عیش آرام ڈیون دے باوجود کئی مہینیاں تک اونے فیاض دی بات ای نہ کچھی تاں یقیناً اوکوں آپڑیں ہوون دا احساس وی تھیا تے اوکوں ایں طرحاں رد کیتے و نجن دی ذلت دارنج وی۔ پر جنیں ویلے خود اوکوں بیگم صاحبہ نے سدا پٹھیا تاں او حیران وی تھیا تے راضی وی کیوں جو اوند اوجود ہک واری ول منیا ویندا پیا ہا۔ لیکن جیں طرحاں سلمیٰ بی بی نے آپڑیں مفاد سانگے پہلے اوکوں رجھاون تے ول کھڑکاؤن دی کوشش کیتی، اونے اوکوں فیاض دے سامنے کوڈی لگھ دا وی نہ رکھیا۔ کتھ بیگم سلمیٰ بدرالدین دی پھنے خانی تے کتھ ہک عورت دا آپڑیں مفاد کیتے آپڑیں آپ کوں پیش کرن دی پہلی پوڑی تے کھڑا تے آکڑ ڈکھاؤن دی کوڑی کوشش۔ اوکوں ایویں لکيا جو ہک بی مہراں تے ہک بی ٹلسی روپ وٹا تے نویں نال نال اوندے سامنے آکھڑی ہئی۔ پر او ڈوہیں ول وی بیگم سلمیٰ بدرالدین کنوں اتر ہن۔ کم از کم آپڑیں آپ کوں نواتے تاں اوندے کول آیاں ہن۔ مکمل اطاعت تے سھے ہتھیا رسٹ کراہیں۔ پر اے کچھی عورت اے جیرھی اوکوں استعمال کرنا وی چاہندی ہے پر اوندی گردن تے لت رکھتے۔

فیاض دا دماغ بھمبیری وانگو بھاؤندا پیا ہا۔ بظاہر بیگم سلمیٰ بدرالدین اینٹی و ن یونٹ ہوون دا تاثر ڈیندی پئی ہئی لیکن فیاض کوں ایویں لگدا پیا ہا جیویں جو او و ن یونٹ دی غاصبیت کوں تو سبج ڈیون دے مشن تے ہے۔ جیں طرحاں دا و ن یونٹ او فیاض نال بناون چاہندی پئی ہئی او او و ن یونٹ توں مختلف نہ ہا کہ جیرھا ڈا ہ سالوں توں پاکستان دیاں سھے کمزور قوماں تے زورے مسائیں مسلط کر ڈتا گیا ہا۔

فیاض کوں بھنی ہوئی کرسی دیاں مہٹیاں پڑیاں تاں او اٹھی کھڑا تھیا۔ کچھری وچ

اندھا راتھی چلایا ہا۔ اونے سر چھنڈ کیا تے فیصلہ کر گھدا جو ہُن واپس بیگم سلمیٰ بدرالدین دے مہمان خانے نی ونبجڑاں۔

”جے اُتھ نی ونبجڑاں تاں وَل ونبجڑاں کتھاں ہے.....؟“ فیاض کول ظاہر ہے ایں سوال دا کوئی جواب نہ ہا۔ ذہن وچ ہک واری خیال ضرور آیا جو ہُن اناں ہمسایاں وچ کجھ نی پیا، روٹی کپڑا تے سردی چھت ہے پئی، ونبجڑے نال رہ۔ حتیٰ دل آکھی لہو لا بیگم سلمیٰ بدرالدین کول تے جے چار ڈہنہہ حیاتی دے سٹھرے گذر دین تاں گزار گھن۔ ساری زندگی استعمال تھیندا رہ گئیں، ہُن استعمال کرتے تاں ڈیکھ بیاں کول۔ کتنی چُخس ہے ایں راند وچ جیکوں سیاست آکھیا ویندے۔

پر دِل نہ منیا۔ فیاض نے ایہو فیصلہ کیتا جو ہُن واپس بیگم سلمیٰ بدرالدین دی کوٹھی تے نی ونبجڑاں، رات بھاویں ریلوے پلیٹ فارم تے کیوں نہ گزارنی پووے۔ ریلوے پلیٹ فارم دا ذہن وچ آیا تاں ساری کھچل وان وٹیندی گئی۔ مسئلہ ای حل تھی گیا۔ فیاض بہاول پور دے ریلوے اسٹیشن ونبجڑاں کیتے چوک فوارے کنوں لنگھیا تاں بکھ نے بلوار کھیا۔ احمد پوری دروازے دے اندروں توے اُتے قیے والیاں ٹکلیاں تلیاں ونبجڑاں دی خوشبو آندی پئی ہئی تیز مسالے والی چراری۔ فیاض دے قدم آپ کنوں آپ تھلیج گئے۔ کھیسے وچ ہتھ مارئیں تاں ڈاہ آئیاں دا بھانج ودا ہا تھیا۔ چار آئیاں وچ رَج تے روٹی کھاؤس جیندے چھیکڑ وچ ڈوں گراں مٹھے دے طور تے رابڑی دے وی ہُن پے۔ کیا سواد ہا چھلواں والی رابڑی داوی۔ اوکوں احمد پوردی نیکی بزاردی رابڑی تے ملائی یاد آگئی جیکوں گھنن کیتے لوک عصر کنوں پہلے تھان رکھ ویندے ہُن۔ واری مطابق ہک لائن وچ پے ہوئے آپووانے کٹورے، منگر تے گھوگرے۔ سودا تیار تھی راہوے ہا تاں دکاندار ترتیب نال سب دے تھاداں وچ کتھائیں ملائی تے کتھائیں رابڑی پیندا ونجے ہاتے جھ مال

مک ونجے ہاؤ ہو مگر موند ہا مار ڈیوے ہا۔ فیاض نے عرصے بعد ہن تاں تازی ضرور کیتی پر  
 وِسریاں گالہیں یاد کرتے ہاں والا ہتھ پیا کون چھڑا وے ہا۔ مَن مونجھا پہلے ہا اتوں نیت  
 بھارویں روٹی کھاتے فیاض دیاں اکھیں وچ خمار لہہ آیا۔ اونے دُکندار کنوں ٹائم کچھیا تاں  
 ہالی مسائیں نو وجدے پے ہن۔ گرمیاں دے نو تاں ایویں ہن جیویں جو سمجھ ہن لٹھا  
 ہووے۔

فیاض احمد پوری دروازے وچوں نکل تے سامنے چوک وچ لگے فوارے دی  
 بنی تے آتے بہہ گیا۔ کڈھائیں جھگ مگھ کر بند اے فوارہ پتہ نی کڈن دا بند پیا ہاتھیا۔ مٹی  
 مٹی تے دھڈڑ تھئے فوارے دے اندر چھیل نے سِک کراہیں عجیب جی غلاظت دا ماحول  
 پیدا کیتا ہو یا ہا چیندے اُتے جا بجائے پئے انسانی فُصلے دیاں جلیبیاں صاف ڈسندیاں  
 پیاں ہن جو آج کل اے فوارہ کیہڑے مقصد کیتے تے کون استعمال کریندا پے۔ کافی دیر  
 توں بعد اتھوں ہک موٹر لنگھی تاں اوندیاں بتیاں دی روشنی چار پھیر بنے ہوئے شیراں  
 دے مونہاں تے پئی، جہاں وچوں کئی زمانے پانی دیاں دھاراں نکلدیاں ہن پر ہن تاں  
 اناں شیراں نے وی شرم کنوں اکھیں ٹوٹ گھدیاں ہو یاں ہن۔ فیاض کوں ایویں لکھا جو  
 اے شیراں دے منہ نی بلکہ بیگم سلمیٰ بدرالدین دے ہتھ ہن جیڑھے چارے پاسوں اوکوں  
 آپ ڈوچھکیندے ہن۔ بیگم سلمیٰ بدرالدین دے ہتھیں دا احساس کتنا مُردہ احساس ہا کہ  
 چیندے اندروں نسوانیت دی بجائے کہیں مُردار دی ہواڑا جن تیں آندی پئی ہئی۔

طبیعت دی سُستی تقاضا کریندی پئی ہئی جو اُو اتھائیں نال دے فٹ پاتھ تے  
 سُم پودے پر اُو اٹھیا تے عید گاہ تے گلزارِ صادق دے ادھ وچوں لنگھ دی اسٹیشن روڈ تے رُ  
 پیا جیڑھی جو بیگم بدرالدین دی کوٹھی دے سامنڑیوں لنگھ کراہیں ریلوے اسٹیشن ڈو ویندی  
 ہئی۔ کجھ لُٹے بعد فیاض بیگم بدرالدین دی کوٹھی دے سامنے ہا۔ اُو اُو پرابن تے لنگھن لکھا

تاں سڑک نے پیراں کوں وَٹھی گھدا کجھ ایں طرحاں جو اوند اقدم چا دن محال تھی گیا۔ دل  
کیا جو اندر آپنے کمرے دے کولے بسترے تے ونج تے سُم پو وے۔ کاوڑ کرنا نہ بنزدے  
نہ ٹھاہندے۔

لیکن ایں تمام تر احساس دے باوجود اُو گھر جیڑھا اُج سویرتیں اوکوں آپڑاں  
آپڑاں لگدا ہا یکدم بیغانہ تھی تے رہ گیا ہا۔ اُونے اُکھیں بھرتے ایں گھرتے دید بھنوائی تاں  
ہاں مُتاوے وات آ گیا۔ اُونے اُج سویرے بہہ تے پُھلاں آلیاں کیا ریاں دی گوڈی کیتی  
ہئی۔ اوند ارمباوی اُتھائیں لا تھا ہوسی کہ جیندے نال اُونے کل سویرے باقی دی گوڈی کرنی  
ہئی۔ پر ہُن اے گھر اوندانی ریہا۔

”صرف اوندے کنوں ای وَل وَل اوند ا گھر کیوں کھیا ویندا پئے۔ گھر دے نال  
دَرتے دَردے نال جُوی ہوئی سُجان، سھو کجھ کیوں اکھ دے جھپکار نال ای اوندی نی  
راہندی۔ میں اُوڑک جیل کوں آپڑاں گھر بنزایا پر اُتھوں وی کڈھ ڈتا گیا۔ ہُن اتھ ہم تاں  
اتھاں راہون وی میڈے وِس وچ نی ریہا۔ نہ جیل میڈی سُجان تے نہ آزادی میڈی  
”تجھان“۔ اوندے اندر کوئی زور دا چیک پیا۔ فیاض کیتے اے کوٹھی ہُن جبر تے غاصبیت  
دے استعارے دے سوا کجھ وی نہ ہئی۔ اُو ایں کوٹھی دے کولے بسترے دی کشش تے  
بیگم سلمیٰ بدرالدین دے ہتھ دے سیک کنوں پرے بھج وَنجن چاہندا ہا۔ اُو ایں دیہہ دی ہر  
علامت ہر نشانی کنوں وی بھج وَنجن چاہندا ہا جیڑھا جو کمزور قوماں دی راہندی ساہندی  
شناخت دی گردن تے آپنا پیر رکھ تے بہہ چلکيا ہا۔

فیاض دے بُت وچ پک واری وَل آپنی سوچ دی قوت کوں پک نکلتے تے گھن  
اُون والیاں سریراں چڑھیاں تے اُو پوری طاقت نال آپڑیں پیر پٹواتے ایں طرحاں  
تکھے تکھے دُھر کیا جو ساہ چڑھدے چڑھدے لوہار دی چڑی پھوکنی بن گیا۔ اُو جلدی کنوں

جلدی ہر قیمت تے بیگم سلمیٰ بدرالدین دی کٹھی دیاں حداں توں باہر نکلن چاہندا ہا۔ اوڑک  
اؤنکل تاں گیا پر فیاض کوں ایندا احساس اؤں ویلے تھیا جنیں ویلے او پلیٹ فارم تے پئی بیچ  
اُتے ونج تے بہہ نہ تھیا۔ ول وی اوکوں آپڑاں ساہ جوڑن وچ بہوں دیر لگی۔

اے کپہو جیہا خوف ہا، ایندی سمجھ اؤکوں خود کوں وی نہ آندی پئی ہئی۔ اؤ کیندے  
کنوں خوفزدہ ہا، ہالی اے وی طے تھیونڑاں ہا۔ کیا اے محض سُجان دے نہ ہو وں دا خوف ہایا  
سُجاڑیں وُنجن دا خوف۔ بہر حال جووی ہا ایندی شدت ایں توں پہلے اتنی نہ ہئی۔ فیاض کوں  
لکھا جو اوندے اندر دی مزاحمت ہر آون والے ڈینہہ دے نال گھٹدی ویندی ہے۔ جیں  
طرحاں اؤ بیگم سلمیٰ بدرالدین دے اگوں بھاڑی پیا ہا ایں طرحاں تاں دا واقعہ تاں اوندی  
پوری حیاتی وچ نہ ہا کہ جتھ مزاحمت دی بجائے اُونے فرار اختیار کیتا ہووے۔ اوکوں اپنے  
آپ کنوں کریت تھیون لگ پئی۔ کجھ لحظے بعد فیاض کوں ہلکے ہلکے پالے دا احساس تھیا تاں  
پتہ لکھا جو تکھے تھن پاروں اؤ پگھر و پانی تھی چکيا ہا۔ تھولی جئی ہوا گھلی تاں پگھر سکن  
دے سبب ٹھنڈا محسوس تھیونڑاں تاں لازمی ہا۔ بُت دی ٹھنڈ نے کجھ دیر بعد اوندے دماغ  
کوں وی ٹھنڈا کر ڈتا۔ اُونے سردے والاں وچ انگلیں ماریاں تاں وال سک کراہیں آپس  
وچ ایوں جھمبڑے کھڑے ہن جیویں جو تھمبڑ نال جھمبڑے گئے ہو وں۔

بہاول پور ریلوے اسٹیشن دے وُنج وینڈر پلیٹ فارم تے بالکل سُنج ہئی۔ چنگے  
چو کھے فاصلے تے لگے ہوئے پیلے بلباں دی روشنی اتنی وی نہ ہئی جو کجھ فٹ تیں تاں سو جھلا  
کر سگدی پر ول وی اے احساس ضرور ڈیویندی پئی ہئی جو اتھ املک اندھارا کانتی۔ اتھاں  
رُکن والی جھیکڑی گاڈی اٹھ و بے دی مُکلا چکی ہئی۔ فیاض دا دل کیتا جو اتھائیں سُم  
پووے پر ول خیال آیا جو کہیں آئے گئے دی ”تو کون میں کون“ توں بچن کیتے ضروری ہے  
جو پرو بھرا تھی سُمے۔ اؤ اٹھی تے تھولا اگوں تے گیا کہ جنیں پا سے پلیٹ فارم مکد اپیا ہا۔ اتھ

کر نواب صاحب دے سیلون واسطے بہوں عالی شان عمارت نما پلیٹ فارم بنایا گیا ہا کہ  
جیو ہا پک عرصے توں بند پیا ہا۔ فیاض کوں ایندے اُزلے پاسے عام لوکاں دے پلیٹ  
فارم تے پک بنی بیچ نظر آ گئی۔ اُونے ہتھ نال ایندے تے پئی مٹی چھنڈ کی تے بانہہ  
سر ہاندی ڈے تے اکھیں چانوٹیونس۔ ہلکی ہلکی ہیل ایں پر و بھری جاتے بنی وی سوادہ  
ہئی تہوں سارے ڈینہہ دا تھکيا ترٹیا جو ان پوڑی پوڑی بند ردے تلا وچ لہندا گیا۔ بند راون  
توں پہلے چھیکو دی احساس بیگم سلمیٰ بدرالدین دی اُون ہکل دا ہا جو نہ اودھو کہ ڈیندی ہے تے  
نہ کہیں کوں دھو کہ ڈیون ڈیندی ہے۔

چترناں تے پوون والے ڈوں ترے بیتاں نے نہ صرف فیاض دیاں چیرکاں  
کڈھواڈتیاں بلکہ اویاں اُدھرتج تے اُٹھیا جیویں جو واقعی اُویگم سلمیٰ بدرالدین دی پگڑ وچ  
آ گیا ہووے۔ اکھیں گھلیاں تاں اوندے سامنے ہتھ وچ بیت اُلاری پلس داسپاہی کھڑا ہا  
جینے اوندے جاگدے سارا ای ڈوں چار بھکا ویں مندے ہکل چھوڑے۔ نال زپوزپ  
بیت وی تے سوال ایہو جو کون ہے، کتھوں آئے تے ایتھاں کیوں ستا پے۔ ایں صورت  
حال وچ اتنا پیہ تاں فیاض کوں وی لگ گیا ہا جو اے کم از کم سلمیٰ بیگم دی بھیجی ہوئی پلس کاسنی  
لہذا اُونے آپڑاں ناں ڈسایا تے ناں ڈساتے چپ کر گیا۔

سپاہی نے لکھ اتا پتا کچھیا پر اُونے ہرواری ایہو ڈسایا جو کئی زمانے ریاست دی  
وستی محراب والے وچ وسدا ہی پر ریاست کسکی تاں سُجان وی کھسیج گئی۔ ہُن چھڑا ناں  
ہے اوند، پتہ نشان، وستی مکان کوئی کاسنی۔ سپاہی اختا تھیا تاں اوکوں گردان کنوں ونھی  
تے ریلوے پلس دی چوکی تے گھسن آیا جتھ تھانیدارتاں دھوتی بنین پاتے کھڑے تے ستا  
پیا ہا پر حوالدار گرسی تے بیٹھا گھلاں کھاندا پیا ہا۔ فیاض نے چوکی دی کندھ تے لگی گھڑی  
تے ناؤم ڈٹھا، رات دا پک وجد پیا ہا۔ سپاہی دے بوٹاں دے کھڑکے نال حوالدار نے اکھ

ہئی تاں سپاہی دے نال ہک مودی کوں ڈیکھ تے خوش تھی گیا جو روٹی روزی آگئی۔  
 ”وہوئے کیکوں ونھی آئیں نازوآ“.....

”سئیں مشکوک ہے، سیلون والی سائیڈ تے کہیں واردات دے چکروچ ہا۔“  
 ”اچھا اچھا اچھا..... تے جیڑھیاں اے ترے چار چوریاں تھن سیلون وچوں  
 قیمتی سمان دیاں، لازمی ایہو بھین داچڈ ہوسی۔“ حوالدار اُنھی کھڑا تھیا تے فیاض دے نیڑے  
 آتے اوندے منہ تے ڈوں چار تھپے رکھ ڈتونس ایس طرحاں جو اوندے منہ وچوں خون  
 سمن پئے گیا۔

”وہوئے نازوآ..... اے تاں میکوں چور نی لگدا۔ اے تاں کوئی گولا ملوک ہے  
 جیڑھا ڈوں تھپ ای نی جھل سکیا میڈے۔“  
 ”اوسیں وڈا بھین تڑیک ہے، آپنا پتہ نشان ای نی ڈسیندا۔“  
 ”اچھا! کیا آہدے۔“

”ایہو جو پہلے تاں ریاستی ہا، ہُن ریاست کھسی گئی، نہ پتہ ریہا تے نہ نشان۔ نہ  
 وستی نہ مکان۔“

”اچھا!..... اے بھاڑی کوئی شاعر تاں نی؟“۔

”پتہ نی سئیں.....“

”اچھا توں گھن جُل ایکوں پچھاڑے، تھولا ایندا آڈرتاں کروں ناں۔ اتھ  
 چیکو باکڑ کیش تاں صاحب دی بندر خراب تھیسے۔“ حوالدار دی گالہہ سُن تے سپاہی نے  
 فیاض کوں ولدا گروان توں پکڑیا تے اوکوں چوکی دے پکھلے دروازے کنوں باہر دھک  
 ڈٹس۔ اوندے وچن توں بعد حوالدار ای باہر پچھاڑے ڈولنگھ گیا۔

اَدھے پونے گھنٹے بعد پکھلا دروازہ کھلیا تے حوالدار ہوکدا سکدا، نازو سپاہی

کوں پُزداؤ لدا کُرسی تے آن ڈٹھا۔ اوندے چکھوں چکھوں ناز و سپاہی وی اندر آیا تے  
حوالدار دے سامنے لاتھی میز دے ڈو جھے پاسے آتے کھڑ گیا۔

”آکھیا نہ ہم اے چور کائنی، میں گھانی کپیا ساری زندگی، پلس بازی کیتی ہے۔  
ایہو جے احمق کئی و دن تھے کہ جہاں دے دماغ وچ ہالی وی ریاست وڑی کھڑی ہے۔  
انہاں کوں عقل کائنی جو ریاست وان وٹیندی گئی تے نواب وی۔ ہُن اے و ن یونٹ ہے،  
ایہوں انہاں بھڑویاں دا پتہ نشان ہے لیکن اے تیتے وقت نال ٹرن دی بجائے وقت دے  
چکھاویں نال ٹرن۔ اے فی سوچیندے جو وقت کوں ریورس گیر لگ پیا تاں بیا کہیں کوں  
کچھ فی تھیونڑاں، ایسے خود مندھے ویرسن۔ گھن آ ایس بھاڑی کوں اندر جو باقی دی رات  
صاحب کوں مروڑے ڈیوے۔ سویرے ایکوں احمد پور والی پہلی بس تے بلہاڈیویں۔ ہونہہ  
..... رات ای خراب کیتی ہس بھاڑی نے تے کھیسے وچ چھڑے چھی آنے۔ چھلڑو جو  
ہووے ہاپک ادھ، کم از کم روزی تاں بن ونجے ہا آج دی۔“





(31)

ساری رات تھانیدار کوں مروڑے ڈواؤن توں بعد ڈونجھے ڈینہہ سویرے  
 سویرے فیاض کوں ریلوے پلس دی چوکی توں ایں طرحاں کڈھیا گیا جو ناز و سپاہی خود دُوج  
 تے او کوں احمد پور والی پہلی لاری وچ بلہا آیتے کنڈیکٹر کوں ہکل ڈے چھوڑیس جو احمد  
 پور توڑ توں پہلے ایکوں اڈے اڈے تلکُن نی ڈیونڑاں۔ لاری ٹری تاں فیاض کنوں اکھیں  
 کھولنا مشکل تھی گیا۔ ساری رات داجگارا تے مروڑیاں دی مشقت کیا گھٹ ہئی جو ٹھڈی  
 ہوادے جھولیاں نے اوندے دماغ تک کوں سُماڈتا۔

سُمن توں پہلے اوندے ذہن وچ گھٹ گھٹ کریندا احساس ہالی وی رکتھائیں  
 جاگدا ودا ہا جو پلس اوندے جیسے بکھے ننگے تے عذاب ملزماں کنوں جان کیویں چھوڑ دیندی  
 ہے۔ نہروچ وڈھدیاں لاوارث لاشاں کوں آپڑیں تھانے دی حدود توں اگی تے دھکُن  
 تے رولے دی ماری واردات کوں بے دے گل مارن سانگے وقوعے دی جاتے تھانے دی  
 حد بندی داجھیر اکھڑا کر ڈیون کوئی نویں گالہہ تاں نہ ہئی۔ فیاض کوں لکيا جو اودی نہروچ

لڑھدی کوئی لاوارث لاش ہے کہ جیکوں بہاول پوردی ریلوے چوکی دی پلس نے دھک  
کراہیں تھانہ احمد پوردی حدود ڈوروانہ کرچھوڑے۔

لاہندھیاں چڑدھیاں سواریاں دی چیکو باکڑ دے باوجود سٹے ریہے فیاض دی  
اکھ کھلی تاں کنڈیکٹر خانپور مرچاں والے اڈے دی آواز لیندا پیاہا۔ خانپور مرچاں والا،  
احمد پورتوں کوئی اٹھ ڈاھ میل دے پندھ تے پک چھوٹا جیہا شاپ ہاتھوں نور پور نورنگا تے  
احمد پوردے درمیانی علاقے دیاں سواریاں لاہی چاڑھی کیتی رکھیندیاں ہن۔ فیاض نے  
سرچھنڈ کیا، چیتا گجھ جاتے آیتے اُونے اپنے آسوں پاسوں دیدھنوائی۔ لاری دیاں سھے  
سیٹاں نہ صرف پُر ہن بلکہ گجھ سواریاں آپڑیاں بکریاں سودھیاں سیٹاں دے ادھ وچلے  
رستے تے کھڑیاں ہن تھیاں۔ پک بکری نے مینگنیاں کرتے پکھلی سواری دے چولے  
دھوتی تے مینا کاری دی کوشش کیتی تاں ڈوہیں سواریاں وچ گو سے بٹی ایں طرحاں شروع  
تھی جو بکری کوں مینگنیاں کرنیاں و سرگیاں۔ نال دیاں لوکاں نے اُناں کوں چھڑواتاں  
گھدا پر کر احمد پور دا ڈاڈا آون تک لگی رہ گئی۔

فیاض ایں سھے تماشے توں بے نیاز سوچیندا ویندا ہا جو تقدیر اوکوں کیویں ولدا احمد  
پور چائی ویندی ہے۔ جیر دھے شہر وچوں اوکوں ڈاھ سال پہلے پلس دے ذریعے شہر نکالا ملیا  
ہا اُتھائیں ولدا او پلس دے حکم تے ویندا پیاہا۔ پہلے پلس نے اوکوں زورے مسائیں  
بہاول پوردی جیل وچ رکھیا تے ہن اوند احق ہوں بہاول پوردے ریلوے اسٹیشن تے پئی  
پک بیچ تے وی نہ منیا ویندا پیاہا۔ جے حالت اے ہے تاں او کیویں تھی گیا آزاد ملکہ دا  
آزاد شہری۔ ایں آزاد ملکہ وچ تاں لوکیں دی تقدیر دے سھے فیصلے انگریز دور طرحاں ہن  
وی او ہے کریندن جہاں دے ہتھ وچ دگا ہئی۔ اُناں دی مرضی جیکوں اتھ راہون داحق  
ڈیون یا گھس گھنن۔

بس دی اڈے تے بریک لگی تاں بیاں سواریاں دے نال فیاض وی تلے لہہ کھڑا  
 تھیا۔ اوکوں سمجھ نہ آندی پئی ہئی جو کیتے ونجے۔ ڈینہہ دا پہلا پہر وی چنگا بھلا چڑھ چکيا ہا۔  
 اوکوں بکھ محسوس تھئی تاں اوندا ہتھ وِلدا کھیسے وچ گیا۔ پر ہُن اے کھسا خالی ہا۔ پیساں دا  
 بھانج پلسیاں کڈھیا بھانویں بس دے کنڈیکٹریا کہیں گنڈھ کپ نے، اُنت تاں ہکو جو اوندا  
 کھسا خالی۔ فیاض دیاں اکھیں آپ کنوں آپے پُس گیاں۔ اوشہر جیندیاں بزاراں کوں  
 اونے پہلی واری پو دے مونڈھے تے بہہ تے ڈٹھا ہا اُج اوندا دے واسطے اُملک پرایا ہا۔ کتھ  
 ونجے، کیندا مہمان تھیوے تے کون اوندا کیتے سِکدا بیٹھا ہوسی۔ اوکوں آپڑیں ناں تھیا ہویا  
 حکیم رام لعل دامرہی والا مکان یاد آیا جیزہا اوندا دے ناں ہوندے ہوئے وی ہُن اوندا نہ  
 ریہا ہا۔

کچھ دیر ایڈے اڈے تڑتڑ ڈیکھن توں بعد اوندا دے قدم خود بخود تحصیل بزار ڈوہڑو  
 پئے۔ تحصیل بزار دے ادھ وچ تھانے دی عمارت نظر آئی تاں اوندا دے قدم تکھے تھیون دی  
 بجائے مٹھے تھی گئے۔ سامنے پکوڑے والے مشہور کھوکھے تے سویل پاروں حلوہ قتلما تیار  
 تھیندا اپیا ہا جنیں ویلے جو شام کوں اتھ پکوڑے بنزائے ویندے ہُن۔ پر چنگی بھلی بکھ دے  
 باوجود خالی جیب فیاض کول ایندے علاوہ بیا کوئی رستہ نہ ہا جو چپ کرتے اتھوں لنگھ ونجے۔  
 لہذا اُونے ایہو کیجا۔

پُرانی تحصیل دا دروازہ لنگھ تے احمد پور دی غلہ منڈی شروع تھی ویندی ہئی۔ گڑ،  
 شکر، دیسی گھنڈ، کنک، باجری، جوار، مکئی، لال مرچ تے بنی اجناس دی رلی ملی خشبو تے  
 اُناں دیاں ادھ گھلیاں بوریاں دیاں قطاراں ہر دکان دے اگوں تے اُناں دے ادھ وچ  
 پھر دا آڑھتی دانسی جیندے آوَن وِجن نال مٹھے دیاں بوریوں توں وَل وَل اڈ دیاں  
 باہندیاں مکھیاں رَل کراہیں منڈی دا ماحول بنزیندے پے ہُن۔ فیاض منڈی دے اگوں

لنگھن پیا تاں ہک ڈاندریڑھی دے نال اٹھ ڈاہ بوریاں لڈیجن کیتے پیاں ہن جیندے پاروں رستہ بند تھیا پیا ہا۔ بیاں لوکاں دے نال فیاض وی کھڑ گیا جو ریڑھی ہٹے تاں او وی اگوں ٹرے۔ ایں آن وچ ریڑھی بان نے فیاض کوں الوایا جو اوہو بوریاں پکڑواتے ریڑھی اُتے چار کھواوے۔ فیاض نے اگوں ودھتے ہتھی ڈتی تاں پنج منٹاں وچ بوریاں ریڑھی اُتے ہن۔ بوریاں لڈواتے فیاض ہک پاسے تھیا تاں نال کھڑے آڑھتی دے منشی نے اوندے ہتھ تے ہک پوانی چارکھی۔ فیاض نے حیران تھی تے منشی ڈوڈھتاں منشی رکھا تھی گیا۔

”چل چل ایہو کافی ہے۔ ہک ریڑھی دی پلے داری دا بیا چوکھا مل ہوندے؟“ فیاض ہن سمجھیا جو منشی اُوکوں پلے دار سمجھدا پیا ہا۔ دل کیتا جو پوانی منشی دے منہ تے مارے پر بکھ دے شدید احساس نے اُوکوں پوانی کھیسے وچ پاؤن تے مجبور کر ڈتا۔ جھکی جھون گھت تے او واپس ولایت تھانے دے سامنے حلوہ پڑی دے کھوکھے تے آتے کھڑ گیا۔ محض کجھ لکھنے دی مشقت توں بعد ہن او اپنی مرضی دا زراں کر سکدا ہا۔ ترے آنے دی حلوہ پڑی کھاتے اُوکوں ایویں لگدا پیا ہا جیویں سارے جہان دار زق کھا گھدا ہووے۔ پیٹ وچ کجھ گیا تاں بُت باراتے اکھیں خود بخود بند تھیندیاں گیاں۔ فیاض کوں بیا کجھ نہ سمجھیا تاں اُوکھوکھے دے پچھلے پاسوں پئی ہک پوانی گُرسی تے باہون کنوں زیادہ پُرس پیا۔ ہند راکا تاں پہلے ہا پیا سو گھو گھ ہند راون وچ لکھنے دی نہ لکھا۔

جیئیں ویلے اوندی جاگ تھئی تاں سمجھ ادھے اسمان تے، اُتے دُھپ اوندے پورے بُت تے ہئی۔ پورا وجود بگھر و پانی تھیا تاں ترے کنوں منہ سِک تے لکڑ۔ فیاض تیکھے تیکھے اٹھی بیٹھا۔ حلوہ پڑی والا کڈ وکڑاں کھوکھا بند کرتے وُنج چکيا ہا۔ پیون دے پانی دی تلاش وچ فیاض نے ایڈے اوڈے دید بھنوائی تاں تھانے دے نال ای ہینڈل والا نکلا

نظر آ گیا۔ ہک ہتھ نال نکا گیر تے ڈوجھی بک نال پانی پیون دا سواد ای کجھ بیا آیا۔ جتھ  
 تریہے لٹھی اُتھ بُت وچ تھیون والی خُشکی دا احساس وی ختم تھی گیا۔ کھیسے وچ ہتھ مار لیس  
 ، پلے داری دی مزدوری دا باقی دا بچہ اہک آنہ ہالی ہاپیا۔ اُونے آنے کوں تلی تے رکھ تے  
 غور نال ڈٹھاتے دل وچ سوچس جو آج شام کنوں پہلے ایں آنے کوں روپیہ ضرور  
 کرنے۔ اے سوچ تے اُو وَلدا غلہ منڈی ڈوڑ پیا۔ اگوں لانگھے دے وچ ای سویر والا منشی  
 کھڑا ہتھیا۔

”وئے کیڈے ٹر گیا ہاویں بھکن آں۔ سویر دی واند ای نی ملدی پئی۔ ہالی ڈاہ  
 ریڑھیاں رَس کٹ گز دیاں بیاں لڈا واونن۔ ڈوں پکے دار اُوڈے پہلے کماندے چن، آٹُر  
 تیکھے تھی تے بوریاں کوں پکڑا مرا“۔ منشی پکے ساہ وچ ساری گالہہ مُکا گیا۔ فیاض کوں اوند  
 بھکن سڈنا بہوں بُرا لکھا پر ڈھیر کاوڑ وچ آپڑاں نقصان ہاتھوں گالہہ مچا گیا تے اگوں ہاتھی  
 تے بوریاں کوں گنڈ تے چاون کیتے چاڑھی نال لگ گیا۔

شام تھیون کنوں پہلے فیاض دے کھیسے وچ ہک روپے دی بجائے ڈھائی روپے  
 تاں آچکے ہن پر اوندے بُت دالوں لوں ملے وانگ ڈکھدا پیا ہا۔ منڈی دیاں دکاناں بند  
 تھیاں تاں اُو اتھائیں ہک دکان دے باہروں بھٹے تے لمبا تھی گیا۔ کپڑے تاں میلے تھے  
 سو تھئے چیل گنڈاوی ہک تھی گیا۔ منڈی دالانگھا ویلا تھیا تاں شام کوں کھاوون پیون دیاں  
 ریڑھیاں تے چھابے لاؤن والے کئی لوک اڈوں اڈوں ایویں کٹھے تھی گئے جیویں جو ایں  
 قسم دی قبضہ گیری دی تانگھ وچ مورچہ لاتے بیٹھے ہووَن۔ قیے دیاں ٹکیاں، آلو والیاں  
 ٹکیاں، سیخ کواب، زیرے دیاں بوٹیاں، سری پاوے، اوجھری، پکوڑے تے دال منگ  
 دیاں ریڑھیاں نے اتنا رَش مچایا جو لوکیں دالنگھڑاں محال تھی گیا۔ ریاست دے بیاں  
 شہراں طرحاں احمد پور وچ وی شام کوں ردھڑاں پکاوڑاں ذالیں کیتے زری آلس تے

عذاب توں گھٹ نہ سمجھیا دیندا ہا تہوں ہر بندہ گھر دیندیاں ویلے ہیں کوشش وچ ہوندا جو شام  
دا کھا جا بزاروں گھن تے ونجے۔ جے خمیس دی شام ہوندی تاں مٹی دیاں گھوگھڑیاں وچ  
راہڑی ملائی دا ٹھنگو رسوایا ہوندا جیندے باہروں ریتل دے ہار ویڑھے ہوئے ہوندے  
ہن۔ جیڑھے لوک اُتھائیں ریڑھی تے کھاؤن پسند کریندے تاں آپنی آپنی چھمی چا کرہیں  
آڑھتیاں دیاں دکاناں دے اگلے پھٹیاں تے چڑھ باہندے۔

آپووانے کھاجیاں دی رلی ملی خشبو نے فیاض دی بکھ کوں بگھایا تاں اودی  
اٹھی تے بھٹے تے تھی بیٹھا۔ پیسے پکے پئے تاں پون کرنی اوکھی تھی گئی جو کیا کھو تیجے۔ گجھ دیر  
سوچ تے اُونے ڈوں روٹیاں تے زیرے دیاں بھنیاں بوٹیاں رکھوایاں تے پانی دا ترماؤ  
گلاس بھرتے ولدا پھٹے تے آن بیٹھا۔ ڈھڈ روٹیاں گیاں تاں بند رنے آن دیاں دیر نہ لاتی  
اے فیاض چھمی گلاس واپس کیجے بغیر اُتھائیں لم لیٹ تھیندا گیا۔

اے فیاض دی حیاتی دانواں پکھ ہا۔ پلے داری وچ نہ مزدوری دی کمی ہی تے نہ  
آمدن دی۔ اُونے پٹھان چوکیدار نال یاری چا گندھی تے منڈی وچ ای پک کرائے دے  
چوبارے دا بھائی وال بن بیٹھا۔ ڈوں جوڑے کپڑیاں دے وی گھن گھدے تے سُمن کوں  
کوندرا لگولا پڑ چھاوی۔ زندگی آسان تھی تاں اوساریاں گاہیں ولدیاں یاد آون پئے  
گیاں جیڑھیاں زندگی کوں قائم رکھنے دی کوشش وچ بھل بھلا گیاں ہن۔ پکے داری دی  
مشقت ہڈاں وچ لٹھی تاں بُت دی پچیر وی گھد دی گھد دی اُملک مُک گئی۔ ڈیہ نہ کوں  
تاں فرصت گھٹ ملدی پر شام تھیندے نال ٹکر مانی توں بعد جیویں جو اُو پڑ چھ تے لیڈا  
ساری گزری ویہانی منڈوے دی فلم بن تے اکھیں دے اگوں آویندی۔ روز فیاض کوں ایہا  
ہکا سوچ ول ول زچ کیتی رکھیندی جو ساری حیاتی سُجھان دی تلاش وچ در بدر تھیونڑن  
والا کیویں بے ناں نشان کرتے آپنے شہر دے پک کوچے وچ سٹ ڈتا گئے۔ بے وس اتنا

تھیا جو کہیں کوں آپڑاں ناں تک ڈساؤن دانہ ہا، منہ ڈکھاؤن دانہ ہا، تہوں ڈاڑھی ودھا،  
ویس وٹارا ہندی ساہندی سُجان وی خود مُنچ کرتے کیڈا سوکھاتے بے چٹا تھی گیا ہا۔ کیا بے  
ناں نشان تھیونزاں وی ہک سُجان ہے! کیا آپنے شہر وچ بے وسیلہ تے لاوارثا تھی تے  
راہونزاں وی کہیں منزل تے کہیں مقام دے حصول دی کوئی شکل ہے؟

فیاض کوں کتھاؤں کوئی جواب نہ ملدا تاں اوکوں آپنے آپ کنوں کریت  
تھیون لگ پوندی۔ کیا دنیا تے ایں وی تھیندا ہوسی جو انساناں دی ہک پوری نسل کوں نسل  
انسانی دے تسلسل دی تختی توں ایں طرحاں کچے پُرنیاں آلی کار مٹاؤ تاو بنجے جو نہ اُناں دی  
کتھائیں قبر بنے تے نہ کہیں مسوان وچ بک سوا دی نظرے۔ لیکن کیا کرتے ایہو حقیقت  
ہئی۔ فیاض دے نال دی پوری نسل آپنی شناختی دے لحاظ نال ایں طرحاں فنا تھی جو مُنڈھ  
لمبھدا ہاتے نہ پاند۔

فیاض دے آسوں پاسوں تعلقات دی ہک نویں دنیا آباد تھی چکی ہئی۔ ترے  
چار مہیدیاں دی مسلسل محنت نال اُونے اتنے پیسے کما گھدے جو ہُن کئی ڈینہہ کم تے نہ وی  
ونجے ہاتاں بکھ نہ مردا ہا۔ آپنے مخصوص حلیے تے اللہ لوک قسم دی طبیعت دے سبب او کہیں  
نال گھلے ملے بغیر وی کہیں کوں او پرانہ نظر دا ہا۔ عاجزی تے انکساری نے اوندے ظاہر کوں  
ایڈا ملائم کیتا جو منڈی دا ہر آڑھتی خواہش کریندا ہا جو فیاض اوندی دُکان تے کم کرے۔  
اوکوں وی گمنامی دی ایں زندگی وچ انوکھڑی چس آؤن لگ گئی لیکن اتجھی زندگی جیندا کوئی  
مقصد نہ ہووے اوندے کیتے ہر آؤن والے ڈینہہ دے نال گزارنی مشکل وی تھیندی  
ویندی ہئی۔ ایں ”ہوند تے نہ ہوند“ دی کیفیت نے اوکوں زندگی دے نویں فلسفے دوجہات  
کرا چھوڑی ہئی جو زندگی کہیں سُجان دے بغیر تاں ول وی گزارنی وُنج سکی ہے پر کہیں  
مقصد دے بغیر کوئنا۔ فیاض دی حیاتی دا مقصد کیا ہا ایندی سمجھ اوکوں ہالی تک نہ آندی پئی

ہی۔ مقصد و سارنا تاں کتھ رہ گیا، سُجنا کیتے زندگی کوں بے سُجنا کر تے دی نہ تاں اوکوں  
زندگی دے مقصد دی بھاند ملی تے نہ ای اوکوں کڈ ہائیں ایندا خیال آیا۔

اوں ڈیہہ وی ڈو پہار ڈھلی تاں آڑھتیاں دیاں مُتھیاں نے دُکاناں بند کرن  
کیتے اجناس دیاں منہ کھلیاں بوریاں اندر رکھواونیاں شروع کیتیاں۔ تریہہ لگی تاں فیاض  
دی تحصیل دروازے ڈوٹر پیاء جتھاں پک بڈھا مہاجر شربت وچن کیتے پک بہوں وڈی  
برما و صراحی کنڈ تے بدھ تے چائی ودا ہوندا جیندے ڈھڈا تے چڑے دی کوئی پیٹی نمائے  
چیل تک ولٹی ہوئی تے اوندے وچ شیشے دے لمبے لمبے گلاس بھسے ہوئے ہوندے۔ ”پی  
پک آنے دا گلاس“ دا ہوکا لیندا بانڈ کی پوشاے کردار سویر توں شام تیں اتھائیں کھڑے  
کھڑے گزار ڈیندا۔ فیاض نے آنہ ڈے تے شربت دا پک گلاس گھدا تے منڈی دے  
لانگھے دے سامڑیں جتیاں دی وڈی دُکان ”گلزار بوٹ ہاؤس“ دے بھٹے تے بٹھ کراہیں  
پیوڑاں بہہ گیا۔

بزار دے ریش تے شور شرابے وچ کہیں نکلے جے بال دے درد کنوں رُوون تے  
چنگھن دی آواز ایں طرحاں آندی پئی ہئی جیویں جو اوندے کول اُچار وون دی سکت مک  
گئی ہووے۔ فیاض نے ایڈے اوڈے ڈٹھاتاں پک دیہاتی نینگر ”گلزار بوٹ ہاؤس“  
دے بھٹے دے ڈوجھے پاسے جھولی وچ کوئی سال کھن دا بال سُمائی زور زور دالڈیندی بیٹھی  
ہئی۔ اوندیاں اکھیں وچوں تاں جھر جھر ہنجوں و ہندے پئے ہن پر اوندے بال دے سر  
تے مکھیاں ایویں یلغار کیتی پیاں ہن جیویں جو گرو شکر دی بوری گھلی پئی ہووے۔ اے سب  
گجھ ڈیکھ تے فیاض دا ہاں ملیج گیا۔ بال ضرور بیمار ہا۔ اوندادل کیتا جو اٹھی تے نینگر کنوں  
حقیقت گھنے پرؤل اے سوچ تے لاغرض تھیون دی کوشش کیتس جو پتہ نی اوکیا سمجھے۔

اتنی دیر وچ پک گھرو پریشان صورت، ہتھ وچ دوا دیاں شیشیاں وٹھی کراہیں



اُوں چھوہر دے نیڑے آن بیٹھا۔ آپڑیں اٹھن باہون توں لگدا اوند اچھے ہا۔ اوندے آون تے چھوہر نے بال دے سر توں ملل دا کپڑا ہٹایا تاں پتہ لکيا جو اونداسارا سر ای گلیاتے بھت بھت تھیا پے تے گلے ہوئے چم وچوں پوں واہندی پئی ہے۔ ہُن تاں فیاض کنوں نہ ریہا گیا۔ اُو اٹھیا تے گھرو کوں وَنچ تے الوائیں جو اے تکلیف کڈن دی ہے۔ ہمدرد کجھ تے گھرو نے اپنے پُتر دی بیماری دی ساری حقیقت کھول سُنزائی۔ کیمڑی دواتے کیمڑا علاج ہاجیزھا اُناں نے ہُن تیں نہ کیتا ہا پر ہتھوں اگلی دی چنگلی تھیندی ویندی ہئی۔ اُج اُو بخاری میڈیکل اسٹور دے بخاری صاحب کوں ڈکھاتے آئے بیٹھے ہُن۔ اُناں نے بادل کٹورے وچ چچی اَنگل وی گھول تے پلائی ہئی تے بندشیشی وی ڈتی ہئی۔ آندے آندے دم وی کیتا جو تھی سکدے کہیں نے بھل دھاگہ کیتا ہووے۔ فیاض نے بندشیشی گھن تے ڈنھی تاں سر پکڑتے بہہ گیا جو ایس دوا دابال دی بیماری نال کیا تعلق۔

”میڈی منوتاں ایس دوا کوں چھوڑ واین دے نال آرام نی آونڑاں۔ ایندے سر تے بگن بوٹی دالیپ کرو، چنگی طرحاں گھوٹ تے۔ جنیں ویلے لیپ آپے سک ونبے تاں لہا چھوڑو۔ ترے چار لیپ توں بعد بال دے سر تے نواں چم آون شروع تھی ویسی۔ تے ول خیراں مہراں۔“

”بگن بوٹی؟..... اے کتھوں لھسی“۔ گھرو نے حیران تھی تے پچھیا۔

”عام لھدی ہے، کہیں وی نہر دے بنے تے ونچ پیا، دَرَب طرحاں جائی پئی ہوئی۔ پٹ تے بوری بھر رکھ تے ول ڈکھ ایس دوا داجادو“۔ فیاض نے نسخہ تاں ڈس چھوڑیا پر اُوں ذال پئے ڈوہائیں دیاں صورتاں تے کوئی سمجھا تاثر نہ ہا جو اُناں کوں یقین دی آئے۔ اُو اُتھوں ولایا تاں ولدا آتے آڑھتی دے پھٹے تے باہون دی بجائے آپڑیں چوبارے چڑھ گیا تے مونجھا تھی کراہیں پڑجھے تے سُنا ناں، بلکہ ڈھے پیا۔ اُو کوں لکيا جو

حکمت دا چنگا بھلا کسب سکھن توں بعد اوند ایں طرحاں پکے دار بن کراہیں بوریاں ڈھوون  
تے لگ وںجواں خود آپنی حیاتی تے ہک مقصد دی توہین ہئی۔ کتھاں خلق خدا دیاں تکلیفاں  
کوں رفع کرن دا ہنر تے کتھاں محض آپنا پیٹ پالن کیتے خود غرضائی دی خجالت۔ حکیم رام  
لعل دے مطب تے ساری گزری ویہانی اوکوں ایویں لگی جیویں کل دی گالہہ ہووے۔ کتنی  
عزت ہئی جو پردے دار گھراں دیاں عورتاں وی آپنی گسنی اوندے ہتھ وچ ڈے ڈیندیاں  
ہن تے کتھاں آج دی پلے داری کہ ہر آندا اویندا گالہہ مندا کڈھ تے ویندے۔ حتیٰ کہ آج  
اوندے وچ اتنی جرات وی نہ ہئی جو سر پگے بال دی ماء کنوں اتنا وی کچھ سکے جو بال کوں  
تکلیف کیا ہے۔ فیاض دا دل کیتا جو دھاڑاں مارتے رووے۔ اتھوں تھوڑے جے پندھ  
تے ہاتھی بزار تے ہاتھی بزار دے نال مڑھی تے مڑھی دے نال تلسی دا گھر جیڑھا ہن اوند  
آپنا گھر ہا پر اوندے وچ اتنی ہمت نہ ہئی جو آج وںج تے اوں گھر دی گنڈی کھڑکا سکے۔ ایہو  
حال دیرے نواب دی بزار وچ مطب دا ہا۔ اتھ وی فیاض دی جرات مٹکا چکی ہئی جو مطب  
تاں کیا، دیرے دی بزار وچوں وی لنگھ سکے۔ دل نے آکھیا جو ول دی حکمت شروع کر ڈے  
پر جیب وچ چار پیسے ہوون دے باوجود او حوصلہ کتھوں گھن آوے ہا جو جیڑھا جو اوکوں دنیا  
دے سامنے سینہ کڈھ تے حیاتی گزارن دا ہر ڈے سکے ہا۔ جیڑھی جرات اتے حوصلہ  
فیاض کنوں اوندے والدین دی مخالفت، حکیم رام لعل دی شروع شروع دی بے رخی،  
پاکستان بنن دے بعد دے ڈینہاں وچ حوصلہ شکن وارداتاں اتے ڈاھ سالاں دی جیل  
نہ کس سگی اوسھو کچھ محض چھی مہینیاں دیاں پلاولیاں نال بیگم سلمیٰ بدرالدین نے ایں طرحاں  
نہیڑ گھدا جو اوکوں خبر ای نہ تھئی۔

اگلے ترے چار ڈینہہ فیاض کم تے نہ گیا۔ آڑھتیاں تے پکے داراں نے ول  
دل کچھو ایا پر فیاض کسے طبیعت خراب تھیونز توں علاوہ بیا کوئی جواب نہ ہا۔ ہوندا وی تاں

کیا ڈسیندا۔ کوئی اپنا گنج وی ڈکھیندے۔ کیوں ڈسے ہا جو ہڈ پیر سلامت ہوندیاں وی دل  
بھنیا کرے تاں کیا کرے۔ اوند اچو بارے دا بھائی وال پٹھان چوکیدار وی انج پریشان جو  
چنگے بھلے چو بکے کون تھی کیا گے۔ ڈوں چار ڈینہہ بے گزرے تاں آپنے آپ دی بے  
اوقاتی کنوں اختا تھیا فیاض چو باریوں تلے لہہ کراہیں قاضی صالح محمد آڑھتی دے پتھارے  
تے آن بیٹھا۔ ڈاھ یاراں و بے وی اُوکوں بکھتاں ہئی پر نران کیتے بغیر وی کھاؤن پیون  
تے روح رجوع کو نہا۔ سویر دے مزدوری تے لگے پلے داروی اُکرس کنوں پگھر و پانی تھی  
کراہیں ساکدے و دے ہن۔ فیاض کون و اندا بیٹھا ڈکھ تے لالوتے بلاول پلے داروی  
بوریاں ڈھو کراہیں اوندے کول آتے ساہ کڈھن بہہ گئے۔ ایں توں پہلے جو حال حویلا، بٹ  
کڑاک تیں ویندا ہک بال والی تریمت تے اوند اگھر والا فیاض دا پتہ پچھدے پچھدے  
اُتھ آئے تے اُوکوں سیان تے اوندے پیراں دے وچ ڈھ پئے۔ نینگرتاں رووے سو  
روے اوند اگھر و پئے وی روند اپیا ہا۔

فیاض تے اوندے نال بیٹھے لالوتے بلاول پلے دار پہلے تاں و بلے جو تھی کیا گئے  
پر جئیں ویلے جاتونے جو ڈوہیں ذال پئے دار و ون خوشی دار و ون ہے تاں کم از کم فیاض دی  
جان وچ جان ضرور آئی۔ اُناں ڈسیا وی سہی تے ڈکھایا وی سہی جو بکن بوٹی دے کجھ ڈینہاں  
دے لیپ نال بال دا املک گلیا پیا سر کیوں ٹھیک تھی گئے۔ نال بیٹھے پلے داراں کیتے وی  
اے گالہ بہوں عجیب ہئی جو فیاض پلے دار ایڈا سیا نا حکیم کڈن توں بن گئے۔ اے رولا کھولا  
ڈکھ تے راہ ویندے گاہک، آڑھتیاں دے منشی اتے خود کئی آڑھتی وی کٹھے تھی گئے۔ ہن  
جتنے منہ امتیاں گالہیں۔ کوئی حیران، کوئی مسکے تے کوئی ٹھٹھہ مخول کرن لگ پیا۔

فیاض نے تکھے تکھے اُناں ذال پئے کوٹورن دی کوشش کیتی پر اوندے کیتے گھن  
آیانڈ رانہ ڈتے بغیر و نجن داناں ای نہ گھندے پے ہن۔ نذرانہ کیا ہا، کندورے وچ ویرھی

ہوئی مٹھی ڈولی روٹی ہی تے نال کجھ پیسے۔ فیاض نے بہوں زور لاتا پر اناں کوں کون نالے۔ جھولیاں چا چا دعائیں وی ڈیونز تے نذرانہ ڈیونز دی کوشش وی۔ ایں ساری صورت حال کوں لوکیں تماشہ بنڑا گھدا۔ ایں توں پہلے جو گرم ڈینہہ دی اکرس نال ننگر دیاں باتھاں تے چو یا بال وی زانوزاف تھیندا، فیاض نے گھبرودے ہتھ وچوں جو ہا گھدا تے اُتے چو بارے تے چڑھ گیا۔

جھینبو رومال وچ چار ڈولیاں ٹکڑے تے ہتھ وچ ہگ روپے دے پُچڑے پُچڑے نوٹ دی ولینوی ہی۔ فیاض دیاں اکھیں وچ آپ کنوں آپے بنجوں تر آئے۔ اُونے شکرانے دے انداز وچ اُتوں تے ڈٹھا، اوندے سر تے نیلی چھت دی بجائے کانے دیاں پتلاں دی چھت ہی پر سامنے لاتھیاں چار مٹھیاں ڈولیاں روٹیاں اُج توں اوکوں اُون رزق دی علامت وانگ لکیاں کہ جیندے پچھوں انسان کوں خودنی بھجواں پوندا بلکہ اُو خود اُون تیں رُتے آندے۔ اوندی تلی تے پیا ہک روپے دا پُچڑوں پُچڑوں نوٹ وی مٹھدا نوٹ نہ ہاں بلکہ اوندے ہوون دا ثبوت تے اوندی ادھورانی، وِسری ویہانی شناخت دا اوڑاں ہا۔ فیاض ڈوہائیں ہتھاں نال سر پکڑتے پڑچھے تے بہہ گیا۔ ہجوں ہن جو رکن دا نہ ای نہ گھندے پے ہن۔ لوکیں دا اوندے تے کھلن تے اوندے حکیم نہ ہوون دا مذاق اُڈاون ای اوندے سمجھدار حکیم ہوون دی دلیل بن گیا ہا۔

پتہ نی کیہڑے ویلے فیاض دی اکھ لگ گئی تے او اُوئیں اُتھائیں پڑچھے تے سُم گیا۔ مدت بعد اوکوں صحیح معنیاں وچ بندر آئی ہی جیویں بلپن وچ اوما دی جھولی وچ سُمدا ہوندا ہا۔ خواباں دا پک نہ رکن تے نہ ملکن والا سلسلہ ہا کہ جیڑھا اوندی بندر کوں پک پک پوڑی جھکان ڈو گھدی ویندا ہا۔ ایں توں پہلے جو عصر تھیوے ہا، اوندے چو بارے دے بھائی وال پٹھان چوکیدار نے اوکوں پٹ اٹھایا۔

”اٹھو مڑا حکیم صاب تمہارا مریض آئی ہے۔“ فیاض کوں پہلے پہلے تاں گجھ نہ  
 سنجھیا پر جئیں ویلے تھوڑا جیہا اشاک تھیا تاں ڈٹھس جو ترے چار عورتاں، ترے چار بندے  
 چو بارے دے دردے باہروں پوڑیاں وچ کھڑن تھئے۔ پٹھان نے فیاض کوں حیران ڈٹھا  
 تاں ول بولیا۔

”یہ سب تم سے اپنا علاج کرانے آئی ہے۔ ماڑا دیکھو نہ ان کو۔ کب سے تمہارا  
 انتظار کر رہی ہے۔“ فیاض کوں آپڑیاں اکھیں تے یقین نہ آندا پیا ہاتے نہ گناں تے۔ بال دا  
 ٹھیک تھیونزاں تاں ہک اتفاق تھی گیا ہا پر لکھے بعد مریضاں دی قطار لگ وئجی اوندی سوچ  
 توں باہر ہئی۔ چلو ٹھیک ہے او اناں دی نبض تاں ڈیکھ گھنسی، بیماری وی بُجھ گھنسی پر دو  
 کتھوں ڈیسی، اوندے کول تاں گجھ کائنی۔ پر ول وی باہر کھڑے مریضاں دے چہریاں  
 تے لا چاری ڈیکھ کراہیں او اٹھی تے اناں دے کول آیا تے سمجھائیں جو بھادیں جو عرصہ تھیا  
 او حکمت کریندا ہا پر ہن سھو گجھ چھوڑ بیٹھے۔ نہ دوانہ دکان۔

”نبض تاں ڈیکھ گھنساں، بیماری وی بُجھ گھنساں پر دو کتھوں ڈیسیاں۔ ٹساں  
 بابا کہیں بے حکیم کول وئجو۔“ فیاض منہ پھیرتے ولدا کرے ڈو وئج لگا تاں ہک بڈھڑے  
 جے مریض نے اوند اہتھ پکڑ گھدا۔ فیاض زچ تھی تے پچھوں ڈو مڑیا تاں کیا ڈیدھے جو  
 بڈھڑے دیاں اکھیں وچ ہنجوں ہن۔

”حکیم صاحب! میڈی ہکا دھی اے، چھی مہینے تھی گن ایندا کوسانی لاہندا پیا۔  
 علاج کرا کرا تھک گیاں، ہڈیاں دی مٹھ تھی تے رہ گئی اے۔ نہ مردی اے تے نہ جیندی  
 اے۔“ بڈھڑا ڈکھ کنوں ڈسکیاں کیا چڑھیا، فیاض دا ہاں گھٹج گیا۔ اونے پوڑیاں تے نگاہ  
 بھنوائی تاں تلے تک مریض کھڑے ہن۔ درتے آیاں کو ولاوے تاں کیویں ولاوے۔  
 چپ کرتے پوچھتے بہہ ریہا تے چوکیدار کوں آکھیس جو اناں کوں ہک ہک کرتے اندر

بھیجی آ۔ اوہک مریض کوں ڈیکھدا، اونداناں تے اوندی بیماری کاپی تے لکھدا تے آندی کل دا آکھ چھوڑیندا جو دوا گھن ونجائے۔ جیکوں دوا دی بجائے پرہیز دی لوڑھ ہوندی یا کہیں کوں غذا نال ای آرام دی توقع ہوندی، اوکوں غذا دی تاکید کر چھوڑیندا۔ ایویں کوئی گھننے کھن وچ اونے سبھی مریض بھکتا چھوڑے۔ فیس گھنن توں انکار کرن دے باوجود اوندے کول یارہاں روپے گٹھے تھی گئے۔ پٹھان چوکیدار انج حیران جوائے کلما بے حکمت جانز داہاتوں ول بوریاں ڈھوڈھو آپنے آپ کوں خوار کیوں کیتی رہ گئے۔ پٹھان دی حیرانگی توں قطع نظر فیاض اٹھیا جو عطا محمد پنساری دی دکان توں دوائیں گھن، اناں کوں کٹ پھک تے مریضاں کیتے پڑیاں بنزار کھے۔

اگلی سویر فیاض دے چوبارے دے سامنے جتھ دوا گھنن والے کلبھو کے مریض لائن بنزاتے بیٹھے ہن اتھ آج دے نویں مریض وی کل توں ڈوڑی تعداد وچ بیٹھے ہن تھے۔ فیاض نے ہنجواں نال پُسیاں ہوئیں اکھیں اُتوں تے چاتیاں پراتے ہن وی اسمان تے اوندے درمیان پتلاں والی چھت آگئی ہئی۔ اُونے نران کیتے بغیر ای مریضاں کوں سڈنا شروع کر ڈتا۔ مریضاں دا بلارا شروع تھیا تاں ساری رات دا جا گیا ہو یا پٹھان چوکیدار اکھیں مسلیندا ہو یا کمرے توں باہر نکل گیا۔ فیاض دی نویں شناخت ہن ”چوبارے والا حکیم“ ہئی۔ چوبارہ..... جیڑھانہ زمین تے نہ اسمان تے۔



## (32)

صدر ایوب خان نے بھاویں جو وُن یونٹ کوں آپڑیاں بوٹاں دی دھمک نال چنگے ٹھوکویں طور تے مضبوط کر چھوڑیا ہا پر جبر دی سیمنٹ تے خوف دی بجری نال اُسارے گئے ایں تھمبے وچ پہلی گھرل اُوں ویلے پئی جڈاں جو اُوں نے بنیادی جمہوریت دے دُغزے نال صدارتی الیکشن وچ محترمہ فاطمہ جناح کوں شکست دے گھان وچ دھک چھوڑیا۔ ڈوجھی ڈَلِک ایندے وچ 1965ء دی جنگ توں بعد معاہدہ تاشقند تے وزیر خارجہ ذوالفقار علی بھٹو دی ایوب مخالف تحریک دی صورت پئی۔ ایں تحریک دا مقصد بھاویں جو وی ہا پر ایوب خان دی کرسی اُلٹاؤن سانگے اندر خانے اُو سارے طبقے ایندے وچ شامل تھی گئے جیڑھے جو کہیں نہ کہیں شکل وچ وُن یونٹ دے مخالف ہُن۔ ایوب خان دے اقتدار دے خاتمے دی صورت وچ اُنّاں کوں وُن یونٹ تَرُند انظر آند اپیا ہا۔

30 نومبر 1967ء کوں پاکستان پیپلز پارٹی دے بزن نال مُلک وچ جے تے کجے ونگ دی لکیر چھکی گئی تاں وُن یونٹ دیاں حامی سبھے قوتاں گٹھیاں تھی کراہیں جے

پاسے مورچہ مل تے بہہ گیاں۔ پاکستان دیاں کمزور کرڈتیاں گیاں لسانی ثقافتاں نے پہلی واری اناں دے مہاندریاں کوں سُنجاتا تے ایندے ردِ عمل وچ اناں دی مخالف پارٹی، پاکستان پیپلز پارٹی ڈوچھکیندے چلے گئے۔ بھادیس جو وَن یونٹ دے بارے پیپلز پارٹی دا کوئی واضح موقف سامڑیں نہ آیا ہاول وی دشمن دا دشمن سنگتی ہوندے۔ تہوں وَن یونٹ دے خلاف لگی چھپی جدوجہد کرن والے سھے دانشور، وکیل، طالب علم، ڈاکٹر، مزدور، سیاسی کارکن اتے کاشتکار ہاں دی ہواڑ کڈھن کیجے ایں پارٹی دے ناں دے نال جُودے گئے۔

ایوب خان دامارشل لاء لگن ویلے فیاض جیل وچ ہا۔ اوندے سمیت وَن یونٹ دے خلاف تحریک چلاون والے سھے کارکناں کوں یقین ہا جو ایوب خان نے جیویں آون سیتی وَن یونٹ بنڑا وَن والے سھے لیڈراں کوں تَن پور یونجہ پُچایا ہا اویں اوناں کوں بھادیس چھوڑے نہ چھوڑے پر وَن یونٹ ضرور تروڑ چھوڑی لیکن کُرسی تے باہون توں بعد اوسھو کجھ بھل کراہیں محض اپنی کُرسی بچاؤن دیاں کوششاں وچ پئے گیا۔ جتنی نفرت فیاض کوں ایوب خان کوں اپنی آس دے تَرٹن دی ہئی اتنی تاں اناں لوکاں کوں وی نہ ہئی کہ جہاں نے اوندی ریاستی سُجناں کوں ملیا میٹ کرتے وَن یونٹ بنڑایا ہا۔

ایوب خان دے خلاف نفرت دا کوئی ہک موگھایا لانگھا کوٹنا ہا۔ لوک جیڑھی شے کنوں اُٹکدے ہوندا رُخ ایوب خان والے پاسے موڑ چھوڑیندے۔ کھنڈ چار آنے مہانگی تھئی تاں بُرا ایوب خان تے جے انا مہانگا تھئے تاں بُرا ایوب خان۔ 1967ء دے آندے آندے شہر شہر وستی وستی چنگے بھلے جلے جلوس شروع تھی گئے۔ اناں دی شروعات سکولاں کالجاں کوں تھئی تے ول اے نفرت گھی گھی محلے محلے کھنڈ دی گئی۔ انہاں ڈنہاں فیاض دی حکمت وی چنگی بھلی چل پئی ہئی۔ بھادیس جو اُونے غلہ منڈی دا چوبارہ چھوڑ ڈتا



تے لاری اڈے کول دکان بنا گھدس پر اونداناں ہُن وی ”چو بارے والا حکیم“ ای سڈیندا  
 ہا۔ سیاست کنوں پرو بھرا تھی باہون دے باوجود اوجہیں ویلے ایوب خان دے خلاف کہیں  
 جلے جلوس دی گاہہ سُنز داتاں دل کریندا جو دکان کول کرے پُچے تے جلوس وچ وُج تے  
 اتجھی تقریر کرے جو لوک اپنی راہ وچ آوَن والی ہر شے کول ڈالے پھالے کریندے ہوئے  
 سِدھے راولپنڈی پہنچن تے ایوب خان دے ایوان صدر کول تیلی لا چھوڑن جینے جو  
 پاکستان دیاں چھوٹیاں ثقافتاں دی مٹی تھیندی سُنجان کول بچاون دی بجائے بیاوی مٹی تے  
 سوا کر چھوڑیا ہا۔

پر جیئیں ویلے اوسویر شام اپنی دکان دے سامنے بیٹھے مریضاں دیاں قطاراں  
 کول ڈیدھاتاں سھے جلے جلوس، کاوڑ کرودھ تے نفرتاں کول بھل کراہیں اُناں دے دُکھ  
 درد تے تکلیفاں دی خبر گیری تے دوا دار وچ جُپ ویندا۔ اوکول لگدا جو سیاست صرف خلق خدا  
 تے عذاب نازل کرن تے اُناں دی حق تلفی واسطے کیتی ویندی ہے۔ لوکیں دی سُنجان مُنچ  
 کرن کیتے کیتی ویندی ہے۔ اُو خود وی تاں سیاست داشکار ہا۔ بلکہ پوری ریاست بہاول پور  
 ای پاکستانی حکمران اشرافیہ دی سیاست داشکار تھی چکی ہئی۔ فیاض کول اناں مریضاں دی  
 شکل وچ اپنی تے اپنی ریاست دی سُنجان نظر دی۔ اُناں دی نبض تے ہتھ رکھن نال اوکول  
 ایویں جا پیدا جو اُونے سکے ہوئے ستلج دریا دی مَن تے ہتھ رکھ گھدا ہووے کہ جیندا سودا  
 ایوب خان نے صرف اپنے چودھار سازشاں کریندی بیوروکریسی کول خوش تے راضی رکھن  
 کیتے انڈیا نال کر گھدا ہا۔ اناں مسکین لوکاں دیاں نبھاں وچ اوکول گھا گھرا تے ستلج  
 واہندے محسوس تھیندے۔ اُو اناں کول چھوڑ تے ہُن کتھائیں نہ وُجن چاہندا ہا۔ اناں  
 دے کول، اناں دے اُدھ وچ راہونا چاہندا ہا۔ اوندی سُنجان دانویں سروں پھپھو یا یو ناچنگا  
 چوکھا تھی کراہیں ہُن چھانور تھیندا ویندا ہا۔ فیاض ہُن ایندی چھاں تلے زندگی گزار تے

ایندیاں جڑہاں وچ دفن تھیون دا خواہش مند ہاتاں جو اوندے بُت دی مٹی ہمیش دی سُجّان بن تے اچھے روپ وچ دھرتی وچوں رنگ چا وے جیکوں کوئی ون یونٹ نہ تاں مٹا سکے تے نہ ونجاسکے۔

سابقہ ریاست بہاول پور وچ فیاض جیسے قوم پرستاں دی عملی سیاست کنوں پاند پُھڑوائی دے باوجود جھ 1967ء ایوب خان دے گرد گھیرا گھستی عوام دشمن بیوروکریسی دے حکومتی جبر دے پہرے وچ گزریا اتھ 1968ء دی شروعات ای مشرقی پاکستان وچ بے چینی دی بھاء بھڑکاؤن دے نال تھی۔ عوامی لیگ دے شیخ مجیب الرحمن تے چونتری بے لوکاں دے خلاف مُلک نال غداری دے مقدمے ”اگر تلہ سازش کیس“ نے بنگالیاں کوں یقین ڈواڈا تا جو جبرِ هاوی ون یونٹ دے استحصالی عذاب دی مخالفت کر لسی اوکوں عبرت دا نشان بنا ڈتا ویسی۔ اگر تلہ سازش کیس دی سماعت نے مشرقی پاکستان سمیت مغربی پاکستان دیاں اُناں سبھے لسانی ثقافتاں کوں ڈراؤن دی بجائے آپڑاں طریقہ کار بدلن تے مجبور کر ڈتا کہ جہاں دے وجود دی ون یونٹ دے ناں تے نفی کیتی ویندی پئی ہئی۔ قوم پرستاں نے سامڑیں آئے بغیر ون یونٹ تے مغربی پاکستان دی حکمران بیوروکریسی دے خلاف آپنی جدوجہد کوں نویں سُر وں منظم کرنا شروع کر ڈتا۔ ایندا نتیجہ اے نکلیا جو مغربی پاکستان دے مندھے ہوئے طبقے شیخ مجیب دے خلاف ایوب خان دی حکومت دے ایں مقدمے کوں آپنے خلاف فرد جرم سمجھن تے مجبور تھی گئے۔ ایں دوران فیاض دے کئی سنگتیاں نے اوکوں لُھہ کراہیں رابطے کیتے جو کہیں نویں تحریک دی کوئی تنظیم سازی کیتی ونجے پراونے صاف جواب ڈے ڈتا۔

”دل نی کریندا ہُن..... تے اساں مُٹھ جتی دل بھنے کروی کیا گھنوں۔ ول غداری دا کوئی بیا مقدمہ۔ اگر تلہ دی بجائے بہاول پور سازش کیس۔ تے ساڈا تاں وکیل

وی کہیں فی بنڑنا۔ جہاں دامقدمہ اسساں لڑنے، اُناں نے وی ساڈے نال فی کھڑنا۔ ساڈا  
مقدرتاں اندھارے رستے تے گمنام غُستان دیاں بے نشان قبریں۔“

فیاض دی سنگت تاں ناکام ول گئی پر پک ڈیہ نہہ اوتھی گیا کہ جینے پک واری  
ول فیاض کون کجھ بیا سوچن دی راہ تے لاچھوڑیا۔ اوں ڈیہ نہہ احمد پور دے مرکزی چوک  
وچ صادق عباس ہائی اسکول دے چھوہراں تے اُناں دے نال وکیلاں نے صدر ایوب  
خان دے خلاف جلوس کڈھیا ہو یا ہا۔ جلوس دی نعرہ بازی روکن تے ایکوں بھجاون کیتے  
پُلِس نے ہائی اسکول دے چھوہراں تے اندھا دھند تے وحشیانہ لاٹھی چارج کیتا۔ بانس دی  
ڈانگ تے لوہے دی موٹی ٹوپی دا وار جیندے اُتے تے جتھ پیا، ہر شے ڈالے پھالے کیتی  
گیا۔ کئی چھوہرے راہ ویندے لوک وی سر پڑواتے ہڈیاں بھنواتے ہسپتال پہنچے تاں  
اُتھوں وی اُناں کون دھک دھکاتے کڈھ ڈتا گیا۔ اناں پھڑتھئے لوکاں وچ پک پھڑ  
فیاض وی ہا۔ اوند اسر تاں بچ گیا پر کجھے ہتھ دی وینی تے ڈانگ دی سٹ نے ہڈی کڑکا  
چھوڑی۔

کجھ ڈیہ نہاں بعد وینی دی ہڈی تاں جڑ گئی پر فیاض دا ٹوٹے ٹوٹے تھیا دل نہ جڑ  
سکیا۔ اونے آپڑیاں اکھیں نال آپڑیں توں بعد دی نسل کون ریاستی جبر تے تشدد دا شکار  
تھیندے ڈٹھا ہاتے اودی کہیں بغاوت یا احتجاج دا حصہ بنڑے بغیر۔ کیا اے سلسلہ ایویں  
رُدارا ہسی نسل در نسل۔ کیا کڈھائیں ایندا وی کوئی اُنت تھیسے۔ فیاض کون اناں سوالاں  
دے جواب وچ چپ تے مایوسی ملی تاں اونے اُناں ساریاں سنگتیاں کون گولنا شروع کر  
ڈتا جیڑھے جو اوکوں نویں تنظیم سازی دا حصہ بناون کیتے آندے ریہے ہن۔ ایں دوران  
مشرقی پاکستان وچ حالات اتنے خراب تھیں گئے جو ایوب خان دی حکومت نے گوڈے ٹیک  
کراہیں باہوی فرووری 1969ء کون نہ صرف اگر تلہ سازش کیس واپس گھن گھدا بلکہ شیخ

مجیب کوں وی بیاں چونتری بندیاں سُودھا بری کرتے ہک طرحاں داموقع ڈے چھوڑیا جو او  
قید وچوں نکل تے سدھار لیس کورس میدان پہنچے تے گج وچ تے بنگالی قوم پرستی دی لگی  
جھپی تحریک کوں جگ جہان دے سامنے چٹانگ کر کھڑاوے۔

شیخ مجیب الرحمن دے معاملے وچ حکومت دی گنڈ لگن توں بعد سندھ،  
بلوچستان، بہاولپور تے صوبہ سرحد دے قوم پرستاں دی سُتی ہوئی اینٹی وِن یونٹ تحریک کوں  
وی نویں زندگی مل گئی۔ فیاض نے نہ صرف احمد پور بلکہ بہاول پور وچ تھیون والیاں میٹنگز  
وچ حاضری کوں لازمی بنا گھدا۔ کافی عرصے توں بعد جھ کئی بیاں قوم پرست سنگتیاں نال  
ملاقاتاں معمول بنیاں اُتھ وکیل ریاض ہاشمی نال وی دوبارہ آؤجی شروع تھی گئی۔ ہُن  
فیاض ہک پر جوش تے اڑ بنگ نوجوان دی بجائے پگی عمراں ڈو ویندیا سانا سوڈھاتے  
معاشی طور تے مطمئن شخص ہاجیکوں وسیب دے چار لوک جائزن وی لگ پئے ہُن۔ تہوں  
اوندی گاہہ تے کنو وی تھیدی تے گاہہ پوری کرن داموقع وی ملدا۔

ایوب خان دے خلاف نویں سروں جاگن والی تحریک بھادیس جو بنیادی  
طور تے اینٹی وِن یونٹ تحریک ای ہی پر ہُن تاں ایسے کئی کئی بے ویس وٹاتے بے کئی  
رنگ برنگے چولے پاگھدے جیندے وچ ذوالفقار علی بھٹو دی اعلان تاشقند دے خلاف  
جدوجہد تے کھاوَن پیوَن دیاں چیزاں دی مہنگائی بارے پُر تشدد جلسے جلوساں نے پورے  
مُلک کوں ہلاتے رکھ چھوڑیا۔ اناں سب نے رَل تے ایوب خان دی ڈھاندی پوندی  
حکومت کوں اتنا ہَسایا جو صدر صاحب نے اُگی تے تگن دی بجائے حکومت کنوں پاند  
مُتھروا وِن وچ ای خیریت سمجھی تے استعفیٰ ڈے کراہیں واند اتھیا۔ تھیونا تاں اے چاہیدا ہا  
جو اسپیکر قومی اسمبلی حکومت سنبھالے ہا پر کمانڈر انچیف جنرل یحییٰ خان نے کُرسی سنبھالی تے  
مُلک ہک واری وِل مارشل لاء دے بوٹاں تلے آ گیا۔

مارشل لاء لکھیا تاں فیاض کئی ڈیہاں تیں وَلدا احمد پوردی غلہ منڈی وچ پٹھان  
چوکیدار دے چو بارے وچ لکھیا رہ گیا۔ پٹھان بہوں کچھیا جو خیر تاں ہے کہ حکمت دی دکان  
کو جندراما کر اہیں اُونکے جیسے چو بارے وچ گھرڑی کیوں ماری پئے پر فیاض اوکوں نالی  
ریہا جو اُن ڈٹھے دُشمن نال واہ جو پئے گئے، ہُن کرے تاں کیا کرے۔ پلس اوندے  
سمیت سھے اینٹی وِن یونٹ قوم پرستاں دے ٹکانیاں تے چھاپے ودی مریدی ہئی جہاں  
اِس واری ایہو فیصلہ کیتا جو پکڑائی نی ڈیونی، لکھیا راہونے تے تحریک کوں مرن نی ڈیونا۔

اِس نویں تحریک وچ فیاض دی حکمت دی ہئی اصلوں گل تھی گئی۔ نہ آمدن دا  
سلسلہ ریہا تے نہ پریشان حال مریضاں، سچا بونہی کوئی سبیل۔ اوند اگزارہ ہوں موڑھی  
تے آن ریہا جیڑھی جو کچھ لیاں کئی مہینیاں دی حسنی وئی ہئی۔ کہیں کہیں ویلے تاں او اصلوں  
اختا تھی ویندا جو اے کناں چکراں کوں پئے گئے۔ چنگی بھلی عزت بنڑی ہوئی ہئی جیکوں  
رول کراہیں اُو وَلدا مفرورتھیا وداہا۔ کئی واری اُونے سوچیا جو گرفتاری ڈے کراہیں اِس روز  
دے ڈر بھو کنوں جان چاٹھو واوے۔ وڈے کنوں وڈا کیا تھیسے، سال چھی مہینیاں دی سزا  
تھی ویسی، کوئی قتل تاں نی کیتا جو کوٹھی لگڑاں پوسی۔ پر وِل ایہو خیال آندا جو انسانی زندگی وچ  
ہمیش ذاتی اہمیت نی ہوندی، کہیں کہیں ویلے اوں دھرتی داماں وی رکھنا پوندے کہ  
جیندی مٹی دی خشبو دھرتی واس دی روح دی خشبو بن چکی ہوندی اے۔ آپڑیں کیتے تاں ہر  
کوئی جیندے پر دھرتی سانگے صرف دھرتی زاد ای جان دی بازی لیندے۔ ایہا سوچ  
اوکھے ویلیاں وچ وی فیاض کوں ہینزاں نہ پوون ڈیندی تے اُو پک واری وِل آپنی سُنجان  
کوں آپنی ریاست دی لے مٹی تھی سُنجان وچ نویں سروں گولن شروع کر ڈیندا۔

ہر آون والے ڈیہاں دے نال جنرل یحییٰ خان دے مارشل لاء داہو کا سکے تکھے  
تکھے مٹھا تھیندا گیا۔ پک پاسے مغربی پاکستان وچ مذہبی جماعتاں دادوستانے کنوں زیادہ

خوشامدانہ گھیراتے ڈوجھے پاسے مشرقی پاکستان وچوں عوامی لیگ دے شیخ مجیب الرحمن دا کھڑکا دڑکا، انہاں ڈوہائیں دے گھبراوچ آئے ہوئے پاکستان دے نویں حاکم کوں بکھائیں کوئی لگن دی جائیجھدی تاں رات دیاں سرور والیاں خشبو دار محفلاں وچ کہ جیڑھیاں ہو لے ڈاڈے ایں طرحاں درگھیاں جو رات ڈینہہ دی پچھان دی باقی نہ رہی۔ ایں ساری صورت حال نے جتھ حکومتی گرفت کوں پولا کیتا اتھ فیاض وی پنج چھی مہینیاں دے لگ چھپاتوں بعد ولد احکام دی ہٹی کھول بیٹھا۔ اے اودور ہا کہ جیندے وچ گھٹ ودھ پورے پاکستان دے قوم پرستاں کوں اپنی جدوجہد کیتے کھل کھینڈن دا موقع مل گیا۔ قوم پرستی دے ایں نویں مہاندے وچ اگر کوئی خطرے دا کھڑکار ہا تاں صرف ذوالفقار علی بھٹونوں کہ جیندی پیپلز پارٹی بہوں تیزی نال سندھ تے پنجاب وچ جا بڑائی آندی ہئی۔

یچی خان دی حکومت دا پہلا سال ممکن تے تھیا تاں مارچ 1970ء دے نیڑے تیزے ون یونٹ ٹرن دی گالہہ ٹر پئی۔ لیگل فریم ورک آرڈر دی روناں ایوب خان دے بنیادی جمہوریت دے نظام کوں ختم کرتے ہک آدمی ہک ووٹ دے اصول موجب ترے ستمبر اں دی قومی اسمبلی بناؤن دا اہر کرنا ہا جیندے وچ آبادی دے مطابق 160 سیٹاں مشرقی پاکستان تے 138 سیٹاں مغربی پاکستان دے علاقیاں کوں ڈیوڑیاں ہن۔ خوشی دی گالہہ اے ہئی جو مغربی پاکستان کوں تحلیل کرن دے قانون دے تحت ون یونٹ تروڑتے مغربی پاکستان دے کئی صوبے بنائے ونجنے ہن۔ یچی خان دے ایں منصوبے نے فیاض سمیت ریاست بہاول پور دے سھے قوم پرستاں دے دلاں وچ گھيو دے ڈیوے بال ڈتے کیوں جو سابقہ ریاست دی ہک صوبے دی صورت بحالی دی منزل ہن اناں دے سامنے کھڑی ہئی۔

لیکن جنیس ویلے 30 مارچ 1970ء کوں اے قانون نافذ تھیا تاں ریاست

بہاول پور دے لوکاں نال ہک واری وَل درؤہ تھی گیا۔ وَن یونٹ تڑیا ضرور لیکن جتھ نو اں  
صوبہ بلوچستان بنزیا اتھ بہاول پور دی وعدہ شدہ صوبائی حیثیت بحال کرن دی بجائے  
ایکوں صوبہ پنجاب وچ ضم کر ڈتا گیا۔ پوری سابقہ ریاست بہاول پور وچ ایندارِ عمل ہک  
بہوں وڈے صدے دے طور تے تھیاتے عام لوکاں نے ایکوں ڈکھ تے مونجھ دی چادر بنا  
تے سرتے تان رگھدا۔ فیاض جیسے قوم پرستاں کیتے وی وَن یونٹ دا ایس طرحاں تڑنا، وَن  
یونٹ بنزن کنوں زیادہ تکلیف دہا۔ وَن یونٹ بنزن دے بعد اوندے تڑن دی کوشش وچ  
بھادویں جو ریاست دی ہک نسل دنیا توں گزر گئی ہئی پر ہک آس تاں ہئی جو اے طوق  
کڈھائیں تاں تڑن کے راہی پر چڑی گھٹے شراب دے نشے وچ مدہوش حاکم کنوں اتجھا  
کاری وار کر اگھدا گیا کہ جیندے بعد اُو آس وی ختم تھی تے رہ گئی۔ مُنڈھوں ایندی پاڑی  
سک گئی تے بجاراوی کُرٹ تھی تے رہ گیا۔

وَ ن یونٹ تڑن کنوں پہلے سندھی، بلوچ، براہوی، بنگالی اتے پشتون وی بہاول  
پور دے ریاستیاں نال ڈکھ سانجھا کرتے کھڑے ہن پر ہن پاکستان دی پوری وحدت وچ  
انہاں دے ہنجوں پونجھن والا کوئی نہ ریہا ہا۔ انہاں کوں آپنی سُجناں دی لڑائی ہن کلہیاں لڑنی  
ہئی پر انہاں دے ڈوہائیں ہتھ خالی، دل تڑے ہوئے تے اکھیں دے سامڑیں اسمان تیں  
اُچی دھڈڑای دھڈڑجیندے وچ نہ کہیں منزل دی نشانی تے نہ کہیں رستے دالیکا۔



(33)

وَن یونٹ ٹرن دے بعد ریاست دے قوم پرستاں کیجے سب توں وڈا مسئلہ جے کوئی ہاتاں صرف قیادت داہا۔ نواب صادق محمد خان توں بعد بھادیس جو ولی عہد محمد عباس عباسی نے امیر آف بہاول پور دالقب اختیار کریندے ہویاں علامتی نوابی سنبھال گھدی ہی پر سرکاری طور تے اُناں دی حیثیت پک وظیفہ خوار توں ودھ کوئنا ہی۔ ایں توں وی اُترے جو عوامی سطح تے نہ کہیں نال اُناں دا کوئی میل ملاپ تے نہ کوئی سنگ بنجک۔ نہ اُوریاستیاں کوں آپڑاں سمجھدے ہن تے نہ ریاستی اُناں کوں۔ پک عجیب جیسے بے معلومیں خوف دا شکار اے علامتی قیادت آپنی سابقہ رعیت کوں کوئی بھال والی راہ ڈکھاؤن توں وی قاصر پر ڈوجھے پاسے فیاض دی نسل دے لوک ہالی توڑیں وی نواب صاحب کوں آپڑاں حاکم سمجھدے ہن تے صادق گڑھ پیلس دا ڈر کھلن دے منتظر راہندے ہن۔

ایں صورت حال وچ ریاستی لوکیں دیاں ترے ونداں تھی گیاں۔ پک پاسے پڑھے لکھے لوک جیڑھے جلے جلوساں دی بجائے قانونی جدوجہد تے یقین رکھیندے ہن



نے ڈوجھے پاسے اوجھڑھے ہر صورت نوابیں دی قیادت وچ جلسے جلوساں تے احتجاجی تحریک نال بہاول پور دی صوبائی حیثیت بحال کراون چاہندے ہن تے اناں ڈوہائیں کنوں ہک پاسے اوجھوٹی جی اقلیت جیکوں کہیں شے نال دلچسپی نہ ہئی۔ اناں کہیتے بہاول پور چڈے ونجے پر اناں دادال پھلکا چلدارا ہوئے۔ پہلی ونڈ دے لوکاں وچ وکیل ریاض ہاشمی جیسے اعلیٰ تعلیم یافتہ قوم پرست ہن تے ڈوجھی ونڈ وچ اوجھہاں نے امیر آف بہاول پور محمد عباس عباسی نال اختلاف رکھن والے اوندے مترے بھرا شہزادہ مامون عباسی کوں آپڑاں لیڈر بنڑا گھدا۔ اناں ڈوہائیں طبقیات دی کنڈ تے اُن ڈٹھے انداز وچ ”بہاول پور متحدہ محاذ“ ہاکہ جیندے وچ چوہدری فرزند علی، سیٹھ عبید الرحمن، سردار محمد خان تے میاں نظام الدین حیدر جیسے نویں پُرانے سبھے ریاستی شرفاء شامل ہن پئے۔ شہزادہ مامون الرشید عباسی دی لیڈر شپ جتھ جوش نال عبارت ہئی اُتھ ہوش دی کُنھی بہاول پور متحدہ محاذ کول ہئی۔

ریاستیاں دا اے کٹھ اتنی وڈی تے پر جوش تحریک بن تے سامڑیں آیا جو ہک واری تاں پوری حکومتی مشینری ہل تے رہ گئی۔ روز دے جلوس، جلسے اُتے اخباری بیان، ایویں لگدا ہا جو بہاول پور صوبہ کل دا بنڑا اِنج بن تے راہسی۔ فیاض دی حکمت دی ہئی کوں ہک واری وَل جنڈرا لگ گیا تے اُو آپڑاں سب کجھ ویچ وٹاتے بہاول پور آن بیٹھا۔ ہُن چوک فوارے دے نزدیک احمد پوری دروازے دے اندر ہک چھوٹا جیہا چو بارہ اوندانواں ٹکانہ ہا۔ حکمت سانگے جاء تاں ہُن صوبہ بنڑن توں بعد گولنی ہئی۔ فیاض دی سویرے جے ماڈل ناؤن اے وچ میاں نظام دین حیدر دی کوٹھی تے تھیندی تاں ڈو پہار ریاض ہاشمی وکیل دے دفتر وچ۔ بجھ ڈھلدا بے شہزادہ سیں کول تاں عشاء سیٹھ عبید الرحمن دی کوٹھی تے۔ ایں دوران جتھ جلسہ اُتھ فیاض موجود تے جتھ جلوس اُتھ فیاض سب توں اگوں۔

ہک انوکھڑا سُرور ہا، عجیب جیہانشہ ہا کہ جینے اوندے وجود کوں بار اہک کرن  
دی بجائے ہلکا پھل بنا ڈتا ہا۔ فیاض آپڑیں قد میں نہ ٹردا ہا بلکہ ہوا وچ اڈدا ہا۔ چارے  
پاسے صوبے بہاول پور دیاں گالہیں، بحث مباحثے، پوسٹر، اشتہار تے کندھاں تے  
لکھایاں، ایویں لگدا جو خلقت منزل ڈونی ویندی پئی بلکہ منزل تے خلقت دے کول آندی  
پئی ہے۔ روز ڈیہاڑے اخباراں دے تھرتلی مچاون والے ایڈیشن، ہاکراں دے ہو کے  
تے چاء والے کھوکھیاں تے چسکیاں بھریندے لوکیں دے اُچے اُچے بلاریاں نے بزار،  
وہارتے آونج سمیت ہر شے کوں ہچھوٹا کر چھوڑیا ہا۔

بہاول پور متحدہ محاذ دی قیادت نے تحریکی معاملات کوں بھرپور طریقے نال  
چلاون کیستے جتھ بیاں ورکراں دے ذمے کئی بئے کم لاتے ہوئے ہن اُتھ فیاض دے  
ذمے شہردیاں کندھاں تے صوبہ بحالی دے نعرے لکھن دی ذمہ داری وی ہئی۔ کم چونکہ  
نازک ہاتھ تھوڑی جی بے احتیاتی دے سبب ہن تیس ترے ورکر گرفتار وی تھی چکے ہن،  
ایں سانگے فیاض ادھی رات توں بعد مولھ مارتے محاذ دے دفتر وچوں نکلداتے جے تیس  
وس لگدا، تحریک بحالی صوبہ دے نعرے لکھ کراہیں فجر دی اذان توں پہلے آپڑیں چوبارے  
تے پہنچ ویندا۔

کنک کپائی تے گہائی دے ایں موسم وچ وی فیاض اوں رات کوں شیرباغ  
دے پچھاڑے کوں پرانی کوٹھی دیاں کندھاں تے تکھے تکھے نعرے لکھدا ودا ہا جو ایں آن  
وچ پہلے کھمن تے ول گا جاں تھیاں تے جھیکڑ وچ مینہ دی درھے پھا شروع تھی گئی۔ فیاض  
نے کوشش کیتی جو کہیں طریقے کہیں اوٹ وچ تھی ونجے پر دور دور تیس کتھائیں کوئی سر  
لکاؤن دی جانہ ہئی۔ ول وی چننے کوئی بھاند پئی او اناکس ڈوڈر کیا۔ فیاض دے ایڈے  
اوڈے بھجدے کریندیاں ہک اوپل کارا وندے نیڑے آتے رکی۔ یکدم اوند اچھلا دروزہ

گھلایا تے کہیں نے جھباروں تھئے فیاض کوں گھیل کراہیں کار دے وچ چا سٹیا۔ ایں توں پہلے کہ فیاض کوں کوئی سرت آندی، کار چنگی بھلی سپیڈ پکڑ چکی ہئی۔

فیاض دیاں اکھیں تے ہتھ ہوون دے کارن اونے ایہو سمجھیا جو آج اوکوں وی پلس نے وٹھی گھدا پر ہالی توڑیں ایند انہ تاں کوئی ثبوت ملدا اپیا ہاتے نہ کوئی شک کرن دی بنی وجہ ہئی۔ پر جنیں ویلے کار رُکی تے اوکوں باہروں کڈھیا گیا تاں سب سمجھ آ گئی کہ اوکوں کینے تے کیوں سڑک توں چاتا ہا۔ کار بیگم سلمیٰ بدرالدین دی کوٹھی دے پورچ وچ ہئی تے اوندے سامنے رسول بخش میرانی مُسکدا کھڑا ہاجیر ہا کار دی ڈرائیونگ سیٹ توں لٹھا ہا۔ جنیں ویلے جو اوکوں گھیل تے کار وچ دُبن والا چو بکا نینگر اوندی یادداشت وچ نہ ہا۔ شاید کوئی نواں ملازم ہا۔

”فیاض صاحب! نہ دعا نہ سلام نہ حال حویلا.... تے آپڑاں اے حال کیا بنزایا ہوئے، ہتھ کالے تے منہ وی کالا، کپڑے میلے نئی۔ بی بی صاحب کول پیش تھیونڑیں، ونج اڈے مہمان خانے، دھا دھوتے نرویا تھی، میں جوڑا کپڑیاں دا تھینداں“..... میرانی طنزیہ مُسکدا ہو یا آپنے کمرے ڈوگیا تے فیاض کہیتے ایں توں علاوہ کوئی رستہ نہ ہا جو او وِلدا مہمان خانے ڈوڑ و نچے۔ کیوں جو او چو بکا نینگر کہیں لو ہے دی کندھ آلی کار اوندے بھجن دا رستہ مل تے کھڑا ہئی تھیا۔



(34)

فیاض کوں جئیں ویلے سلمیٰ بی بی داسڈا آیا تاں رات دے ڈوں وَجدے پئے  
 ہن۔ مینہ ہالی توڑیں ایویں و سدا پیا ہا جو آج نہ وٹھاتاں ول کڈن وٹھا۔ بی بی داملازم  
 اوکوں ہوں ڈرائنگ روم وچ چھوڑ گیا جتھ جو بی بی اوندے نال الویندی ہئی پر آج اے کمرہ  
 بھاں بھاں کریندا پیا ہا۔ اُلحظہ کھن تاں اُتھائیں کھڑا رہا پر جیویں ای باہون داسو چئیں سلمیٰ  
 بی بی دی بہنی اُتھ آئی تے اوکوں اندر ڈو آون دی شارٹ کٹئیں۔ فیاض کہیں بھید آلی کار  
 اوندے پچھوں ٹر پیا۔ ڈوں لبیاں گیلریاں وچوں لنگھ کراہیں بہنی ہک کمرے دے در  
 تے پہنچی تے اوکوں اَنگل نال ہو لے جیہا کھڑ کائیں۔ اندروں آون والی آواز یقیناً سلمیٰ بی  
 بی دی ہئی پر ایندا مطلب اُوہو بہنی سمجھدی ہئی۔ اونے پچھوں مُڑتے فیاض کوں وٹھاتے  
 اکھ نال اندر وُجن دا اشارہ کریندی ہوئی واپس اڈھائیں ٹر گئی کہ جتھوں آئی ہئی۔

فیاض کجھ اَجھکیا، پریشان تھیاتے ولدا اُتھائیں کھڑ گیا۔ بہنی نے ویندیاں  
 ویندیاں ول گچی بھنواتے پچھوں تے وٹھاتاں اوکوں اُتھائیں اَجھکیا ڈیکھ تے دوبارہ سختی

نال اندرونجن دا اشارہ کئیس تے موڑ مُرگئی۔ فیاض نے وی دروازے تے تھوڑا جیہا دیا پاتا  
تاں اُو آپ کنیں آپے کھلدا گیا۔ فیاض دا اگلا قدم اُوکوں سلئی بی بی دے بیدروم وچ گھن  
آیا ہا۔ اُو پک واری ول اچھکیا کیوں جو اوندے پیر کہیں موٹے موٹے تے کولے کولے  
قالین وچ گھب گئے ہن تے چا دن نال وی نہ پتہ دے پے ہن۔

”آ..... آ، اُگوں تے آ فیاض، میں چار سال بعد ہن وی تیڈے تے اعتماد  
کریندی پئی آں۔“ کمرے وچ ڈھیر اندھارے تے تھوڑے سو جھلے دے باوجود فیاض نے  
ڈیکھ گھدا جو سلئی بی بی پٹنگ دی بجائے آرام گُرسی تے اہلی پئی ہے۔ فیاض تھوڑا اُگو ہاں تھیا  
پر ول اچھک گیا۔ صاف نظر دا پیا ہا جو سلئی بی بی نے پورے کپڑے پاؤں دی بجائے کہیں  
بہوں پتلے تے کالے رنگ دے کپڑے دا کوئی ڈھلا ڈھلا پر لُندا جیہا فراک پاتا ہوئے  
جیزہا پنیاں توں وی اُتی تے ہا۔ فیاض نے اکھیں نو اگھدیاں۔ سلئی بیگم کھل پئی۔

”کدھائیں نی ڈٹھا عورت کوں۔“ سلئی اوندی شرم دی چس چنیدے ہوئے  
آرام گُرسی توں اُٹھی تے نال آتے فیاض دا ہتھ آپڑیں ہتھ وچ گھن گھدا۔ فیاض دیاں  
اکھیں بیاں وی نو گیاں۔ اوندے ہتھ برف دا ٹک ٹھڈے محسوس کرتے سلئی نے اپنے  
ہتھ دی پگڑی وی سخت کر گھدی تے اُوکوں ہولے ہولے ٹریندی ہوئی آرام گُرسی دے  
نیزے گھن آئی تے ول پو لا پو لا دھک کراہیں گُرسی تے اُو میں لٹا چھوڑیُس جیویں کجھ  
لحظے پہلے خود لیٹی پئی ہئی۔ فیاض اُٹھن کہیتے اُتو ہاں تھی پھٹکیا پر سلئی گُرسی دی ہتھی تے چڑھ  
بیٹھی تے آپڑیں ڈوہیں ہتھ اوندے سینے تے ایں طرحاں چار کھے جو اُو اُٹھی تاں کیا،  
مہتک وی نہ سکے۔

”اُوں ہونہ۔.... اُتھوں اُٹھنا بہوں مشکل بلکہ ناممکن۔ میں تیکوں آکھیا ہاں جو  
نہ کہیں کوں دھوکہ ڈیندی آں تے نہ ڈیون ڈیندی آں۔ پر توں ول ای میڈے نال چترائی

کرتے بھیج گیوں۔ بھجڑاں ہاتاں کتھائیں پرے تاں بھجیں ہا۔ اے احمد پورتیں بس تریہہ  
میل دا بھجڑاں تاں کوئی بھجڑاں نہ تھیا۔“ پاگلاں آلی کار آپ کنوں آپے کھلدی بیگم سلمیٰ  
بدرالدین یکدم سک دم تھی گئی۔ اوندے چہرے دی ملہار پک لٹھے وچ ایویں تھی گئی جیویں  
فیاض، بندہ نی بلکہ بد بودی ماری کوئی روڑی ہے۔ ”توں سمجھدا کیا ہیں آپنے آپ کوں۔  
ہائیں!!! کڈھائیں ڈٹھاوی ہی خود کوں۔ پتہ نی کیوں توں میکوں جیل وچ پیا بھا گیا ہاویں  
۔ شاید بہوں ای مظلوم لگ ہی تیڈی تے میں تیڈے تے اعتماد کر بیٹھی۔ پرہن تاں توں  
میڈی ضد ہیں، اُو ضد جیندے نال نفرت کیتی ویندی ہے، جیندے نال دھوکہ کیتا  
ویندے۔“ سلمیٰ دیاں اکھیں وچ بے معلومیں ہنجوں تر آئے ہن۔

”بہوں کاوڑ ہے میکوں تیڈے تے، بے پناہ کاوڑ..... دل کریندے جو بھن  
تروڑتے رکھ ڈیواں تیکوں، بوٹیاں بوٹیاں کر ڈیواں، مندھ ڈیواں، لہری بنڑاڈیواں تیڈی۔  
پر میں ایویں کانٹاں کریاں جیویں توں میڈے نال کرتے گیا ہاویں۔ پک مہربان عورت  
کوں ٹھڈا مارتے نگھ گیا ہاویں۔ توں سوچ نی سکدا جو کتنی ذلت کتنی بے عزتی برداشت کیتی  
ہوسی میں۔ آپڑیں آپ نال اکھ ملاؤن جوگی وی نہ رہ گئی۔“ سلمیٰ باہون دی بجائے اٹھی  
کھڑی تھی تے کمرے وچ ٹہلن لگ گئی۔ فیاض وی گری توں تھوڑا جیہا اُتے اٹھی کراہیں  
ٹھو مارتے بہہ گیا۔

”توں کیا جانے پک امیر کبیر تے سوسائٹی وچ وڈا سیاسی ناں رکھن والی بیوہ  
عورت تے کیا گزردی ہے خاص طور تے جنیں ویلے اوندے سرتے مایو وی نہ ہوؤن۔  
کتنے کتے اوندے اگوں پچھوں پھر دن اوند مال اسباب تے سیاسی شناخت لٹن کیتے۔ کیا  
میڈا طواف کوئی نہ کریندا ہوسی، کوئی نہ پھر دا ہوسی میڈے پچھوں، کیا کمی ہے میڈے وچ،  
کیا کوئی میڈے کول کہ جیندے اُتے کوئی وی عورت، عورت ہوؤن داماں کر سکدی ہوسی۔

میڈے جیہاں عورتاں آپنی سیاسی تے خاندانی شناخت بچاؤن کیتے ہمیشہ کندھ کاتی نال  
 گھیندیاں راہندن تے ایندے بدلے آپنی ہک نکلی جیئٹھی وی پوری نی کر سکیاں۔  
 اناں داوی جسم ہوندے، جسم دے تقاضے ہوندن تے جسم دیاں ضرورتاں وی۔ پر اوکھیں  
 اتجھے بندے کوں آپڑیں نیڑے نی آؤن ڈیندیاں کہ جیندے اُتے کوئی لکھ جیڈا شک وی  
 کر سکے۔ آپڑیں آپ کوں مارن کیتے اناں کوں تیدے جیسے گھراں دی لوڑھ ہوندی اے کہ  
 جیڑھے نال ای سٹے راہون تاں ول ای کوئی شک نہ کرے۔“

سلمیٰ بارے کجھ پتہ نہ لگدا پیاہا جو او کرن کیا چاہندی اے۔ او ولدی آتے اوں  
 آرام کرسی دی ہتھی تے چڑھ بیٹھی کہ جیندے اُتے فیاض پُسر یا بیٹھاہا۔ کرسی دے کجھے  
 پاسے اندھارے وچ تپائی اُتے ہک بوتل شراب دی تے ادھ پیتا گلاس وی پیاہا۔ سلمیٰ نے  
 بیٹھے بیٹھے گلاس چاتاتے ہکے ساہ وچ اکیوں خالی کرن توں بعد زور داسر چھنڈ کیا۔ فیاض  
 نے شراب دی بو محسوس کرتے نفرت نال نگ سنکیریا۔ کہیں عورت کوں تاں کیا اونے آج  
 تک کہیں مرد کوں وی شراب پیندا نہ ڈٹھاہا۔ سلمیٰ نے ایویں جا پیا جو او اندے نال چیکھاں  
 کریندا پئے۔ او نے بوتل دا ڈھکن کھول تے ادھا گلاس شراب دا بھریا تے ہک گھٹ  
 بھرن توں بعد باقی دی شراب فیاض دے مُنہ تے بھکا سٹی۔ فیاض کوں ایس حرکت دی  
 املک توقع نہ ہئی۔ شراب نے اوندیاں اکھیں دے وچ پہرہ کراہیں ساڑ مچا ڈتاتے باقی دی  
 نے اوندے مُنہ توں وہہ تے اوند اُتلادھر جھباروں کر چھوڑیا۔ فیاض زور لاتے کرسی توں  
 اٹھن لکيا پر سلمیٰ ڈوہیں گوڈے اوندے ڈھڈتے رکھ تے اوندے اُتے چڑھ تے بہہ گئی۔

فیاض دا دل کیتا جو او کوں دھک تے ہک پاسے مارے تے چیک چیک تے  
 سُنو واڈیوے جو او چندری خود اوندے لائق کانتی۔ عورت تے مرد دا جسمانی خجوک جیڑھا  
 اوندے نزدیک عبادت ہا، ایس طرحاں ہک بے ناں تے بے نشاں گناہ نہ تھی سکداہا۔ او

سلمیٰ کوں ڈسن چاہندا ہا جو عورت مرد دا ہک بے کوں جسمانی تسکین ڈیونڑاں کوئی راہ  
 دیندیاں دی لگی چھپی راندنی بلکہ ہک بے کوں عزت تے احترام ڈیون دا وسیلہ ہے۔ او  
 آکھن چاہندا ہا جو اے سھو کجھ آپوانی سُجھان قائم کرن دا ذریعہ ہے، سُجھان مُنچ کرن دا حربہ  
 نی۔ پر او کجھ وی نہ آکھ سکيا۔ عورت دا احترام سامنے آگیا ہا۔ او اوکوں کیویں ڈسیندا جو تسکین  
 کیتے جسمیں دا واپارنی کیتا ویندا بلکہ ایندے کیتے تاں ڈوں ہتھاں دیاں ڈوں انگلیں دالمس  
 ای کافی ہوندے۔ او آکھن چاہندا ہا پر آکھ نہ سکيا جو خالص احساس کوں دھوکہ نی ڈتا وُنچ  
 سگدا، دھوکہ، دھوکے کوں ای ڈتا ویندے۔

فیاض زبان نال تاں کجھ نہ آکھ سکيا پر اوندیاں اکھیں اے سارا کجھ اتنی توانائی  
 نال آہدیاں پیاں ہن جو شاید زبان ایں طرحاں نہ آکھ سکدی۔ سلمیٰ کوں فیاض دیاں اکھیں  
 وچ اپنے کیتے گریٹ، حقارت تے نفرت نظر دی پئی ہئی۔ ایں احساس نے اوندے اُتے  
 جنون طاری کر ڈتا اتنا جو اُونے فیاض دے مُنہ تے ٹھکن توں وی گریز نہ کیتا۔ ایں توں  
 پہلے جو فیاض سلمیٰ دی ایں حرکت کوں سمجھ سگدا، اُونے گروان توں پگڑتے اوکوں اُتی تے  
 اٹھایا تے ہکی چھک نال ای اوندی قمیض دا دامن لیراں کرتے گھلیندی ہوئی بیڈ روم  
 وچوں کدھن توں بعد ڈرائنگ روم دے باہروں دھک آئی۔ فیاض باہروں پورچ وچ  
 حیران پریشان تے ہکا بکا پر سلمیٰ نے دروازہ اندروں بند کرتے دھاڑاں مار مار روون  
 شروع کر ڈتا۔





(35)

سلمیٰ بدرالدین دی کوٹھی توں جیویں تیویں نکلن توں بعد فیاض آپنے چوبارے  
تے پہنچیا تاں سویر دے چار و جدے پے ہن۔ بارش رکن توں بعد احمد پوری دروازے  
دیاں حلوہ پڑی والیاں دکاناں کھلن لگ گیاں ہن۔ چھولیاں دیاں ریڑھیاں، دال منگ  
دے تاسلے تے آلو بھی دے چھا بڑے وی لگن شروع تھیندے پے ہن۔ سونہیں  
دکانداراں توں اکھ بچاتے ریلوے اسٹیشن کنوں پیریں رُدا فیاض تیکھے تیکھے چوبارے  
دیاں پوڑیاں چڑھیا تے بسترے تے ڈھبہ کراہیں دُسلکیاں بھر بھر رُوون لگ پیا۔ اوکوں  
آپڑیں آپ کنوں کریت تھیندی پئی ہئی۔ ایویں لگدا ہا جو اوندی روح تک سلمیٰ دیاں  
ٹھکاکاں وِچ لہڑی پئی ہے۔ ہک عورت کوں احترام ڈیون دے قصور وِچ اوند پورا وجود  
گُوڑے دا اُروڑ بنا ڈتا گیا ہا۔ ایس ساری تذلیل دے باوجود کتھاؤں ہک ہکی جئی لیک  
اوکوں ہن وی سو جھلا ڈکھیندی پئی ہئی۔ اوکوں آپنے آپ تے مان تھیندا محسوس تھیا جو نہ  
تاں او ایس غلیظ راند دا حصہ بنڑے تے نہ ای کہیں عورت دی تذلیل دا موجب۔

ڈسکیاں ٹھاریاں تاں اوندی سوچ سلٹی دی سوچ تے غالب تھیدی گئی۔ ایں دوران اوندے اندر جاگن والی تبدیلی توں بعد فیاض کوں آپڑاں وجود دھاتا دھوتا لگن لگ پیا۔ جنیں ویلے جو سلٹی اوکوں اتجھی بدبودار روڑی وانگ جا پدی پئی ہئی کہ جیندے اُتے خشبو والیاں چادران چڑھا ڈتیاں گیاں ہوون۔ کیا عزت تے عصمت صرف عورت دی ہوندی ہے۔ ایں تصور دی توسیع مرد توڑیں کیوں نی۔ خیال بدلایا، سوچ بدلی تاں اوندے اندر سکون دی ہک لہر سرتوں پیراں تیں درگھدی گئی۔ کجھ لختے بعد جنیں ویلے اوندیاں نندراکیاں اکھیں نندر نال نوٹج گیاں، فیاض سبھو کجھ بھل چکیا ہئی جو گزری رات دے ڈوجھے پہر اوندے نال تھیا کیا ہے۔

فیاض جا گیا تاں ڈوپہار ڈھلدی پئی ہئی۔ اواٹھیا تاں وبل تے ہا پر اڈے اڈے ڈیکھ کراہیں ولدا اکھیں مسلیندا ہو یا بسترے تے دَبک تھیا۔ ہُن اویا تاں سٹا ہا پر پیا جاگدا ہا۔ اوندے جاگن نال بُت داتروڑ وی نویں سروں جاگ پیا۔ سویرے وڈے ویلے محسوس تھیون والا سکون ولد کتھائیں ہک اَن ڈٹھی اَن سونہی چو بھ وچ بدلدا ویندا ہا۔ گزریل رات دی کہانی کہیں ٹٹھی فلم طرحاں اوندے دماغ دے پردے تے پوری آواز نال چیکدی رڑدی پئی ہئی۔ ول کتھاؤں تھوٹھو دیاں آوازاں آیاں تے اوندائے لیس نال لہرتج گیا۔

فیاض ٹپ مارتے اٹھی بیٹھاتے جلدی جلدی ڈوہیں ہتھیں نال منہ کوں اگھئیں پر منہ تاں اصلوں سُکاتے صاف ہا۔ آپنے آپ کنوں گریٹ دا احساس کہیں دورے طرحاں نویں سروں اوندے سرتے سوار تھی چکیا ہا۔ ایں ساری کیفیت کنوں بھج و نجن کیتے اُونے اٹھی تے چوبارے دی اودری وی کھول چھوڑی جیڑھی جو بزار آلے پائے کھلدی ہئی۔ ڈینہہ ڈھلن دے نال لوکیں دی ٹور وچ وی تیکھاج آ گیا ہا۔ دفتر اں والے لوک

گھراں ڈو ویندے پئے ہن۔ ڈینہہ چڑھے بزاراں وچ آون والیاں تریمتیں آپڑیں ٹوپی والے سادے برقعیاں سمیت ولدیاں گھراں دیاں گھتاں وچ وڑ چکیاں ہن۔

”اے عورتاں وی عجیب ہن۔ پتہ نی چاہندیاں کیا ہن۔ کوئی ڈیکھن والا نہ ہووے تاں ٹوپی والے برقعے وچوں وی آپڑاں آپ ڈکھاؤن کیجیے نیاری والی دکان تے آن باہن۔ چھڑے ہتھ پیر ڈکھاتے باقی دے اندازے مرد ذات دے تصورات تے چھوڑ ڈیسن تے جے کوئی اناں کوں ڈیکھن چاہوے تاں چچی انگل دا نوہہ دی نہ ڈیکھیں۔“

دروازے دی کُنڈی کھڑکی تاں آپنی سوچ وچ مکن فیاض دی چھر کی نکل گئی۔

”آج تیں تاں اتھ کوئی اونداجانڑوں نہ آیا ہا..... اے کون تھی سکدے۔“ فیاض نے ایہو سوچ سچیندیاں گل وچوں اگوں جھریٹی ہوئی قمیض لہاتے پک پاسے سٹی تے جلدی نال گھنڑے تے پئی بنین پاتے دروازہ کھول ڈٹس۔ باہروں متحدہ محاذ دا ورکرادرلیس کھڑا ہا۔ اوکوں ڈیکھ کراہیں فیاض نے دروازے دا ڈو جھاطاق وی کھول چھوڑیا تاں جو اوندرا آ سکے۔

”میں باہونڑاں کانتی۔ بس پک سنیہا ہے قیادت طرفوں.... آندے جمعے یعنی اپریل دی چوٹی کوں فرید گیٹ تے مک مکا دا پروگرام ہے۔“ ادرلیس اندر آئے بغیر اُتھائیں پوڑیاں وچ کھڑے کھڑے ہو لے ہو لے الانڑاں۔

”مک مکا“....؟؟؟.... فیاض نے حیران تھی تے اُوں ڈو ڈٹھا۔

”بہوں وڈا جلسہ..... لکھاں بندیاں دا۔ متحدہ محاذ دی پوری قیادت کٹھی تھیندی پئی ہے۔ اوندے بعد اُتھاؤں جلوس نکلسے جیڑھا پورے بہاول پور وچ کھنڈ ویسی کہیں سمندر طرحاں۔ ول ڈیدھے ہئیں جو صوبہ کیویں نی بنڑدا۔ توں بس اتنا کرنے جو

پورے شہر دیاں کندھیں تے ایندا اعلان لکھ ڈیونڑیں۔ ترے ور کر بے تیڈے کول عشاء  
 توں بعد آویسن۔ بس ہمت کرنی ہے ہُن، صوبہ محض اگلے جمعے دی مار ہے۔ جمعہ 24 اپریل  
 1970ء....“ اے آکھ تے ادریس واپس مڑیا تے تلوں تے پوڑیاں لاہندا گیا۔  
 ویندے ویلے اوند دیاں اکھیں وچ کامیابی دی چمک ہئی۔ ایندے برعکس فیاض پہلے تاں  
 اُتھائیں کھڑا کھڑا کہیں سوچ وچ بڈ گیا تے ول پتہ نی دماغ وچ کیا آئیں جو متھے تے وٹ  
 پئے گئے، کہیں اُن دُکھی پریشانی دے۔



(36)

چوہی اپریل انوی سوستر۔ پوری ریاست دے دھرتی واساں نے طے کر گھدا جو  
 بہاول پور متحدہ محاذ دی قیادت وچ بہاول پور دے فرید دروازے طاقت دا بھر پور مظاہرہ  
 کریندے ہوئے جنرل یحییٰ خان کوں ڈس ڈتا ویسی جو اتھوں دے لوکاں نال وعدہ خلائی  
 کیڑھے مل وکدی ہے۔ صادق آباد کنوں لاتے منڈی گنج میکلوڈ تک دے قافلے ڈوں  
 ڈیہاں توں بہاول پور پہنچن شروع تھی چکے ہن تے کل ساری رات توں ایہو سلسلہ جاری  
 ہا۔ بھادیس جو سابقہ ریاست دے ہر شہر تے وستی کوں رکا وٹاں نال بند کر ڈتا گیا ہا لیکن ول  
 وی بہاول پور شہر دیاں سڑکاں تے ہر پاسے خلقت ای خلقت۔ بہاول وکٹوریہ ہسپتال دی  
 باہرلی کندھ دے نال پلس دی بے تحاشہ نفری دے باوجود چوک فوارے والے پاسوں  
 لوکاں دے جھیاں دے جھے فریڈ گیٹ ڈوروں دواں۔ ڈو جھے پاسوں شیر باغ، تر بجھے  
 پاسوں وستی حمیتیاں تے چوتھے پاسوں کالی پٹی تے وی ساگی حال تے ساگی نقشہ۔  
 پلس نے آپڑیں جانوں اناں سکھ رستیاں کوں بند کرن دی کوشش کیتی پر کوئی وی

بند نہ تھی سکيا۔ کالی پٹی تے وتی حمیتیاں والے رستے ڈی سی دفتر کول آن رلدے ہن کہ  
جھاں ایس پی تے ڈی آئی جی دے دفتر اں توں علاوہ کمشنر دا دفتر وی راہ وچ پوندا ہا۔ اناں  
دی حفاظت سانگے اتنی پلس گٹھی کیتی گئی جو اے جاء پوری پلس لائن بن گئی۔ فرید دروازہ  
خود ترے وڈیاں سڑکاں دے ملاپ دی تکنون ہے تے انہاں وچوں ہر ہک سڑک کئی  
سڑکاں دے مجور ہون توں بعد اتھ پہنچدی ہے۔ ایں طرحاں اے تکنون ہک وڈا میدان  
بن کراہیں ہزاراں لوکیں کول آپے اندر لگا گھندی اے۔

اؤں ڈیہنہ گھٹو گھٹ سٹھ ستر ہزار بندہ چھڑا ایں تکنون وچ مئے گیا ہاتے باقی دا  
آون کار ہک پاسوں شیر باغ تیں ہاتے ڈوجھے پاسوں چوک فوارے تک۔ فرید گیٹ دی  
اندر لی جاء تے اندر لا بزار متحدہ محاذ دی قیادت دی آمد کیتے چھوڑ رکھیا گیا ہا پر ول دی اتھ کر  
ہزاراں دی تعداد وچ ورکر موجود ہن پئے کہ جہاں نے دروازے توں باہر فوٹو پلس کول  
بنائے گئے اسٹیج دی حفاظت وی کرنی ہئی۔ فیاض اؤں جتھے دا انچارج ہا کہ جیندی ذمہ داری  
وچ اسٹیج توں علاوہ تریمتیں دے رستے دی نگرانی وی ہئی کہ جتھوں لنگھ کراہیں اؤ وڈے  
ویلے توں ای چار پھیر دیاں دکاناں دیاں چھتاں تے چڑھیاں بیٹھیاں ہن تے ہالی تیں  
آون کار ہئی۔

جلے دے باقاعدہ آغاز تو پہلے وی کئی لیڈر صاحبان واری واری اسٹیج تے آندے  
تے صوبے دے حق وچ پر جوش تقریراں کرتے اڈے اڈے تھی ویندے۔ ایں دوران  
ہک وڈا جلوس فرید گیٹ دے اندر لے پاسوں باہر آیا۔ سڑتج ہئی جو ایندی قیادت کوئی  
بہوں اچیری خاتون رہنما کریندی پئی ہئی کہ جیندا ناں سر پرانز دے طور تے راز وچ رکھیا  
گیا ہا۔ اؤں خاتون رہنما نال ٹردیاں بیاں کئی تریمت رہنماواں وچ سب توں نمایاں بیگم  
سلمیٰ بدرالدین ہئی جیندے چچھوں چچھوں میرانی کہیں چچھاویں طرحاں ٹردا آندا ہا۔ سلمیٰ  
نے تاں کالی عینک پاتی ہوئی ہئی پر میرانی نال فیاض دی اکھ ٹکڑی ای گئی۔ میرانی دے تھوڈاں

تے آون والی مخصوص مُسک فیاض کیتے اوپری نہ ہئی۔ اُونے اگوں تے تھی تے سلمیٰ بی بی دے کن وچ کوئی نیکی جی تھیری کیتی۔ اُونے وی مُسک تے سر ایں طرحاں ہلایا جیویں اے خبر کہیں ردی اخبار وچوں پڑھ تے سُزائی گئی ہووے۔

”آخ تھو.....“

فیاض کوں ایویں لکيا جو اوند اُمَنہ وَلدا لیس نال لیو تَج گئے۔ اُونے وِبل تے ڈوہیں ہتھان نال مُنہ کوں اُگھیا پر اُتھ تاں کُجھ نہ ہا۔ فیاض نے گردن موڑ تے اُناں ڈوہائیں کوں ہک واری وَل ڈیکھن دی کوشش کیتی پر یکدم ہر پاسے دھول اندھا رہی گیا۔ عجیب جیسے دھوئیں دے گولے اوندے چار پھیر ڈھاندے پے ہن کہ جہاں وچوں نکلن والا چٹا دھواں مُنہ سر تے رتیاں مرچاں دالیپ کیتی ویندا ہا۔ اکھیں وچوں پانی تے گھنگ کنوں سینہ پھٹدا ہا۔ لوکیں کوکاراڑا گھتیا جو پُلَس نے چارے پاسوں آنسوگیس مارنی شروع کر ڈتی ہے۔

پہلے تاں کُجھ بھاجڑ پئی پر وَل لوکیں نے جوتے آنسوگیس دے اُوہے گولے پُلَس ڈوٹھکا ونڑیں شروع کر ڈتے جیڑھے جو اُناں کوں مارے ویندے پے ہن۔ باقی ترے پاسیاں دی پُلَس تاں پرے پرے ہئی پر جیڑھا لکيا ہو یا جتھا فریڈ گیٹ دے اندروں نکلیا اُونے لوکاں کوں سنھلن دا موقع ای نہ ڈتا جو اے آنسوگیس آندی کتھوں پئی ہے۔ کُجھ لکھتے بعد جئیں ویلے سُر ت آئی تاں لوکیں نے سلہاں دے ٹوٹے پٹ کراہیں فریڈ گیٹ دے اندر چارُخ کیتا۔ پُلَس آلیاں خلقت کوں آپڑیں پاسے آندا ڈٹھا تاں یکدم سدھا فائر کھول ڈتا۔ ایں توں بعد وَل کتنے لوک مرے تے کتنے پھٹو تھئے، کون گنز داتے کیندے واسطے گنز داتے۔ چالہی پنجاہ ہزار لوکیں تے کیڈی دیر توڑیں اندھا دھند گولی چلی پر سرکاری اعلان صرف ڈوہے مرن دا تھا۔



(37)

25 اپریل 1970ء — سویرے سویرے سجھ اُبھرن توں پہلے قلعہ ڈیر اور  
کنوں کئی میل اُگوں ریت دے ٹبیاں دے اُدھ وچ ہک پُرانا جیہاٹرک کھڑا جیندے  
نال ہک پلس دی جیپ تے جیپ وچوں گنجوایاں ہویاں وردیاں تے جگراتے دیاں  
ماریاں شکلاں والے ڈاہ بارہاں سپاہی وی لتھے کھڑے ہن۔ اُناں دے نال کجھ مزدور نینگر  
دی ہن جہاں دے کپڑیاں تے جا بجا خون دے سکے ہوئے داغ صاف نظر دے پے  
ہن۔ کاہیاں مونڈھے تے رکھی، سکیاں بوتھیاں والے اے سبھے ونگاروسڈے گئے مزدور  
کہیں حکم دی تانگھ وچ اڈے اڈے ڈیدھے کھڑے ہن۔ اُناں دے آٹھرے ہوئے  
ہوٹھاں دیاں روایاں خود بلیندیاں پیاں ہن جو اُوکئی گھنٹیاں توں بکھے ترے ہن۔

کجھ دیر دے بعد تھانیدار دی وردی والے اُفسر نے اُناں کوں ٹبیاں دے اُدھ  
وچ قدرتی طور تے بنڑی ہوئی پیالہ نما جاء کوں تھوڑا بیا گھٹن دا اشارہ کیاتاں جو گزری کل  
فرید دروازے فائرنگ نال مرن والے اُناں ریاستیاں کوں لُک لُکاتے پور ڈٹا ونجے



جیڑھے صوبہ منکن دی سک وچ مرن توں بعد وی مقتولاں دی گنتی وچ شمار نہ کیے گئے  
ہن۔ گھنائی اجاں فٹ فٹ وی نہ تھئی ہئی جو تلوں مُردیاں دے سکے ہوئے انسانی بیجر  
ظاہر تھیون لگ پئے۔ مزدور چھرک تے اڈے اڈے تھیون لگے تاں تھانیدار کھل پیا۔  
”کھٹو کھٹو بھین بھینکو..... اے تاں بنڑی بنڑائی قبر ہے۔ اتھائیں پُرنیدے  
ہئیں اناں بھین تڑیکاں کوں“۔ مزدوراں ڈردے ڈردے کجھ بئی صفائی کیتی تاں وچوں پنج  
بیجر کپڑیاں سودھے نکل آئے۔ کپڑیاں توں پتہ لگدا ہا جو ترے جُوان ہن تے ڈوں  
عورتاں۔

”ہڈیاں ہن تاں بہوں پُراڑیاں پراویں لگدے جو تر یہہ کنوں رُل موئے  
ہو سن تے ول ہوانے ریت گھیل کراہیں اُتے بیا بنڑا چھوڑیا ہوسی“۔ تھانیدار نے آپو  
وانزیں گویڑ کریندے مزدوراں کوں ہکل ڈتی جو تکھے تھیون تے ٹرک وچ لاتھیاں لاشاں  
کڈھ تے کھڈے وچ سٹن۔ مزدوراں نے تکھے تکھے ٹرک وچوں لاشاں گھیلڑیاں شروع  
کیتیاں تے کھڈے وچ سٹندے گئے۔

سب توں پہلی لاش پوری حیاتی آپنی سُجان گولیندے فیاض دی ہئی۔ اُوکوں  
بھکاتے سٹیا گیا تاں اُوک زانے بیجر دے نال پک تھی تے وُنج ڈنھی چیندے گل وچ  
موٹے موٹے رتے موتیاں دی ڈوڑی مالا پُڑے کنوں وی صاف ڈسدی پئی ہئی۔ ڈوہیں  
دے سچ ہتھ دیاں انگلیں ایویں پک بے نال مہمڑیاں پیاں ہن جیویں جو پک بے دا  
آڈر کریندیاں پیاں ہووِن۔ لگدا ہا جو اُوکھیں پکی منزل دے پاندھی ہن تے اُج ول کہیں  
بے پندھ تے روانہ تھیون سانگے کٹھے تھی گئے ہن۔ پک پک کرتے سبھے لاشاں پک  
بے دے اُتے سٹ ڈتیاں گیاں۔ مزدور ہالی ریت گھیلن دا سوچیندے ای پے ہن جو  
یکدم زور دی اندھاری گھلی یا کوئی واجھلوڑا ایس طرحاں آیا جو ہر پاسے دھوں اندھار تھی گیا۔

سارے دے سارے پلے تے مزدور مُنہ سر وڑھیندے بھج تے آپڑیاں آپڑیاں جنیں وچ بہہ تھئے۔

اُدھے گھنٹے بعد اندھاری جھلجی تاں کھڈے والی جاتے وَلدے سروں ریت دا  
نواں بُبا بن چُکيا ہا۔ کوئی نہ جان سکيا جو بیاں کئی اُدھ اُدھو رے لوکاں طرحاں آپنی تے آپنی  
دھرتی دی سُجان گولیندے فیاض دی تلاش دا پندھ چھڑا اے توڑیں ہایا اتھاؤں شروع پیا  
تھیندا ہا۔




اسلام آباد 22 مارچ 2018ء

Waqar Aslam

0306-1446635

## حفیظ خان کی دیگر کتب

|       |                                                 |                                                                            |
|-------|-------------------------------------------------|----------------------------------------------------------------------------|
| 1989ء | کچ دیاں ماڑیاں                                  | سرائیکی میں ڈراموں کی پہلی کتاب<br>(اکادمی ادبیات پاکستان سے ایوارڈ یافتہ) |
| 1990ء | ویندی رُت دی شام                                | سرائیکی افسانے<br>(اکادمی ادبیات پاکستان سے ایوارڈ یافتہ)                  |
| 1990ء | ماما جمال خان                                   | سرائیکی میں بچوں کے ڈراموں کی پہلی کتاب                                    |
| 1993ء | اتفاق سے نفاق تک                                | پاکستان کی آئینی تاریخ کا ایک فسوں خیز باب                                 |
| 1997ء | یہ جو عورت ہے                                   | اُردو افسانے                                                               |
| 1999ء | پہلی شب تیرے جانے کے بعد                        | نظمیں                                                                      |
| 2003ء | خواب گلاب                                       | بچوں کے سرائیکی ڈرامے                                                      |
| 2004ء | اندر لیکھ داسیک                                 | سرائیکی افسانے                                                             |
| 2005ء | زُٹھڑے پندھ                                     | سرائیکی ڈرامے                                                              |
| 2006ء | رفعت عباس کی سرائیکی شاعری                      | تحقیق و تنقید                                                              |
| 2007ء | خرم بہاولپوری: شخصیت، فن اور منتخب سرائیکی کلام |                                                                            |
| 2007ء | حفیظ خان کی کہانیاں                             | اُردو کہانیاں                                                              |
| 2008ء | اس شہر خرابی میں                                | منتخب کالم                                                                 |
| 2009ء | سرائیکی ادب: افکار و جہات                       | تحقیق و تنقید                                                              |
| 2011ء | مآثرِ ملتان                                     | ملتان کی غیر جانبدارانہ تاریخ                                              |
| 2012ء | کافی: سندھ وادی کی شعوری تاریخ                  | تحقیق و تنقید                                                              |
| 2013ء | کلامِ خرم بہاولپوری                             | منتخب سرائیکی کلام                                                         |
| 2014ء | ڈھیر ڈیہناں واقصہ                               | سرائیکی تحقیق و تنقید                                                      |
| 2016ء | رت جگلوں کی مراد                                | تحقیق، تنقید تاثرات                                                        |
| 2017ء | پٹھانے خان                                      | سرگزشت                                                                     |





**وَن یونٹ** پاکستان کی سیاسی تاریخ کا سیاہ باب کہ جس کے سبب حکمران ذہنی ساخت نے بیک جنبشِ قلم محکوم  
 لسانی ثقافتوں سے اُن کی تمام تر تہذیبی، تاریخی اور جغرافیائی پہچان سازشاً چھین کر اپنی غاصبانہ تحویل میں لے لی۔  
 صدیوں سے اس خطے میں رہنے والے کروڑوں لوگ شب بھر میں اپنی شناخت کے بحران میں یوں مبتلا کیے گئے کہ زندہ  
 رہنے کا ہنر تک بھلا بیٹھے۔ ”ادھ اُدھورے لوک“ پتا ہے ریاست بہاول پور میں جنم لینے والے فیاض جیسے اُن بد قسمت  
 کرداروں کی، جن کی زندگی محض اس لیے کبھی نہ پوری ہونے والی خواہشوں کی بھینٹ چڑھ گئی کہ وہ تقسیم ہند کے  
 مضمرات میں سے گزرتے ہوئے وَن یونٹ جیسی سیاسی جکڑ بندی کے ٹوٹنے اور بہاول پور صوبہ بحالی کی اُمید میں اپنی  
 غصب شدہ پہچان تلاشنے کے سفر پر نکلے تھے۔

**محمد حفیظ خان**

ابوالبرکات  
 2018



ملتان انسٹیٹیوٹ آف پالیسی اینڈ ریسرچ، ملتان  
 email: insafond@yahoo.com